

Jág₁ Dse₃ quió'₅ Diú₄ a₂ ca₂ tó'₂ San Lucas ne₄ Si₂

Jág₁ a₂ca₂rë₃lióg₃ Si₂ a₂ca₂jmo₃ San Lucas

¹ Juin₅ bá₄ dsa₂ i₂ qui₂ ca₂ nio₃ ne₄ ca₂ can₃ ta₁ ca₂ tó'₂ ne₄ si₂ ca₂ le₃ jě₃ jág₁ 'a₂ lia'₂ dsón'₂ niog₅ ca₂ lě₃ jě₄ quián₂ jnia'₅₄, ² lia'₂ con'₂ lě₅ ca₂ jme₃ tag₅ dsa₂ i₂ ca₂ tě₂ ne₄ lia'₂ con'₂ le₂ 'uig₅₄ jme₁ ca₂ rë₃ lióg₃, ton'₂ ca₂ jme₃ 'o₅₄ ca₂ 'ě₂ jág₁ dse₃. ³ Ján₃ bá₄ le₂ jaun₂, jniá₂ ně₃ ma₂ cáun₃ 'í₁ dse₃ lín₃ 'a₂ lia'₂ ma₂ já₅ jě₁ le₂ 'uig₅₄, jaun₂ bá₄ líng₂ dsi₂ ten₅₄ a₂ tó'₄ ne₄ si₂ la₂ ca₂ le₃ jě₃ lia'₂ con'₂ lě₅, a₂ tsíng₂ ne'₅₄ 'ne₂, gui'₅₄ Teófilo,* ⁴ ia₁ jaun₂ ŋi'₅₄ dse₃ a₂ dsón'₂ tí₅ jág₁ a₂ ma₂ ca₂ rë₃ tǐng'₃.

'Ě₂ jág₁ ángel quián₅ Diú₄ a₂ le₃ chan₂ Juan₅₄ i₂ chon₃ dsa₂ jmig₂

⁵ Jmig₄ lia'₂ con'₂ jme₁ lín₄ Herodes rag₅₄ 'uě₃ Judea, jme₁ chan₂ jan₂ jme₂ dsa₂ i₂ jme₁ chen₂ Zacarías, i₂ jme₁ tén₄ le₃ quió'₅ co₂ nió'₃ jme₂ dsa₂ quián₅ Abías. Dsa₂ mǐ₂ quián₅ jme₂ dsa₂ 'éi₂ ně₃ jme₁ chen₂ Elisabet, i₂ jme₁ lín₄ tsi₁ jon₂ quián₅ jme₂ dsa₂ Aarón. ⁶ Le₃ oin₃ jme₁ lín₄ dsa₂ dsen₃ le₃ ne₄ Diú₄, jme₁ jme₂ ti₃ 'éi'₃ quió'₅ Te₁ gui'₅₄. A₂ chain₂ le₂ jaun₂ ně₃, tsá₃ 'ein₂ qui₂ le₃ bóg'₂ dso₄ jua'₅₄ 'e₂ dso₄ le₃ bóg'₂. ⁷ La₁ 'i₁ jan₂ guein₂ tsá₃ i₂ ma₂ ca₂ rë₃ chán₃ quián₅, ia₁ jme₁ lín₄ Elisabet jan₂ 'io₅₄ quen₂. Jme₁ ma₂ cain'₅₄ ma₂ guein'₂ 'ŋio₅ lín₃ jain₂ jain₂.

* **1:3** o₃, “ne₂ i₂ nióg'₃ Diú₄.”

⁸ Co₂ráun₂, ca₂lë₃ jme₁ca₂të₂ jmig₄ a₂tin₅₄ jme₂dsa₂
i₂quian'₅₄ Zacarías a₂jme₃ti₃ ta₁ a₂tióin₂ ne₄ Diú₄,
⁹ a₂jmo₃ lia'₂ con'₂ lë₅ tag₄ chí'₅ quió'₅ jme₂dsa₂.
Të₃jë₄ jmig₄ jaun₂, ca₂o₃ág₃ jág₁ ca₂tín₂ Zacarías,
a₂'í₂ dsi₂néi₂ ja₁jñi₅ quió'₅ Te₁gui'₅₄ a₂dsí'₂ chen₂.
¹⁰ Të₁lia'₂ 'ein₅₄ dsí'₂ chen₂ ne₄chei₂ në₃, dsa₂ juig₂
guë'₂ le₃ca₁'né₄ bá₄ le₁ñi'₂ chiléin'₂ Diú₄.

¹¹ Të₃jë₄ jaun₂ ca₂jme₃jnia₅ jan₂ ángel quián₅
Te₁gui'₅₄ ne₄ Zacarías të₂le₃ gu₂ ne₁ ja₁lë₄ ne₄chei₂.

¹² Jme₁ca₂jág₂ Zacarías, ca₂ja₃gó'₃ dsí'₅ 'ñio₅ lin₃,
ca₂lia'₂ tsá₃ a₂ñi₅ jmo₃ ca₂jén'₃. ¹³ La₁ ca₂juá'₂ ángel:

—Zacarías, tsá₃ lë₁jmo₂ gang'₃, ia₁ ma₂nág₂ Diú₄
jág₁ quiáng'₂ a₂chi₁lein'₅₄, jaun₂ le₃chan₂ jan₂ guein₂
dsa₂ ñe'₂ quián₅ Elisabet dsa₂ m'í₂ quiáng'₂. Guein₂
'éi₂ quiang'₅₄ Juan₅₄. ¹⁴ Jmó'₂ 'io'₂ le₃chang'₂, o₂'ñi₃
o₂jñia₃ 'au'₂ në₃, ján₃ bá₄ juin₅ i₂të₃ dsí'₅ jë₁ma₂chain₂.

¹⁵ Ia₁ léin₂ dsa₂ juin'₂ le₃ne₄ Te₁gui'₅₄. Tsá₃ vino 'ín'₂,
on₃ guë'₂ ti₁jmíg₃ në₃; Jme₂dsí₂ Jñi₅ó bá₄ ma₂rë₂rin₅
të₂dsí'₅ né'₃ a₂le₃chain₂. ¹⁶ Co₃jéin'₂ juin₅ lin₃ dsa₂
juig₂ Israel le₃quió'₅ Te₁gui'₅₄ Diú₄ quián₅. ¹⁷ 'Éi₂
i₂já₅ ne₄ juí₅ quió'₅ Te₁gui'₅₄, 'ein₅₄ jme₂dsí₂, ton'₂ 'io₂₃
juí₅bí₂ juí₁lia'₂ a₂jme₁'io₅ Elías, a₂jme₃dsiain₁₂ m'í₅₄
ja₁con₂ dsa₂, quian'₅₄ chi'₂-guein₂ quián₅, a₂co₃jéin'₂
juí₁lia'₂ i₂tsá₃ ne'₅₄, jme₃tag₂₃ le₃tiin₂ le₃ñí'₂ a₂dse₃.
Le₂në₅ jmo₃ co₂jñia₅₄ dsa₂ ia₁jaun₂ guein₃ Te₁gui'₅₄.

¹⁸ Jaun₂ ca₂ñag₃ Zacarías ca₂ñí'₃ ángel:

—¿'A₂ bá₄ lia'₂ lé₂ le₃guion₅₄ jniá₂ a₂tí₅ dsón'₂ jág₁
në₅? Ia₁ dsa₂ ma₂guen'₂ bá₄ jniá₂, le₂jaun₂ guë'₂ dsa₂
m'í₂ quiáng₃ i₂ma₂dsi₁juin₅₄ ñi₂ ján₃.

¹⁹ Jaun₂ ca₂ñag₃ táng₃ ángel:

—Gabriel bá₄ jniá₂, chéng'₅ le₃ ne₄ Diú₄. A₂ chéng₅₄ bá₄ guio₃ a₂ juá'₄ jág₁ dse₃ la₂ ne'₅₄. ²⁰ La₁ tē₂ nē₃, cóng'₂, tsá₃ ma₃ jág₁ le₃ dsiá'₁ ca₂ lia'₂ ca₂ lē₃ le₂ nē₅, 'uig'₅₄ ia₁ a₂ tsá₃ 'éng'₂ jág₁ quió₃ a₂ le₃ ti₃ jē₁ ma₂ dsi₃ jmig₄ jaun₂.

²¹ Dsa₂ juig₂ nē₃, le₁ jnia₂₃ a₂ o₃ 'in₅ Zacarías, dsi₂ gó'₃ dsi'₅ ia₁ a₂ ca₂ rē₃ 'in₄ 'éi₂. ²² Jme₁ ca₂ o₃ 'ín₃ nē₃, la₁ tsá₃ ma₃ jág₁ le₂ dsi₃, jaun₂ ca₂ rē₃ lí'₄ bá₄ dsa₂, cha₂ a₂ ca₂ jág₃ dsi₂ néi₂ guá'₅ templo. A₂ jnia'₅₄ qui₂ bí₂ gu₂ bá₄ jmo₂₃ léi₄, ia₁ ma₂ coin₅₄.

²³ Jme₁ ca₂ dsi₃ jmig₄ a₂ jme₃ ti₃ ta₁ jaun₂, jaun₂ ŋá'₃ bá₄ ja₁ quió'₄. ²⁴ Cang₂ jaun₂ nē₃, ca₂ can₃ Elisabet dsa₂ mí₂ quiáin₅ guein₂. Tē₁ lia'₂ jaun₂, tei₄ bá₄ ca₂ 'í₃ dsi₂ néi₂ quió'₅ con'₂ 'ŋiá₂ tsi'₂. 'Ein₅₄ qui₂ dsi₂ jnia₅ dsi'₅, lín₂: ²⁵ “Co₂ nē₅ ca₂ rē₃ 'ŋi₃ dsi'₅ Te₁ gui'₅₄ a₂ lín₅ le₂ la₂, ia₁ jaun₂ tsá₃ ma₂ 'ag₃ dsa₂ 'lig'₅₄.”

'Ē₂ jág₁ jan₂ ángel quián₅ Diú₄ a₂ le₃ chan₂ Jesús

²⁶ Jŋéi₂ tsi'₂ ma₂ ne₁ ŋó₄ a₂ quian₅ Elisabet guein₂; Diú₄ nē₃ ca₂ chein₃ táng₃ ángel Gabriel caun₂ juig₂ ja₁ tén₄ Galilea ja₁ chei₂ Nazaret, ²⁷ a₂ ca₂ i₁ jme₁ jniai₂₃ ne₄ jan₂ dsa₂ mi₄ i₂ jme₁ ma₂ lí'₅₄ jág₁ a₂ jéin'₂ gu₂ quian'₅₄ i₂ chen₂ José, jan₂ dsa₂ tsi₁ jon₂ Rag₅₄ David. Dsa₂ mi₄ 'éi₂ jme₁ chen₂ María. ²⁸ Jaun₂ nē₃, ca₂ 'í₃ ángel dsi₂ néi₂ ja₁ 'en₅₄ María, jaun₂ ca₂ juá'₂:

—¡Siang'₃ María! ¡'E₂ guě₄ dsen'₃ 'ne₂, ia₁ quiong'₅₄ Te₁ gui'₅₄!†

† **1:28** A₂ lín₅₄ chog₅₄ si₂ juá'₂ ján₃: “Ma₂ jme₂ gu'₅₄ Diú₄ jme₂ gon'₅₄ 'ne₂ con'₂ guě₄ ca₂ le₃ jín₃ dsa₂ mí₂.”

29 La₁ jme₁ca₂nág₂ María jág₁ në₅, 'ŋio₅ lin₃ ca₂i₃gó'₃ dsí₅, jaun₂ ca₂'náu'₃ dsí₅ 'e₂ bá₄ jein₅ jág₁ jaun₂. 30 Jaun₂ ca₂juá'₂ táng₃ ángel:

—Tsá₃ lë₁jmo₂ gang'₃, María, ia₁ a₂dse₃ dsí₅ Diú₄ jmo₂₃ ja₁cong'₂. 31 Ní₂, 'í₂ jan₂ guein₂ të₂'au'₂; le₃chan₂ jan₂ guein₂ dsa₂ ŋe'₂ quiáng'₂, jaun₂ quiain'₅₄ JESÚS. 32 'Ŋio₅ juin'₂ léin₂; quiong₃ dsa₂ a₂lín₅ Ja₁ŋi'₅₄ Diú₄ i₂guá₅ guei'₅₄ lin₃. Te₁gui'₅₄ Diú₄ në₃, dsio₃ ne₄ta₁ quió'₅ David jme₂gui'₂. 33 Jaun₂ jme₃góin₃ con'₂ tan₅₄ ne₄ chi'₂ dsio₄ Jacob, jaun₂ tsá₃ ma₁líg'₂ jmig₄ dsí₃ŋí₂ 'éi'₃ quió'₅.

34 Jaun₂ ca₂ŋag₃ María ca₂ŋí'₃ ángel:

—¿'A₂ bá₄ lia'₂ lé₂ a₂në₅? Ia₁ tsá₃ dsa₂ ŋe'₂ cuíng₅.

35 Jaun₂ ca₂ŋag₃ ángel:

—Jme₂dsí₂ Jŋió₅ bá₄ jmo₃ a₂lé₂ le₂jaun₂ ja₁cong'₂; ju₁₅bí₂ quió'₅ Te₁gui'₅₄ i₂guá₅ guei'₅₄ bá₄ lio₃ 'en'₁ quió'₅. Jaun₂ lë₃, guein₂ jŋió₅ i₂le₃chan₂ 'éi₂, quiong₃ dsa₂ Ja₁ŋi'₅₄ Diú₄. † 36 Ján₃ bá₄ le₂në₅ Elisabet ríng'₂, o₁jŋia'₅₄ ma₂guein'₂, ma₂të₂ jŋéi₂ tsi'₂ a₂quiain₂₃ guein₂, jaun₂ le₂në₅ bá₄ le₃chan₂ jan₂ guein₂ quián₅ i₂të'₂ dsa₂ 'io₅₄ quen₂. 37 Ia₁ 'i₁caun₂ tsá₃ 'e₂ cha₂ jua'₅₄ a₂tsá₃ qui'₅₄ jmig₄ Diú₄.

38 Jaun₂ ca₂juá'₂ María:

—Ní₂, dsa₂ i₂jme₂ti₃ ta₁ ne₄ Te₁gui'₅₄ bá₄ jniá₂; ju₁₁le₅₄ ja₁cong₂ con'₂ lë₅ jág₁ quiáng'₂.

Jaun₂ ca₂ŋá'₃ ángel ja₁coin₂.

Ca₂i₁jag₅₄ María ja, quió'₄ Elisabet

39 Të₃jë₄ jmig₄ jaun₂, ca₂ŋó₃ María të₂le₃ dséi₂ ju₁₅ juig₂ niog₅ má'₂ ja₁tén₄ Judea. 40 Jaun₂

† 1:35 o₃, “Jaun₂ në₃, guein₂ i₂le₃chan₂ 'éi₂ quiong₃ dsa₂ guein₂ jŋió₅.”

jme₁ca₂dsióg₃, ca₂í₃ dsi₁néi₂ quió'₅ Zacarías,
ca₂cuiin₃ Diú₄ Elisabet. ⁴¹ Jme₁ca₂nág₂ Elisabet
a₂cuag₅ María Diú₄, dsi₂jui₅ jaun₂ bá₄ ca₂jín'₂ guein₂
të₂dsí₅, jaun₂ ca₂rë₃cain'₂ Jme₂dsí₂ Jñiό₅. ⁴² Jaun₂
ca₂í₃ co₂mí₅₄, juá'₂:

—i'E₂ guë₄ 'ñiό₅ jme₂gu'₅₄ Diú₄ 'ne₂, lia'₂ con'₂ guë₄
'i₁jan₂ dsa₂ mí₂ sián'₂, le₂jaun₂ guë'₂ guein₂ quiáng'₂
ně₃! ⁴³ ¿I₂'ein₂ bá₄ jniá₂, já₅ chog₅₄ Te₁gui'₅₄ quiáng₃
ja₂jag₅₄? ⁴⁴ Ia₁ dsi₂jui₅ jme₁në₂cuag'₅₄ Diú₄, ca₂jín'₂
'io'₂ jén'₅ guein₂ quiáng₃ të₂dsí₃. ⁴⁵ i'E₂ guë₄ dsen'₃
'ne₂ a₂ca₂rë₃'éng'₂, ia₁ le₃ti₃ ja₁cong'₂ a₂ma₂juá'₂
Te₁gui'₅₄!

⁴⁶ Jaun₂ María ně₃, ca₂juá'₂:

Jme₂juin'₂ të₂dsí₃ Te₁gui'₅₄.

⁴⁷ Jme₂dsí₂ quió'₃ ně₃, 'io'₂ jén'₅
le₃quió'₅ Diú₄ quiáng₃ i₂lió₂.

⁴⁸ Ia₁ Diú₄ ca₂jén'₃ ne₅₄ ja₁con₂ jniá₂
dsi₂ñég₂ i₂jme₂ti₃ quián₅.

Jaun₂ ně₃, le₂tan₅₄ le₃ne₄ jui₅ ja₁ñó₄,
të₂ dsa₂ líng₅ i₂rë₂gon'₅₄ quián₅ Diú₄.

⁴⁹ Ia₁ 'e₂ guë₄ 'uan'₂ Diú₄,
ia₁ ca₂jmo₃ caun₂ a₂juë'₂ ja₁cong₂;
i'e₂ guë₄ jñiό₅ a₂chein₂!

⁵⁰ Co₂tan₅₄ bá₄ ñéi₂ dsí₅
le₂tan₅₄ tsí₁jon₂ dsa₂ i₂jme₂go₃.

⁵¹ Quian'₅₄ gu₂ bën₂, ca₂jmo₃ caun₂ a₂juë'₂
a₂tsá₃ 'ein₂ qui'₅₄ jmí_g₄.

Ia₁ co₂ñei'₅₄ ca₂guiain'₃ 'uë₃
dsa₂ i₂con'₂ ñí'₂ dsí₅ guion₅₄ jmo₂₃ táin'₅.

⁵² Ca₂'liain'₃ cau₅ i₂jme₁tián'₄ can'₅₄,
a₂ca₂dsiain₃ táng₃ i₂jmo₅ me'₂.

53 Dsa₂ i₂jme₁chan₂ 'on₄,
ca₂jme₃tau₅₄ quian'₅₄ a₂dse₃.

I₂ŋí₄ jme₁chan₂ dse₃ guë'₂,
ca₂'uág'₂ ca₂chei'₃ líin₃.

54 Ca₂jme₃'oin₅₄ dsa₂ juig₂ Israel i₂jme₂ti₃ quiáin₅,
ca₂dsia₃ ŋéi₂ dsí₅ ca₂dsáu'₃ dsí₅

55 con'₂ lě₅ jág₁ quió'₅
ca₂tsí'₃ Abraham jme₂gui'₂ jniog₄
quian'₅₄ ca₂le₃jín₃ tsi₁jon₂ quiáin₅ co₂tan₅₄.

56 Con'₂ 'ni₅ tsi'₂ ca₂dsin₃ ca₂'í₃ María ja₁quió'₄
Elisabet. Cang₂ jaun₂ ŋái'₃ táng₃ ja₁quió'₄.

Ca₂rě₃chán₃ Juan₅₄ i₂chon₅ dsa₂ jmig₂

57 Cang₂ jaun₂ ca₂dsin₃ jmig₄ a₂le₃chan₂ guein₂
quián₅ Elisabet, jaun₂ ca₂rě₃chán₃ jan₂ guein₂ dsa₂
ŋe'₂ quián₅. 58 Jaun₂ ca₂rě₃ŋi₅ o₁rín₅₄, quian'₅₄ dsa₂
i₂tián'₅ cau₅ quió'₅ ně₃, 'a₂ lia'₂ ca₂jmo₃ Te₁gui'₅₄ dse₃
dsí₅ ja₁con₂ 'éi₂. Jaun₂ ca₂jmo₃ 'io'₂ quiong'₅₄.

59 Jaun₂ ca₂lě₃ ně₃, jme₁ca₂tě₂ ŋjia₃ jmig₄, ca₂o₃lén₂
dsa₂ ca₂ti₃ lo₄ guein₂, jaun₂ jme₁'nio₃ quiong₃
Zacarías lia'₂ chen₂ jmei₂. 60 La₁ ca₂juá'₂ chog₅₄
guein₂:

—Jan₂'ón₄. Juan₅₄ bá₄ le₃chein₂.

61 Jaun₂ ca₂ŋag₃ táng₃ dsa₂:

—'I₁jan₂ o₁rín_g'₂ tsá₃ i₂chen₂ le₂ně₅, jme₁né₄.

62 Jaun₂ ca₂jmo₃ dsa₂ léi₄ quian'₅₄ gu₂ a₂ca₂tsí'₃
jmei₂ guein₂ 'a₂ guë'₂ lia'₂ 'nio₃ 'éi₂ le₃chen₂ guein₂.

63 Jaun₂ ca₂mi₃ 'éi₂ ca₂'nau₅₄ jau₅₄ 'ma₂, jaun₂ ne₄
jaun₂ ca₂tióng₃: “Juan₅₄ bá₄ chein₂.” Jaun₂ ca₂í₃gó'₃
dsí₅ ca₂le₃jín₃ tioin'₅₄. 64 Dsi₂jui₅ jaun₂ ca₂ján₃ mi₂'o₄
Zacarías, ca₂'ág₂ 'ua₁ táng₃ le₁tsi'₂, ca₂dsia₃ jág₁,

ca₂jme₃juin'₂ Diú₄. ⁶⁵ Jaun₂ ca₁i₃gó'₃ dsí₅ ca₂le₃jín₃
 dsa₂ i₂tián'₅ cau₅, jaun₂ le₂tan₅₄ juig₂ te₁'i₁ 'uë₃ má'₂
 ja₁tén₄ Judea ně₃, ca₂i₃'ag₅₄ jág₁ ca₂le₃jě₃ a₂ca₂lě₃
 jaun₂. ⁶⁶ Dsa₂ i₂qui₂ca₂rě₃ŋi₅ a₂jaun₂ ně₃, jme₁'nio'₂
 dsí₅ i₂gú'₃ jág₁ ně₅, qui₂ŋi'₅ le₂jan₂ le₂jan₂ dsia₂₃:
 “¿'E₂ bá₄ lén₂ guein₂ 'éi₂?” Ia₁ dsón'₂ bá₄ dsau₅ léi₄
 jme₁quiong'₅₄ Te₁gui'₅₄ guein₂ 'éi₂.

Le₂la₂ canto a₂ca₂jme₃juin'₂ Zacarías Diú₄

⁶⁷ Zacarías jmei₂ guein₂ ně₃, rě₂cain'₂ Jme₂dsí₂
 Jŋi₅ó₅, qui₂ca₂'ě₃ jág₁ ca₂cuë₃ Diú₄, ca₂juá'₂:

⁶⁸ Jui₁le₂juin'₂ Te₁gui'₅₄ Diú₄

quián₅ dsa₂ juig₂ Israel,

ia₁ ma₂guain₂₃ jě₄ quián₂ jniog₄

dsa₂ juig₂ quián₅, ma₂ca₂lió₂.

⁶⁹ Ma₂ca₂cuag₃ jniog₄ jan₂ i₂'uan'₂ lín₃

i₂lín₅ lia'₂ lě₅ caun₂ mi₁juí₁,

jan₂ i₂jás₅ jě₄ tsi₁jon₂ David i₂ca₂jme₃ti₃ ta₁ ne₅₄,

a₂ja₂lioin₅₄ dsa₂ quián₅.

⁷⁰ Le₂ně₅ jág₁ quió'₅ ca₂cuë₃ ca₃ma₂líg'₂,

ca₂juá'₂ tě₂le₃ quian'₅₄ dsa₂ i₂jme₁'ě₂ jág₁,

i₂jme₁lě₄ 'í₁ quián₅,

⁷¹ jme₁ca₂juá'₂ a₂lió₂ o₄gú₃ dsa₂ i₂'iog₅₄,

i₂uig₅ dsí₅ jág₂ ně₃,

⁷² ja₁juá'₂ ně₃ a₂tiá'₃ ŋéi₂ dsí₅

ja₁con₂ dsa₂ can'₅₄ quián₂,

ja₁juá'₂ ně₃ dsiog'₂ dsí₅ jág₁ jŋi₅ó₅ quió'₅ ron₅.

⁷³ A₂ně₅ bá₄ jág₁ jaun₂ ca₂quiog₂

jme₁ca₂'in₃ 'ŋiog₅

ca₂tsí'₃ Abraham jme₂gui'₂ jniog₄:

⁷⁴ a₂ca₂juá'₂ a₂lió₂ o₄gú₃ dsa₂ i₂'iog₅₄,

ia₁jaun₂ dsiá₁ tiá₂ dsí₅ jme₁ti₁ ne₅₄,

75 ia₁jaun₂ le₂chong₂ rē₂ le₃ne₅₄, lě₅ 'í₁,
ca₂le₃jě₃ jmig₄ chong₂.

76 Jaun₂ tē₂le₃ ja₁con'₂ 'ne₂ guē'₂, jón₃,
tě₂ dsa₂ a₂lín_g'₅ jan₂ i₂'ě₂ já_g₁ quián₅ Diú₄
i₂guá₅ guei'₅₄ lín₃,

ia₁ gog'₅₄ ne₄ jui₅ quió'₅ Te₁gui'₅₄
a₂jmó'₂ co₂ñia₅₄ jui₅ quió'₅.

77 'Ne₂ bá₄ o₁jmó'₄ a₂le₃cuí'₅ dsa₂ juig₂ quiáin₅
'e₂ jaun₂ a₂lión₂ dsa₂,
tē₂le₃ quian'₅₄ a₂'én₂ dsá_u₁.

78 Ia₁ nēi₂ bá₄ dsí₅ Diú₄ quián₂ jniog₄.

Jaun₂ lě₃, tē₂ guei'₅₄ i₂juig₃ bá₄
chein₂₃ caun₂ si₂,

nē₂jag₄ bá₄ ca₂jnia₃ caun₂ jmig₄ 'mí₂

79 ja₁con₂ dsa₂ i₂tián'₅ jē₄ qui₁né'₃,
ja₁'ei₅ 'én'₁ 'mú₃ ně₃,

a₂jniog₃ jniog₄ caun₂ jui₅ ja₁'ag₃ tei₄.

80 Caun₂ ca₂i₃cón₃ bá₄ guein₂ 'éi₂, caun₂ rē₂'uain'₂
bá₄ tē₂le₃ jui₅ jme₂dsí₂ ně₃; ca₂guá₂ caun₂ ja₁lě₄ 'uě₃
quein₂ co₂'ñiog₅, ca₂lia'₂ ca₂tě₂ jmig₄ a₂ca₂jme₃jniai₂₃
jin₄ dsa₂ juig₂ Israel.

2

Ca₂rě₃chán₃ Jesús *(Mateo 1:18-25)*

1 Jaun₂ ca₂lě₃ ně₃ jmig₄ jaun₂ ca₂jmo₃ 'éi'₃ gui'₅₄
Emperador Augusto, a₂cho₃ si₂ tioin₃ ca₂le₃jín₃ dsa₂
ta₁caun₂ mi₂güig₃. 2 (Jē₁le₂'uig₅₄ si₂ ně₅ ca₂cho₃
dsa₂ lia'₂ con'₂ jme₁lín₄ Cirenio dsi₄má'₂ 'uě₃ Siria.)
3 Jaun₂ jma₃quén₅ ca₂tín₂ dsa₂ ca₂le₃jín₃ dsi₃lein₃
juig₂ go₅₄, a₂qui₂dsi₃tioin₃ si₂.

4 Jaun₂ ca₂'í₃ José jui₅ ca₂o₃'íin₃ juig₂ Nazaret ja₁tén₄ 'uë₃ Galilea, ca₂ηái'₃ jui₅ 'uë₃ Judea a₂dsiáin'₄ Belén, go₄ David, ia₁ dsa₂ tsi₁jon₂ David bá₄ jme₁lín₄ José. 5 Ca₂i₁tioin₃ si₂ ja₁jaun₂ quian'₅₄ María i₂ma₂li'₅₄ jág₁ jéin'₂ gu₂ quaiain'₅₄; ma₂quaiain₂₃ bá₄ guein₂ ηí₂₃. 6 Ca₂lë₃ nê₃, con'₂ ma₂tioin'₅₄ ja₁jaun₂, ca₂dsin₃ jmíg₄ a₂le₃chan₂ guein₂ quiáin₅. 7 Ja₁jaun₂ ca₂rë₃chán₃ guein₂ ne₅₄ 'éi₂ quiáin₅, 'ein₅₄ ca₂lio₃ 'mi'₂, ca₂quio₂₃ 'ηió'₃ tsi₁gu₅ ja₁gué'₅ já'₂, 'uig₅₄ ia₁ a₂tsá₃ ma₃ja₁ca₂tíin₂ dsi₂néi₂ ja₁siá'₂ ja₁ηia₃.

Ca₂jme₃jnia₅ ángel ne₄ dsa₂ i₂jmo₅ 'í₁ já'₂ cha'₂

8 'Uë₃ jaun₂ jme₁tion'₅₄ ηia₅ ja₁nau₂ co₂nió'₃ dsa₂ i₂jmo₅ 'í₁ já'₂ cha'₂ quián₅, a₂'uë₂ jaun₂. 9 Ca₂jme₃jnia₅ jan₂ ángel quián₅ Te₁gui'₅₄ ne₅₄, ca₂jnia₃ co₂tág₅ co₂'né'₅ quió'₅ Te₁gui'₅₄ le₃lág'₃ ja₁tioin'₅₄, jaun₂ ca₂rë₃gó'₅ 'ηio₅ lín₃. 10 La₁ ca₂juá'₂ ángel:

—Tsá₃ jmo₂ 'nia'₂ gang'₃. Ní₂, a₂i₃'ë₃ jág₁ dse₃ bá₄ jniá₂ guio₃, caun₂ jág₁ quió'₅ ca₂le₃jín₃ dsa₂, jiá₃ cán₂ o₂'ηió₃ dsi₅. 11 Ia₁ jmíg₄ nê₃, ca₂rë₃chan₂ o₄quián'₂ 'nia'₂ juig₂ go₄ David, jan₂ i₂lió₂, i₂lín₅ Te₁gui'₅₄ I₂rë₂'ín₁ quián₅ Diú₄. 12 Quian'₅₄ léi₄ la₂ o₁quion'₂ 'nia'₂ 'í₁: dsian'₂ 'nia'₂ guein₂ rë₂bón'₅ 'mi'₂, rë₂quaiain₂₃ 'ηió'₃ tsi₁gu₅ ja₁gué'₅ já'₂.

13 Dsi₂jui₅ con'₂ tsá₃ jáin₅, ca₂jíin₂ juin₅ lín₃ ángeles sián'₂ con₂ ángel 'éi₂, ca₂tóin'₂ jme₂juin'₂ Diú₄ ca₂juá'₂:

14 jui₁le₂juin'₂ Diú₄ guei'₅₄ i₂juíg₃!

Ne₄ gua'₅₄ 'uë₃ nê₃,

jui₁'ei₅ tei₄ ja₁con₂ dsa₂ mi₂güí₃

i₂ma₂dsia₅ Diú₄ dse₃ dsí₅ o₄quió'₄.

15 Ca₂lě₃ ně₃, jme₁ma₂i₃len₃ ángeles guei'₅₄ i₂juí₃, jaun₂ ca₂jme₃lióg₃ dsa₂ i₂jmo₅ 'í₁ já'₂ cha'₂ 'éi₂ qui₂ca₂tsí'₃ riin'₅₄:

—Ma₃ jniog₄ jui₅ Belén, ma₃ dsi₁jag₅₄ a₂ca₂lě₃ ja₁jaun₂, con'₂ lě₅ já₁ ma₂ně₂'ě₂ Te₁gui'₅₄.

16 Ca₂i₃lěin₂ jaun₂ ně₃ tēle₃ dséi₂. Dsón'₂ rē'₂ ja₁jaun₂ ca₂dsáin'₂ María quian'₅₄ José, guein₂ ně₃ rē₂quian₂₃ 'ñió'₃ gu₅ ja₁gué'₅ já'₂. 17 Jme₁ca₂jág₂, jaun₂ gué'₄ ca₂dsia₃ 'a₂ lia'₂ lě₅ já₁ a₂ca₂nág₂, a₂ca₂'ě₂ ángel a₂'iin₂₃ guein₂, 18 jaun₂ ca₂i₃gó'₃ dsí₅ ca₂le₃jín₃ dsa₂ i₂ca₂nág₂ já₁ a₂dsia₅ dsa₂ i₂quián₅ já'₂ cha'₂ 'éi₂. 19 La₁ María ně₃, 'no'₂ bá₄ dsí₅ ca₂le₃jě₃, 'e₂ jein₅ a₂lě₂ jaun₂. 20 Dsa₂ i₂jmo₅ 'í₁ já'₂ cha'₂ ně₃, ca₂i₃lein₃ bá₄ táng₃ qui₂jme₂juiin'₂ Diú₄, qui₂cuē₂₃ ti₁'mag'₄ o₄quió'₄ ca₂le₃jě₃ a₂ca₂tě₂ ne₅₄ quian'₅₄ a₂qui₂ca₂nág₂. Ia₁ ca₂le₃jě₃ bá₄ ca₂rě₃ti₃ con'₂ lě₅ ca₂juá'₂ ángel.

Ca₂i₃jme₂jniai₂₃ guein₂ Jesús guá'₅

21 Jme₁ca₂dsin₃ jnia₃ jmig₄, ca₂ti₃ dsa₂ lo₄ guein₂, jaun₂ ca₂quiong₃ JESÚS* lia'₂ con'₂ lě₅ ca₂juá'₂ ángel ca₂tsí'₃ María né'₃ a₂cáun₂.

22 Jme₁ca₂dsin₃ jmig₄ a₂'i₄ 'éi'₃ jmo₃ le₁jíin₃ a₂jme₂ti₃ lia'₂ con'₂ lě₅ 'Éi'₃ quió'₅ Moisés, ca₂i₃lein₅₄ Jerusalén jniai₂₃ guein₂ i₁jein'₅₄ ne₄ Te₁gui'₅₄. 23 Ca₂jmo₃ le₂ně₅ ia₁ ton₅ ne₄ Si₂ quió'₅ Te₁gui'₅₄: “Ca₂le₃jín₃ guein₂ dsa₂ ηe'₂ i₂ne₅₄ i₂le₃chan₂, lěin₂ i₂lě₅ 'í₁ quián₅ Te₁gui'₅₄.”† 24 Ja₁jaun₂ ca₂jén'₃ ján₃

* **2:21** Lia'₂ chen₂ Jesús (hebreo: Yeshua) jein₅ já₁, “Lió₂ bá₄ Te₁gui'₅₄.” † **2:23** Éxodo 13:2.

con² lě⁵ juá'² 'éi'³ quió'⁵ Te¹gui'⁵⁴: “On³ i¹ju², o³
co²dsán'³ i¹ju² bē² 'e².” †

²⁵ Jmⁱg⁴ jaun², jme¹chan² jan² dsa² jē⁴ juig²
Jerusalén i²jme¹chen² Simeón. Jme¹lín⁴ jan²
dsa² dsen³ lín³, i²jme¹jme²gan³ Diú⁴; jme¹chain²
chi¹jñia²³ a²guán² i²cuē³ lián'² quió'⁵ dsa² juig²
Israel. Jme¹quiong'⁵⁴ Jme²dsí² Jñió⁵; ²⁶ 'éi² bá⁴
ma²ca²'ē² jág¹ ne⁵⁴ a²tsá³ jóin² ca²lia'² ca²jíin² de'²
I²rē²'ín¹ quián⁵ Te¹gui'⁵⁴. ²⁷ Jmⁱg⁴ jaun² ηó³ jiog⁵
Jme²dsí² Jñió⁵ jui⁵ guá'⁵ templo. Ja¹jaun² jme¹'ein⁵⁴
ně³ jme¹ca²dsi³lén² chog⁵⁴-jmei² guein² Jesús, jñiai²³
guein² a²jmo³ quiong'⁵⁴ con² lě⁵ tag⁴ chí'⁵ a²quí'⁵
'Éi'³. ²⁸ Jaun² ca²jñau'³ Simeón ca²jñai'³ guein²,
ca²jme³juin'² Diú⁴, ca²juá'²:

²⁹ Nē³ gué⁴ ně³, 'ne² juig³ quiáng³,
ma²lé² dsiang'⁵⁴ tei⁴

dsa² i²jme²ti³ ne'⁵⁴,

lia'² con² lě⁵ jág¹ quiáng'².

³⁰ Ia¹ la² ca²tě² ne³ i²ma²cheng'² lió²,

³¹ i²ma²jmo'⁵⁴ co²jñia⁵⁴ quián⁵ ca²le³jě³ juig² nación.

³² I²la² bá⁴ i²lín⁵ si²

i²jmo³ tág⁵ ja¹con² dsi²nau²;

i²la² bá⁴ i²lín⁵ dsa² i²chi'³ jlá'¹

juig² Israel quiáng'².

³³ Ca²i³gó'³ dsí⁵ bá⁴ José quian'⁵⁴ chog⁵⁴ guein²,
o⁴quió'⁴ jág¹ a²ca²juá'² Simeón jaun², 'in²³ guein².

³⁴ Jaun² ca²jme³gu'⁵⁴ Simeón quió'⁵, jaun² ca²juá'²
ca²tsí'³ María chog⁵⁴ guein²:

—Ní², 'en⁵⁴ jui⁵ guein² la² já⁵, jmo³ a²dsi³gan'⁵⁴ 'uē³
juin⁵ dsa² juig² Israel, o³ tē²le³ ron'² juin⁵ 'e². Já⁵

† **2:24** Levítico 5:11; 12:8.

lín₅ caun₂ léi₄ quió'₅ i₂'ag₃ i₂náu₃ quen₅ i₂le₃'iog₅₄.
³⁵ Le₂ně₅ bá₄ jióg'₃ 'í₁ le₃jniá₂ 'a₂ lia'₂ dsi₂jio₅ dsi₅
 dsa₂ le₂jan₂ le₂jan₂. La₁ tē₂le₃ ja₁cong'₂ ně₃, dsi₃ñíg'₂
 ně₂ja₄ bá₄ caun₂ ñi₁tág₂ dsi₂tia₃ tē₂'au'₂.

³⁶ Ján₃ bá₄ jaun₂ jme₁'en₅₄ jan₂ guiong'₂ i₂chen₂
 Ana, ja₁míg₄ Fanuel, dsa₂ tsi₁jon₂ Aser. 'Éi₂ ně₃
 jme₁'ě₂ jág₁ o₄quió'₄ Diú₄ ján₃. Jme₁ma₂guein'₂.
 Mei'₂ bá₄ lia'₂ con'₂ ca₂jen'₂ gu₂. Guio₃ ñi₂ bá₄
 ca₂rě₃quiai₅₄ dsa₂ ñe'₂ quiáin₅. ³⁷ Quén'₂ ne₂guióg₂
 rě₂dsí₂ quén₂ (84) ñi₂ a₂ca₂rě₃'ní₂. Š Guiong'₂ 'éi₂ ně₃
 jme₁'ein₅₄ tián₂ i₁dsi₅ guá'₅. 'Uě₂-jmi₂ bá₄ jme₁jme₂ti₃
 ne₄ Te₁gui'₅₄ chi₂lén'₂ Diú₄ a₂jme₂'iin₅₄ ně₃. ³⁸ Hora
 jaun₂ dé₄ ca₂dsióg₃ ja₁tión₂ dsa₂, ca₂cu'ě₃ ti₁'mag'₄
 Diú₄, ca₂dsia₃ jág₁ 'iin₂₃ guein₂ tsí'₅ ca₂le₃jín₃ dsa₂
 i₂tion'₅₄ i₂le₁ñia₅ a₂lión₂ dsa₂ juig₂ Jerusalén.

Ca₂i₃lein₃ táng₃ Nazaret

³⁹ Jaun₂ ně₃ jme₁ma₂ca₂lě₃ jmo₂₃ ca₂le₃jě₃ con'₂ lě₅
 ta₁ qui'₅ 'Éi'₃ quió'₅ Te₁gui'₅₄, jaun₂ ca₂i₃lein₃ jui₅ 'uě₃
 Galilea, ja₁niog₅ Nazaret, juig₂ go₅₄. ⁴⁰ Guein₂ ně₃,
 caun₂ ca₂i₃jui_{in}'₂ bá₄, caun₂ ca₂rě₃'uáin'₃ ně₃, ton'₂
 'ñio₅ lín₃ ñi₅, Diú₄ bá₄ jme₁jme₂gu'₅₄.

Lia'₂ con'₂ me'₂ Jesús ca₂dsióg₃ i₁dsi₅ guá'₅

⁴¹ Ca₂le₃jě₃ ñi₂ jme₁dsi₂lén₂ chog₅₄-jmei₂ Jmig₄
 Tē₂'iin₅₄ a₂tě₅ Jerusalén. ⁴² Jme₁ca₂dsí'₃ Jesús guia₃-
 tín₂ ñi₂, ca₂i₃lén₂ táng₃ co₂dsia₅ jui₅ Jerusalén.
 Ia₁ le₂jaun₂ tin₂ dsa₂ ca₂le₃jě₃ ñi₂ dsi₃lén₂ jmig₄
 jaun₂. ⁴³ Jme₁ca₂gú'₃ jmig₄, ca₂i₃lein₃ táng₃. Tsá₃
 ca₂rě₃lí'₄ chog₅₄-jmei₂ ñnia'₅₄ jaun₂ bá₄ tē₁'ñia₄ Jesús

Š 2:37 o₃, "Ma₂'ein₅₄ quén'₂ ne₂guióg₂ rě₂dsí₂ quén₂ (84) ñi₂."

Jerusalén, ⁴⁴ ia₁ líin₂ ma₂ŋái'₅ bá₄ quiain'₅₄ dsa₂ sián'₂. Caun₂ jmíg₄ ma₂ne₁ŋó₄ tioin'₅₄ jui₅ i₃lein₃ jme₁ca₂'nau'₂ jin₄ o₁riin'₅₄, jin₄ dsa₂ i₂cuin₂₃ ně₃.
⁴⁵ La₁ tsá₃ ca₂dsáu'₂. Jaun₂ ca₂jeín'₃ táng₃ jui₅ ca₂i₃léin₂ Jerusalén ca₂i₁'niog'₂ ja₁jaun₂.

⁴⁶ A₂'ni₅ jmíg₄ jaun₂ jme₁ca₂dsáu'₂ i₁dsi₅ guá'₅, guá₅ jin₄ tē₅juá'₅, nag₂₃ jág₁, ŋag₂₃ ŋí'₅ 'éi₂ ně₃.

⁴⁷ Jaun₂ ca₂i₃gó'₃ dsí₅ ca₂le₃jin₃ i₂tion'₅₄ nag₅ jág₁ quió'₅, ia₁ 'ŋio₅ lin₃ ŋi₅ 'a₂ lia'₂ qui₂jeín'₃ jág₁ quió'₅ dsa₂ 'éi₂. ⁴⁸ Jme₁ca₂jág₂ chog₅₄-jmei₂, ca₂i₃gó'₃ dsí₅, jaun₂ ca₂juá'₂ chog₅₄:

—Jón₃, ¿'e₂ lē₃ jmog'₅₄ le₂ně₅? Néi'₅, jniá₂ ně₃, ma₂ně₂i₁nio₁ 'i₅ dsi₅ 'niog'₂ jnia'₅₄.

⁴⁹ Jaun₂ ca₂ŋag₃ Jesús:

—¿'E₂ lē₃ 'nau'₂ 'nia'₂ jniá₂? ¿Tsa₁ ŋi'₅₄ 'nia'₂ a₂ca₂tíng₂ 'ú₄ ta₁ quió'₅ Ŋe'₃?

⁵⁰ La₁ tsá₃ ca₂ŋí'₂ dsí₅ 'éi₂ 'e₂ jein₅ jág₁ jaun₂.

⁵¹ Jaun₂ ca₂jóin'₃ bá₄ quiain'₅₄ chog₅₄-jmei₂ jui₅ Nazaret. Caun₂ bá₄ ne'₅₄ ca₂le₃jě₃ a₂tē₂néi'₂ chog₅₄-jmei₂. La₁ tei₄ bá₄ 'ma₅ chog₅₄ dsí₅ ca₂le₃jě₃ a₂jaun₂.

⁵² Jaun₂ caun₂ ca₂i₃juin'₂ bá₄ Jesús, rē₂ niog₅ dsi₅₄, rē₂ chéin'₅ le₃ne₄ Diú₄, lia'₂ le₃ne₄ dsa₂ ně₃.

3

'Ĕ₂ Juan₅₄ i₂chon₅ dsa₂ jmíg₂ jág₁ caun₂ 'uē₃ quein₂ co₂'ŋiog₅

(Mateo 3:1-12; Marcos 1:18; Juan 1:19-28)

¹ Ŋi₂ guia₃-ŋiá₂ lia'₂ con'₂ jme₁lín₄ emperador Tiberio, jmíg₄ lia'₂ con'₂ jme₁lín₄ táng₃ Poncio Pilato dsi₄má'₂ 'uē₃ Judea; Herodes guē'₂ jme₁lín₄ rag₅₄ i₂jmo₅ 'éi'₃ 'uē₃ Galilea; Felipe riin'₅₄ guē'₂ jme₁lín₄

dsi₄má'₂ le₂tan₅₄ juig₂ Iturea quian'₅₄ Traconite;
Lisanias ně₃ jme₁lín₄ dsi₄má'₂ quián₅ Abilinia.

² Ján₃ bá₄ jmig₄ jaun₂ jme₁lín₄ jme₂dsa₂ dsen₅₄ Anás
quian'₅₄ Caifás. Con'₂ jmig₄ jaun₂ dé₄ ně₃, ca₂tě₃
Diú₄ ca₂tě'₃ Juan₅₄, ja₁ŋi'₅₄ Zacarías, 'uě₃ co₂'ŋiog₅
ja₁jme₃guá₄. ³ Juan₅₄ ně₃ ca₂ŋi₃ le₂tan₅₄ juig₂ te₁'i₁
ma₂quián₅ Cuá₃ Jordán, qui₂tsí'₅ dsa₂ a₂'nió'₅ tsóin₃
jmig₂, cuě₃ léi₄ a₂ma₂ca₂dsi₃quén'₅ dsí₅ ia₁jaun₂
le₃'én₂ Diú₄ dsáu₁. ⁴ Le₂ně₅ bá₄ ca₂lě₃ ca₂rě₃ti₃ con'₂
lě₅ jág₁ a₂ca₂tó'₂ Isaías ne₄ si₂, l₂jme₁'ě₂ jág₁ o₄quió'₄
Diú₄, a₂ca₂juá'₂:

Nag₃ dsa₂ co₂mi'₅₄ jág₁

caun₂ 'uě₃ co₂'ŋiog₅, a₂juá'₂:

Jmo₄ 'nia'₂ co₂ŋia₅₄ juí₅ quió'₅ Te₁gui'₅₄:

Nia₄ 'nia'₂ caun₂ juí₅ co₂dsau₅.

⁵ Ca₂le₃jě₃ ji'₅₄ siá₅ 'nió'₅ le₃can'₂,

ca₂le₃jě₃ dsí₂con'₂, má'₂, 'nió'₅ 'ag₃ co₂rě₂;

Ca₂le₃jě₃ juí₅ qui₂rě₂guion'₂, 'nió'₅ lé₂ co₂dsau₅,

juí₅ a₂qui₂le₁quin'₅₄, 'nió'₅ lei₂.

⁶ Ca₂le₃jín₃ dsa₂ mi₂güig₃ bá₄ jág₃

'a₂ lia'₂ lě₅ a₂jmo₃ Diú₄ lió₂.*

⁷ Jaun₂ ca₂'uin₂ dsa₂ quió'₅, ca₂o₃lěin₂ mi₂₃ cho₃

Juan₅₄ jmig₂, † jaun₂ ca₂juá'₂ 'éi₂:

—i'Nia'₂ tsí₁jon₂ dsí₂mi'₂! ħ'Eín₂ bá₄ ně₂chí'₃ 'nia'₂

a₂cuing'₂ long'₅₄ uig₅ a₂ja₂quián₃? ⁸ Cuě₄ 'nia'₂

léi₄ jaun₂ a₂tě₃dsón'₂ ma₂ca₂dsi₃quén'₅ 'au'₂. 'A₃

lě₁juí₁dsi₂ŋia₅ 'au'₂ 'nia'₂ jua'₅₄ a₂jua'₅₄: “Lág₅ jnia'₅₄

tsí₁jon₂ Abraham”; ia₁ jniá₂ juá'₅, Diú₄ qui'₅₄ jmig₄

jmo₃ ca₂tě₂ ni₁cang₁ tio'₅₄ la₂, lé₂ le₃jmói'₂ chi'₂-

guein₂ quián₅ Abraham. ⁹ Ia₁ ma₂lě₅ co₂ŋia₅₄ ŋi₁dsi₁

* **3:6** Isaías 40:3-5. † **3:7** lit. “tióg₂ Juan₅₄ jmig₂.”

a₂qui₃uín'₂ ni'₁ma₂. Ca₂le₃jě₃ 'ma₂ a₂tsá₃ dse₃ mǐg₂
'ag₅, uín'₂ dsi₃to'₅₄ si₂.

¹⁰ Jaun₂ ca₂ŋag₃ dsa₂:

—ǰ'E₂ bá₄ le₃jmó₁ jnia'₅₄ jaun₂ ně₃?

¹¹ Jaun₂ ca₂ŋag₃ táng₃:

—I₂cha₂ tǐn₃ dsán'₃ tsin'₅₄, jui₁cuě'₄ co₂dsán'₃ i₂tsá₃
cha₂ quió'₅; le₂jaun₂ guě'₂ jui₁lia'₂ i₂cha₂ a₂guě'₃,
jui₁jme'₂oin₅₄ jui₁lia'₂ i₂tsá₃ cha₂ quió'₅.

¹² Ca₂o₃lén₂ i₂lǐn₅₄ i₂cán₂ 'lia'₅₄ quián₅ dsi₂tan₅₄ ně₃,
a₂nio₃ tsóin₃ jmǐg₂, jaun₂ ca₂tsí'₃ Juan₅₄:

—Tě₅, ǰ'e₂ bá₄ lé₂ le₃jmó₁ jnia'₅₄?

¹³ Jaun₂ ca₂jéin'₃ táng₃ 'éi₂ jág₁:

—Tsá₃ jmó'₂ 'nia'₂ jua'₅₄ a₂cán'₁ ŋag₅₄ guě'₄ 'lia'₅₄
quió'₅ dsa₂, jua'₅₄ a₂dsi₁juin'₅₄ con'₂ 'éi'₃ qui'₅ si₂.

¹⁴ Ca₂o₃lén₂ i₂lǐn₅₄ 'lióg₂ ně₃, ca₂ŋag₃:

—Jnia'₅₄ guě'₂ ně₃; ǰ'E₂ bá₄ ca₂tág₂ jnia'₅₄ jmó₁?

Jaun₂ ca₂ŋag₃:

—Tsá₃ qui₁quiang'₄ dsa₂ juě'₅, jua'₅₄ a₂qui₁jñiá'₄
'e₂ qui₁jñiá'₄ quió'₅, on₃ guě'₂ qui₁'nǐg'₄ dsa₂ jua'₅₄
a₂lě₁qui₁'nǐ'₄. Jui₁le₂'ŋio₂ bá₄ 'au'₂ 'nia'₂ ján₃, con'₂
ma₂tí₅ 'liang'₅₄.

¹⁵ La₁ dsa₂ ně₃, tsá₃ tei₄ le₁'ág₄ dsí₅ tioen'₅₄, le₁jñia₂₃
le₃ŋi₅ chi₂jua'₂ Juan₅₄ 'éi₂ bá₄ lǐn₅ I₂rě₂'ín₁ quián₅
Diú₄. ¹⁶ Jaun₂ ca₂juá'₂ Juan₅₄ 'ŋiog₅, ca₂tsí'₃ ca₂le₃jǐn₃:

—Jniá₂ ně₂tiáng₃ 'nia'₂ jmǐg₂; la₁ i₂já₅ chi₂quín₃
ně₅, tióg₂ Jme₂dsí₂ Jñió₅, jě₄ si₂ ně₃. 'Éi₂ bá₄ i₂'uan'₂
guě'₄ lia'₂ con'₂ guě'₄ jniá₂, ca₂lia'₂ jnia'₅₄ lau₂ ton₅
tag₅₄ bá₄ tsá₃ ca₂tǐng₂ tsi'₅₄. ¹⁷ Ma₂chi₁chan'₂ si₂jmu₂
a₂jme₂dse₃ mǐg₂ trigo. Cág'₃ dse₃ lǐn₃, con'₂ dsia₃

jmá'₃ a₂dse₃, 'ma₃ dsi₂néi₂. Dsí'₂ bá₄ jme₁qui₅ dsi₂si₂ ja₁tsá₃ líg'₂ jmíg₄ éi₃.

18 Jaun₂ le₂ně₅ bá₄, 'lióng₂ jág₁ dse₃ siá'₂ ca₂to'₂ Juan₅₄, ca₂jme₃tšin₂₃ dsa₂ jág₁ dse₃.

19 Ján₃ bá₄ ca₂jéin₂ Rag₅₄ Herodes, ia₁ a₂jme₁ma₂guá₅ 'éi₂ quian'₅₄ 'io₅₄ Herodías dsa₂ mí₂ quián₅ riin'₅₄, † ne₄ 'lióng₂ guě₄ a₂lig'₅₄ siá'₂ a₂jme₁jmo₅-dsáu₅ Herodes; 20 la₁ tē₂le₃ ηag₅₄ guě₄ ca₂jme₃ja₃: né'₃ 'má₃ bá₄ ca₂tiáin₂ Juan₅₄.

Ca₂chon₃ Juan₅₄ jmíg₂ Jesús

(Mateo 3:13-17; Marcos 1:9-11)

21 Jme₁ma₂ca₂lě₃ choin₂₃ Š jmíg₂ ca₂le₃jín₃ dsa₂, jme₁ma₂ně₂chon₃a Jesús jmíg₂, a₂ma₂chéin'₅ chi₂lén'₂ Diú₄ ně₃. Tě₃jě₄ jaun₂ ca₂niá₃ dsi₄ i₂juíg₃.

22 Ca₂sión₃ Jme₂dsí₂ Jñió₅ chi₁dsáin₃ jniá'₂ lia'₂ jniá'₂ jan₂ i₁ju₂, ne₄ quío'₅. Jaun₂ ca₂né'₂ jág₁ a₂já₅ guei'₅₄ i₂juíg₃ a₂juá'₂:

—'Ne₂ bá₄ líng'₅ jón₃ quiáng₃ i₂'nióg₃ guě₄ lín₃; 'ñio₂ bá₄ dsi₃ 'ñio₅ lín₃ jing₅₄ 'ne₂.*

Dsa₂ can'₅₄ quián₅ Jesús i₂qui₂ma₂ñi₂ ma₂dsi₃jo

(Mateo 1:1-17)

23 Con'₂ guióg₂-guiá₂ ñi₂ bá₄ jme₁ma₂'en₅₄ Jesús lia'₂ con'₂ jme₁ca₂jme₃lióg₃ ca₂jme₃tšin₂₃ dsa₂ jág₁ dse₃. Dsa₂ ně₃, jmo₂₃ dsí₅ a₂lín₅ 'éi₂ ja₁ñi'₅₄ Šě₄.

Jaun₂ Šě₄ 'éi₂ ca₂já₃ ca₂lín₃ ja₁ñi'₅₄ Elí.

24 Elí 'éi₂ guě'₂ ně₃ ca₂já₃ ca₂lín₃ ja₁ñi'₅₄ Matat; Matat 'éi₂ guě'₂ ně₃ ca₂já₃ ca₂lín₃ ja₁ñi'₅₄ Leví

† 3:19 A₂lín₅₄ chog₅₄ si₂: “Felipe riin'₅₄.” § 3:21 lit. “tiáin₂.”

* 3:22 A₂lín₅₄ chog₅₄ si₂ tsá₃ chi₁ton₅ “i₂'nióg₃ guě₄ lín₃”, a₂chi₁ton₅ táng₃ “jmíg₄ ně₃ ca₂ling₃ ñéi'₅.”

i₂jme₁lín₄ ja₁ŋi'⁵⁴ Melqui;
 Melqui ně₃ jme₁lín₄ chi'₂ quián₅ Jana,
 i₂jme₁lín₄ chi'₂ quián₅ José;
 25 José ně₅ ně₃ ca₂já₃ ca₂liin₃ chi'₂ quián₅ Matatías;
 Matatías guë'₂ ně₃ ca₂já₃ ca₂liin₃ ja₁ŋi'⁵⁴ Amós;
 Amós jme₁lín₄ ja₁ŋi'⁵⁴ Nahum;
 Nahum guë'₂ jme₁lín₄ ja₁ŋi'⁵⁴ Esli,
 i₂jme₁lín₄ chi'₂ quián₅ Nagai
 26 i₂jme₁lín₄ chi'₂ quián₅ Ma'at;
 Ma'at guë'₂ ca₂já₃ ca₂liin₃ ja₁ŋi'⁵⁴ Matatías;
 Matatías guë'₂ ca₂já₃ ca₂liin₃ chi'₂ quián₅ Semei;
 Semei 'éi₂ ně₃ ca₂já₃ ca₂liin₃ ja₁ŋi'⁵⁴ i₂chen₂ José;
 José guë'₂ ně₃ ca₂já₃ ca₂liin₃ ja₁ŋi'⁵⁴ Judá;
 27 Judá 'éi₂ guë'₂ ně₃ ca₂já₃ ca₂liin₃ ja₁ŋi'⁵⁴ Joana;
 Joana 'éi₂ guë'₂ ně₃
 ca₂já₃ ca₂liin₃ chi'₂ quián₅ i₂jme₁chen₂ Resa;
 Resa guë'₂ ně₃
 ca₂já₃ ca₂liin₃ ja₁ŋi'⁵⁴ i₂chen₂ Zorobabel;
 Zorobabel guë'₂ ně₃
 ca₂já₃ ca₂liin₃ chi'₂ quián₅ i₂jme₁chen₂ Salatiel,
 i₂jme₁lín₄ ja₁ŋi'⁵⁴ Neri,
 28 i₂jme₁lín₄ ja₁ŋi'⁵⁴ Melqui,
 i₂jme₁lín₄ ja₁ŋi'⁵⁴ Adi,
 i₂jme₁lín₄ chi'₂ quián₅ i₂chen₂ Cosam,
 i₂jme₁lín₄ chi'₂ quián₅ Elmodam,
 i₂jme₁lín₄ chi'₂ quián₅ i₂jme₁chen₂ Er,
 29 i₂jme₁lín₄ chi'₂ quián₅ Josué;
 Josué ně₃ ca₂já₃ ca₂liin₃ ja₁ŋi'⁵⁴ Eliezer;
 Eliezer guë'₂ ně₃ ca₂já₃ ca₂liin₃ ja₁ŋi'⁵⁴ Jorim,
 i₂jme₁lín₄ ja₁ŋi'⁵⁴ Matat;

30 Matat guë'² ně³ ca₂já₃ ca₂liin₃ ja₁ŋi'⁵⁴ Leví;
 Leví guë'² ně³ ca₂já₃ ca₂liin₃ ja₁ŋi'⁵⁴ Simeón;
 Simeón guë'² ně³ ca₂já₃ ca₂liin₃ ja₁ŋi'⁵⁴ Judá;
 Judá guë'² ně³ ca₂já₃ ca₂liin₃ ja₁ŋi'⁵⁴ José;
 José 'éi₂ guë'² ně³ ca₂já₃ ca₂liin₃ ja₁ŋi'⁵⁴ Jonán;
 Jonán 'éi₂ guë'² ně³ ca₂já₃ ca₂liin₃ ja₁ŋi'⁵⁴ Eliaquim;
 31 Eliaquim guë'² ca₂já₃ ca₂liin₃ ja₁ŋi'⁵⁴ Melea;
 Melea guë'² ca₂já₃ ca₂liin₃ ja₁ŋi'⁵⁴ Mainán;
 Mainán guë'² ca₂já₃ ca₂liin₃ ja₁ŋi'⁵⁴ Matata;
 Matata guë'² ně³ ca₂já₃ ca₂liin₃ ja₁ŋi'⁵⁴ Natán;
 32 Natán guë'² ca₂já₃ ca₂liin₃ ja₁ŋi'⁵⁴ David;
 David 'éi₂ guë'² ně³ ca₂já₃ ca₂liin₃ ja₁ŋi'⁵⁴ Isái;
 Isái guë'² ně³ ca₂já₃ ca₂liin₃ ja₁ŋi'⁵⁴ Obed;
 Obed guë'² ca₂já₃ ca₂liin₃ ja₁ŋi'⁵⁴ Bo'oz;
 Bo'oz guë'² ca₂já₃ ca₂liin₃ ja₁ŋi'⁵⁴ Salmón;
 Salmón guë'² ca₂já₃ ca₂liin₃ ja₁ŋi'⁵⁴ Na'asón;
 33 Na'asón guë'² ně³ ca₂já₃ ca₂liin₃ ja₁ŋi'⁵⁴ Ami-
 nadab;
 Aminadab guë'² ca₂já₃ ca₂liin₃ ja₁ŋi'⁵⁴ Aram;
 Aram guë'² ně³ ca₂já₃ ca₂liin₃ ja₁ŋi'⁵⁴ Esrom;
 Esrom guë'² ca₂já₃ ca₂liin₃ ja₁ŋi'⁵⁴ Fares;
 Fares guë'² ně³ ca₂já₃ ca₂liin₃ ja₁ŋi'⁵⁴ Judá;
 34 Judá guë'² ně³ ca₂já₃ ca₂liin₃ ja₁ŋi'⁵⁴ Jacob;
 Jacob guë'² ně³ ca₂já₃ ca₂liin₃ ja₁ŋi'⁵⁴ Isaac;
 Isaac guë'² ně³ ca₂já₃ ca₂liin₃ ja₁ŋi'⁵⁴ Abraham;
 Abraham guë'² ně³ ca₂já₃ ca₂liin₃ ja₁ŋi'⁵⁴ Taré;
 Taré guë'² ně³ ca₂já₃ ca₂liin₃ ja₁ŋi'⁵⁴ Nacor;
 35 Nacor guë'² ca₂já₃ ca₂liin₃ ja₁ŋi'⁵⁴ Serug;
 Serug guë'² ca₂já₃ ca₂liin₃ ja₁ŋi'⁵⁴ Ragau;
 Ragau guë'² ca₂já₃ ca₂liin₃ ja₁ŋi'⁵⁴ Peleg;
 Peleg guë'² ně³ ca₂já₃ ca₂liin₃ ja₁ŋi'⁵⁴ Heber;
 Heber guë'² ca₂já₃ ca₂liin₃ ja₁ŋi'⁵⁴ Sala;
 36 Sala guë'² ca₂já₃ ca₂liin₃ ja₁ŋi'⁵⁴ Cainán;

Cainán guë'² ca₂já₃ ca₂liin₃ ja₁ŋi'⁵⁴ Arfaxad;
 Arfaxad guë'² ca₂já₃ ca₂liin₃ ja₁ŋi'⁵⁴ Sem;
 Sem guë'² ca₂já₃ ca₂liin₃ ja₁ŋi'⁵⁴ Noé;
 Noé guë'² ca₂já₃ ca₂liin₃ ja₁ŋi'⁵⁴ Lamec;
³⁷ Lamec guë'² ně₃ ca₂já₃ ca₂liin₃ ja₁ŋi'⁵⁴ Matusalén;
 Matusalén guë'² ně₃ ca₂já₃ ca₂liin₃ ja₁ŋi'⁵⁴ Enoc;
 Enoc guë'² ně₃ ca₂já₃ ca₂liin₃ ja₁ŋi'⁵⁴ Jared;
 Jared guë'² ně₃ ca₂já₃ ca₂liin₃ ja₁ŋi'⁵⁴ Mahalale'el;
 Mahalale'el guë'² ně₃ ca₂já₃ ca₂liin₃ ja₁ŋi'⁵⁴ Cainán;
³⁸ Cainán guë'² ně₃ ca₂já₃ ca₂liin₃ ja₁ŋi'⁵⁴ Enós;
 Enós guë'² ně₃ ca₂já₃ ca₂liin₃ ja₁ŋi'⁵⁴ Set;
 Set guë'² ně₃ ca₂já₃ ca₂liin₃ ja₁ŋi'⁵⁴ Adán;
 Adán guë'² ně₃ ca₂já₃ ca₂liin₃ co'² nió'⁴ ja₁ŋi'⁵⁴ Diú₄.

4

*Ca₂caun₃ i₂sě₃dsen₃ táu₂ quió'₅ Jesús
 (Mateo 4:1-11; Marcos 1:12-13)*

¹ Jaun₂ Jesús ně₃, ma₂rě₂rřin₅ Jme₂dsí₂ Jŋi₅,
 ca₂o₃'iin₃ Cuá₃ Jordán. Ca₂jio₃ Jme₂dsí₂ caun₂ 'uě₃
 quein₂ co₂'ŋiog₅. ² Ja₁jaun₂ ca₂i₁'i₅ tē₂láu₃ jmig₄,
 ia₁jaun₂ cáun₂ táu₂ i₂sě₃dsen₃. Tsá₃ 'e₂ ca₂guě'₃
 'i₁ca₂juig₄ tē₁lia'₂ jmig₄ jaun₂. Jme₁ca₂dsan₃ jaun₂,
 jaun₂ guě₄ ma₂i₁cón'₅ 'ŋio₅ lin₃. ³ Jaun₂ ca₂juá'₂
 i₂sě₃dsen₃:

—Chi₂jua'₂ dsón'₂ líng'₅ Ja₁ŋi'⁵⁴ Diú₄, jmo₄ jui₁le₅₄
 i₁ŋí'₄ ni₁cang₁ ně₅.

⁴ Jaun₂ ca₂ŋag₃ Jesús:

—Chi₁ton₅ ne₄ Si₂: “On₃jua'₅₄ jmá'₃ quian'₅₄ i₁ŋí'₄
 le₃tan₅₄ dsa₂ mi₂güig₃ le₃chain₂.”* , †

* **4:4** Deuteronomio 8:3. † **4:4** A₂lin₅₄ chog₅₄ si₂ juá'₂ ján₃;
 “a₂'nió'₅ le₂chain₂ nag, jág, quió'₅ Diú₄ ně₃.”

⁵ Jaun₂ ca₂jio₃ táng₃ i₂së₃dsen₃ caun₂ má'₂ ja₁ñei₅.
Ja₁jaun₂ ca₂'ë₃ ca₂tiá₂ tei₄ ca₂le₃jě₃ juig₂ te'i'₁ gua'₅₄
'uë₃. ⁶ Jaun₂ ca₂juá'₂:

—Gog'₂ 'ne₂ bá₄ dsia₅₄ jniá₂ ca₂le₃jě₃ juig₂ nē₅;
'ne₂ bá₄ gong'₂ lé₂, 'ó'₄ bí₂, qui₂jme₃juag'₂ dsa₂. Ia₁
a₂niog₅ ne₃ jniá₂ bá₄ nē₅, ton'₂ lé₂ le₃cué₄ jniá₂ 'ein₂
'nio₃ cué₄. ⁷ Jaun₂ a₂lé₂ quiáng'₂ nē₁jua'₂ ca₂chi₁jne'₄
ne₃ jme₁juag'₂.

⁸ Jaun₂ ca₂ñag₃ Jesús:

—Ne₄ Si₂† quió'₅ Diú₄ chi₁ton₅: “Jme₁gan₃ 'nia'₂
Te₁gui'₅₄ Diú₄ quiáng'₂; ne₄ jan₂ 'éi₂ bá₄ ca₂tín'₂ 'nia'₂
jme₁ti'₄.” §

⁹ Cang₂ jaun₂ ca₂jio₃ táng₃ i₂së₃dsen₃ juig₂
Jerusalén, jaun₂ ca₂i₁chei'₂ caun₂ ja₁lě₄ ja₁ñei₅ gué₄
ne₄ ni₁'ia'₂ guá'₅ templo, jaun₂ ca₂juá'₂:

—Chi₂jua'₂ 'ne₂ líng'₅ Ja₁ñi'₅₄ Diú₄, tian'₅₄ ca₂tě₂
'uë₃; ¹⁰ ia₁ chi₁ton₅ ne₄ Si₂:

Dsiog₃ Diú₄ o₄gú₃ ángeles quiáin₅,

jaun₂ jmo₃ 'í₁;

¹¹ guéi'₂ quian'₅₄ gu₂

ia₁jaun₂ tsá₃ jéng'₂ uig₅ nióg'₃ ni₁cang₁.*

¹² Jaun₂ ca₂ñag₃ Jesús:

—Ján₃ bá₄ juá'₂ ne₄ si₂: “Tsá₃ tang'₅₄ Te₁gui'₅₄ Diú₄
quiáng'₂.” †

¹³ Jme₁ca₂dsan₃ ca₂le₃jě₃ a₂niog₅ ca₂juá'₂
i₂së₃dsen₃ a₂cáun₂ táu₂ jaun₂, jaun₂ ca₂i₃uúin₂
co₂'na₂, nē₁jua'₂ líg'₂ ca₂cuin₃ táng₃ jmig₄.

† **4:8** A₂lin₅₄ chog₅₄ si₂ juá'₂ le₂la₂ ján₃: “Jñiag'₃ cau₅ quió₃ 'ne₂
Satanás, ia₁ ne₄ Si₂.” § **4:8** Deuteronomio 6:13. * **4:11** Salmo

91:11-12. † **4:12** Deuteronomio 6:16.

Ca₂jme₃lióg₃ Jesús ca₂jme₃tag₂₃ 'uë₃ Galilea
(Mateo 4:12-17; Marcos 1:14-15)

14 Ca₂ηá'₃ táng₃ Jesús jui₅ 'uë₃ Galilea rë₂can'₂
 Jme₂dsí₂ Jñió₅ të₂dsí₅. Le₂con₂ juig₂ te₁'i₁ ma₂quián₅
 jaun₂, ca₂l₃'ag₅₄ jág₁ 'ag₅ dsa₂. 15 Ca₂i₁jme₁tiin₂₃ dsa₂
 le₂tan₅₄ guá'₅ sinagogas quió'₅ dsa₂, jaun₂ ca₂le₃jín₃
 bá₄ dsa₂ jme₁jme₂juag'₂.

Dsiáin'₃ táng₃ juig₂ Nazaret

(Mateo 13:53-58; Marcos 6:1-6)

16 Jaun₂ ca₂ηái'₃ jui₅ Nazaret, ja₁ca₂i₃juin'₂.
 Caun₂ jmig₄ sa₅₄ ca₂'í₃ dsi₂néi₂ guá'₅ sinagoga,
 ia₁ le₂jaun₂ tiin₂. Jaun₂ ca₂nau₂ a₂'í₃ Si₂. 17 Jaun₂
 ca₂cuë₃ dsa₂ si₂ rë₂bin₅ quió'₅ Isaías i₂jme₁'ë₂ jág₁
 o₄quió'₄ Diú₄. Jme₁ma₂në₂néi'₃ si₂, jaun₂ ca₂dsó'₂
 ja₁chi₁ton₅ le₂la₂:

18 Dsín₂ Jme₂dsí₂ quián₅ Te₁gui'₅₄ ne₄ quió₃,

ia₁ ma₂ca₂'ag₃ jniá₂

a₂i₁'ë₃ jág₁ dse₃ jin₄ dsa₂ dsi₂ηé₂.

Ca₂chei₃ a₂i₁'ë₃ jág₁ a₂lión₂ dsa₂ i₂qui₂le₁jní₅,

ton'₂ ján₃ guë'₂ jmo₅₄ jnia₅₄ jme₁ne₁ dsa₂ i₂ten₄;

qui₁long₁₂ dsa₂ i₂qui₂dsi₂ηí₂ uig₅ qui₂jmóg'₂

dsa₂;

19 a₂'ë₄ jmig₄ dse₃ a₂lió₂ Te₁gui'₅₄. †

20 Jaun₂ ca₂bín₂ táng₃ si₂; ca₂jín'₃ dsa₂ i₂jme₂'o₅₄,
 jaun₂ ca₂guá₂ táng₃. Ia₁ jaun₂ bá₄ tion'₅₄ dsa₂
 ca₂le₃jín₃ le₁ηii'₂, jág₂. 21 Jaun₂ ca₂jme₃lióg₃ Jesús
 ca₂juá'₂:

—Jmig₄ në₃ ca₂të₂ ne'₅₄ 'nia'₂ ca₂rë₃ti₃ a₂juá'₂ Si₂
 në₅.

† 4:19 Isaías 61:1-2.

22 Ca₂le₃jín₃ bá₄ dsa₂ 'iin₂₃ dse₃ Jesús, dsi₂gó'₃ dsí₅ ca₂le₃jé₃ jág₁ jlá'₁ a₂'uë'₂ 'o₅₄. Jaun₂ qui₂ca₂ñí'₃ riin'₅₄:

—¿On₁jua'₅₄ i₂në₅ 'éi₂ i₂lín₅ ja₁ñi'₅₄ Së₄?

23 Jaun₂ ca₂juá'₂ Jesús:

—A₂dsi₂jó'₃ já₅ jmi_g₄ le₃jua'₅₄ 'nia'₂ juig'₅₄ jniá₂ quio₃ § la₂: “Ne₂ tē₅mí₅ jma'₅₄ mí₅ 'ñiag'₂.” Le₃jua'₅₄ 'nia'₂ në₃: “A₂ca₂rē₃ne₄ jnia'₅₄ a₂ca₂jmo'₅₄ Capernaum, ma₂në₃ jmo₄ ja₁lá₃ go'₅₄ ján₃.”

24 Caun₂ ca₂juá'₂ bá₄:

—A₂tē₃dsón'₂ juá'₅ jniá₂ juig'₂ 'nia'₂, 'i₁jan₂ dsa₂ i₂'ě₂ jág₁ quián₅ Diú₄, tsá₃ a₁jaun₂ jua'₅₄ a₂guei₃ dsa₂ dse₃ go₅₄. 25 Tí₅ bá₄ jág₁ quió₃ a₂juá'₅ la₂, juin₅ dsa₂ mí₂ 'nág₂ i₂jme₁chan₂ Israel jmi_g₄ lia'₂ con'₂ jme₁chan₂ Elías i₂jme₁'ě₂ jág₁ o₄quió'₄ Diú₄, lia'₂ con'₂ ca₂rē₃ 'ín₃ 'ñio₅ lín₃ a₂guë'₃ dsa₂ ta₁caun₂ juig'₂ nación, ia₁ tsá₃ ma₃jmí₅ ca₂tang₂ 'nī₅ ñi₂ tē₂ ca₂dsio₄.

26 La₁ ca₂lia'₂ quió'₅ 'i₁jan₂ 'io₅₄ 'nág₂ i₂jme₁chan₂ Israel, tsá₃ ca₂ñe₄ Elías, jñia'₅₄ lia'₂ quió'₅ jan₂ i₁náu₃ i₂jme₁guá₄ Sarepta* a₂niog₅ quián₅ ciudad Sidón bá₄.

27 Ján₃ bá₄ le₂jaun₂ jme₁chan₂ juin₅ dsa₂ i₂jme₁lín₄ 'mé'₅ 'iog₅ juig'₂ Israel, lia'₂ con'₂ jmi_g₄ ca₂ñi₃ Eliseo i₂jme₁'ě₂ jág₁ o₄quió'₄ Diú₄ ján₃. La₁ ca₂lia'₂ 'i₁jan₂ i₂'éi₂ tsá₃ ca₂'lón₂, jñia'₅₄ lia'₂ jan₂ i₂jme₁chen₂ Na'amán† i₂jme₁chan₂ 'uë₃ Siria bá₄.

28 Jme₁ca₂nág₂ dsa₂ jág₁ në₅, ca₂le₃jín₃ con'₂ i₂tion'₅₄ guá'₅ sinagoga ca₂rē₃'néi₃ 'lig'₅₄.

29 Qui₂ca₂nau₂ tioin'₅₄, ca₂dsei₂₃ juig'₂, ca₂lín₂

§ 4:23 quió₃: Jág₁ quió'₅ dsa₂ Jen'₅₄, co₂'nió'₄ le₃jua'₅₄, caun₂ jág₁ a₂ñí'₂ dsí₅ a₂ca₂quiog₂ dsa₂ can'₅₄, a₂dsia₅ dsa₂. * 4:26 'Nio'₂ ja₁ton₅

† 4:27 Na'amán: 'Í₂ 2 Reyes 5.

le₁jiog₂₃ ca₂të₂ ne₄ má'₂ ja₁lë₄ ni₁'lau₂ dsio'₅₄ juig₂,
ia₁ a₂jme₁dsi₂jiog₅ dsí'₅ jme₁tón₂ ja₁jaun₂. ³⁰ La₁
con'₂ ca₂η₁₅ bá₄ 'éi₂ jë₄ quió'₅, ca₂lón₂ ηá'₅.

Jan₂ dsa₂ i₂jme₁'en₅₄ jme₂dsí₂ 'lin'₅₄
(Marcos 1:21-28)

³¹ Jaun₂ ca₂ηó₃ Jesús juig₂ Capernaum, caun₂
juig₂ tén₅ 'uë₃ Galilea. Ja₁jaun₂ ca₂jme₃tin₂₃ dsa₂
jme₁jmig₄ sa₅₄. ³² 'Ni₀₅ lin₃ dsi₂gó'₃ dsí'₅ dsa₂ quian'₅₄
jág₁ quió'₅, ia₁ a₂'io₂₃ 'éi'₃ dsón'₂ bá₄ a₂jme₂tag₂₃.
³³ Dsi₂néi₂ guá'₅ sinagoga ja₁tioin'₅₄ jaun₂, jme₁'en₅₄
jan₂ dsa₂ i₂'en₅₄ jme₂dsí₂ je₂na'₅₄ të₂dsí'₅. Jaun₂
ca₂guió'₃ 'éi₂, ca₂juá'₂:

³⁴ —i'Ne₂ ně₃! ¿'E₂ lë₃ tiáng'₅ jë₄ quián₂ jnia'₅₄, 'ne₂
Jesús Nazareno?† ¿A₂i₃'éin'₃ jnia'₅₄ bá₄ 'ne₂ ηe'₃?
Guion₄ jniá₂ 'ein₂ líng'₅: 'ne₂ líng'₅ I₂jñi₀₅ quián₅
Diú₄.

³⁵ Jaun₂ ca₂jí₂ Jesús, ca₂juá'₂:

—i₂Tei₄ jmo₄; tén₃ dsa₂ ně₅!

Jaun₂ je₂na'₅₄ ně₃, ca₂tón₂ 'uë₃ të₃ jág₅ ca₂le₃jín₃,
jaun₂ guë₄ ca₂o₃'ín₃, la₁ tsá₃ 'e₂ uig₅ ca₂jmóg'₂.

³⁶ Jaun₂ ca₂ja₃gó'₃ dsí'₅ ca₂le₃jín₃, jaun₂ ca₂dsia₃ jág₁
jin₄ riin'₅₄, ca₂juá'₂:

—¿'E₂ bá₄ jág₁ ně₅? I₂në₅ 'io₂₃ bí₂ jmo₂₃ 'éi'₃ lia'₂
ma₂'uin₂ bá₄ jme₂dsí₂ 'lin'₅₄ jë₁ma₂ca₂juá'₂.

³⁷ A₂jaun₂ ně₃, ca₂i₃'ag₅₄ jág₁ le₂con₂ juig₂ te₁'i₁
ma₂quián₅ jaun₂.

Ca₂jme₃'lión₂ Jesús ma₂chog₅₄ Si₂mu₅₄ Pe₄
(Mateo 8:14-15; Marcos 1:29-31)

† 4:34 o₃, “i₂chan₂ Nazaret.”

38 A₂ca₂o₃'ín₃ Jesús guá'₅ sinagoga jaun₂, ca₂ηó₃ ja₁quió'₄ Si₂mu₅₄. Ja₁jaun₂ jme₁rē₂quian₅ ma₂chog₅₄ 'éi₂ dso'₅₄ 'i₄ dséi₂ 'ηio₅ lin₃. Jaun₂ ca₂mi₃ dsa₂ ne₅₄ o₄quió'₄ dsa₂ dso'₅₄. 39 Jaun₂ ca₂jme₃quiáin₃ cau₅ quió'₅ dsa₂ dso'₅₄, ca₂jéin₂ dso₄ dséi₂. Jaun₂ ca₂o₃'ág₃ dséi₂. Dsi₂jui₅ le₂jaun₂ bá₄ ca₂nau₂ dsa₂ i₂jme₁dso'₅₄, ca₂jme₃ti₃ ne₄ dsa₂ i₂tion'₅₄.

*Ca₂jme₃'lión₂ Jesús juin₅ dsa₂ dso'₅₄
(Mateo 8:16-17; Marcos 1:32-34)*

40 Tē₂le₃ ca₂nei₂ jmig₄ jaun₂, ca₂le₃jín₃ dsa₂ i₂chan₂ dsa₂ dso'₅₄ quián₅ jui₁'e₂ guě₃ dso₄ lín₅, ca₂o₃jio₃ dsa₂ ne₅₄. Jaun₂ qui₂ca₂téin₂ gu₂ le₂jan₂ le₂jan₂ dsa₂ dso'₅₄, ca₂jme₃'lió₂. 41 Juin₅ bá₄ jme₂dsí₂ je₂na'₅₄ qui₂ca₂'uín'₂ quió'₅ dsa₂, qui₂guió'₅ juá'₂:

—i'Ne₂ líng'₅ Ja₁ηi'₅₄ Diú₄!

La₁ Jesús ně₃, ca₂jí₂ bá₄, tsá₃ ca₂cuě₃ jmig₄ jua'₅₄ a₂juá'₂ guě₄, ia₁ a₂ηi₅ rē₂ bá₄ je₂na'₅₄ a₂lín₅ 'éi₂ I₂rē₂'ín₁ quián₅ Diú₄.

*Ca₂ton₃ Jesús jág₁ 'uě₃ Galilea
(Marcos 1:35-39)*

42 Jme₁jnia₃ jaun₂, ca₂o₃'ín₃ Jesús ηó₃ caun₂ ja₁lě₄ co₂'ηiog₅. La₁ ca₂le₃jín₃ dsa₂ ca₂i₁nioi₁₂ ca₂'nau'₂. Jaun₂ ně₃ jme₁ca₂dsáu'₂, jme₁jnéi₂ jui₅ tsá₃ jme₁cuě₂₃ jmig₄ dsáin'₃. 43 Jaun₂ ca₂juá'₂ Jesús:

—Ca₂tín₂ jniá₂ qui₂i₁'ě₃ jág₁ jui₁lia'₂ ja₁gon₂ Diú₄, le₂tan₅₄ jui₂g₂ja₁siá'₂, ia₁ ta₁ ně₅ chen₄ bá₄ jniá₂ guio₃.

44 Jaun₂ le₂ně₅ bá₄ ca₂ηi₃ Jesús ca₂'ě₂ jág₁ le₂con₂ guá'₅ sinagogas a₂te₁'i₁ ja₁tén₄ Judea.Š

Š 4:44 A₂lin₅₄ chog₅₄ si₂ juá'₂: “Galilea.”

5

*Ca₂jmo₃ Jesús ca₂jon₃ dsa₂ju₄
(Mateo 4:18-22; Marcos 1:16-20)*

¹ Ca₂lë₃ co₂ráun₂ jme₁'en₅₄ Jesús chei'₅₄ Jmi₁ñí'₄ Genesaret.* Të₃jë₄ jaun₂ ca₂ñi'₂ juin₅ lin₃ dsa₂, ca₂lia'₂ co₂'liog'₂ bá₄ tioin'₅₄, ia₁ 'nio₃ nag₃ jág₁ quió'₅ Diú₄. ² Jaun₂ ca₂jág₃ Jesús tin₃ tsi₁mu₅ a₂le₁jë₁, le₁'ág₄ chei'₅₄ jmig₂, ia₁ dsa₂ i₂tsán'₂ ju₄ jme₁ma₂sióin₃ i₂ráng₃ 'má₅ quió'₅. ³ Jaun₂ ca₂'í₃ Jesús caun₂ tsi₁mu₅ jaun₂, a₂lë₅ quió'₅ Si₂mu₅₄. Jaun₂ ca₂mi₃ a₂jio₃ 'éi₂ ca₂juig₄ guë₄ le₃ne₄ jmig₂. Jaun₂ ca₂guá₂ 'ñio'₃ tsi₁mu₅, jaun₂ ja₁jaun₂ ca₂jme₃lióg₃ ca₂jme₃tñin₂₃ dsa₂. ⁴ Jme₁ca₂dsan₃ cuë₂₃ jág₁, ca₂tsí'₃ Si₂mu₅₄:

—Jñiog'₅₄ mu₅ quiáng'₂ le₃ja₁jí'₂ guë₄. Ja₁në₅ tiong₂ 'má₅ quiáng'₂, jaun₂ lén'₂ 'nia'₂ ju₄.

⁵ Jaun₂ ca₂ñag₃ Si₂mu₅₄:

—Të₅, la₂ tio'₅₄ bá₄ jnia'₅₄ ta₁jma₃ nei₅ ca₂néi₃, tsá₃ 'ein₂ já'₂ ma₂lag₅ jnia'₅₄; la₁ i₁tion₃ caun₂ ia₁ a₂juá'₂ 'ne₂.

⁶ Jme₁ca₂jmo₃ le₂jaun₂, ca₂lia'₂ juin₅ lin₃ ju₄ i₃ton'₅₄, jnia'₅₄ mei'₂ tsá₃ ca₂gag₂ bá₄ 'má₅ quió'₅ tioin'₅₄. ⁷ Jaun₂ ca₂bí₂ gu₂ ca₂të'₃ riin'₅₄ i₂jme₁tion'₅₄ tsi₁mu₅ caun₂, ia₁jaun₂ ja₃lén₂ jme₃'o₅₄. Jme₁o₃lén₂ 'éi₂ ně₃, ca₂jme₃cain'₂ ta₁tñ₃ tsi₁mu₅, jnia'₅₄ mei'₂ tsá₃ ca₂i₃guein'₅₄ bá₄ tioin'₅₄. ⁸ Jme₁ca₂jág₃ Si₂mu₅₄ ně₅, ca₂ñó₃ ca₂chi₃jnë₃ ne₄ Jesús, ca₂juá'₂:

—Jnia'₃ cau₅ quió'₃, Te₁gui'₅₄, ia₁ dsa₂ cha₂ dsáu₁ bá₄ jniá₂.

⁹ Ia₁ dsi₂gó'₃ dsí₅ Si₂mu₅₄ quian'₅₄ riin'₅₄, ia₁ a₂ñí'₄ lë₃ 'ñio₅ juin₅ ju₄ i₂ca₂join₃. ¹⁰ Ján₃ bá₄ le₂jaun₂

* **5:1** Ján₃ bá₄ chei₂ “Jmi₁ñí'₄ Galilea.”

Jacobo quian'⁵⁴ Juan⁵⁴ i₂lín⁵ ja₁ŋi'⁵⁴ Zebedeo, ia₁co₂dsia₅ jme₁i₂nioi⁵⁴ quian'⁵⁴ Si₂mu⁵⁴ tsáin'² ju₄. La₁Jesús ně₃ ca₂juá'² ca₂tsí'³ Si₂mu⁵⁴:

—Tsá₃jmo₂gang'³. Ia₁tē₂le₃ne₄ju₁i₅ja₁dsau⁵⁴ ně₅, ŋí'¹jmag'⁵⁴ dsa₂mi₂güig'³ ju₁lia'² jmag'² ju₄.

¹¹ Jme₁ma₂ně₂jŋióg'³ tsi₁mu₅ quió'⁵ le₃ja₁quein₂chei'⁵⁴ jmig₂, ja₁jaun₂ ca₂dsia₃ jē₂, ca₂i₃lén₂ bá₄quian'⁵⁴ 'éi₂.

Ca₂jme₃'lión₂Jesús jan₂ dsa₂ i₂lín₅ 'mé'₅ 'iog₅

(Mateo 8:1-4; Marcos 1:40-45)

¹² Co₂ráun₂ jme₁'en⁵⁴ Jesús caun₂ juig₂, jaun₂ca₂dsióg₃ jan₂ dsa₂dso'⁵⁴ i₂lín₅ 'mé'₅ 'iog₅, ta₁jain₂. Jme₁ca₂jín₂ Jesús, ca₂tóin₂ tē₂rē₃'éin₂ 'uē₃, ca₂mi₃tion⁵⁴-jan₃, ca₂juá'²:

—Te₁gui'⁵⁴, chi₂jua'² 'niog'², jŋia'⁵⁴ lia'² 'ne₂ bá₄qui'⁵⁴ jmig₄ chi'⁵⁴ dso₄ a₂lín₅.

¹³ Jaun₂ ca₂néi'³ gu₂, ca₂ní'³ quió'⁵ dsa₂ dso'⁵⁴, ca₂juá'²:

—'Nio₃ jniá₂. Jmo⁵⁴ bá₄ le₁jín₃'₃.

Dsi₂jui₅ jme₁ca₂juá'² jaun₂, ca₂jŋia'³ 'mé'₅ 'iog₅ a₂jme₁lín₄. ¹⁴ Jaun₂ ca₂jmo₃ Jesús 'éi'₃ a₂tsá₃ 'ein₂tsí'₃ 'i₁jan₂. Jŋia'⁵⁴ lia'² ca₂juá'²:

—La₁ gua₂ o₂jme₁jnia₅ ne₄ jme₂dsa₂, o₄quió'⁴ a₂ma₂le₁jín₃'₃, o₂jmo₄ o₂jen'⁵⁴ ne₄ Diú₄ con'² lě₅ 'Éi'₃ quió'⁵ Moisés, † co₂'nió'⁴ a₂jang'⁵⁴ jág₁ dsau₅ jín₄ dsa₂.

¹⁵ La₁ tē₂le₃ lě₅ guē₄ ca₂i₃'ag⁵⁴ bá₄ jág₁ ca₂le₂con₂ a₂'in₅ dsa₂ Jesús. Jaun₂ i₂juin₅ lín₃ dsa₂ i₂jme₁tē₁ja₂lén₂ ŋi'² ja₂néi₃ jág₁, i₂'nio₃ 'lión₂ ně₃ 'e₂

† 5:14 'Í₂ Levítico 14.

caun₂ jmi₁uig₅ chain₂. ¹⁶ La₁ jme₁dsi₂uúin₃ bá₄ 'ni'₂ juig₂ ja₁con'₂ 'njog₅, chi₃lén'₂ Diú₄.

Ca₂jme₃'lión₂Jesús jan₂ dsa₂'lian'₂
(Mateo 9:1-8; Marcos 2:1-12)

¹⁷ Ca₂lë₃ co₂ráun₂ jme₁'en₅₄ Jesús jme₂tiin₂₃ dsa₂. Le₂con₂ jaun₂, jme₁tián'₄ i₂lin₅₄ dsa₂ fariseos, tē₅juá'₅ nē₃, i₂ja₂lén₂ le₂con₂ 'uē₃ Galilea, Judea, juig₂ Jerusalén nē₃. Ia₁ jui₅bí₂ quió'₅ Te₁gui'₅₄ bá₄ jme₁'io₅ Jesús, a₂jme₂'lióin₂ dsa₂. ¹⁸ Tē₃jē₄ jaun₂, ca₂dsi₃lén₂ dsa₂ le₁jñiai₂₃ jan₂ dsa₂ 'lian'₂, dsín₂ ne₄ tsi₁jein₁. Jme₁'no'₂ juí₅ dsi₃toin'₅₄ dsi₂néi₂, jme₁dsi₃quio₂₃ ne₄ Jesús. ¹⁹ Ia₁ tsá₃ ca₂dsó'₂ 'a₂ lia'₂ dsi₃toin'₅₄, ia₁ a₂ñí₄ lë₃ juin₅ dsa₂ tion'₅₄, jaun₂ ca₂uig₂ le₃co'₅₄ tsi₁'né₅. Jaun₂ ca₂niá₃ jē₄ gua'₅₄ lag₁, jaun₂ ca₂sió₂ lia'₂ jma₃quian'₅₄ tsi₁jein₁, dsi₂jo₂ jaun₂, ne₄ Jesús. ²⁰ Jme₁ca₂jág₃ Jesús a₂'én₂ dsa₂ 'éi₂ 'ñio₅ lin₃, jaun₂ ca₂juá'₂:

—'Ne₂ dsa₂, ma₂rē₂'én₄ bá₄ dsáu'₂.

²¹ Jaun₂ nē₃ ca₂jme₃lióg₃ tē₅juá'₅ quian'₅₄ dsa₂ fariseos nē₃ ca₂i₃jñia₅ dsí₅: “¿I₂'ein₂ bá₄ nē₅ jmái'₂ mi'₅₄ Diú₄ a₂juá'₂ le₂nē₅? 'I₁jan₂ tsá₃ 'ein₂ lé₂ le₃'én₂ dsáu₁ dsa₂, jñia'₅₄ lia'₂ Diú₄ bá₄.” ²² La₁ a₂lí₄ rē₂ bá₄ Jesús 'e₂ a₂qui₂dsi₂jñia₅ dsí₅ dsa₂ 'éi₂, jaun₂ ca₂juá'₂:

—¿'E₂ bá₄ lë₃ dsi₂jog₅ 'au'₂ 'nia'₂ le₂nē₅? ²³ ¿'E₂ a₂'ua₁ guē₄ ta₁, a₂juá'₄ jniá₂ juig₅₄ dsa₂ la₂: “Ma₂rē₂'én₄ dsáu'₂”, o₃ a₂juig₅₄ 'e₂ jniá₂: “Nau₂, ñi₄”? ²⁴ Ia₁ dse₃ jaun₂. La₂ jmo₅₄ jniá₂ ia₁jaun₂ le₃ñi'₅₄ 'nia'₂ a₂'io₅ bí₂ 'éi'₃ Jaun₅ dsa₂ mi₂güig₃ ne₄ gua'₅₄ 'uē₃ a₂qui₃'éin₂ dsáu₁ dsa₂.

Jaun₂ guē₄ ca₂tsí'₃ dsa₂ 'lian'₂:

—'Ne₂ juí₂g₂ jniá₂, nau₂, quion₂ tsi₁jein₁ quiáng'₂, guan'₂.

²⁵ Dsi₂jui₅ jaun₂ të₃ já₅g₅ ca₂le₃jín₃, ca₂nau₂ ca₂cáun₃ tsi₁jein₁ quió'₅ ca₂ñái'₃ jme₂juin'₂ Diú₄.

²⁶ Jaun₂ ca₂i₃gó'₃ dsí₅ ca₂le₃jín₃, ca₂jme₃juin'₂ Diú₄ ně₃. Jaun₂ të₃jě₄ dsi₂gó'₃ dsí₅ jaun₂, qui₂ca₂tsí'₃ riin'₅₄:

—Jmí₄g₄ ně₃ ca₂tě₂ ne₄ jniog₄ a₂dsi₂gó'₃ dsí₅.

Ca₂tě'₃ Jesús Leví

(Mateo 9:9-13; Marcos 2:13-17)

²⁷ Cang₂ jaun₂ ca₂o₃'iin₃ táng₃. Ja₁ñó₄ jaun₂, ca₂jín₂ jan₂ i₂chen₂ Leví i₂cán₂ 'lia'₅₄ a₂ca₂tín₂ dsi₂tan₅₄, guá₅ ja₁dsi₂qui₅ dsa₂ 'lia'₅₄. Jaun₂ ca₂juá'₂ Jesús:

—Ñia₅ chi₁co'₅₄ quió₃.

²⁸ Ja₁jaun₂ ca₂dsia₃ jě₂, ca₂nau₂ ñó₃ quiong'₅₄.

²⁹ Ca₂i₁jmo₅₄ Leví caun₂ má₃ pa₁ dsi₂né₂ quió'₅ o₄quió'₄ Jesús, jaun₂ ca₂ñi'₂ juin₅ dsa₂ i₂cán₂ 'lia'₅₄ riin'₅₄. Juin₅ bá₄ dsa₂ sián'₂ ně₃ qui₂ca₂guě'₃ quiain'₅₄. ³⁰ La₁ dsa₂ fariseos quian'₅₄ të₅juá'₅ quiáin₅, chi₂ca₂'iin₃ dsa₂ i₂ma₂quian'₅₄ Jesús, ca₂juá'₂:

—¿'E₂lě₃ qui₂quě'₂ qui₂'ág'₂ 'nia'₂ co₂dsia₅ quian'₅₄ dsa₂ i₂cán₂ 'lia'₅₄ ně₅, dsa₂ i₂le₁cán'₄ dso₄ ně₃?

³¹ Jaun₂ ca₂ñag₃ Jesús:

—Ma₁ tsá₃ të₅mí₅ 'nió'₅ quió'₅ dsa₂ i₂le₁'ág₄ dse₃ dsí₅; dsa₂ i₂le₁dso'₅₄ bá₄ 'nió'₅ quió'₅. ³² Tsá₃ ta₁ jaun₂ guio₃ jniá₂ a₂tě₄ dsa₂ dsen₃; a₂tě₄ dsa₂ i₂le₁cán'₄ dso₄ bá₄ jniá₂ guio₃, ia₁jaun₂ dsi₁quén'₅ dsí₅.

Ca₂ñi'₃ dsa₂ Jesús ju₁lia'₂ a₂jme₂'in₅₄ dsa₂

(Mateo 9:14-17; Marcos 2:18-22)

33 Jaun₂ dsa₂ 'éi₂ ně₃ ca₂tsí'₃ Jesús:

—¿'A₂ guë'₂ lia'₂ i₂gú'₃ jme'₂in₅₄ dsa₂ i₂quian'₅₄ Juan₅₄, jë₂ qui₂tsí'₅ Diú₄, le₂jaun₂ bá₄ dsa₂ quián₅ fariseos ně₃, la₁ dsa₂ quiáng'₂, guë'₅ 'ín'₂ bá₄?

34 Jaun₂ ca₂jéin'₃ Jesús jág₁:

—¿Lé₂ le₃chi₁quian'₄ 'nia'₂ jmig₄ jme'₃in₅₄ ju₁lia'₂ dsa₂ i₂té₄ ja₁jen'₂ gu₂ dsa₂, chi₂jua'₂ jaun₂ bá₄ guá₅ guë'₂ dsa₂ ñe'₂ i₂jen'₂ gu₂? 35 La₁ já₅ jmig₄ jë₁ma₂ñia'₃ dsa₂ ñe'₂ 'éi₂; jmig₄ jaun₂ guë'₄ ma₂lé₂ jme'₃in₅₄.

36 Ján₃ bá₄ ca₂juá'₂ Jesús jág₁ jáng'₅ léi₄ la₂:

—Ma₁ tsá₃ 'ein₂ dsa₂ tíong₅ 'nau₅₄ 'mí'₂ 'mí₂ tsi'₁ 'mí'₂ gui'₅₄. Ia₁ ně₁jua'₂ ca₂jmo₃ le₂jaun₂, a₂ñia'₅₄ guéi₃ bá₄ caun₂ caun₂, ton'₂ tsá₃ ma₃rë₂ quin₅ tsi'₁ 'mí'₂ gui'₅₄ quian'₅₄ 'nau₅₄ 'mí₂. 37 Ján₃ guë'₂ tsá₃ tia'₂ dsa₂ vino 'mí₂ ni₁lau₂ gui'₅₄, ia₁ ně₁jua'₂ ca₂jmo₃ dsa₂ le₂jaun₂, a₂ne'₂ bá₄ ni₁lau₂ gui'₅₄ quian'₅₄ dsió'₁ vino 'mí₂; téin₃ bá₄ vino, ton'₂ dsi₃'én₂ ni₁lau₂ gui'₅₄ ně₃.

38 Jaun₂ lë₃, lau₂ 'mí₂ bá₄ 'nió'₅ tia'₃ dsa₂ vino 'mí₂, ia₁jaun₂ rë₂ lé₂ 'í₁ le₃tín₃. 39 Ján₃ bá₄ le₂jaun₂ ju₁lia'₂ i₂ma₂'in'₅ vino gui'₅₄ a₂ma₂ron₂, tsá₃ jiá₃ dsi'₅ 'ín'₂ vino 'mí₂ a₂të₂ca₂jlen'₃. “Ia₁ tió'₅ a₂gui'₅₄” bá₄ juá'₂.

6

*Guén₂ dsa₂ quián₅ Jesús míg₂ trigo caun₂ jmig₄ sa₅₄
(Mateo 12:1-8; Marcos 2:23-28)*

1 Caun₂ jmig₄ sa₅₄, ca₂ñi₅ Jesús caun₂ ja₁nau₂ ja₁ñia₄ trigo. Jaun₂ ca₂gág₃ dsa₂ i₂quiain'₅₄ mí'₂ trigo, qui₂ca₂guéin₂ ca₂guë'₃. 2 Jaun₂ jme'₁ca₂jág₂ i₂lin₅₄ dsa₂ fariseos, jaun₂ ca₂juá'₂:

—¿'E₂ lë₃ jmo'₂ 'nia'₂ a₂tsá₃ 'i₄ 'éi'₃ jmo₃ dsa₂ jme'₁jmig₄ sa₅₄?

Jaun₂ ca₂ŋag₃ Jesús:

³ —ǂTsa₁ ma₂'í₂ 'nia'₂ ja₁juá'₂ a₂ca₂jmo₃ David quiain'₅₄ riin'₅₄ jme₁ca₂tá'₂ i₁cón'₅? ⁴ Ca₂'í₃ dsi₂néi₂ quió'₅ Diú₄ ca₂can₃ i₁ŋí'₄ ŋjió₅ a₂'i₄ 'éi'₃ a₂guě'₃ jmá'₃ jme₂dsa₂. Ca₂guě'₃, ca₂cuě'₃ riin'₅₄ i₂jme₁quiain'₅₄ ně₃.

⁵ Ca₂juá'₂ Jesús ján₃:

—Jaun₅ dsa₂ mi₂güí₃g bá₄ i₂quian₅ 'éi'₃ ne₄ quió'₅ jmig₄ sa₅₄.

Dsa₂ i₂rě₂já'₃ caun₂ gu₂

(Mateo 12:9-14; Marcos 3:1-6)

⁶ Co₂ráun₂ táng₃ caun₂ jmig₄ sa₅₄ ca₂lě₃, ca₂'í₃ Jesús guá'₅ sinagoga, ca₂jme₃tiin₂₃ dsa₂. Jě₄ jaun₂ jme₁'en₅₄ jan₂ dsa₂ i₂rě₂já'₃ gu₂ ne₁. ⁷ Ca₂tio₃g dsa₂ fariseos quian'₅₄ tě₅juá'₅ chi₂jua'₂ jme₃'lióin₂ 'éi₂ tě₃ jmig₄ sa₅₄, ia₁ jme₁'no'₂ jui₅ 'a₂ lia'₂ jmo₃ dsáu₁ 'éi₂. ⁸ La₁ a₂ŋi₅ rě₂ bá₄ Jesús 'e₂ a₂dsi₂jio₅g dsí₅ dsa₂ 'éi₂ tióin₂, jaun₂ ca₂tsí'₃ dsa₂ i₂rě₂já'₃ gu₂:

—Nau₂, ŋia₅ dsi₂jo₂ la₂.

Ca₂nau₂ bá₄ dsa₂ 'éi₂ ca₂ŋó₃. ⁹ Jaun₂ ca₂tsí'₃ Jesús dsa₂ i₂tióin₂ já₅g:

—La₂ ŋag₄ jniá₂ caun₂ 'nia'₂: ǂ'E₂ 'i₄ 'éi'₃ jmo₃ dsa₂ jui₁lia'₂ jme₁jmig₄ sa₅₄? ǂA₁dse₃, o₃ a₂'lig'₅₄ 'e₂? ǂA₂lióin₂ dsa₂ mi₂güí₃g riin'₅₄, o₃ a₂ŋag'₃ 'e₂?

¹⁰ Jaun₂ ca₂jín₂ ca₂le₃jín₃ dsa₂ i₂tióin₂ le₃lág'₃ quió'₅, jaun₂ ca₂tsí'₃ dsa₂ dso'₅₄:

—Nei'₅₄ gog'₂.

Jaun₂ ca₂néi'₃. Dsi₂jui₅ jaun₂ bá₄ ca₂lág₃ gu₂. ¹¹ La₁ ca₂rě₃'né₃ bá₄ dsa₂ jain₂ jain₂ tióin'₅₄, ca₂jme₃lió₃g ca₂tsí'₃ riin'₅₄ 'e₂ jmái'₂ Jesús.

Ca₂qui_{ón}'₂ Jesús guida₃-tín₂ dsa₂ i₂chein₃ 'a₂ guě₃ já'₄ chei₃

(Mateo 10:1-4; Marcos 3:13-19)

¹² Ca₂lě₃ tē₃jě₄ jmig₄ jaun₂, ca₂ŋó₃ Jesús jui₅ caun₂ má'₂ a₂chi₂i₁lein'₄ Diú₄. Tē₁jma₃nei₅ bá₄ ca₂ŋi₅ chi₂lén'₂ Diú₄. ¹³ Jme₁jnia₃ táng₃ jaun₂, ca₂tě'₃ dsa₂ i₂quiain'₅₄, jaun₂ ca₂quióin'₂ guida₃-tín₂ 'éi₂. I₂'éi₂ ně₃ ca₂quiain₃, i₂chen₄ quiáin₅.* ¹⁴ Le₂la₂ jme₁chein₂: Si₂mu₅₄ i₂ca₂quiain₃ Pe₄; Drě₄ rin'₅₄ Si₂mu₅₄; Jacobob quian'₅₄ Juan₅₄ ně₃; Fe₂li₄, Bartolomé, ¹⁵ Tě₅₄, To₁má₄, Jacobo† i₂lín₅ ja₁ŋi'₅₄ Alfeo; Si₂mu₅₄ i₂lín₅ cananista. † ¹⁶ Judas rin'₅₄ Jacobo; quian'₅₄ Judas Iscariote§ i₂ca₂dsióg₃ ca₂'ni₃ Jesús cang₂.

Jme₂tin₅ Jesús juin₅ lín₃ dsa₂

(Mateo 4:23-25)

¹⁷ Jme₁ca₂sióin₃ má'₂ jaun₂, quiain'₅₄ 'éi₂, jaun₂ ca₂nau₂ caun₂ ja₁lě₄ ja₁jo₂. Ja₁jaun₂ ně₃ jme₁ma₂le₁ŋi'₂ juin₅ lín₃ dsa₂ i₂chan₂ ta₁caun₂ 'uě₃ Judea, i₂ja₂lén₂ Jerusalén, ca₂le₃jě₃ juig₂ te₁'i₁ le₂tan₅₄ chei'₅₄ jm₁ŋí'₄ ja₁niog₅ juig₂ Tiro quian'₅₄ Sidón ně₃, ¹⁸ ia₁ 'nio₃ dsa₂ nag₃ jág₁ quió'₅ Jesús, ton'₂ ia₁ 'nio₃ 'lióin₂ 'e₂ caun₂ dso₄ niog₅ lín₅. Le₂jaun₂ guě'₂ dsa₂ i₂chan₂ uig₅ co₂jmóg'₂ jme₂dsi₂ 'lín'₅₄, ja₁jaun₂ qui₂ca₂'líoin₂ bá₄ ján₃. ¹⁹ Qui₂ca₂'náu'₃ ju₁5 a₂ní₁'₃ quió'₅ Jesús, ia₁ jme₁'io₅ 'éi₂ bí₂ a₂jme₁jme₂'lióin₂ ca₂le₃jín₃.

* **6:13** griego: apóstolous (dsa₂ i₂chen₄). † **6:15** o₃, Santiago.

† **6:15** griego: Celotes, co₂'nió'₄ dsa₂ i₂nau₂ quen₅; jan₂ i₂'nio₃ táun₂ 'uě₃ 'éi'₃ quió'₅ Roma. Jma₃quén₅ ca₂quioin₃ le₃on₃ Si₂mu₅₄ 'éi₂, ia₁ ŋí₄ lě₃ mei'₂ tsá₃ ca₂ne₅₄ a₂chein₂. § **6:16** o₃, Judas i₂chan₂ Cariot; o₃ Judas i₂tě₂jín₁.

Ju₁lia'₂ a₂dse₃, quian'₅₄ a₂tsá₃ dse₃ lia'₂ chan₂ dsa₂
(Mateo 5:1-12)

20 Jaun₂ ca₂jín₂ ca₂le₃jín₃ i₂ma₂quai_{in}'₅₄, jaun₂ ca₂juá'₂:

—'E₂ guě₄ dsen'₃ 'nia'₂ dsa₂ i₂chang'₂ ñég'₂ le₃ne₄ Diú₄, ia₁ 'nia'₂ bá₄ ca₂tíng'₂ ja₁goin₂.

21 'E₂ guě₄ dsen'₃ 'nia'₂ i₂chang'₂ 'ong'₅₄ rě₂ně₃, ia₁ 'ág'₄ bá₄ 'au'₂. Dsen'₃ 'nia'₂ i₂qui'₂-o₅ jmig₄ ně₃, ia₁ ñág'₄ bá₄ 'nia'₂.

22 'E₂ guě₄ dsen'₃ 'nia'₂ jě₁ma₂ca₂jme'₃ iog'₅₄ dsa₂, a₂'uág'₂, jě₁ma₂tě₂ rě₁tě₃'o'₂, quiong₃ dsa₂ a₂'ling'₅₄ o₄quió'₄ Jaun₅ dsa₂ mi₂güí'₃.

23 'Jmo₄ 'nia'₂ 'io'₂ 'ñio₅ lin₃, quian₂ 'nia'₂ o₂'ñio₃ 'au'₂ jě₁ma₂tě₂ jmig₄ jaun₂, ia₁ le₂ně₅ bá₄ guéi'₁ 'nia'₂ juě'₂ 'liang'₅₄ guei'₅₄ i₂juí'₃. Ia₁ le₂ně₅ bá₄ ma₂jmo₃ dsa₂ can'₅₄ quiáin₅ ca₃ma₂líg'₂ ma₂jmaí'₂ dsa₂ i₂jme'₁ě₂ jág₁ quián₅ Diú₄.

24 'La₁ 'e₂ guě₄ juí'₂ 'nia'₂ dsa₂ cha₂ cu₄, ia₁ ma₂gue'₅₄ bá₄ 'nia'₂ liang'₅₄.

25 'E₂ guě₄ juí'₂ 'nia'₂ i₂chang'₂ quile₁'ág'₃ 'au'₂, ia₁ já₅ jmig₄ jě₁le₃chang'₂ 'ong'₅₄. 'E₂ guě₄ juí'₂ 'nia'₂ i₂chan₂ co₂ñág₂ jmig₄ ně₃, ia₁ já₅ bá₄ jmig₄ jě₁tóng'₁ 'lia'₂ 'au'₂ qui'₁-áu'₂.

26 'Juí'₂ bá₄ 'nia'₂ jě₁ma₂tě₂ rě₁qui₃'ag₃ dsa₂ dse₃, ia₁ le₂ně₅ bá₄ ca₂jmo₃ dsa₂ can'₅₄ quiáin₅, ca₂'in₃ dse₃ dsa₂ juí₁gan₂ i₂jme'₁ě₂ jág₁ ma₂líg'₂.

A₂jme₃ nio₃ dsa₂ juí₁lia'₂ dsa₂ i₂'iog'₅₄
(Mateo 5:38-48; 7:12)

27 'La₁ 'nia'₂ dsa₂ i₂nag₅, juá'₅ jniá₂: Jme₁'nió₄ 'nia'₂ dsa₂ i₂'iog'₅₄, jmo₄ a₂dse₃ ja₁con₂ dsa₂ i₂ja₂uin₅₄ dsí₅ jág₂. 28 Caun₂ dse₃ bá₄ qui₁'íng'₄ i₂'ag₅

'lig'⁵⁴; chi₁len'⁵⁴ 'nia'₂ Diú₄ o₄quió'₄ i₂lë₁co₂jmóg'₂.
 29 Chi₂jua'₂ 'ein₂ ca₂jnáu₃ ca₂ton₂ rë₂jog'₂, jein'⁵⁴
 le₃ca₂ton₂ táng₃ o₁jnáu₄; chi₂jua'₂ 'ein₂ ca₂jñiá'₂
 'mi'₂ dsiog₂ quiáng'₂, le₂jio₅ tsíng'₂ a₂qui'⁵⁴ cuë'⁵⁴
 ján₃, o₁quion₂. 30 Jui'₁ein₂ guë'₃ mi₅ 'e₂ mi₂₃, cuë'⁵⁴;
 chi₂jua'₂ 'e₂ caun₂ a₂jñiá'₂ quiáng'₂, tsá₃ ma₃mag'⁵⁴.
 31 Jui₁lia'₂ a₂'niog'₂ 'nia'₂ jmo₃ dsa₂ja₁cong'₂, le₂jaun₂
 jmo₄ 'nia'₂ ja₁coin₂.

32 'Ia₁ në₁jua'₂ 'nióg'₃ jmá'₃ lia'₂ dsa₂ i₂'nio₃ 'nia'₂
 guiong'⁵⁴, ¿'e₂ ti₁'mag'₄ ca₂tíng'₂ në₁jua'₂ le₂jaun₂?
 Ia₁ ján₃ bá₄ le₂në₅ jmo₅ jui₁lia'₂ dsa₂ i₂'no₅ dso₄.
 33 Ia₁ chi₂jua'₂ jmo'₂ 'nia'₂ dse₃ jmá'₃ lia'₂ ne₄ dsa₂
 i₂jmo₅ dse₃ ja₁cong'₂, ¿'e₂ ti₁'mag'₄ ca₂tíng'₂ në₁jua'₂
 le₂jaun₂? Ia₁ le₂në₅ bá₄ tion'⁵⁴ dsa₂ i₂'no₅ dso₄ ján₃.
 34 Në₁jua'₂ qui₂dsi'₂ 'nia'₂ jmá'₃ lia'₂ le₃quió'₅ i₂lín'₂
 'nia'₂ le₃qui'⁵⁴ jmíg₄ jéin'₃ quiáng'₂, ¿'e₂ ti₁'mag'₄
 ca₂tíng'₂ në₁jua'₂ le₂jaun₂? Ia₁ le₂në₅ bá₄ tion'⁵⁴ guë'₂
 dsa₂ i₂'no₅ dso₄ ján₃, qui₂dsi₂ quió'₅ r'in'⁵⁴ jain₂ jain₂,
 ia₁jaun₂ qui₃gue₃ quió'₅ r'in'⁵⁴. 35 La₁ 'nia'₂ në₃,
 jme₁'nió₄ i₂'iog⁵⁴, jmo₄ a₂dse₃ ja₁coin₂; dsi₄ 'nia'₂
 quió'₅, tsá₃ jmo₄ 'nia'₂ jua'⁵⁴ a₂ñí₄ 'i₅ 'au'₂ a₂jaun₂.
 Jaun₂ le₂në₅ bá₄ guéi'₁ 'nia'₂ juë'₂ 'liang'⁵⁴, ton'₂ léng'₂
 chi'₂-guein₂ quián₅ Diú₄ i₂guá₅ guei'⁵⁴. Ia₁ i₂'ua₁
 dsí₅ 'éi₂ ján₃ ja₁con₂ dsa₂ 'lin'⁵⁴, i₂jñia'⁵⁴ ti₁'mag'₄ tsá₃
 cuë₂₃. 36 Jui₁len'⁵⁴ 'nia'₂ dsa₂ ñéi₂ dsí₅, jui₁lia'₂ ñéi₂
 dsí₅ Diú₄ N'éi'₅.

Tsá₃ lë₁cáun₂ 'nia'₂ 'í₁ quió'₅ r'íng'₂
(Mateo 7:1-5)

37 'Tsá₃ lë₁cáun₂ 'nia'₂ 'í₁ ja₁con₂ r'íng'₂, jaun₂ tsá₃
 con₂ Diú₄ 'í₁ ja₁con₂ 'nia'₂ guiong'⁵⁴. Tsá₃ 'lián'₅ 'nia'₂

ríng'₂ jaun₂ tsá₃ 'liog'₃ Diú₄ guion'₅₄ 'nia'₂ ján₃. 'Én₃ 'nia'₂ dsáu₁ ríng'₂, jaun₂ bá₄ 'én₂ Diú₄ dsáu'₂ 'nia'₂ guiong'₅₄. 38 Qui₂jme₁'on₁ 'nia'₂ ríng'₂, jaun₂ bá₄ jme₃'o₅₄ Diú₄ 'nia'₂, cuë₃ caun₂ 'éi'₃ tí₅, a₂tó'₅ tiá₂, a₂qui₂rë₂'ñiá'₄ rë₂ lín₃, ca₂lia'₂ tsá₃ ma₃to'₂ ja₁'éi'₄ jmo₃, tó'₃ të₂jmu₂ quián'₂ 'nia'₂. Ia₁ 'éi'₃ jaun₂ bá₄ to'₂ Diú₄ jui₁lia'₂ lë₅ 'éi'₃ a₂dsián'₅ 'nia'₂ ríng'₂ guiong'₅₄.

39 Jaun₂ ca₂cuë₃ Jesús jág₁ jáng'₅ léi₄ la:

—¿Lé₂ le₃ñia₃ dsa₂ ten₄ jan₂ dsa₂ ten₄ rñin'₅₄ a₂'ë₃ jui₅? ¿Tsa₁ tsi₃sén'₂ jua'₅₄ jui₁lia'₂ caun₂ siá₅?

40 'I₁jan₂ jui₁lia'₂ i₂t₅ si₂ tsá₃ lín₅ jua'₅₄ a₂juñin'₂ guë₄ con'₂ guë₄ të₅ quián₅; ca₂lia'₂ ca₂dsó'₃ si₂ quió'₅, jaun₂ guë₄ lé₂ le₃dsióg₄ lén₂ con'₂ lín₅ të₅ quián₅.

41 '¿'A₂ bá₄ lia'₂ ññiá'₄ 'ne₂ jme₁qui₅ pí'₁ a₂'i₄ jme₁ne₁ ríng'₂, ton'₂ tsá₃ leng'₅₄ a₂'i₄ ni₁'ma₂ chá₅ jme₁ne'₄ 'ñiag'₂? 42 ¿'A₂ bá₄ lia'₂ tiá₂ 'au'₂ juig'₅₄ ríng'₂: “Rñin'₅₄ jniog₄, cuë₄ jmig₄ o₁dsi₁₂ jme₁qui₅ pí'₁ a₂'i₄ jme₁ne'₄”? ¡'Ne₂ dsa₂ i₂lë₁jmo₅-dsáu₅ o₁ne₁! Dsi₄ de'₂ ññiá₅ ni₁'ma₂ chá₅ a₂'i₄ jme₁ne'₄ 'ñiag'₂, jaun₂ guë₄ le₃jag'₅₄ rë₂ dsí'₁ qui₅ pí'₁ a₂'i₄ jme₁ne₁ ríng'₂.

*Të₂le₃ 'a₂ lia'₂ lë₅ míg₂ a₂'ag₅ bá₄ ni₁'ma₂, jáng'₅ léi₄
(Mateo 7:17-20; 12:34-35)*

43 'Tsá₃ cha₂ ni₁'ma₂ dse₃ jua'₅₄ a₂lé₂ le₃'ag₃ míg₂ 'lig'₅₄; ján₃ guë'₂ le₂jaun₂ tsá₃ cha₂ ni₁'ma₂ 'lig'₅₄ jua'₅₄ lé₂ le₃'ag₃ míg₂ dse₃. 44 Le₂caun₂ le₂caun₂ bá₄ ni₁'ma₂ jau'₂ 'í₁ të₂le₃ 'a₂ lia'₂ lë₅ míg₂ a₂'ag₅: ma₁ tsá₃ quñ₅ dsa₂ míg₂ higos jui₁lia'₂ ni₁'ma₂ taun₅ chei₅₄, on₃ guë'₂ lé₂ le₃cág'₃ dsa₂ míg₂ uvas jui₁lia'₂ chi₁uíng₃ taun₅. 45 Ján₃ bá₄ le₂në₅ dsa₂ në₃. Jui₁lia'₂ dsa₂ dsen₃, lia'₂ con'₂ lë₅ a₂dse₃ a₂ma₂rë₂'ma₄ të₂dsí₅,

jmo₂₃ a₂dse₃; dsa₂ i₂'lin'₅₄ ně₃, lia'₂ con'₂ lě₅ a₂'lig'₅₄
a₂ma₂rě₂'ma₄ tē₂dsí₅, jmo₂₃ a₂'lig'₅₄. Ia₁ lia'₂ con'₂
lě₅ a₂'lióng₂ ŋag₅₄ cha₂ tē₂dsí₅ dsa₂, a₂jaun₂ bá₄ 'uě₂
mi₂'o₅₄.

Tin₃ né₃ 'uig₅₄ cha₂
(Mateo 7:24-27)

⁴⁶ 'ĵ'E₂ bá₄ lě₃ tē'₅ 'nia'₂ jniá₂, “Te₁gui'₅₄, Te₁gui'₅₄”,
ton'₂ tsá₃ jmo'₂ guě'₂ 'nia'₂ a₂juá'₅? ⁴⁷ Le₂jan₂ le₂jan₂
i₂tě₁ja₂lén₂ ne₃, i₂ja₂né₃ jág₁ quió₃, ton'₂ ne'₅₄ ně₃, la₂
'ín₄ 'a₂ lia'₂ lín₅: ⁴⁸ lín₅ jui₁lia'₂ jan₂ dsa₂ i₂ca₂j₂móg'₃
'né₅, ca₂gué₃'ei₄ de'₂ jniá₅ ca₂lia'₂ ca₂tě₂ ne₄ ni₁'lau₂.
Ne₄ jaun₂ ca₂jme₃lióg₃ 'uig₅₄ 'ia'₂. Jme₁ca₂juě'₂ jmig₂,
ca₂dság'₃ jmig₂ tiá₂ 'ei₅ dso'₂ tsi₁'né₅ jaun₂. La₁
ca₂lia'₂ jnia'₅₄ tsá₃ ca₂'ŋiá'₂, ia₁ rě₂ jme₁lě₄. ⁴⁹ La₁
jui₁lia'₂ i₂nag₅ jág₁ quió₃, ton'₂ tsá₃ nei'₅₄ guě'₂ ně₃,
lín₅ jui₁lia'₂ lín₅ dsa₂ i₂ca₂chi'₃ 'ne₄ jnia'₅₄ dsí₂ ne₄
'uě₃ bá₄, tsá₃ 'uig₅₄ 'ia'₂ ca₂jmo₃. Jme₁ca₂dság'₃ tiá₂
'ei₅ jmig₂ dso'₂ tsi₁'né₅ jaun₂, ca₂qui₁'₃ bá₄, co₂ŋei'₅₄
ca₂'en₃.

7

Ca₂jme₃'lión₂ Jesús jan₂ dsa₂ mozo quián₅ juig₅₄
'lióg₂ romano
(Mateo 8:5-13)

¹ Jme₁ca₂dsan₃ cuě₂₃ jág₁ le₂ně₅, ca₂le₃jín₃ bá₄
dsa₂ qui₂ca₂nág₂, jaun₂ ca₂ŋó₃ jui₅ juig₂ Caper-
naum. ² Ja₁jaun₂ jme₁guá₄ jan₂ juig₅₄ 'lióg₂ romano
i₂jme₁'ŋio₅ jan₂ dsa₂ i₂jme₁jme₂ti₃ ne₅₄, i₂jme₁'nioi₃
lín₃. 'Éi₂ ně₃ jme₁dso'₅₄ jme₁ma₂rě₂quai₂₃ jóin₂.
³ Jme₁ca₂rě₃ŋi₅ juig₅₄ 'lióg₂ a₂'in₅ dsa₂ Jesús, jaun₂
ca₂chein₃ jan₂-on₃ dsa₂ can'₅₄ quián₅ dsa₂ judíos
a₂i₃lén₂ a₂i₁mi₂ ne₄ Jesús a₂jiá₃ jme₃'lióin₂ dsa₂ mozo

quiáin₅. ⁴ Jme₁ dsi₃ léin₂ ja₁ 'en₅₄ Jesús, ca₂ m_i₃ tion₅₄-
jan₃, ca₂ juá'₂:

—Ca₂ t_{ín}₂ bá₄ gui'₅₄ juig'₅₄ 'lióg₂ 'éi₂ a₂ jme₁ 'oin'₄,
⁵ ia₁ 'ñio₅ lin₃ bá₄ 'nioi₃ dsa₂ juig'₂ go₄ jniog₄. Ia₁
'éi₂ bá₄ ca₂ jmo₃ 'éi'₃ a₂ ca₂ lág₃ guá'₅ sinagoga quián₂
jnia'₅₄.

⁶ Jaun₂ ca₂ ñó₃ bá₄ guë'₂ Jesús quian'₅₄ 'éi₂. La₁
jme₁ ma₂ ja₂ quián₃ dsi₁ léin₂ dsi₂ néi₂ jme₁ ca₂ chen₃
táng₃ gui'₅₄ juig'₅₄ 'lióg₂ jan₂-on₃ a₂ mei₅₄ quiáin₅,
a₂ quian₅ jág₁ a₂ juá'₂:

—Te₁ gui'₅₄, tsá₃ cán'₁ ta₁ jua'₅₄ a₂ gog'₅₄ tē₂ ja₁ quió₃,
ia₁ tsá₃ ca₂ t_{ín}₂ jua'₅₄ a₂ o₁ 'ú'₃ dsi₂ néi₂ quió₃. ⁷ 'Uig'₅₄
jaun₂ i₂ jiog₅ dsi₃, ζi₂ 'ein₂ bá₄ jniá₂ jua'₅₄ nei₅₄ 'ñió₃
tē₂ ja₁ cong'₂? La₁ tió'₅ jua'₅₄ ca₂ jon₄ bá₄ jág₁ quiáng'₂
tē₂ nē₅, ia₁ jaun₂ jnia₃ dso'₅₄ mozo quiáng₃. ⁸ Ia₁ le₂ nē₅
bá₄ jniá₂ 'ñió₃ chéng'₅ jme₁ ti₅₄ ne₄ juig'₃, ján₃ bá₄
niog₅ gu₃ 'lióg₂ i₂ te₁ neg'₄. Nē₁ jua'₂ ca₂ juig'₂ jniá₂,
“Gua₂ jó₄”, ja₁ jaun₂ dsó₃ bá₄; nē₁ jua'₂ ca₂ juig'₂ “Ñia₅
ja₁ lá₃”, jiá₃ bá₄. Ján₃ guë'₂ le₂ jaun₂ nē₁ ca₂ juig'₂
“O₂ jmo₄ a₂ la₂ a₂ ó₃”, a₂ jaun₂ dsi₃ jmó₂ bá₄.

⁹ Jme₁ ca₂ nág₂ Jesús jág₁ nē₅, ca₂ i₃ gó'₃ dsí₅ o₄ quió'₄
dsa₂ 'éi₂, jaun₂ ca₂ jéin'₃ ca₂ jín₂ dsa₂ i₂ quiain'₅₄, jaun₂
ca₂ juá'₂:

—Tē₃ dsón'₂ bá₄, ca₂ lia'₂ 'i₁ jan₂ dsa₂ chan₂ Israel
tsá₃ ma₂ ca₂ dsán'₂ jniá₂ i₂ 'én₂ lia'₂ 'én₂ dsa₂ nē₅.

¹⁰ Jme₁ ca₂ dsi₃ len₃ dsa₂ i₂ chen₄ 'éi₂ dsi₂ néi₂,
ma₂ ca₂ 'lón₂ bá₄ dsa₂ mozo i₂ jme₁ dso'₅₄.

Ca₂ jme₃ jen'₅₄ Jesús ja₁ ñi'₅₄ jan₂ 'io₅₄ 'nág₂

¹¹ Cang₂ jaun₂ ca₂ ñó₃ táng₃ Jesús caun₂ juig'₂
ja₁ chei₂ Nain, jaun₂ ca₂ jme₃ quiain'₅₄ chi'₂ dsi₂ guia₃-
tín₂ quiáin₅, i₃ léin₂ quian'₅₄ ju_in₅ guë'₄ dsa₂ sián'₂

ně₃. ¹² Jme₁ja₂quián₃ dsióg₄ ja₁dsi₂ton'₅₄ dsa₂ o₄'né₄ juig₂, ca₂jág₃ ca₂'uin₂ dsa₂ i₃'óin₃ jan₂ 'lag₄, i₂jan₂ tan₅₄ 'éi₂ ja₁ŋi'₅₄ jan₂ 'io₅₄ 'nág₂. Juin₅ lin₃ bá₄ dsa₂ juig₂ i₂jme₁quiong'₅₄ i₃'o₃. ¹³ Ca₂tá'₂ ŋéi₂ dsí₅ Te₁gui'₅₄ jme₁ca₂jág₂, jaun₂ ca₂juá'₂:

—Tsá₃ 'au₂.

¹⁴ Jaun₂ ca₂jme₃quiáin₃ ca₂níi'₃ tsi₁gu₅. Ca₂ŋia₃ bá₄ guë'₂ dsa₂ i₂jme₁le₁te₂, jaun₂ ca₂juá'₂ Jesús ca₂tsí'₃ 'lag₄:

—i'_{Ne₂} juíg₂ jniá'₂ chi'₂, nau₂!

¹⁵ Jaun₂ ně₃ ca₂guá'₂ 'lag₄, ca₂jme₃lióg₃ ca₂dsia₃ jág₁, jaun₂ ca₂jáng'₂ Jesús ne₄ chog₅₄. ¹⁶ Jme₁ca₂tě'₂ ne₄ dsa₂ a₂ca₂lě₃ jaun₂, ca₂i₃gó'₃ dsí₅ ca₂le₃jíin₃, jaun₂ ca₂jme₃juin'₂ Diú₄, ca₂juá'₂:

—Ma₂ca₂rě₃jniá'₂ jan₂ dsa₂ juin'₂ i₂'ě₂ jág₁ quián₅ Diú₄ jě₄ quián₂ jniog₄.

Juá'₂ ně₃:

—Ma₂guan₅ Diú₄ a₂jme₃'oin₅₄ dsa₂ juig₂ quiáin₅.

¹⁷ Le₂con₂ ja₁tén₄ 'uë₃ Judea, le₂con₂ ma₂quián₅ jaun₂ ně₃, qui₂ca₂rě₃ŋi₅ dsa₂ a₂ca₂jmo₃ Jesús jaun₂.

*Dsa₂ i₂ca₂chen₃ Juan₅₄ i₂chon₅ dsa₂ jmi₂g₂
(Mateo 11:2-19)*

¹⁸ Ca₂rě₃ŋi₅ Juan₅₄ ca₂le₃jě₃ a₂jaun₂, ia₁ ca₂dsia₃ dsa₂ i₂jme₁quiain'₅₄. Jaun₂ ca₂tě'₃ on₃ dsa₂ 'éi₂, ¹⁹ jaun₂ ca₂chei₃ ne₄ Te₁gui'₅₄ a₂dsi₃ŋag₅₄ chi₂jua'₂ tě₃dsón'₂ líin₅ dsa₂ i₂lě₅ jág₁ jiá₃, o₃ ŋjia₃ i₂sián'₂ 'e₂. ²⁰ Jaun₂ dsa₂ 'éi₂ ně₃, ca₂jme₃quiáin₃ con₂ Jesús jaun₂ ca₂juá'₂:

—Juan₅₄ i₂chon₅ dsa₂ jmi₂g₂ ně₂chei₃ jnia'₅₄ a₂ŋag₄ 'ne₂ chi₂jua'₂ tě₃dsón'₂ líng'₅ i₂lě₅ jág₁ jiá₃, ¿o₃ ŋjia₄ jnia'₅₄ i₂sián'₂ 'e₂?

21 Të₃jë₄ jaun₂, ca₂jme₃'lión₂ Jesús ju_in₅ lin₃ dsa₂ i₂jme₁le₁dso'₅₄, ca₂le₃jě₃ ne₅₄ jm_iuig₅ a₂jme₁le₁quian₅ dsa₂; lia'₂ jme₂dsí₂ 'lin'₅₄ ně₃ qui₂ca₂'uín'₂; qui₂ca₂jmóg'₃ jme₁ne₁ dsa₂ i₂jme₁ten₄. 22 Jaun₂ guě₄ ca₂jéin'₃ jág₁ quió'₅ 'éi₂, ca₂juá'₂:

—O₂nó'₅ 'nia'₂ o₂dsia₄ o₂chei'₅₄ Juan₅₄ 'e₂ ca₂tě₂ ne'₅₄, 'e₂ a₂qui₂ně₂nei'₂ ně₃. Qui₂jág₅ ju_ilia'₂ dsa₂ ten₄; tē₁i₂nio₄ táng₃ dsa₂ i₂tsá₃ lé₂ jme₁i₂nio₄; tē₂tsin'₅₄ le₁jín₃ i₂jme₁lín₄ 'mé'₅ 'iog₅; qui₂nag₅ táng₃ dsa₂ i₂jme₁guin₄ ně₃; le₂jaun₂ guě'₂ 'lag₄ ně₃ qui₂jein'₅₄ táng₃; ja₁con₂ dsa₂ dsi₂ñe₂ dsi₂'ag₅ jág₁ dse₃ a₂lión₂ dsa₂. 23 'E₂ guě₄ dsen₃ dsa₂ i₂tsá₃ 'ag₅ caun₂-tín₃ dsí₅ o₄quió₃ jniá'₂.

24 Jme₁ma₂i₂len₃ dsa₂ i₂ca₂chen₃ Juan₅₄ 'éi₂, jaun₂ ca₂jme₃lióg₃ Jesús ca₂tsí'₃ dsa₂ a₂'iin₂₃ Juan₅₄, ca₂juá'₂:

—¿'E₂ ca₂i₁jag'₄ 'nia'₂ lia'₂ con'₂ i₁nóg'₄ 'uě₃ quein₂ co₂'ñiog₅ jaun₂? ¿O₃ bá₄ ca₂jag'₅₄ 'nia'₂ ca₂'nau₂ ni₁'ma₂ ta₅ a₂lě₁qui₂bí₂ dsí₂ ja₁jaun₂? 25 Chi₂jua'₂ on₃ jaun₂, ¿'e₂ guě'₂ ca₂i₁jag'₄ 'nia'₂? ¿O₃ bá₄ ca₂jing'₅₄ jan₂ dsa₂ i₂qui'₂ tsin'₅₄ jlá'₁ 'e₂? La₁ on₃ le₂jaun₂. Ia₁ ñi'₅₄ bá₄ 'nia'₂, ca₂le₃jín₃ dsa₂ i₂tē₁i₂nio₄ jlán'₁ i₂qui₂cuě'₅ o₂'ñió₃ o₂jñia₃ dsi₅, i₂tion'₅₄ ju_ilia'₂ dsi₂néi₂ quió'₅ rag₅₄ bá₄ i₂le₂'éi₂. 26 Jaun₂ ně₃, ¿'e₂ guě'₂ ca₂i₁jag'₄ 'nia'₂? ¿O₃ bá₄ jan₂ dsa₂ i₂'ě₂ jág₁ quián₅ Diú₄ 'e₂ ca₂jín'₅₄ 'nia'₂? Dsón'₂ bá₄ jaun₂. Jan₂ i₂lín₅ i₂juin'₂ guě₄ lia'₂ con'₂ guě₄ jan₂ i₂'ě₂ jág₁ quián₅ Diú₄ bá₄ ca₂i₁jín'₄ 'nia'₂, juá'₅ jniá'₂. 27 Juan₅₄ bá₄ 'éi₂ i₂'in₅ Si₂ quió'₅ Diú₄ ja₁juá'₂:

Tsing₅₄ jan₂ dsa₂ quiáng₃ ne₄ ju_iquiáng'₂, jón₃,

a₂dsi₃can₅ jág₁, jmo₃ co₂jñia₅₄ jui₅.*

28 Juá'₅ jniá'₂ juíg'₂ 'nia'₂, ca₂lia'₂ 'i₁jan₂ dsa₂ tsá'₃ ma₂ca₂rē₃chán'₃ i₂juin'₂ guě'₄ lia'₂ con'₂ guě'₄ Juan₅₄. La₁, i₂lín₅ i₂me'₂ guě'₄ ja₁gon₂ Diú'₄, i₂'éi₂ lín₅ i₂juin'₂ guě'₄ lia'₂ con'₂ guě'₄ 'éi₂.

29 (Ca₂le₃jín₃ dsa₂ i₂ca₂nág₂, lia'₂ dsa₂ i₂cán₂ 'lia'₅₄ ně₃, jme₁ca₂jñó₂ jmi₂g₂ ca₂cho₃ Juan₅₄, le₂ně₅ bá₄ ca₂jme₃jniai'₂₃, Diú'₄ bá₄ i₂lín₅ i₂qui₂dsi₅ 'éi'₃ tí₅. 30 La₁ dsa₂ fariseos quian'₅₄ tē₅juá'₅ ně₃, tsá'₃ ca₂gue₃ cho₃ Juan₅₄ jmi₂g₂; le₂ně₅ bá₄ a₂ca₂rē₃jniái₂ ján₃ a₂tsá'₃ ji'₅₄ a₂jme₁'nio₃ Diú'₄ jmo₃ quiong'₅₄.)

31 —¿'A₂ lia'₂ le₃jua'₅₄ lín₅ dsa₂ i₂chan₂ jmi₂g₄ ně₃? ¿'E₂ bá₄ quian'₅₄ le₃quíng₄ lín₅? 32 Lín₅ jui₁lia'₂ lín₅ i₂bě'₅₄ i₂tón'₅ qui₂guió'₅ jmaí'₂ riin'₅₄ jě₄ 'ma'₅₄, juá'₂: Ně₂jéi₄ jnia'₅₄ te₁fi₁ o₄quián'₂ 'nia'₂,

la₁ tsá'₃ ně₂dsián'₃ 'nia'₂;

ján₃ guě'₂ ně₂jmo₁ jnia'₅₄ son₅₄ quió'₅ 'lag₄

la₁ tsá'₃ ca₂tá'₂ guě'₂ 'lia'₂ 'au'₂ 'nia'₂.

33 'Ia₁ ca₂guan₃ Juan₅₄ i₂chon₅ dsa₂ jmi₂g₂, i₂tsá'₃ jme₁guě'₅ i₁ñí'₄, on₃ guě'₂ vino jme₁'ín'₂ ně₃, ca₂'iin'₅₄ 'nia'₂ a₂'ein₅₄ jme₂dsi₂ je₂na'₅₄. 34 Ca₂guan₃ guě'₂ táng₃ Jaun₅ dsa₂ mi₂güíng₃ i₂tiin₂ guě'₅, 'ín'₂ ně₃; la₁ 'nia'₂ juá'₂ 'ín'₅ a₂lín₅ jlé₂ 'í₅, má₄ jmi₂g₃ ně₃, a₂lín₅ a₂mei₅₄ quián₅ dsa₂ cha₂ dsáu₁, quian'₅₄ dsa₂ i₂cán₂ 'lia'₅₄ quián₅ dsí₂tan₅₄ ně₃. 35 Rě₂jniá₂ bá₄ a₂ñí₄ lě₃ ñí'₂ dsí₅ Diú'₄, a₂tiin₂, tē₂le₃ quian'₅₄ 'a₂ lia'₂ lě₅ jmo₅ chí'₂-guein₂ quián₅.

'En₅₄ Jesús dsi₂néi₂ quió'₅ Si₂mu₅₄ dsa₂ i₂lín₅ fariseo

* 7:27 Malaquías 3:1.

36 Jaun₂ ca₂të₃ jan₂ dsa₂ fariseo ca₂të'₃ Jesús a₂i₁guë'₂ dsi₂néi₂ quió'₅. Ca₂'í₃ bá₄ guë'₂ Jesús dsi₂néi₂ quió'₅ dsa₂ fariseo 'éi₂ jme₁dsióg₃, jaun₂ ca₂guá₂ ne₄ mesa. 37 Të₃jë₄ jaun₂, ca₂dsióg₃ jan₂ 'io₅₄ i₂'no₅ dso₄ i₂jme₁ñi₅ juig₂ jaun₂, ia₁ jme₁ca₂rë₃ñi₅ a₂'en₅₄ Jesús guë'₅ dsi₂néi₂ quió'₅ dsa₂ fariseo 'éi₂. Jaun₂ ca₂dsióg₃ quian₅ caun₂ ni₁tsí₅ pí'₁ jlá'₁ a₂lë₅ quian'₅₄ alabastro, a₂'a₄ no'₅₄ mi₂juig₂. 38 Ca₂guá₂ 'o₂₃ cau₅ ja₁tióng₂ tag₄ Jesús, ca₂jme₃lióg₃ 'ág₂ jmig₂ 'ei₅ jme₁ne₁₂ co'₅₄ tag₄ 'éi₂. Jaun₂ ca₂jme₃quém₃ táng₃ quian'₅₄ jñi₂ dsi₅₄, jaun₂ ca₂chen'₃, jaun₂ ca₂tsáng₂ no'₅₄ mi₂juig₂. 39 Jme₁ca₂jág₃ dsa₂ fariseo i₂quió'₅ dsi₂néi₂, ca₂i₃jio₅ dsí₅: “Jua'₅₄ mei'₂ guë₃ të₃dsón'₂ dsa₂ në₅ lín₅ jan₂ i₂'ë₂ jág₁ quián₅ Diú₄, jme₁le₃lí'₄ 'a₂ lia'₂ lín₅ dsa₂ i₂ní'₅ quió'₅. Ia₁ jan₂ 'io₅₄ i₂'no₅ dso₄ bá₄ në₅.” 40 Jaun₂ ca₂juá'₂ Jesús ca₂tsí'₃ 'éi₂:

—Si₂mu₅₄, cha₂ caun₂ jág₁ a₂'nio₃ juig₅₄ 'ne₂.

—Jua'₅₄ 'ne₂, Të₅ —ca₂ñag₃.

41 Jaun₂ ca₂juá'₂:

—On₃ dsa₂ jme₁le₁rín₃ cu₄ quió'₅ jan₂ dsa₂ i₂tin₂ jme₁dsi₂ cu₄. Jan₂ jme₁rín₂ ca₂jau₅₄ mei₅ 'éi'₃ cu₄ denarios, jan₂ guë'₂ jme₁rín₂ të₂láu₃-guiá₃. 42 Ca₂'én₂ bá₄ guë'₂ dsa₂ juig₅₄ cu₄ dsá_{u1} jë₁le₃oín₃ le₂jaun₂, ia₁ tsá₃ guë'₂ qui'₅₄ jmig₄ jáng'₃. Jaun₂ tsá₃ ma₃tion₅₄ ca₂mág₃ cú₁. Jaun₂ në₃, ¿'ein₂ i₂on₃ 'éi₂ i₂'nioi₃ guë'₄?

43 Ca₂ñag₃ táng₃ Si₂mu₅₄:

—Dsa₂ i₂jme₁rín₂ guë'₄ 'lióng₂, lín₂ jniá₂.

—Dsau₅ bá₄ le₂në₅ —ca₂ñag₃ Jesús. 44 Jaun₂ ca₂jñin₂ táng₃ 'io₅₄, ca₂tsí'₃ táng₃ Si₂mu₅₄:

—¿Jing'₄ dsa₂ mí₂ la₂? Jme₁në₂'ú₃ dsi₂néi₂ quiáng'₂, tsá₃ jmig₂ në₂cuë'₅₄ a₂jñi₃ tag₃; la₁ 'io₅₄ la₂

ně₃ ma₂ně₂rang₃ tag₃ quian'₅₄ jmig₂ 'ei₅ jme₁ne₁₂,
 ton'₂ ma₂ně₂chi₃ táng₃ quian'₅₄ jñi₂ dsi₅₄. ⁴⁵ Ján₃ bá₄
 le₂jaun₂, tsá₃ ně₂chen'₅₄ quió₃ jme₁guang₁₂. 'Io₅₄
 la₂ guë'₂ ně₃, ca₂lia'₂ tsá₃ 'na₂ bá₄ caun₂ chen'₂ tag₃.
⁴⁶ Tsá₃ no'₅₄ ma₂ně₂'ág'₂ jua'₅₄ a₂ma₂ně₂tsáng'₃ dsi₃;
 la₁ 'io₅₄ la₂ guë'₂ ně₃, ma₂ně₂'ág'₂ no'₅₄ mi₂juig₂ tag₃.
⁴⁷ 'Uig₅₄ ně₅ ně₃ juá'₅ jniá₂ ia₁ a₂ñí₄ lë₃ 'lióng₂ dso₄
 jme₁rë₂cáin'₄, la₁ ma₂rë₂'én₄, a₂jaun₂ bá₄ lë₃ ñí₄ lë₃
 cuë₂₃ léi₄ a₂'nio₃. La₁ jui₁lia'₂ dsa₂ i₂ca₂juig₄ bá₄ dsá_{u1}
 rë₂'én₄, me'₂ bá₄ cuë₂₃ léi₄ a₂'nio₃.

⁴⁸ Jaun₂ guë'₄ ca₂juá'₂ ca₂tsí'₃ 'io₅₄:

—Ca₂le₃jě₃ bá₄ dsá_{u1}'₂ ma₂rë₂'én₄.

⁴⁹ Ca₂le₃jín₃ guë'₄ dsa₂ sián'₂ i₂jme₁tián'₄ ne₄ mesa
 quiaín'₅₄, ca₂dsia₃ tsí'₅ riín'₅₄:

—¿I₂'ein₂ bá₄ ně₅, ca₂të₂ dsá_{u1} dsa₂ qui₂'éin₂?

⁵⁰ La₁ Jesús ně₃, ca₂tsí'₃ dsa₂ mí₂ 'éi₂:

—Ia₁ a₂'éng'₂, ma₂ca₂lóng'₂ ně₃. Guan'₂ tei₄
 quiáng'₂.

8

Dsa₂ mí₂ i₂jme₁i₂nio₄ jme₂'on₅₄ Jesús

¹ Cang₂ jaun₂, ca₂ñi₂ Jesús le₂tan₅₄ juig₂ ca'₅₄,
 le₂tan₅₄ juig₂ pí'₁ ně₃, qui₂l₁jme₁tiin₂₃ dsa₂ jág₁
 dse₃ jui₁lia'₂ ja₁gon₂ Diú₄. Jme₁quiaín'₅₄ bá₄
 chi'₂ dsi₂guia₃-tín₂. ² Ján₃ guë'₂ jme₁quiaín'₅₄
 dsa₂ mí₂ i₂ma₂ca₂'uín'₂ jme₂dsí₂ 'lín'₅₄ quió'₅,
 i₂ma₂ca₂jme₃lióin₂ dso₄ a₂jme₁lín₄ ně₃. Jín₄ 'éi₂
 jme₁ñi₅ jan₂ i₂chen₂ María i₂të'₂ Magdalena,*
 i₂ma₂'uín'₂ Jesús guion₃ je₂na'₅₄ të₂dsí₅; ³ ján₃ bá₄

* **8:2** o₃, “i₂chan₂ Magdala.”

jme₁ŋi₅ i₂chen₂ Juana i₂lín₅ dsa₂ mí₂ quián₅ Cuza,
dsa₂ i₂niog₅ ne₄ 'e₂ a₂cha₂ quió'₅ Herodes; ján₃ bá₄
jme₁ŋi₅ i₂chen₂ Susana; i₂juin₅ bá₄ i₂sián'₂ guě₄
i₂jme₁i₂nio₄ quiong'₅₄, jme₁jme₂'o₅₄ quian'₅₄ 'e₂
a₂cha₂ quió'₅.

Jág₁ jáng'₅ léi₄ ju₁lia'₂ dsa₂ i₂séi₂ míg₂ jon₂
(Mateo 13:1-9; Marcos 4:1-9)

⁴ Lióng₂ juig₂ ja₁jme₁tón'₅ dsa₂ juí₅ dsi₂léin₂
dsi₂jín₅₄ Jesús. Jě₁ma₂le₁ŋi'₂ dsa₂ juin₅ ně₃, jaun₂
ca₂dsia₃ jág₁ jáng'₅ léi₄ la₂, ca₂juá'₂:

⁵ —Jan₂ dsa₂ ca₂ŋe₄ ja₁nau₂ ca₂i₁séi₄ míg₂ jon₂.
Jme₁ma₂'ein₅₄ séi₂ ně₃, a₂lin₅₄ míg₂ i₂ga'₅₄ le₂'i₄
juí₅ qui₂ca₂tsó'₃ dsa₂; i₁tan₅ guě'₂ ně₃ ca₂guě'₃
ca₂dsio₄. ⁶ Ca₂dsio₄ guě'₂ ně₃ ca₂l₃to'₅₄ jě₄ ni₁cang₁;
jme₁ca₂'ia₂, ca₂rě₃quéin₃ bá₄ ia₁ tsá₃ gua'₅₄ cha₂
jua'₅₄ a₂güg'₂. ⁷ Ca₂dsio₄ guě'₂ ca₂séi'₂ jě₄ ni₁taun₅.
La₁ ni₁taun₅ bá₄ tiá₂ ca₂jo₃ jme₁ca₂'ia₂. ⁸ La₁ ca₂dsio₄
guě'₂ ně₃ ca₂tín₂ ja₁dse₃ gua'₅₄; a₂jaun₂ ca₂i₃cón₃,
ca₂rau₂ dse₃ lin₃, caun₂ 'ŋiá₂-láu₂ míg₂ lia'₂ ca₂míg₂
jon₂ a₂ca₂séi₂.

Jme₁ma₂lě₅ jme₂tag₂₃ le₂ně₅, ca₂juá'₂ tiá₂:

—Chi₂jua'₂ 'ein₂ 'nia'₂ dsi₅₄ rě₂gua₄, nei₂ 'nia'₂ rě₂.

Ta₁ quí'₅ jág₁ a₂jáng'₅ léi₄
(Mateo 13:10-17; Marcos 4:10-12)

⁹ Jaun₂ ca₂ŋag₃ chi'₂ dsi₂guia₃-tín₂ 'e₂ bá₄ jein₅ jág₁
a₂cuě₂₃ jaun₂. Jaun₂ ca₂juá'₂ Jesús:

¹⁰ —Diú₄ bá₄ jmo₅ a₂rě₂ŋí'₂ 'au'₂ 'nia'₂ jág₁
a₂rě₂'ma₄ quió'₅, 'a₂ lia'₂ lě₅ ja₁goin₂. La₁ dsa₂ sián'₂
ně₃, juíg₂ jniá₂ tě₂le₃ quian'₅₄ jág₁ jáng'₅ léi₄, ia₁jaun₂:
I₂ně₂jág₃, la₁ tsá₃ le₃lí'₄ 'e₂ ně₂jág₃;

i₂ně₂néi₂ ně₃, la₁ tsá₃ le₃lí'₄ 'e₂ ně₂néi₂,
on₃ guë'₂ le₃ŋí'₂.†

*Juá'₂ Jesús 'e₂ jág₁ dsau₅ jein₅ jág₁ ju₁lia'₂ dsa₂ i₂séi₂
míg₂ jon₂*

(Mateo 13:18-23; Marcos 4:13-20)

¹¹ 'A₂la₂ bá₄ jein₅ jág₁ a₂jáng'₅ léi₄: A₂lě₅ co₂'nió'₄ míg₂ jon₂, jág₁ dse₃ quió'₅ bá₄ Diú₄ jaun₂. ¹² Ju₁lia'₂ ca₂dsio₄ míg₂ jon₂ a₂i₃ga'₅₄ le₂'i₄ ju₁ guë'₂ ně₃, le₂jaun₂ lín₅ ju₁lia'₂ ca₂dsion₄ dsa₂ i₂nag₅ jág₁ dse₃; la₁ i₂sě₃dsen₃ guë'₂ ně₃, ja₂ŋiá'₃ jág₁ dse₃ jme₁ma₂'i₄ dsí₅, ia₁jaun₂ tsá₃ ma₃le₃'éin₂ jua'₅₄ a₂lióin₂. ¹³ Co₂'nió'₄ míg₂ jon₂ a₂i₃to'₅₄ jě₄ ni₁cang₁ guë'₂ ně₃, co₂'nió'₄ lín₅ ju₁lia'₂ dsa₂ i₂guen₅ 'ŋio₂ dsí₅ jág₁ dse₃ jě₁ma₂ca₂nág₂. La₁ cang₂ jaun₂ tsá₃ tiá₂ tióin₂; lín₅ ně₂jag₄ bá₄ a₂tsá₃ jmú₄ cha₂ ju₁ jme₂dsí₂ quió'₅. Co₂'na₂ bá₄ rě₂'éin₂, ia₁ jě₁ma₂ca₂i₃ŋí₂ 'e₂ caun₂ ju₁i₅bí₂ a₂caun₂ táu₂, dsí₂lein₅ táng₃ le₃ca'₃, tí jág₁. ¹⁴ Co₂'nió'₄ jon₂ a₂ca₂séi'₂ jě₄ ni₁taun₅ guë'₂ ně₃, co₂'nió'₄ lín₅ ju₁lia'₂ dsa₂ i₂nag₅ jág₁, la₁ tě₂le₃ ne₄ ju₁ ja₁i₂léin₂ jaun₂, tě₂ ca₂juig₄ bá₄ jme₂gain₂₃ dsí₅ a₂jo₅ bí₂ a₂quian₅ o₂me'₅₄ dsí₅, a₂ja₂ dsí₅ le₃cha₂ cu₄ 'lióng₂, a₂'nio₃ cuě'₅ o₂'ŋi₃ o₂ŋia₃ dsí₅; i₂ně₅ ně₃ lín₅ co₂'nió'₄ míg₂ a₂tsá₃ ma₃lé₂ rón₃. ¹⁵ La₁ ca₂dsio₄ míg₂ jon₂ a₂ca₂séi₂ ja₁dse₃ gua'₅₄, co₂'nió'₄ lín₅ ju₁lia'₂ dsa₂ i₂dse₃ dsí₅ i₂caun₂ ne'₅₄, tsán'₂ tiá₂ jág₁ a₂nag₂₃, caun₂ ju₁n'₂ bá₄ dsí₅, 'lióng₂ a₂dse₃ rě₂ŋiá₂ a₂jmo₂₃ chain₂.

† **8:10** Isaías 6:9.

Jág₁ jáng'₅ léi₄ ju₁lia'₂ ni₁tsí₅ chi₁guí'₂ si₂
(Marcos 4:21-25)

16 'I₁jan₂ dsa₂ tsá₃ guí'₅ si₂ caun₂ ni₁tsí₅, jua'₅₄ a₂jlě₂ o₃ a₂chi'₂ né'₃ tsi₁cama 'e₂. A₂'ag₅ guei'₅₄ bá₄ dsa₂ si₂, ia₁jaun₂ jniá'₂ quió'₅ i₂dsi₂ton'₅₄. 17 Ján₃ bá₄ le₂jaun₂, 'i₁caun₂ a₂rě₂'ma₄ jlě₅ cha₂ jua'₅₄ a₂lín₂ dsa₂ a₂tsá₃ le₃jniá'₂; tion₅₄ bá₄ rě₂jniá'₂. Ján₃ guě'₂ le₂jaun₂ 'i₁caun₂ jág₁ tsá₃ cha₂ jua'₅₄ lín₂ dsa₂ a₂tsá₃ 'ein₂ le₃ŋi₅: tion₅₄ bá₄ rě₂ŋi₅ dsa₂.

18 'Quion₂ de'₂ 'nia'₂ 'í₁ rě₂ jaun₂, 'a₂ lia'₂ lě₅ nag'₂, ia₁ ju₁lia'₂ i₂ma₂ŋí'₂, Diú₄ bá₄ jmo₃ a₂le₃ŋí'₂ guě₄. La₁ ju₁lia'₂ i₂tsá₃ 'nio₃ le₃ŋí'₂ guě'₂ ně₃, ca₂tě₂ a₂jme₁ma₂ŋí'₂, lín₂, ŋŋia'₃.

Chi'₂ rin'₅₄ Jesús, quian'₅₄ chog'₅₄
(Mateo 12:46-50; Marcos 3:31-35)

19 Jaun₂ ca₂dsi₃lén₂ chi'₂ rin'₅₄ Jesús quian'₅₄ chog'₅₄, jme₁'nio₃ jme₁ŋí'₃ ca₂tě₂ ja₁'en₅₄ 'éi₂, la₁ tsá₃ lé₂, ia₁ ju₁n₅ lín₃ dsa₂ tion'₅₄. 20 Jaun₂ jan₂ dsa₂ sián'₂ bá₄ ca₂ŋag₃ jág₁ ca₂juá'₂:

—Chog'₂ quian'₅₄ chi'₂ ríng'₂ ně₅ tióin₂ ca₁'né₄, 'nio₃ jíin₂ 'ne₂.

21 Jaun₂ ca₂ŋag₃:

—Dsa₂ i₂nag₅ jág₁ quió'₅ Diú₄, ton'₂ jme₂ti₃, 'éi₂ bá₄ lín₅ cha₃, ríng'₃ ně₃.

Ca₂jmo₃ Jesús ca₂'ág₂ tei₄ jm₁ŋí'₄, ca₂ŋŋia'₃ dsí₂ ně₃
(Mateo 8:23-27; Marcos 4:35-41)

22 Co₂ráun₂ ca₂'í₃ Jesús caun₂ tsi₁mu₅, jaun₂ ca₂tsí'₃ chi'₂ dsí₂guia₃-tín₂ quiáin₅:

—Ma₃dsau₅₄ quióng₄ le₃ca₂taun₂.

Jaun₂ ca₂i₃lén₂ bá₄. ²³ Të₁lia'₂ tioen'₅₄ 'ain₂₃ jmi₁ñi'₄, la₁ 'éi₂ në₃ ca₂güin₂ bá₄. Të₃jë₄ jaun₂ ca₂'ág₂ dsí₂ tiá₂ lin₃ ne₄ jmi₂g₂. Ca₂rë₃lióg₃ i₃'a₄ jmi₂g₂ 'ñi₀'₃ tsi₁mu₅, ca₂lia'₂ ma₂lé₂ dsi₃guein'₅₄ bá₄, go'₂ lin₃ tioen'₅₄. ²⁴ Jaun₂ ca₂i₁ñei₂₃ Jesús, ca₂juá'₂:

—¡Të₅! ¡Të₅! ¡Dsi₃'éin₂ jniog₄!

Jaun₂ ca₂nau₂ bá₄ guë'₂ Jesús ca₂të₂ ca₂jéin₂ dsí₂, a₂jná'₅ jmi₂g₂ në₃. Dsi₂jui₅ le₂jaun₂ bá₄ ca₂të₁tsi'₅₄ táng₃ tei₄. ²⁵ Jaun₂ tsí'₅ chi'₂ dsi₂gua₃-tín₂:

—¿'A₂ ñó₅ a₂'én'₂ 'nia'₂?

Ca₂lia'₂ lë₁quian₅ juë'₅ lin₃ bá₄ tioen'₅₄ dsi₂gó'₃ dsí₅, dsia₂₃ tsí'₅ riin'₅₄:

—¿'Ein₂ bá₄ lín₅ dsa₂ në₅, tiin₂ jmo₃ 'éi'₃ tsí'₅ të₂ dsí₂, jmi₂g₂ në₃, ne'₅₄ a₂juá'₂?

*Dsa₂ chan₂ Gerasa i₂tion'₅₄ jme₂dsí₂ 'lín'₅₄
(Mateo 8:28-34; Marcos 5:1-20)*

²⁶ Jaun₂ guë₄ ca₂dsi₃lén₂ 'uë₃ Gerasa[†] a₂ron₅ le₃ño'₅₄ jmi₂g₂ ja₁ron₅ 'uë₃ Galilea. ²⁷ Jme₁ca₂o₂'ín₃ Jesús a₂të₁tsiin'₅₄ 'uë₃, jaun₂ ca₂jme₃quián₃ jan₂ dsa₂ juig₂ jaun₂ cau₅ quió'₅. Dsa₂ 'éi₂ në₃, líg'₂ bá₄ qui₂ca₂j₀ jme₂dsí₂ je₂na'₅₄. Líg'₂ bá₄ ñi₂₃ tsá₃ ma₃tsin'₅₄ qui'₅, on₃ guë'₂ ma₃jua'₅₄ a₂guá₅ dsi₂néi₂; tau₂ 'ñio₅ quió'₅ 'lag₄ bá₄ jme₁ma₂guá₅. ²⁸ Jme₁ca₂jíin₂ Jesús, jaun₂ ca₂guió'₃ co₂mí'₅₄, ca₂chi₃jné₃ ne₄ 'éi₂, ca₂juá'₂ tiá₂ lin₃:

—¿'E₂ bá₄ lë₃ ñe'₃ i₃tiáng'₃ jë₄ quián'₂ jniá₂, 'ne₂ Jesús Ja₁ñi'₅₄ Diú₄ i₂guá₅ guei'₅₄ lin₃? Mí₂₃ jniá₂ ne'₅₄, tsá₃ cuë₂ uig₅.

[†] **8:26** A₂lin₅₄ chog₅₄ si₂ juá'₂: “Gadara”; a₂siá'₂ guë'₂ në₃, juá'₂: “Gergesa”; ján₃ bá₄ le₂në₅

29 Ca₂juá'₂ le₂ně₅ ia₁ jme₁ma₂ně₂jmo₃ Jesús 'éi'₃ a₂o₃'in₅ jme₂dsí₂ 'lín'₅₄ quió'₅. 'Lióng₂ ráun₂ bá₄ le₂jníá'₅ jme₁ma₂ca₂jñau'₃ i₂'lín'₅₄. Jaun₂ o₁jñia'₅₄ ma₂qui₂ma₂'néi₂ dsa₂ mi₂gu₂ mi₂tag₅₄ quian'₅₄ ní₁ cadenas ia₁jaun₂ lé₂ 'í₁, la₁ ca₂le₃jě₃ bá₄ jme₁gág₅. Jme₁'liog'₂ je₂na'₅₄ a₂jme₁dsi₂ñí₃ uíng₂ gua'₅₄ quein₂ ja₁co₂'ñiog₅.

30 Jaun₂ ca₂ñag₃ Jesús:

—¿'A₂ bá₄ lia'₂ cheng'₂?

Jaun₂ ca₂ñag₃:

—Ju_{in}₅Š bá₄ cheng₂.

Le₂ně₅ ca₂juá'₂ chein₂ ia₁ a₂ju_{in}₅ je₂na'₅₄ i₂jme₁tion'₅₄ quió'₅.

31 Jaun₂ jme₂dsí₂ 'éi₂ ně₃ qui₂ca₂mi₃ tion₅₄ ne₄ Jesús ia₁jaun₂ tsá₃ guiog'₃ 'éi₂ ca₂tě₂ ja₁ca₂jein₃ chi₁dsio₅₄. 32 Jaun₂ jme₁tion'₅₄ ju_{in}₅ i₁ñí₅ caun₂ dsi₂con'₂. Jaun₂ ca₂mi₃ jme₂dsí₂ a₂cuě₃ Jesús jmig₄ a₂dsi₃toin'₅₄ quió'₅ i₁ñí₅. Jaun₂ ca₂cuě₃ bá₄ guě'₂ Jesús jmig₄. 33 Jaun₂ qui₂ca₂'u_{in}₂ bá₄ je₂na'₅₄ quió'₅ dsa₂ 'éi₂; ca₂l₃léin₂ i₃toin'₅₄ quió'₅ i₁ñí₅. Ca₂le₃jín₃ i₁ñí₅ 'éi₂ ně₃ ca₂i₁nioi₁₂ co₂'ei₅ 'lig'₅₄, qui₂ca₂sein'₃ tsag₂ siá₅ ca₂séin'₂ tě₂ dsi₂jmig₂. Ja₁jaun₂ ca₂dsain₃ ca₂'in'₃ jmig₂.

34 Jme₁ca₂tě₂ ne₄ dsa₂ i₂jme₁jmo₅ 'í₁ i₁ñí₅ 'e₂ ca₂lě₃, ca₂l₃lein₃ ca₂cuíng₃ ca₂i₁dsia₂ jě₄ juig₂, ja₁nau₂ ně₃. 35 Jaun₂ ca₂l₁len₅₄ dsa₂ juig₂ i₁jag₅₄ a₂ca₂lě₃ ja₁jaun₂. Jme₁ca₂dsi₃léin₂ ja₁'en₅₄ Jesús, ca₂jíin₂ dsa₂ i₂ma₂'u_{in}₂ je₂na'₅₄ tě₂dsí₅. Jaun₂ ma₂guá₅ con₂ Jesús ma₂qui'₂ tsin'₅₄, ma₂'en₅₄ bá₄ dsí₅. Jaun₂ ca₂i₃gó'₃ dsí₅ dsa₂ jme₁ca₂jág₂. 36 Dsa₂ i₂ca₂tě₂ ne₄ a₂ca₂lě₃

Š 8:30 griego: legión.

jaun₂, ca₂dsia₃ ca₂tsí'₃ táng₃ i₂ca₂dsilén₂ 'éi₂ 'a₂ lia'₂
 ca₂'lón₂ dsa₂ i₂jme₁tion'₅₄ je₂na'₅₄ tē₂dsí₅. ³⁷ Jaun₂
 ně₃, ca₂le₃jín₃ bá₄ dsa₂ chan₂ le₃lág'₃ juig₂ 'uē₃
 Gerasa ca₂tsí'₃ Jesús a₂o₃'in₅ ja₁jaun₂, ia₁ 'ñio₅ lin₃
 tē₂tsí'₅₄ go₂'i₃ tion'₅₄ dsa₂. Jaun₂ ca₂ñá'₃ bá₄ 'éi₂ ca₂'í₃
 táng₃ tsi₁mu₅. ³⁸ Dsa₂ i₂ca₂'uin₂ jme₂dsí₂ je₂na'₅₄
 quió'₅ ně₃, jme₁mi₂₃ ne₄ Jesús a₂jme₁dsó₃ quiong'₅₄.
 La₁ 'éi₂ ně₃ ca₂jmo₃ 'éi'₃ a₂ñia₃ bá₄, ca₂juá'₂:

³⁹ —Guan'₂ bá₄ quiáng'₂, o₂dsia₄ ca₂le₃jě₃ 'e₂
 ně₂jmo₃ Diú₄ ja₁cong'₂.

Ca₂ñá'₃ bá₄ guē'₂ dsa₂ 'éi₂ quió'₅, ca₂i₁dsia₂ le₂tan₅₄
 jë₄ juig₂ 'e₂ ca₂jmo₃ Jesús quiong'₅₄.

Ja₁míg₄ Jairo, quian'₅₄ 'io₅₄ i₂ca₂ñí'₃ tsin'₅₄ Jesús
(Mateo 9:18-26; Marcos 5:21-43)

⁴⁰ Jme₁ca₂dsián'₃ táng₃ Jesús le₃'ño'₅₄ jmig₂,
 qui₂ca₂guei₃ dsa₂ a₂'ñio₂ dsí₅, ia₁ ca₂le₃jín₃ bá₄
 jme₁ma₂le₁jñiog₂₃ tioen'₅₄. ⁴¹ Të₃jë₄ jaun₂, ca₂dsióg₃
 jan₂ dsa₂ i₂chen₂ Jairo, i₂niog₅ gu₂ guá'₅ sinagoga.
 Dsa₂ 'éi₂ ně₃ ca₂chi₃jnë₃ ne₄ Jesús jme₁dsióg₃, ca₂mi₃
 tion'₅₄-jan₃ ia₁jaun₂ dsó₃ ja₁quió'₄. ⁴² Ia₁ jme₁chan₂
 jan₂ tan₅₄ ja₁míg₄, i₂jme₁ma₂'en₅₄ con'₂ guia₃-tín₂
 ñi₂, i₂jme₁ma₂i₁jón₂. Jme₁ma₂'en₅₄ Jesús jui₅ ñó₃
 ja₁quió'₄ 'éi₂, ju₁n₅ lin₃ dsa₂ i₂i₃lén₂ quiong'₅₄, lia'₂
 qui₂rë₂quín'₅ bá₄ Jesús ñó₃.

⁴³ Jë₄ jaun₂, ñó₃ jan₂ dsa₂ mí₂ i₂dso'₅₄ ma₂guia₃-tín₂
 ñi₂ a₂tiin₂,* la₁ ca₂lia'₂ 'i₁jan₂ tsá₃ 'ein₂ ma₂ca₂tió'₃
 jme₃lió₂.

* **8:43** A₂lin₅₄ chog₅₄ si₂ juá'₂ ján₃: “Jme₁ma₂'éin₂ ca₂le₃jě₃ cu₄
 a₂jme₁cha₂ quió'₅ quian'₅₄ tē₅mí₅.”

44 'Io₅₄ 'éi₂ ně₃ ca₂jme₃quiáin₃ tē₂le₃ chi₁co'₅₄ quió'₅
Jesús. Jaun₂ ca₂níi'₃ chei'₅₄ tsin'₅₄ 'éi₂. Co₂tan₅₄
dsi₂jui₅ le₂jaun₂ bá₄ ca₂quion₂ jmi₂ 'ain₅₄.

45 Jaun₂ ca₂juá'₂ Jesús:

—ǂ'Ein₂ ně₂ní'₃ quió'₃?

Ca₂le₃jín₃ bá₄ dsa₂ ηag₂₃ juá'₂ tsá₃ ηi₅.

Jaun₂ ca₂juá'₂ Pe.₄†

—Tē₅, jág'₂ bá₄ 'ne₂ chi₁quí'₅ co₂'liog'₂ dsa₂
ca₂taun₂ ca₂taun₂ ja₂náu₅.

46 La₁ caun₂ ca₂juá'₂ bá₄ Jesús:

—Chan₂ i₂nē₂ní'₃ quió'₃, ia₁ ca₂rē₃léi₄ jniá₂ o₂'ág₃
bí₂ quió'₃.

47 'Io₅₄ ně₃, jme₁ca₂rē₃lí'₄ a₂tsá₃ ma₃lé₂ jua'₅₄
a₂'mai₃, já₃ jlein₂₃, ca₂chi₃jné₃ ne₄ 'éi₂. Tē₃ jág'₅
ca₂le₃jín₃ dsa₂ ca₂juá'₂ lia'₂ tí₅ jág'₁ 'e₂ 'uig₅₄ ca₂níi'₃
quió'₅ 'éi₂, ton'₂ ca₂járng'₃ jág'₁ dsau₅ a₂ca₂'lón₂
dsi₂jui₅ le₂jaun₂.

48 Jaun₂ ca₂juá'₂ Jesús:

—Jón₃, ne₄ ia₁ a₂'éng'₂, ca₂'lóng'₂ bá₄. Guan'₂ tei₄
quiáng'₂.

49 Tē₃jē₄ juá'₂ jág'₁ jaun₂ jme₁ca₂dsióg₃ jan₂ dsa₂
i₂chen₄ dsi₂néi₂ quió'₅ i₂niog₅ gu₂ guá'₅, ca₂juá'₂:

—Ma₂jon₅ bá₄ chi'₂ quiáng'₂. 'A₃ ma₃cuē'₂ ta₁ Tē₅.

50 La₁ ca₂nág₂ bá₄ Jesús, jaun₂ ca₂juá'₂:

—Tsá₃ lē₁jmo₂ 'lia'₂ 'au'₂. Jñia'₅₄ con'₂ 'én₃ bá₄,
jaun₂ ně₃ jag'₅₄ i₂'lión₂ bá₄ chi'₂ quiáng'₂.

51 Jme₁ca₂dsióg₃ dsi₂néi₂, tsá₃ ca₂cuē₃ jmig₄ jua'₅₄
dsi₃ton'₅₄ 'i₁jan₂ i₂sián'₂, jñia'₅₄ lia'₂ Pe₄, Juan₅₄, Ja-
cobo_† ně₃, quian'₅₄ jmá'₃ chog₅₄-jmei₂ chi'₂ 'éi₂ bá₄

† 8:45 A₂lin₅₄ chog₅₄ si₂juá'₂ ján₃: “Pe₄ quiain'₅₄ rñin'₅₄.” ‡ 8:51
o₃, Santiago.

i₃ton'₅₄. ⁵² Jaun₂ qui'₂-o₅ bá₄ dsa₂ qui'₂ dsí'₅ lin₃ tioen'₅₄, o₄quió'₄ chí'₂. Jaun₂ ca₂juá'₂ Jesús:

—Tsá₃ 'au₂ 'nia'₂; on₃jua'₅₄ i₂rë₂jon₅₄ në₅. Jñia'₅₄ lia'₂ a₂rë₂güin₃ bá₄.

⁵³ La₁ jñia'₅₄ ca₂ñí'₂ bá₄ 'éi'₂ tioen'₅₄, ia₁ ñi₅ rë₂ bá₄ a₂jme₁ma₂rë₂jon₅₄ dsón'₂ bá₄ chí'₂.

⁵⁴ Jaun₂ ca₂tñin₂ gu₂ chí'₂ 'éi'₂, ca₂juá'₂ tiá'₂:

—jón₃, nau₂!

⁵⁵ Ca₂gú'₃ táng₃ jme₂dsí'₂ quió'₅; dsi₂jui₅ jaun₂ bá₄ ca₂nau₂. Jaun₂ ca₂jmo₃ Jesús 'éi'₃ a₂cuë'₃ dsa₂ a₂guë'₃.

⁵⁶ Jaun₂ dsi₂gó'₃ dsí'₅ 'ñio₅ lin₃ chog₅₄-jmei₂. La₁ Jesús në₃ ca₂juá'₂ a₂tsá₃ 'ein₂ tsí'₃ 'i₁jan₂ a₂ca₂lë₃ jaun₂.

9

Ca₂chen₃ Jesús chí'₂ dsi₂guia₃-tñin₂ (Mateo 10:5-15; Marcos 6:7-13)

¹ Ca₂ñí'₂ Jesús chí'₂ dsi₂guia₃-tñin₂ quiáin₅ ca₂cuë'₃ jui₅bí'₂ a₂'io₃ 'éi'₃ ne₄ quió'₅ ca₂le₃jñin₃ jme₂dsí'₂ je₂na'₅₄, a₂lé₂ qui₂jme₃'lióin₂ dsa₂ jui₁'e₂ guë'₃ dso₄ niog₅ lín₅. ² Ca₂chei₃ a₂dsi₃'ë₃ jág₁ jui₁lia'₂ ja₁gon₂ Diú₄, a₂dsi₃jme₁'lioin₅₄ dsa₂ i₂le₁dso'₅₄. ³ Jaun₂ ca₂juá'₂:

—Tsá₃ 'e₂ cán'₁ 'nia'₂ 'i₁caun₂ le₂'i₄ jui₅, on₃ guë'₂ 'ma₂'i₅₄, on₃ guë'₂ tsi₁na'₅₄ on₃ guë'₂ i₁ñí'₄, on₃ guë'₂ cu₄, on₃ guë'₂ tsín'₂ 'nia'₂ siá'₂ cán'₁. ⁴ Le₂caun₂ dsi₂néi'₂ ja₁dsi₁nó'₅ 'nia'₂, ja₁jaun₂ jan'₄ 'nia'₂ ca₂lia'₂ ca₂të₂ jmig₄ a₂o₁nog'₄ táng₃. ⁵ Le₂caun₂ jui₂ja₁tsá₃ guei₅ dsa₂, co₂dsia₅ 'uin'₂ 'nia'₂ jui₂jaun₂, séi'₃ 'nia'₂ 'liog₂ tag'₅₄, a₂jmo'₂ léi₄ a₂tsá₃ ma₃'e₂ 'uin'₄ 'nia'₂ quiain'₅₄.

6 Jaun₂ qui₂ca₂'uin₂ bá₄ chi'₂ dsi₂guia₃-tín₂,
ca₂l₃lén₂ le₂tan₅₄ juig₂ i₁'ě₄ jág₁ dse₃, i₁jme₁'lioin₂₃
dsa₂ ně₃.

Ca₂jon₃ Juan₅₄ i₂chon₅ dsa₂ jmig₂
(Mateo 14:1-12; Marcos 6:14-29)

7 Jaun₂ ca₂rě₃ŋi₅ Rag₅₄ * Herodes ca₂le₃jě₃ 'e₂ niog₅
lě₂. La₁ tsá₃ caun₂ a₂i₃jio₅ dsí₅, ia₁ dsia₅ i₂lin₅₄,
Juan₅₄ bá₄ 'éi₂ ŋi₅ a₂ma₂ca₂jein'₅₄ táng₃. ⁸ I₂lin₅₄ guě'₂
dsia₅ a₂ma₂ca₂jme₃jnia₅ Elías; i₂sián'₂ guě'₂ dsia₅
a₂ma₂ca₂jen'₅₄ táng₃ jan₂ i₂jme₁'ě₂ jág₁ quián₅ Diú₄
ma₂líg'₂. ⁹ La₁ Rag₅₄ Herodes 'niog₅ guě'₂ ně₃ juá'₂:
—Jua'₂ jniá₂ 'ŋi₃ ca₂jmo₃ 'éi'₃ a₂ca₂quí'₃ dsa₂
dsi₂lag₄ 'éi₂. ¿'Ein₂ guě'₂ ně₅, tsá₃ caun₂ jág₁ guion₁₂
a₂jmo₂₃?

Jaun₂ Herodes ně₃ jme₁'no'₂ ju₁i₅ a₂jme₃jein'₂.

Ca₂jme₃tan₅₄ Jesús 'ŋiá₂ mei₅ dsa₂
(Mateo 14:13-21; Marcos 6:30-44; Juan 6:1-14)

¹⁰ Jme₁ca₂o₃len₃ dsa₂ i₂chen₄ quián₅ 'éi₂, jaun₂
ca₂dsia₃ ca₂tsí'₃ Jesús 'e₂ niog₅ ca₂jmo₃ ja₁i₁lein₅₄.
Jaun₂ ca₂jio₃ Jesús a₂i₃lén₂ con'₂ guoin₅₄ caun₂
juig₂ ja₁chei₂ Betsaida. ¹¹ La₁ tion₅₄ bá₄ ca₂i₃lén₂
dsa₂ sián'₂ jme₁ca₂rě₃ŋi₅; ca₂guei₃ bá₄ guě'₂
Jesús qui₂ca₂jme₃tag₂₃ jág₁ ju₁lia'₂ ja₁gon₂ Diú₄
ca₂jme₃'lióin₂ dsa₂ i₂jme₁le₁dso'₅₄ ně₃.

¹² Tě₂le₃ ca₂'láu₂ jmig₄ jaun₂, ca₂o₃lén₂ chi'₂
dsi₂guia₃-tín₂ ca₂tsí'₃ Jesús:

—'Ei'₂ jág₁ dsa₂, ia₁jaun₂ dsí₃lein₅ dsí₃'nióg₂
a₂guě'₃, ju₁dsi₂'nio'₂ ja₁jnia₃ le₂con₂ juig₂ pí'₁
ma₂quián₅ ně₅, ia₁ tsá₃ 'e₂ cha₂ ja₁lá₃.

¹³ La₁ Jesús guě'₂ ně₃ ca₂juá'₂:

* **9:7** griego: tetra₄ca (i₂gon₂ jmo₅ 'éi'₃ 'uě₃ Galilea).

—Cuë'₅₄ 'nia'₂ dsa₂ a₂guë'₃.

Jaun₂ ca₂ŋag₃ 'éi₂ táng₃:

—Tsá₃ 'e₂ cha₂ jua'₅₄ a₂le₃cue'₅₄ jnia'₅₄ dsa₂, jnia'₅₄ lia'₂ 'ŋiá'₂ i₁ŋí'₄ bá₄ 'i₄; quian'₅₄ on₃ i₁ju₁, jnia'₅₄ lia'₂ ně₁jua'₂ dsi₁liá₄ má₃ con'₂ tín'₂ guë'₃ ca₂le₃jín₃.

¹⁴ Con'₂ 'ŋiá'₂ mei₅ dsa₂ 'éi₂ jme₁lě₂, jmá'₃ dsa₂ ŋe'₂.

Jaun₂ ca₂juá'₂ Jesús ca₂tsí'₃ chi'₂ dsi₂guia₃-tín₂ quián₅:

—Chei'₅₄ 'nia'₂ dsa₂ jui₁tian'₄ jui₁jmo₁₂ jma₃tě₂lón₃-guián₂ lia'₂ co₂niói'₃.

¹⁵ Jaun₂ ca₂jmo₃ bá₄ guë'₂ 'éi₂ 'éi'₃ a₂tian'₃ dsa₂.

¹⁶ Jaun₂ ca₂tín₂ Jesús ta₁'ŋiá'₂ i₁ŋí'₄, le₃on₃ i₁ju₁ ně₃. Ca₂chóg'₃ ne₅₄ jui₅guei'₅₄ i₂juíg₃, ca₂jme₃ŋiói₃ a₂jaun₂. Jaun₂ guë'₄ ca₂'niai₃, ca₂cué'₃ chi'₂ dsi₂guia₃-tín₂. 'Éi₂ guë'₂ ně₃ ca₂dsi₃ó'₃ jín₄ dsa₂. ¹⁷ Ca₂le₃jín₃ bá₄ ca₂guë'₃ ca₂lia'₂ ca₂'ág'₃ dsí₅. Jme₁ca₂lě₃ jaun₂, guia₃-tín₂ tsi₁mí'₂ tá₁ ca₂cág'₃ dsa₂ jmá'₃ 'nau₅₄ a₂ca₂chóng₃.

Ca₂juá'₂ Pe₄ lia'₂ tí₅ jág₁ a₂lín₅ Jesús I₂rě₂ 'ín₁ quián₅ Diú₄

(Mateo 16:13-19; Marcos 8:27-29)

¹⁸ Co₂ráun₂ 'en₅₄ Jesús 'ŋiog₅ chi₂lén'₂ Diú₄, i₂jme₁quiain'₅₄ bá₄ chi'₂ dsi₂guia₃-tín₂, jaun₂ ca₂ŋag₃ Jesús:

—¿'E₂ 'ag₅ dsa₂ jniá'₂? ¿'Ein₂ lín₅ jniá'₂, dsia₅ dsa₂?

¹⁹ Jaun₂ ca₂ŋag₃ chi'₂ dsi₂guia₃-tín₂:

—I₂lín₅₄ dsa₂ dsia₅ a₂lín'₅ Juan₅₄ i₂chon₅ dsa₂ jmíg₂; i₂lín₅₄ guë'₂ dsia₅ a₂lín'₅ Elías; i₂lín₅₄ guë'₂ dsia₅ táng₃ a₂lín'₅ i₂sián'₂ i₂jme₁'ě₂ jág₁ quián₅ Diú₄, a₂ca₂jein'₅₄ táng₃.

²⁰ Jaun₂ ca₂ŋag₃ Jesús:

—¿'Nia'₂ guë'₂ ně'₃? ¿'E₂ guë'₂ juá'₂ 'nia'₂ 'ein'₂ lín'₅ jniá'₂?

Jaun₂ ca₂ŋag₃ Pe₄:

—'Ne₂ líng'₅ I₂rë'₂ín₁ quián₅ Diú₄.

'Ĕ₂ Jesús jág₁ a₂jóin₂

(Mateo 16:20-28; Marcos 8:30--9:1)

²¹ Jaun₂ ca₂juá'₂ Jesús a₂jmo₃ tei₄, a₂tsá₃ 'ein'₂ tsí'₃ jág₁ jaun₂. ²² Jaun₂ ca₂juá'₂ ně':

—Co₂ně₅ 'en₅₄ 'éi'₃ Jaun₅ dsa₂ mi₂güig₃ a₂dsi₃ŋí₂ uig₅ 'ŋio₅ lín₃; jme'₃iog₅₄ dsi₂gui'₅₄ can'₅₄, lia'₂ juig₅₄ jme₂dsa₂, të₅juá'₅ ně₃. Quin'₃ dsa₂ jág₁ a₂ŋag'₃, la₁ jein'₅₄ bá₄ táng₃ a₂'ni₅ jmig₄ jaun₂.

²³ Jaun₂ ca₂tsí'₃ ca₂le₃jín₃:

—Në₁juá'₂ chan₂ i₂'nio₃ jiá₃ chi₁co'₅₄ quió₃, co₂dsia₅ juí₁dsi₂'én₂ dsí₅ 'ŋiog₅, juí₁'ei₅₄ bá₄ caun₂ dsí₅ ca₂le₃jě₃ jmig₄ o₁ŋnia'₅₄ ca₂join₃, † juí₁jia₂ chi₁co'₅₄ quió₃. ²⁴ Ia₁ juí₁lia'₂ dsa₂ i₂'nio₃ le₃chan₂ dse₃ mi₂güig₃ la₂, dsi₃'én₂ quió₃; la₁ juí₁lia'₂ dsa₂ i₂quí'₃ dsí₅ juí₁dsi₂ŋí₂ 'e₂ dsi₃ŋí₂ o₄quió₃ jniá₂, lí'₂, tíin'₄ bá₄. ²⁵ Ia₁ ¿'e₂ bá₄ ta₁ jmo₃ a₂lí'₄ dsa₂ ca₂le₃jě₃ a₂cha₂ ne₄ gua'₅₄ 'uë₃ la₂, në₁juá'₂ dsi₃'éin₂ bá₄ guë'₂? ²⁶ Ia₁ në₁'ein'₂ gui'₅₄ jén'₅ o₄quió₃ jniá₂ quian'₅₄ o₄quió'₄ jág₁ quió₃, ján₃ bá₄ le₂jaun₂ le₃gui'₅₄ Jaun₅ dsa₂ mi₂güig₃ 'ag₃ jë₁ma₂tě₂ rë₁ŋjió'₂ ma₂lín₅ Rag₅₄ jlán'₁ juí₁lia'₂ jlán'₁ Jmei₂, quian'₅₄ ángeles ŋjió₅ quián₅. ²⁷ A₂dsi₂jó'₃ juig₂ jniá₂ 'nia'₂, chan₂ bá₄ 'nia'₂ i₂lín₅₄ i₂tión₂ jě₄ la₂, i₂tsá₃ dsián₃ ca₂lia'₂ ca₂tě₂ ne₅₄ bí₂ 'éi'₃ quió'₅ Diú₄.

† 9:23 lit. “juí₁quian₅₄ cróg₄ quió'₅ ca₂le₃jě₃ jmig₄.”

*Ca₂rě₃tsín₃ Jesús lia'₂ jniái₂
(Mateo 17:1-8; Marcos 9:2-8)*

28 Con'₂ jñia₃ jmig₄ cang₂ a₂ca₂juá'₂ Jesús le₂ně₅, ca₂ŋó₃ juí₅ má'₂ i₁chi₂i₁lein'₄ Diú₄, jme₁quai_{in}'₅₄ Pe₄, Jacobo, Juan₅₄ ně₃. 29 Tě₃jě₄ chi₂lėin'₂ Diú₄, ca₂rě₃tsín₃ lia'₂ jniái₂. Tsin'₅₄ ně₃ ca₂rě₃tsín₃ ca₂jnia₃ tiog₂ jau₂, ca₂lia'₂ tág₅ 'ŋio₅ lin₃. 30 Tě₃jě₄ jaun₂, ca₂jnia₃ on₃ dsa₂, dsia₂₃ jág₁ quian'₅₄ Jesús. Moisés quian'₅₄ Elías bá₄ 'éi₂. 31 Ca₂lia'₂ co₂tág₅ co₂'né'₅ bá₄ ca₂jniai₃, tióin₂ dsia₂₃ a₂niog₅ lé₂, 'mú₃ a₂gue₃ jě₄ juig₂ Jerusalén, a₂le₃ti₃ 'éi'₃ a₂'ein₅₄. 32 Tě₃ma₃i_güin₃ 'ŋio₅ lin₃ bá₄ Pe₄ quai_{in}'₅₄ rñin'₅₄, ca₂jme₃jnio₅₄ ne₅₄ ca₂jñin₂ Jesús jniái₂ co₂tág₅ quian'₅₄ dsa₂ on₃ i₂quai_{in}'₅₄. 33 Jme₁ma₂i₂uín₃ dsa₂ 'éi₂ cau₅ quió'₅, jaun₂ ca₂juá'₂ Pe₄ ca₂tsí'₃ Jesús:

—Tě₅, i₁e₂ guě₄ dse₃ lia'₂ tio'₅₄ jniog₄ ja₁lá₃! Ně₃ o₁jmó₁ 'ni₅ tsí'₁io₅ láu₃: caun₂ quiáng'₂, caun₂ quió'₅ Moisés, caun₂ guě'₂ quió'₅ Elías ně₃.

La₁ a₂lě₁ca₂juá'₂ bá₄ Pe₄, on₃juá'₅₄ jaun₂ lí'₄ a₂tě₂i₂₃ le₂jaun₂.

34 Tě₃ dsia₂₃ jág₁ le₂jaun₂, jme₁gua₃ jnei₅ ca₂jliin₃, jaun₂ guě₄ ca₂ja₃gó'₃ tióin'₅₄ jme₁ca₂i₃'én₂ 'éi₂ jě₄ jnei₅. 35 Jě₄ jnei₅ jaun₂ ca₂né'₂ jág₁, ca₂juá'₂:

—I₂la₂ bá₄ jón₃ I₂rě₂'ín₁ quiáng₃. Nei₂ 'nia'₂ jág₁ quió'₅.

36 Jme₁ma₂ně₂néi₂ jág₁ jaun₂, jua'₂ 'ŋiog₅ bá₄ Jesús ma₂chéin'₅ jme₁ca₂jág₃. La₁ jmig₄ jaun₂, tei₄ bá₄ ca₂jmo₃ tsá₃ 'ein₂ ca₂tsí'₃ 'i₁jan₂ a₂ca₂tě₂ ne₅₄ jaun₂.

*Ca₂jme₃lión₂ Jesús jan₂ chi'₂ i₂jme₁'en₅₄ jme₂dsí₂
'lín'₅₄
(Mateo 17:14-21; Marcos 9:14-29)*

37 Jme₁jnia₃, ca₂sióin₃ táng₃ má'₂ jaun₂, con'₂ gué'₂ juin₅ lin₃ dsa₂ ca₂jme₃jein'₂. 38 Tě₃ jin₄ dsa₂ jaun₂, ca₂juá'₂ tiá₂ jan₂ dsa₂ ca₂tsí'₃ Jesús:

—Tě₅, jmo₄ dse₃ 'au'₂, jin₄ co₂nio₄ chi'₂ quiáng₃, i₂jan₂ la₂ bá₄ la₂ quiáng₃ chan₂. 39 Jme₂dsí₂ 'lin'₅₄ bá₄ i₂co₂jmóg'₂ guió'₅ co₂tiá₂ jén'₅ dso₄ 'ei₂, qui₂'uě'₅ jan₅ mi₂'o₅₄. I₂'lin'₅₄ ně₃, jmóg'₂, ca₂lia'₂ jaun₂ guě₄ téi₂ ca₂lia'₂ ma₂jén'₃ uig₅ 'nio₅ lin₃. 40 Jme₁ma₂ně₂juíg₂ chi'₂ dsí₂guia₃-tín₂ quiáng'₂ a₂jme₁dsei₂₃, la₁ tsá₃ ca₂tió'₃.

41 Jaun₂ ca₂juá'₂ Jesús:

—i'En₁ jmá'₃ 'nia'₂ dsa₂ chan₂ jmig₄ ně₃ tsá₃ 'e₂ 'éng'₂! ¿Je₂liá'₂ jmig₄ jmá'₃ 'nió'₅ jmo₅₄ tió'₅ dsí₃ jin'₄ 'nia'₂? Nj₅₄ chi'₂ quiáng'₂ le₃la₂.

42 La₁ jme₁ma₂ńó₅ chi'₂ le₃ne₄ Jesús, i₃'iin₃ táng₃ ca₂tón₂ jme₂dsí₂ je₂na'₅₄ qui₂ca₂ba₂lág'₂. La₁ dsí₂jui₅ le₂jaun₂ ca₂jí₂ Jesús ca₂jéin₂ i₂'lin'₅₄, ca₂jme₃'lióin₂ chi'₂. Jaun₂ ca₂jáng'₂ ne₄ jmei₂.

43 A₂jaun₂ ně₃, ca₂l₃gó'₃ dsí₅ ca₂le₃jin₃ 'a₂ lia'₂ juin'₂ Diú₄.

*Ca₂'ě₂ táng₃ Jesús jág₁ a₂jóin₂
(Mateo 17:22-23; Marcos 9:30-32)*

Tě₃ tion'₅₄ dsa₂ dsí₂gó'₃ dsí₅ a₂jmo₅ Jesús, jaun₂ ca₂juá'₂ ca₂tsí'₃ dsa₂ guia₃-tín₂ quiáin₅:

44 —Rě₂ nei₂ 'nia'₂ jág₁ quió'₃ la₂: nj'₅₄ ta₁ ja₁dsau₅₄ ně₅, jáng'₂ dsa₂ quió'₅ Jaun₅ dsa₂ mi₂güí₃ o₄gú₃ dsa₂.

45 La₁ jág₁ jaun₂ ně₃, tsá₃ ca₂ńí'₂ dsí₅ chi'₂ dsí₂guia₃-tín₂, ia₁ tsá₃ jme₁ma₂'i₄ 'éi'₃ a₂le₃ńí'₂. Jaun₂ tsá₃ ca₂tiá₂ dsí₅ a₂ńí'₃ Jesús 'e₂ 'nio₃ juá'₂ quian'₅₄ jág₁ jaun₂.

¿'Ein₂ lín₅ i₂dsen₅₄ guě₄?
(Mateo 18:1-5; Marcos 9:33-37)

⁴⁶ Jaun₂ ca₂tsín₂ chi'₂ dsi₂guia₃-tín₂ con'₂ guioin₅₄, ne₄ jui₁lia'₂ 'ein₂ i₂lén₂ i₂dsen₅₄ guě₄ jë₄ quió'₅. ⁴⁷ La₁ jme₁ca₂rë₃lí'₄ Jesús 'e₂ a₂dsia₂₃, jaun₂ ca₂cain₃ jan₂ guein₂ ca₂dsiog₃ cau₅ quió'₅. ⁴⁸ Jaun₂ ca₂juá'₂:

—Jui₁lia'₂ dsa₂ i₂guen₅ guein₂ la₂ o₄quió'₃ jniá₂, guei₂₃ jniá₂; jui₁lia'₂ dsa₂ i₂guei₅ jniá₂, ján₃ guë'₂ guein₂₃ i₂ca₂chei₃. Ia₁ jui₁lia'₂ i₂jmo₅ me'₂ guě₄ jë₄ ca₂le₃jín'₃ 'nia'₂, i₂'éi₂ bá₄ i₂lín₅ i₂dsen₅₄ guě₄.

I₂tsá₃ 'iog₅₄ jniog₄, i₂quian'₅₄ jniog₄ bá₄ 'éi₂
(Marcos 9:38-40)

⁴⁹ Jaun₂ ně₃ ca₂juá'₂ Juan₅₄:

—Të₅, ma₂jín₄ jnia'₅₄ jan₂ dsa₂ 'uín'₂ jme₂dsí₂ je₂na'₅₄ quian'₅₄ bí₂ 'éi'₃ a₂'ó'₅ 'ne₂. Tsá₃ ma₃ca₂cuë'₅₄ jnia'₅₄ jmíg₄, ia₁ tsá₃ guë'₂ ñi₂₃ quian'₅₄ jniog₄.

⁵⁰ La₁ Jesús ně₃ ca₂juá'₂:

—Tsá₃ jmó'₂ 'nia'₂ le₂jaun₂ a₂jñig'₅₄. Ia₁ jui₁lia'₂ dsa₂ i₂tsá₃ 'iog₅₄, të₂le₃ quián₂ jniog₄ bá₄ tión₂ i₂le₂'éi₂.

I₃jen₅₄ Jacobo quian'₅₄ Juan₅₄ ca₂jí₂ Jesús

⁵¹ Jme₁ma₂ja₂quián₃ të₅₄ jmíg₄ a₂dsán'₃ táng₃ Jesús guei'₅₄ i₂juíg₃, ca₂'ág₂ caun₂ dsí₅ ca₂'í₃ jui₅ a₂dsióg₄ Jerusalén. ⁵² Ca₂chein₃ dsa₂ i₃lén₂ ne₄ jui₅ i₃jmó₂ co₂ñia₅₄ ja₁ñia₃ caun₂ juíg₂ pí'₁ niog₅ 'uë₃ Samaria. ⁵³ La₁ tsá₃ ca₂guen₃ dsa₂ Jesús ja₁jaun₂, ia₁ ca₂rë₃lí'₄ a₂'ein₅₄ jui₅ ñó₅ jui₅ Jerusalén bá₄. ⁵⁴ Jaun₂ ně₃, jme₁ca₂rë₃ñi₅ Jacobo quian'₅₄ Juan₅₄ a₂tsá₃ guei₅ dsa₂, jaun₂ ca₂juá'₂:

—Te₁gui'⁵⁴, tsa₁ dse₃ jmó₁ jniog₄ 'éi'₃ a₂sió₃ si₂
guei'⁵⁴ i₂juíg₃ ia₁jaun₂ 'én₂ juig₂ la₂?†

55 Jaun₂ ca₂jén'₃ Jesús ca₂jí₂.§

56 Jaun₂ ca₂i₃léin₂ bá₄ táng₃ juig₂ siá'₂.

Dsa₂ i₂jme'₁nio₃ jme₃quian'₅₄ Jesús
(Mateo 8:19-22)

57 Ja₁i₃léin₂ jaun₂, ca₂juá'₂ jan₂ dsa₂:

—Te₁gui'⁵⁴, 'nio₃ jniá₂ jme₁quion₁ 'ne₂ le₂con₂
ja₁gog'⁵⁴.

58 Jaun₂ ca₂ḡag₃ táng₃ Jesús:

—Jui₁lia'₂ i₁güi₅, i₂'io₅ to₄ bá₄ 'éi₂; ján₃ bá₄ le₂jaun₂
jui₁lia'₂ i₁tan₅ i₂i₂nio₄ guei'⁵⁴, tio'⁵⁴ tsag₄ bá₄ 'éi₂ ján₃.
La₁ Jaun₅ dsa₂ mi₂güig₃ ně₃ tsá₃ ja₁cha₂ quió'₅, jua'⁵⁴
ja₁lé₂ le₃jña₃.

59 Jaun₂ ca₂tsí'₃ i₂sián'₂:

—Nia₅ quian'⁵⁴ jniá₂.

La₁ ca₂ḡag₃ 'éi₂:

—Te₁gui'⁵⁴, * jui₁i₁ 'óng₃ de'₂ ḡe'₃.

60 Jaun₂ ca₂ḡag₃ táng₃ Jesús:

—Jui₁dsi₂'ón₃ 'lag₄, 'lag₄ riin'⁵⁴. La₁ 'ne₂, juíg₂ jniá₂,
gua₂ o₂'ě₃ jág₁ jui₁lia'₂ 'a₂ lia'₂ lé₅ ja₁gon₂ Diú₄.

61 Jaun₂ ca₂juá'₂ táng₃ jan₂:

—Te₁gui'⁵⁴, 'nio₃ jniá₂ nei⁵⁴ quian'⁵⁴ 'ne₂, la₁
jui₁i₁'éi'₃ de'₂ jág₁ i₂chan₂ quió₃.

62 La₁ Jesús ně₃ ca₂juá'₂:

† 9:54 A₂lin₅₄ chog₅₄ si₂ juá'₂ ján₃: “jui₁lia'₂ ca₂jmo₃ Elías.” § 9:55
A₂lin₅₄ chog₅₄ si₂ juá'₂ ján₃: “ca₂juá'₂; —Tsá₃ len'⁵⁴ 'nia'₂ guiong'⁵⁴ 'ein₂
jme₂dsí₂ ca₂jo₃ 'nia'₂, Ia₁ tsá₃ ta₁ jaun₂ já₅ Jaun₅ dsa₂ mi₂güig₃ a₂'éin₂
dsa₂, tē₂le₃ a₂lió₂ bá₄.” * 9:59 A₂lin₅₄ chog₅₄ si₂ tsá₃ chi₁ton₅ jág₁
“Te₁gui'⁵⁴.”

—Dsa₂ i₂ma₂në₂'éi₂ caun₂ dsí₅ a₂jme₃quiong'⁵⁴,
në₁jua'₂ ca₂'ág₂ caun₂-tin₃ dsí₅, lín₅ lia'₂ lín₅ jan₂
i₂jme₂lióg₃ quiá'₂ 'uë₃, jéin'₅ le₃ca'₃. Tsá₃ ta₁ tén₄ dsa₂
i₂le₂'éi₂ le₃ja₁gon₂ Diú₄.

10

Chen₅ Jesús 'nag'₂ ne₂guión₂ rë₂dsí₂ guian₃ dsa₂

¹ Cang₂ jaun₂ ca₂quión'₂ Te₁gui'₅₄ 'nag'₂ ne₂guión₂
rë₂dsí₂ guian₃ (70) dsa₂ sián'₂. * Jaun₂ qui₂ca₂chein₃
jma₃on₃ jma₃on₃ 'éi₂ i₃lén₂ ne₄ jui₅ quió'₅, ca₂le₃jé₃
juig₂ ja₁'ein₅₄ jui₅ dsióg₄.

² Ca₂tsí'₃ 'éi₂:

—Juin₅ lín₃ bá₄ dsa₂ 'nio₃ gue₃ jág₁ quió'₅ Diú₄;
lë₅ në₂jag₄ bá₄ 'lióng₂ lín₃ a₂ca₂rau₂, la₁ dsa₂ i₂jmo₃
ta₁ bá₄ tsá₃ juin₅ chan₂. Jaun₂ lë₃, mi₄ 'nia'₂ chei'₅₄
Juig₅₄ ja₁nau₂ jui₁chein₁₂ dsa₂ i₂jmo₃ ta₁ cág'₃. ³ Jag₄
'nia'₂ jaun₂, 'nia'₂ tsín₂ jniá₂ o₁nóg'₅ líng'₅ co₂'nió'₄
guein₂ já'₂ cha'₂ jin₄ dsig₂ náu₂. ⁴ Tsá₃ tsi₁na'₅₄
cán'₁ 'nia'₂, on₃ guë'₂ lau₂ tó'₅ cu₄, on₃ guë'₂ lau₂
ton₅ tag'₄ 'nia'₂ siá'₂ cán'₁. Tsá₃ jme₁'ag'₄ 'nia'₂
le₂'i₄ jui₅ jua'₅₄ a₂dsiá'₁ 'nia'₂ jág₁ uë'₂ quian'₅₄ dsa₂.
⁵ Jë₁ma₂të₂ rë₁tón'₂ 'nia'₂ dsi₂néi₂ quió'₅ dsa₂ ja₁jan'₄,
cuin₅₄ de'₂ 'nia'₂ dsa₂ Diú₄ juig'₅₄ le₂la₂: “Jui₁'ei₅
bá₄ tei₄ tion'₄ 'nia'₂ dsi₂néi₂ la₂.” ⁶ Chi₂jua'₂ dsa₂
i₂quió'₅ dsi₂néi₂ jaun₂ 'ua₁ bá₄ dsí₅, të₃'njá₄ bá₄ jág₁
a₂'ei₅ tei₄ quián'₂ 'nia'₂ ja₁coin₂. La₁ në₁jua'₂ tsá₃
le₂jaun₂, të₃'njá₄ bá₄ táng₃ ja₁con'₂ 'nia'₂ guiong'₅₄
jág₁ a₂'ei₅ tei₄ jaun₂. ⁷ Caun₂ bá₄ ja₁o₁nja'₄ 'nia'₂,
qué'₂, 'én'₂ 'nia'₂ 'e₂ caun₂ a₂niog₅ cuë'₅ dsa₂; ia₁

* **10:1** A₂lín₅₄ chog₅₄ si₂ chi₁ton₅ “'nag'₂ ne₂guión₂ rë₂dsí₂ guia₃-tín₂
(72) dsa₂ sián'₂.”

a₂co₂jaun₂ ca₂tín₂ bá₄ dsa₂ 'liain'₅₄ ta₁ quió'₅. Jaun₂ tsá₃ i₁nio'₄ 'nia'₂ le₂'í₁ 'né₅. ⁸Jë₁ma₂dsi₃nóg'₅ le₂caun₂ juig₂ ja₁guei₅ dsa₂, qué'₂ 'nia'₂ jui₁'e₂ gué₃ a₂cué₅ dsa₂. ⁹Jme₁lion₅₄ 'nia'₂ dsa₂ dso'₅₄ i₂chan₂ ja₁jaun₂, chei'₅₄: “Ma₂ja₂quián₃ bí₂ 'éi₂ quió'₅ Diú₄ ja₁con'₂ 'nia'₂.” ¹⁰La₁ në₁jua'₂ ca₂dsi₃nó'₅ 'nia'₂ caun₂ juig₂ ja₁tsá₃ guei₅ dsa₂, 'uín'₂ 'nia'₂ jë₄ calles, chei'₅₄: ¹¹“Le₂jio₅ 'liog₂ te₁'i₁ go'₄ 'nia'₂, a₂qui₂ca₂quen'₂ tag₄ jnia'₅₄, la₂ séi'₄ jnia'₅₄, a₂jmo₁ léi₄ tsá₃ ma₃'e₂ 'uag₄ jnia'₅₄ quian'₅₄ 'nia'₂. La₁ dsá₂ 'au'₂ 'nia'₂ jmo₄, ma₂ja₂quián₃ bí₂ 'éi'₃ quió'₅ Diú₄ ja₁cong'₂.” ¹²Juá'₅ jniá₂ juig₂ 'nia'₂, 'nio₅ lin₃ gué₄ uig₅ a₂'ë₂ Diú₄ jmig₄ jaun₂ ja₁con₂ dsa₂ 'éi₂, lia'₂ con'₂ gué₄ dsa₂ juig₂ Sodoma.

Juig₂ ja₁tsá₃ ne'₅₄ dsa₂
(Mateo 11:20-24)

¹³'i'E₂ gué₄ juig₂ 'nia'₂ dsa₂ juig₂ Corazín! ¡'E₂ gué₄ juig₂ 'nia'₂ dsa₂ juig₂ Betsaida! Ia₁ jua'₅₄ mei'₂ gué₃ ca₂le₃jín₃ dsa₂ chan₂ Tiro quian'₅₄ Sidón ca₂të₂ ne₅₄ ju₁lia'₂ ju₁bí₂ jué'₂ a₂niog₅ lé₂ jë₄ quián'₂ 'nia'₂ jmig₄ në₃, líg'₂ bá₄ tsá₃ ma₂quí'₂ 'mi'₂ taun₅ jme₁tiain'₃ jë₄ jua₂ në₃, jme₁jmo₃ léi₄ a₂ca₂dsi₃quén'₅ dsí₅. ¹⁴La₁ jë₁ma₂të₂ rë₁qui₃dsi₅ Diú₄ 'éi'₃, 'nio₅ lin₃ gué₄ 'nio₅ uig₅ guéi'₁ 'nia'₂ con'₂ gué₄ uig₅ a₂ca₂gue₃ dsa₂ i₂chan₂ Tiro quian'₅₄ Sidón. ¹⁵'Ne₂ gué'₂ juig₂ Capernaum, ¿a₁rong'₂ ñei₅ të₂ guei'₅₄ i₂juig₃, líng'₂? 'En₁ bá₄ 'ne₂ síong'₃ ca₂të₂ ja₁ca₂tín₂ 'lag₄.†

¹⁶'Dsa₂ i₂nag₅ jág₁ quián'₂ 'nia'₂, jág₁ quió₃ jniá₂ bá₄ nag₂₃. Dsa₂ i₂tsá₃ guen₅ 'nia'₂, jniá₂ bá₄ a₂tsá₃

† 10:15 griego: hades, co₂'nió'₄ a₂juá'₂, ja₁quió'₄ 'lag₄.

guei₂₃. I₂tsá₃ guei₅ jniá₂, ján₃ bá₄ le₂jaun₂ tsá₃
guein₂₃ i₂ca₂chei₃ jniá₂.

Ca₂dsi₃len₃ táng₃ i₂'nag'₂ ne₂guión₂ rē₂dsí₂ guian₃

17 Ca₂o₃len₃ táng₃ 'io'₂ jén'₅ ta₁'nag'₂ ne₂guión₂
rē₂dsí₂ guian₃ (70)† dsa₂ 'éi₂, jaun₂ dsia₂₃, juá'₂:

—Te₁gui'₅₄, ca₂lia'₂ jio₅ je₂na'₅₄ bá₄ nag₅ gau₂ jág₁
quián₂ jnia'₅₄ jē₁ma₂ca₂'ín₂ jnia'₅₄ 'ne₂.

18 Jaun₂ ca₂ṅag₃ Jesús:

—Ján₅. Ma₁ jág₅ bá₄ jniá₂ jme₁ca₂tán'₂ Satanás
guei'₅₄ i₂juíg₃ lia'₂ ja₁ta'₂ caun₂ si₁ṅí'₃. § 19 'Éi'₃
jaun₂ bá₄ ma₂cuē₃ jniá₂ 'nia'₂ a₂ó'₅ 'nia'₂ bí₂ 'éi'₃
a₂lé₂ le₃qui₁tsong'₅₄ dsi₂mi'₂, i₁'né₅ ně₃, a₂tiang'₃ ne₄
ca₂le₃jě₃ jui₅bí₂ a₂gu₂dsí₂ i₂'io'₅₄, ca₂lia'₂ jnia'₅₄ tsá₃
'e₂ jén'₄ 'nia'₂ guiong'₅₄. 20 La₁ tsá₃ jmo₂ 'nia'₂ 'io'₂
ia₁ a₂nag₅ gau₂ jme₂dsí₂ 'lín'₅₄ jág₁ quián'₂ 'nia'₂.
A₂jaun₂ bá₄ jmo₄ 'nia'₂ 'io'₂ ia₁ a₂ma₂le₁tong'₂ ne₄ si₂
guei'₅₄ i₂juíg₃.

Jme₂ quian'₅₄ Ja₁ṅi'₅₄

(Mateo 11:25-27; 13:16-17)

21 Hora jaun₂, ca₂jmo₃ Jme₂dsí₂ Jṅi₅ a₂'io'₂ jén'₅
lín₃ Jesús, jaun₂ ca₂juá'₂:

—Jme₂juín'₁ jniá₂ 'ne₂, Tia₅₄, Juíg₅₄ guei'₅₄ i₂juíg₃,
gua'₅₄ 'uē₃ ně₃, ia₁ ma₂ca₂'ma'₅₄ a₂nē₅ ja₁con₂ dsa₂
i₂ṅí₄ tīn₂ si₂, i₂ṅí'₂ dsí₅ ně₃, a₂ma₂ca₂jme₁jniag'₂
le₃ja₁con₂ dsa₂ i₂lín₅ lia'₂ lín₅ guein₂ i₂tsá₃ 'e₂ cuí'₅.
Dsón'₂ bá₄ jaun₂, Tia₅₄ quiáng₃, ia₁ le₂nē₅ 'ṅio₂ 'au'₂.

22 Jaun₂ ca₂jén'₃ Jesús, ca₂juá'₂.*

† 10:17 A₂lín₅₄ chog₅₄ si₂ chi₁ton₅ “ta₁'nag'₂ ne₂guión₂ rē₂dsí₂
guia₃-tīn₂ (72).” § 10:18 'Nio'₂ ja₁ton₅ Isaías 14:12-15; Apocalipsis
9:1; 12:9. * 10:22 A₂lín₅₄ chog₅₄ si₂ tsá₃ chi₁ton₅ “jaun₂ ca₂jén'₃
Jesús, ca₂juá'₂.”

—Ne'₃ jniá₂ ma₂dsia₃ o₄gu₃ ca₂le₃jě₃. Jaun₂ 'i₁jan₂ tsá₃ 'ein₂ cuin₅ 'ein₂ 'éi₂ i₂lín₅ Ja₁ñi'₅₄, jñia'₅₄ lia'₂ 'ñiog₅ bá₄ Jmei₂. Ján₃ guë'₂ le₂jaun₂, 'i₁jan₂ tsá₃ 'ein₂ cuin₅ 'ein₂ 'éi₂ lín₅ Jmei₂, jñia'₅₄ lia'₂ Ja₁ñi'₅₄ bá₄ i₂cuig₅, jaun₂ jme₂jniog₂₃ ne₄ dsa₂ i₂'ñio₂ dsí₅ Ja₁ñi'₅₄ jme₂jniog₂₃.

²³ Jaun₂ ca₂jéin'₃, ca₂tsí'₃ jmá'₃ chi'₂ dsi₂gua₃-tín₂ guioin₅₄:

—E₂ guë₄ dsen₃ dsa₂ i₂të₅ ne₄ juí₁lia'₂ a₂niog₅ jág'₂ 'nia'₂, ²⁴ ia₁ a₂dsi₂jó'₃ juá'₅ jniá₂, juin₅ rag₅₄ ma₂líg'₂, lia'₂ dsa₂ i₂jme'₁ě₂ jág₁ quián₅ Diú₄ ně₃, jme'₁ín₅ dsí₅ jme₁të₃ ne₅₄ juí₁lia'₂ a₂niog₅ të₅ ne'₅₄ 'nia'₂ rë₂ně₃, la₁ tsá₃ ca₂jág₃. Ján₃ bá₄ jme'₁ín₅ dsí₅ nag₃ juí₁lia'₂ a₂niog₅ nag'₂ 'nia'₂ jmig₄ ně₃, la₁ tsá₃ ca₂nág₂.

Jág₁ jáng'₅ léi₄: a₂dse₃ ca₂jmo₃ jan₂ dsa₂ chan₂ Samaria

²⁵ Co₂ráun₂ ca₂nau₂ jan₂ të₅juá'₅, a₂jñia'₅₄ con'₂ cáun₂ táu₂ bá₄ ca₂ñag₃:

—Të₅, ¿'e₂ 'nió'₅ jmo₅₄ jniá₂, ia₁jaun₂ tñg₅₄ ja₁le₃chang₂ co₂tan₅₄?

²⁶ Jaun₂ ca₂ñag₃ Jesús:

—¿'E₂ 'éi'₃ tio'₅₄ ne₄ Si₂ guë'₂? ¿'A₂ lia'₂ ñí'₂ 'au'₂ a₂í'₂?

²⁷ Jaun₂ ca₂ñag₃ táng₃ të₅juá'₅ 'éi₂:

—“Jme'₁nió₄ Te.guí'₅₄ Diú₄ quiáng'₂ ca₂le₃jě₃ 'au'₂, ca₂le₃jě₃ jme₂dsí₂, ca₂le₃jě₃ juí₅bí₂, quian'₅₄ ca₂le₃jě₃ a₂ñí'₂ dsei'₂ ně₃;† ján₃ guë'₂ le₂jaun₂ jme'₁nióg'₄ dsa₂ mi₂güig₃ ríng'₂ juí₁lia'₂ 'nióg'₃ 'ñiag'₂.”‡

²⁸ Jaun₂ ca₂ñag₃ táng₃ Jesús:

† 10:27 Deuteronomio 6:5. ‡ 10:27 Levítico 19:18.

—Dse₃ lin₃ bá₄ nē₂ŋag'₅₄. Nē₁jua'₂ ca₂jmo'₅₄ le₂nē₅, léng'₂ bá₄ ja₁le₃chang'₂ co₂tan₅₄.

²⁹ La₁ tē₅ 'éi₂ jme₁'nio₃ chein'₃ dse₃, jaun₂ ca₂tsí'₃ Jesús:

—¿'Ein₂ 'éi₂ dsa₂ mi₂güig₃ ríng'₃?

³⁰ Jaun₂ ca₂ŋag₃ Jesús ma₂tē₂chan'₂ jág₁ jaun₂, ca₂juá'₂:

—Jan₂ dsa₂ jme₁'en₅₄ jui₅ o₂'iin₃ Jerusalén ca₂sióin₃ a₂dsióg₄ juig₂ Jericó. Dsa₂ 'ang₂ bá₄ ca₂jo₃ ca₂chei'₃ lín₃, ca₂cuē₃ dsa₂ 'ŋio₅ lín₃ jŋia'₅₄ mei'₂ tsá₃ ca₂ŋag'₃. Jaun₂ guē₄ ca₂l₃lein₅. ³¹ Jē₂ lia'₂ jui₅ jaun₂ 'en₅₄ jui₅ já₅ jan₂ jme₂dsa₂. La₁ con'₂ ca₂quiá₂ cau₅ bá₄ ca₂ŋi₅ jme₁ca₂jág₂. ³² Ján₃ bá₄ ca₂já₃ táng₃ jan₂ dsa₂ i₂lín₅ tsi₁jon₂ Leví, con'₂ ca₂quiá₂ cau₅ bá₄ ján₃, ca₂ŋi₅. ³³ La₁ jan₂ dsa₂ i₂chan₂ Samaria 'ein₅₄ jui₅, ca₂dsióg₃ ja₁ron₅ dsa₂ dso'₅₄, ca₂tá'₂ ŋéi₂ dsí₅ jme₁ca₂jág₂. ³⁴ Jaun₂ ca₂jme₃quiáin₃ cau₅ quió'₅, ca₂'ág₂ aceite quian'₅₄ vino ja₁rē₂cuí'₃, ca₂lio₃. Jaun₂ ca₂tág₃ co₁lag₁ bú'₄ quiáin₅, ca₂jio₃ caun₂ 'né₅ ja₁jŋia₅ dsa₂. Ja₁jaun₂ ca₂jmo₃ 'í₁. ³⁵ Jme₁jnia₃ jaun₂, ca₂dsi₂ tin₃ cu₄ 'ua'₂ ca₂cuē'₃ dsa₂ juig₅₄ dsi₂néi₂, ca₂juá'₂: “Jmo₄ co₂nio₄ 'í₁ dsa₂ nē₅. Nē₁jua'₂ 'e₂ ca₂'éng'₃ guē₄ quiáng'₂, la₂ bá₄ jáng'₄ jē₂ma₂guióng'₃.” Nē₃ nē₃ jaun₂. ³⁶ ¿'Ein₂ dsa₂ i₂ún₂ 'éi₂ líng'₂ ca₂jmo₃ dsí₅ a₂lín₅ dsa₂ mi₂güig₃ rin'₅₄ dsa₂ i₂ca₂j má'₂ dsa₂ 'ang₂?

³⁷ Jaun₂ ca₂ŋag₃ táng₃ tē₅juá'₅:

—I₂ca₂tá'₂ ŋéi₂ dsí₅ dsa₂ 'éi₂.

Jaun₂ ca₂ŋag₃ táng₃ Jesús:

—Guan'₂, le₂nē₅ jmo₄ 'ne₂ ján₃.

Ca₂dsi₀g₃ Jesús dsi₂néi₂ quió'₅ Marta quian'₅₄ María

³⁸ Con'₂ tioen'₅₄ jui₅, ca₂'í₃ Jesús caun₂ juig₂ pí'₁. Ja₁jaun₂ ca₂guei₃ jan₂ dsa₂ mí₂ i₂chen₂ Marta dsi₂néi₂ quió'₅. ³⁹ 'Éi₂ ně₃ jme₁chan₂ jan₂ riin'₅₄ i₂chen₂ María. 'Éi₂ ně₃ tei₄ bá₄ ca₂guá₂ cau₅ mi₂tag₄ Te₁gui'₅₄, nag₂₃ jág₁ a₂juá'₂ 'éi₂. ⁴⁰ Marta guē'₂ ně₃ 'ein₅₄ tsá₃ rē₂jīn₅₄ jmo₂₃ ta₁ a₂cha₂ dsi₂néi₂, jaun₂ guain₃ o₃chi'₅₄ Jesús, ca₂juá'₂:

—Te₁gui'₅₄, ħtsa₁ dsan₂ 'au'₂ a₂tsá₃ 'e₂ jme₂'o₅₄ 'io₅₄ ríng'₃? 'Nió₃ bá₄ 'eng₅₄ tsá₃ rē₂jīng₅₄ jme₂tī₅₄. Chei'₅₄ ju₁jme₂'o₅₄.

⁴¹ Jaun₂ ca₂ḡag₃ Te₁gui'₅₄:

—Marta, Marta, jág₅ bá₄ jniá₂ 'ḡio₅ tsá₃ rē₂jīng'₅₄ 'eng'₅₄ dsan₂ 'au'₂ 'lióng₂ ta₁ a₂jmo'₂. ⁴² La₁ caun₂ bá₄ a₂dsen₅₄ guē₄ a₂ca₂tín₂ dsa₂ nag₃. María ríng'₂ ně₃, ně₂quió'₃ a₂dse₃ guē₄, jaun₂ 'i₁jan₂ tsá₃ 'ein₂ le₃jñiá'₂ a₂ma₂nē₂quió'₃.

11

*Jme₂tag₅ Jesús 'a₂ lia'₂ chi₃lén'₂ dsa₂ Diú₄
(Mateo 6:9-15; 7:7-11)*

¹ Co₂ráun₂ jme₁'en₅₄ Jesús chi₂lén'₂ Diú₄. Jme₁ca₂lě₃ jaun₂, ca₂juá'₂ chi'₂ dsi₂guia₃-tín₂ quiáin₅:
—Te₁gui'₅₄, jme₁tag₅ 'a₂ lia'₂ chi₂lén'₄ jnia'₅₄ Diú₄, ju₁lia'₂ ca₂jme₃tag₅ Juan₅₄ ca₂jme₃tīn₂₃ dsa₂ quiáin₅.

² Jaun₂ ca₂juá'₂:

—Le₂la₂ jua'₅₄ 'nia'₂ jē₁ma₂tě₂ rē₁chi₁leng'₄ Diú₄:
Tia₅₄, 'ne₂ i₂ḡéi'₂ guei'₅₄ i₂juíg₃*

* **11:2** A₂lin₅₄ chog₅₄ si₂ tsá₃ chi₁ton₅ “ne₂ i₂ḡéi'₂ guei'₅₄ i₂juíg₃.”

jui₁jme₂gó'₃ dsa₂ a₂rë₂njió₄ a₂cheng'₂.

Jui₁le₅₄ bá₄ 'éi'₃ quiáng'₂,

jui₁le₅₄ bá₄ a₂'ñio₂ 'au'₂ 'ne₂, ne₄ gua'₅₄ 'uë₃,

jui₁lia'₂ lë₂ guei'₅₄ i₂juíg₃.†

³ Cuë₄ a₂'nió'₅ que₅₄ jnia'₅₄ jmíg₄ në₃.

⁴ 'Én₃ dsáu₁ jnia'₅₄,

jui₁lia'₂ 'én₅ jnia'₅₄ dsáu₁ rin'₅₄.

'A₃ cuë₂ jmíg₄ jiá₃ jui₅bí₂ a₂cáun₂ táu₂,

të₂le₃ lio₄ bá₄ o₄gú₃ i₂së₃dsen₃.‡

⁵ Ca₂juá'₂ Jesús në₃:

—Jua'₅₄ mei'₂ guë₃ le₃jua'₅₄, chan₂ jan₂ 'nia'₂

i₂dsióg₄ a₂'uë₂ quió'₅ a₂mei₅₄ quián₅, tē₂, juá'₂: “Jmó₄

dse₃ 'au'₂ rin'₅₄ jniog₄, dsi₄ 'ni₅ i₁ñí'₄. ⁶ Ia₁ lia'₂ guan₅

quió₃ jan₂ a₂mei₅₄ quiáng₃ 'ein₅₄ jui₅; ia₁ tsá₃ 'e₂ cha₂

'i₁caun₂ quió₃ a₂le₃cuë₄.” ⁷ Dsa₂ dsi₂néi₂ në₃ lé₂

le₃ñag₃ tē₃ rë₂quiain₂₃: “Tsá₃ cuë₂ o₂me'₅₄ dsi₅, ia₁

ma₂chi₁jnág₅ o₄'né₄ quió₃; chi'₂-guein₂ quiáng₃ në₃

ma₂tiáin'₅ le₁güín₃. Jaun₂ tsá₃ lé₂ no₅₄ jua'₅₄ cuë₅₄

a₂mi'₂.” ⁸ Jaun₂ juá'₅ jniá₂, tion₅₄ bá₄ náu₃ cuë₃

ca₂le₃jë₃ 'e₂ a₂mi₅ 'éi₂, on₃jua'₅₄ jmo₃ ia₁ lë₅ a₂mei₅₄,

të₂le₃ 'uig₅₄ ia₁ a₂ñí₄ lë₃ tion₅₄ mi₃ bá₄. ⁹ Jaun₂ le₂në₅

bá₄ juíg₂ jniá₂ 'nia'₂: Mi₄ 'nia'₂, jaun₂ ñeg'₂ bá₄; 'niai'₂

'nia'₂, jaun₂ dsiain'₂; quein₄ 'nia'₂ o₄'né₄ té₃, jaun₂

niá₂. ¹⁰ Ia₁ jui₁lia'₂ i₂mi₅ 'e₂ mi₅, gue₂₃. Le₂jaun₂

jui₁lia'₂ i₂'no'₂ 'e₂ 'no'₂, dso'₂ bá₄. Le₂jaun₂ guë'₂

quió'₅ jui₁lia'₂ i₂të₂, niá₂ bá₄ o₄'né₄.

¹¹ 'O₃ bá₄ chan₂ i₂lin₅₄ 'nia'₂ jmo₅, jë₁ma₂ca₂mi₃

guein₂ quiáng'₂ i₁ñí'₄, ¿cuë'₂ 'nia'₂ ca₂míg₂ ni₁cang'?

† 11:2 A₂lin₅₄ chog₅₄ si₂ tsá₃ chi₁ton₅ “jui₁le₅₄ bá₄ 'éi'₃ quiáng'₂, jui₁le₅₄

bá₄ a₂'ñio₂ 'au'₂ 'ne₂ ne₄ gua'₅₄ 'uë₃, jui₁lia'₂ lë₅ guei'₅₄ i₂juíg₃.” ‡ 11:4

A₂lin₅₄ chog₅₄ si₂ tsá₃ chi₁ton₅ “të₂le₃ lio₄ bá₄ o₄gú₃ i₂së₃dsen₃.”

O₃ nə₁jua'₂ ca₂mii₃ jan₂ i₁ju₁, ʔcu₁in'₅ 'nia'₂ jan₂ dsi₂mi'₂? ¹² O₃ jə₁ma₂ca₂mi₃ ca₂míg₂ mi₂jlag₂, ʔo₃ bá₄ cu₁in'₅ jan₂ i₁'né₅ 'e₂? ¹³ Chi₂jua'₂ 'nia'₂ dsa₂ mi₂güí₃ i₂'nau'₂ dso₄ chang'₂, ting'₂ cuē'₂ bá₄ chi'₂-guein₂ quiáng'₂ a₂dse₃, j'ě₂ guě₄ bá₄ Néi'₅ 'nia'₂ i₂guá₅ guei'₅₄ cu₁in₃ Jme₂dsí₂ Jñi₅ quiáin₅ quió'₅ ca₂le₃jín₃ i₂mi₅!

Juá'₂ dsa₂ a₂'io₅ Jesús jui₅bí₂ quió'₅ Be'elzebú
(Mateo 12:22-30; Marcos 3:19-27)

¹⁴ Co₂ráun₂ táng₃ jme₁'en₅₄ Jesús dsein₂₃ jan₂ jme₂dsí₂ je₂na'₅₄ i₂jmo₅ a₂tsá₃ lé₂ dsia₃ dsa₂ jág₁. Jme₁ca₂o₃'ín₃ je₂na'₅₄ quió'₅ dsa₂, jaun₂ guě₄ ca₂dsia₃ táng₃ dsa₂ 'éi₂ jág₁. Jaun₂ ca₂i₃gó'₃ dsí₅ dsa₂ tioen'₅₄. ¹⁵ La₁ i₂lín₅₄ guě'₂ ca₂dsia₃ 'iin₂₃ Jesús:

—Qui'₅₄ i₂ně₅ jmig₄ 'u₁in'₂ je₂na'₅₄ quian'₅₄ jui₅bí₂ quió'₅ Be'elzebú, i₂lín₅ juig₅₄ je₂na'₅₄.

¹⁶ I₂lín₅₄ guě'₂ ně₃, a₂jñia'₅₄ con'₂ cáun₂ táu₂ bá₄ jme₁mi₂₃ a₂jme₁jmo₃ Jesús a₂sió₃ caun₂ léi₄ guei'₅₄ i₂juig₃. ¹⁷ La₁ a₂ñi₅ rě₂ bá₄ Jesús 'a₂ lia'₂ dsi₂jio₅ dsí₅ dsa₂ 'éi₂. Jaun₂ lě₃ ca₂juá'₂:

—Jui₁lia'₂ caun₂ juig₂ nación, tioen'₅₄ mi'₅₄ guioin₅₄, tioen'₅₄ le₁dsoin'₅₄, dsi₃'én₂ bá₄ juig₂ jaun₂. Le₂jaun₂ guě'₂ jui₁lia'₂ caun₂ dsi₂néi₂ tion'₅₄ dsa₂ le₁dsoin'₅₄ tsá₃ caun₂ jág₁ 'ei₅, ján₃ bá₄ dsi₃'én₂ dsi₂néi₂ jaun₂. ¹⁸ Le₂ně₅ bá₄ ján₃, nə₁jua'₂ ca₂lě₃ le₁dso'₅₄ jui₅bí₂ quió'₅ i₂sě₃dsen₃, ʔ'a₂ guě'₂ lia'₂ lé₂ le₃qui'₅₄ guě₄ jmig₄ jio₃ ne₄ta₁ quió'₅? Juá'₅ jniá₂ le₂ně₅ ia₁ juá'₂ 'nia'₂, quian'₅₄ bí₂ quió'₅ Be'elzebú bá₄ a₂'u₁n'₄ jniá₂ je₂na'₅₄. ¹⁹ La₁ chi₂jua'₂ le₂jaun₂ 'u₁in'₄ jniá₂ quian'₅₄ bí₂ quió'₅ Be'elzebú, ʔ'ein₂ guě'₂ quió'₅ bí₂ quian₅ i₂quian'₅₄ 'nia'₂ a₂lé₂ le₃'uág'₂ ján₃?

Jaun₂ ju₁lia'₂ lě₅ jmo₅ dsa₂ 'éi₂ bá₄ jióg'₂ 'í₁ a₂tsá₃ tí₅ jág₁ quián'₂ 'nia'₂. ²⁰ La₁ chi₂jua'₂ jaun₂ quian'₅₄ ju₁bi'₂ a₂tin₂ Diú₄ lon₄ jniá'₂ dsa₂ o₄gú₃ je₂na'₅₄, jaun₂ le₂ně₅ bá₄ jau'₂ jág₁ dsau₅ a₂ma₂gua₅ bí₂ 'éi'₃ quió'₅ Diú₄ ja₁con'₂ 'nia'₂.

²¹ 'Ju₁lia'₂ jan₂ dsa₂ 'uan'₂ chain₂ rě₂jáin₁, 'io₂₃ ca₂le₃jě₃ a₂'nió'₅ quió'₅ jmo₃ 'nei₂, jaun₂ lě₅ 'í₁ ca₂le₃jě₃ 'e₂ tio'₅₄ dsi₂néi₂. ²² La₁ nē₁ca₂já₃ jan₂ i₂'uan'₂ guě₄ lia'₂ con'₂ guě₄ 'ŋiog₅ 'éi₂, nē₁ca₂jo₃ ně₃, i₂'éi₂ guě'₂ ně₃ jniá'₂ ca₂le₃jě₃ a₂ŋí₄ lě₃ bein'₂ jmo₂₃ a₂'uain'₂. Jaun₂ jmo₂₃ dsióg₂ ca₂le₃jě₃ a₂ca₂lí'₃.

²³ 'Ju₁lia'₂ dsa₂ i₂tsá₃ chén'₅ le₃quió₃ jniá'₂, i₂'iog₅₄ bá₄ 'éi₂. Ju₁lia'₂ i₂tsá₃ cág'₅ co₂lě₅ quian'₅₄ jniá'₂, jniá'₅₄ jmo₅ tsí₁rě₂ja₅₄.

Jme₂dsí₂ 'lin'₅₄ i₂dsián'₅ táng₃

(Mateo 12:43-45)

²⁴ 'Ju₁lia'₂ jan₂ jme₂dsí₂ 'lin'₅₄ i₂o₂'in₅ quió'₅ dsa₂, dsi₂ŋí₃ le₂tan₅₄ ja₁quein₂ dsi₂'nio'₂ ja₁jŋia₃. Nē₁jua'₂ tsá₃ dso'₂ ja₁'í₂ ně₃, 'no'₂ dsí₅: “Nég'₄ táng₃ dsi₂néi₂ quió'₃ ja₁o₂'ing₃.” ²⁵ Jē₁ma₂dsiáin'₃, jein'₂ táng₃ dsa₂ 'éi₂ ma₂lín₅ co₂'nió'₄ bá₄ caun₂ dsi₂néi₂ a₂chí'₅ rě₂, rě₂'ia'₅₄, rě₂lag₄ ně₃. ²⁶ Jaun₂ dsó₅ táng₃ dsi₂quián₂ guě₄ guion₃ jme₂dsí₂ i₂'lin'₅₄ guě₄ lia'₂ 'ŋiog₅, jaun₂ dsi₂tian'₂ ca₂le₃jíin₃ tē₂dsí₅ dsa₂ 'éi₂. Jaun₂ dsa₂ 'éi₂ ně₃ 'ŋio₅ lín₃ guě₄ le₃'lín'₅₄ dsióg₄ lia'₂ con'₂ guě₄ jme₁lín₄ le₂jniá₅. Š

'A₂ lia'₂ 'nió'₅ jmo₃ dsa₂ ia₁jaun₂ le₃chain₂ dse₃

²⁷ Tě₃ 'en₅₄ Jesús dsia₂₃ le₂ně₅, ca₂juá'₂ tiá₂ jan₂ dsa₂ mǐ₂ tē₃jín₄ dsa₂:

Š **11:26** 'Nio'₂ ja₁ton₅ 2 Pedro 2:20.

—i'E₂ guě₄ dsen₃ dsa₂ mⁱ₂ i₂ca₂caun₃ 'ne₂,
i₂ca₂'éin'₃ dsi'₅₄ quió'₅!

28 Jaun₂ ca₂ṅag₃:

iTě₂le₃ ja₂lin₃ guě₄ dsen₃ dsa₂ i₂nag₅ 'e₂ juá'₂ Diú₄,
ton'₂ jme₂ti₃!

Léi₄ a₂lin₅ Jonás

(Mateo 12:38-42; Marcos 8:12)

29 Caun₂ qui₂ṅi'₂ bá₄ dsa₂ ja₁chén'₄ Jesús, jaun₂ 'éi₂
ně₃ ca₂jme₃lióg₃ ca₂juá'₂:

—'Nⁱ₁₀₅ lin₃ ma₂'lin'₅₄ dsa₂ rě₂ně₃, mi₂₃ a₂jmo₅₄
jniá₂ léi₄ juě'₂. La₁ tsá₃ ma₂'e₂ léi₄ jua'₅₄ a₂jmo₄ guě₄
jniá₂, jṅia'₅₄ lia'₂ caun₂ léi₄ a₂ca₂lě₃ quian'₅₄ Jonás
bá₄. 30 Ia₁ le₂ně₅ ju₁lia'₂ Jonás ca₂lin₃ caun₂ léi₄
tě₂le₃ ja₁con₂ dsa₂ i₂jme₁chan₂ Nínive jmig₄ jaun₂,
le₂ně₅ bá₄ ján₃, Jaun₅ dsa₂ mi₂güí₃ léin₂ caun₂
léi₄ a₂jáng'₃ jág₁ dsau₅ ja₁con₂ dsa₂ i₂chan₂ jmig₄
ně₃. 31 Jě₁ma₂tě₂ rě₁qui₃dsi₅ Diú₄ 'éi'₃, náu₃ 'io₅₄
rag₅₄ i₂jme₁chan₂ tě₂le₃ sur, jein'₅₄ quian'₅₄ dsa₂ ṅe'₂
i₂chan₂ jmig₄ ně₃. 'A₂ lia'₂ niog₅ ca₂jmo₃ 'éi₂, jióg'₂
'í₁ a₂rě₂cán'₄ dsa₂. Ia₁ 'io₅₄ 'éi₂ ca₂'í₃ ju₁ca₂já₃ uíng₂
lin₃ guain₃ ca₂o₃néi₃ jág₁ ca'₅₄, ca₂o₃dso₅₄ dsí₅ 'a₂
lia'₂ niog₅ dsi₄ Salomón. La₁ ně₃ ně₃, la₂ chén'₅
jan₂ i₂juin'₂ guě₄ lia'₂ Salomón. 32 Ján₃ bá₄ náu₃
i₂jme₁chan₂ Nínive, jein'₅₄ quian'₅₄ dsa₂ ṅe'₂ i₂chan₂
jmig₄ ně₃, jě₁ma₂tě₂ rě₁qui₃dsi₅ Diú₄ 'éi'₃. 'A₂ lia'₂
niog₅ ca₂jmo₃ 'éi₂ ma₂líg'₂ jióg'₂ 'í₁ a₂rě₂cán'₄ dsa₂
jmig₄ ně₃. Ia₁ 'éi₂ ca₂jme₃tsín₃ dsí₅ jme₁ca₂'ě₂ Jonás
jág₁ quió'₅ Diú₄. La₁ ně₃ ně₃, la₂ chén'₅ jan₂ i₂juin'₂
guě₄ lia'₂ Jonás.

Dsa₂ i₂lin₅ lia'₂ lě₅ caun₂ si₂
(Mateo 5:15; 6:22-23)

33 'I₁jan₂ dsa₂ tsá₃ guí'₅ caun₂ si₂ ni₁tsí₅ jua'₅₄ chi'₃ ja₁chi₁quion'₅₄. * A₂'ag₅ guei'₅₄ bá₄ dsa₂ si₂, ia₁jaun₂ jág₃ dsa₂ i₂dsi₃ton'₅₄ dsi₂néi₂. 34 Jme₁ne₁ dsa₂ lě₅ co₂'nió'₄ caun₂ ni₁tsí₅ a₂guí'₂ si₂ quió'₅ ni₁ŋi₁ dsa₂. Chi₂jua'₂ dse₃ jme₁ne'₄, ta₁jang'₂ bá₄ tág₅ si₂ quiáng'₂. La₁ ně₁jua'₂ tsá₃ dse₃, ta₁jang'₂ bá₄ chéng'₅ qui₁né'₃. 35 Tě₃ŋi'₅₄ 'nia'₂ jaun₂, ia₁ con'₂ tsá₃ ŋó₅ ně₁jua'₂ si₂ quiáng'₂ tsá₃ jniág'₂. 36 Chi₂jua'₂ ta₁jang'₂ tág₅ bá₄ si₂ quiáng'₂, tsá₃ qui₁né'₃ lě₅. Jniág'₂ bá₄ lia'₂ ja₁jniá'₂ tág₅ caun₂ si₂.

Jme₂caun'₂ Jesús quió'₅ dsa₂ fariseos quian'₅₄ tě₅juá'₅

(Mateo 23:1-36; Marcos 12:38-40; Lucas 20:45-47)

37 Jme₁ca₂dsan₃ cuě₂₃ jág₁, ca₂tág₃ jan₂ dsa₂ fariseo a₂i₃guě'₃ quiong'₅₄. Jme₁ca₂dsióg₃ dsi₂néi₂ ca₂guá₂. 38 Dsa₂ fariseo 'éi₂ ně₃, i₃gó'₃ dsí₅ ia₁ tsá₃ ca₂jme₃ti₃ Jesús con'₂ lě₅ tag₄ a₂chí'₅, a₂rang₃ gu₂ né'₃ a₂guě'₃. 39 La₁ Te₁gui'₅₄ ně₃, ca₂juá'₂:

—'Nia'₂ dsa₂ fariseos líng'₅ lia'₂ lě₅ ni₁vaso, ni₁u_{ing}₅, a₂ŋia'₅₄ le₁jě₃ jmá'₃ le₃co'₅₄, la₁ tě₂le₃ jui₅ jme₂dsí₂ quiáng'₂, qui₂rě₂can'₂ ca₂le₃jě₃ a₂lig'₅₄ a₂jmo'₂: tsá₃ mag'₂ 'au'₂ 'nia'₂ ma₂qui₂ma₂'ang'₂ quió'₅ dsa₂. 40 i'_{E2} bá₄ tsá₃ ŋí'₂ 'au'₂ 'nia'₂! ¿On₁jua'₅₄ i₂ca₂jmo₃ le₃co'₅₄, ca₂jmo₃ le₃ŋió'₂ ján₃? 41 Ja₂lin₃ guě₄ dsióg₅ jen'₅₄ de'₂ 'nia'₂ a₂te₁'i₁ quiáng'₂, jaun₂ guě₄ lé₂ le₃tě₃tsin'₅₄ 'nia'₂ le₁jíng'₃ le₃ja₁con₂ Diú₄.

42 i'_{E2} guě₄ juíg'₂ 'nia'₂ dsa₂ fariseos! Ia₁ a₂jme₂tí'₁ 'nia'₂ jmo'₂, cuě'₂ Diú₄ caun₂ qui'₅₄ a₂guia₃ a₂'i₄ 'éi'₃ cuě'₅₄, ca₂lia'₂ ca₂le₃jě₃ ne₅₄ ma₁'au₂ a₂lě₂ ma₂juig₂

* 11:33 A₂lin₅₄ chog₅₄ si₂ juá'₂ ján₃: "on₃ guě'₂ né'₃ tsi₁gu₅."

má₃ bá₄ jáng'₄ 'nia'₂. La₁ con'₂ ma₂ŋi'₅₄ bá₄ 'nia'₂ ju_{i5}dse₃të₃dsón'₂ ja₁'ŋio₂dsí₅ Diú₄, ja₁jme₁jme₁'nió'₄ 'nia'₂ Diú₄: a₂në₅ bá₄ a₂dsen₅₄ guë₄ a₂ca₂tín'₂ 'nia'₂ jmó'₂, la₁ on₃jua'₅₄ a₂tsá₃ ma₃jme₁tí'₄ 'nia'₂ 'éi'₃.

43 'juíg'₂ 'nia'₂ dsa₂ fariseos! Ia₁ 'ŋio₅ lín₃ të₅ 'au'₂ a₂tiáng'₄ jláng'₁ ja₁dsen₅₄ guë₄ ju_{i1}lia'₂ dsi₂néi₂ guá'₅ sinagogas. Ján₃ bá₄ të₅ 'au'₂ 'nia'₂ qui₃cuag₃ dsa₂ Diú₄ ju_{i1}lia'₂ jë₄ 'ma'₅₄ a₂jme₂go₃ dsa₂ 'ŋio₅ lín₃.

44 'i'E₂ guë₄ juíg'₂ 'nia'₂!† Ia₁ líng'₅ ju_{i1}lia'₂ lë₅ tau₂ 'ŋio₅ a₂tsá₃ léi₄ cha₂. Dsa₂ në₃ qui₂ŋi₅ ne₄, të₃ tsá₃ ŋi₅.”

45 Jaun₂ ca₂ŋag₃ jan₂ të₅juá'₅:

—Të₅, a₂juá'₂ 'ne₂ në₅, a₂të₂'ó'₁ jnia'₅₄ bá₄ 'ne₂.

46 Jaun₂ ca₂ŋag₃ Jesús:

—juíg'₂ 'nia'₂ të₅juá'₅! Ia₁ quian'₄ 'nia'₂ lio₅₄ guei₂ i₂sián'₂, la₁ guion'₅₄ 'nia'₂ në₃, ca₂lia'₂ jŋia'₅₄ gog'₂ tsá₃ 'niog'₂ tí'₄.

47 'juíg'₂ 'nia'₂! Ia₁ qui₂chog'₂ 'nia'₂ ni₁'ia'₂ jlá'₁ quió'₅ 'lag₄ i₂jme₁'ë₂ jág₁ quió'₅ Diú₄, ton'₂ dsa₂ can'₅₄ quián'₂ 'nia'₂ guiong'₅₄ qui₂ca₂jme₃dsiog₂₃. 48 Jaun₂ në₃, lia'₂ lë₅ jmo'₂ 'nia'₂, cuë'₂ léi₄ co₂'nió'₄ caun₂ bá₄ 'ei₅ jág₁ 'nia'₂ quian'₅₄ dsa₂ can'₅₄ quiáng'₂. Ia₁ dsa₂ can'₅₄ ca₂jme₃dsiog₂₃; 'nia'₂ guë'₂ ma₂ja₂nióg'₅ chog'₂ ni₁'ia'₂.

49 'Jaun₂ lë₃ Diú₄, ia₁ a₂tiin₂ a₂ma₂ŋi₅ bá₄ a₂lé₂, ca₂juá'₂: “Qui₁tsing₅₄ dsa₂ i₂dsi₃can₅ i₂dsi₃'ë₃ jág₁ quió₃. I₂lín₅₄ 'éi₂ jme₃dsian₅ dsa₂; i₂lín₅₄ guë'₂ qui₃'ein₃.” 50 Jaun₂ në₃ ca₂të₂ dsa₂ chan₂ jmig₄ në₃ bá₄ rë₂cán'₄ 'mú₃ quió'₅ ca₂le₃jín₃ dsa₂ i₂'ë₂ jág₁

† 11:44 A₂lín₅₄ chog₅₄ si₂ chi₁,ton₅ ján₃: “'nia'₂ të₅juá'₅, 'nia'₂ dsa₂ fariseos në₃, a₂lë₃jmo'₂ góg'₂ a₂o₁ne₁.

i₂ma₂dsan₃ ca₂le₃ ca₂nio₃ mi₂güig₃. ⁵¹ Ca₂lia'₂ con'₂ jme₁ca₂jon₃ Abel, ca₂të₂ jmig₄ i₁ca₂jon₃ Zacarías i₂ca₂ñi'₃ dsa₂ jë₄ ja₁lë₄ ne₄chei₂ quian'₅₄ ja₁ñi₅, dsa₂ chan₂ jmig₄ në₃ bá₄, juá'₅ jniá₂, qui₃ 'mú₃ quió'₅ ca₂le₃jín₃ dsa₂ i₂ma₂dsan₃ 'éi₂.

⁵² 'i'E₂ guë₄ juíg'₂ 'nia'₂ të₅juá'₅! Ia₁ 'nia'₂ bá₄ ma₂rë₂'móg'₄ jág₁ quió'₅ Diú₄ a₂lë₅ co₂'nió'₄ ñi₁ llave quió'₅ o₄'né₄ ja₁jme₁le₃tin₂, le₃ñi'₂ dsa₂. On₃ guë'₂ guion'₅₄ 'nia'₂ tóng'₄, on₃ guë'₂ cuë'₂ 'nia'₂ jmig₄ dsi₃ton'₅₄ i₂'nio₃ tón'₃.

⁵³ Jme₁ca₂dsan₃ juá'₂ Jesús le₂në₅, ca₂rë₃'né₃ 'lig'₅₄ dsa₂ fariseos, të₅juá'₅ në₃. Jaun₂ ca₂jme₃lióg₃ jmóg'₂ m'₅₄, tsá₃ caun₂ a₂qui₂ca₂ñag₃, a₂jme₁jmo₂₃ tion'₅₄ lia'₂ jme₁jéin'₃ 'éi₂ jág₁. ⁵⁴ Ia₁ jme₁'nio₃ jo₅₄ jua'₅₄ ca₂jon₄ bá₄ jág₁ 'lia'₂ jme₁'ñiá₃ 'éi₂.

12

Ca₂jme₃tag₅ Jesús a₂tsá₃ jmo₃ dsa₂ a₂ñia'₅₄ con'₂ dse₃ le₁'ág₄ o₁ne₁

¹ Të₃jë₄ jaun₂, të₂le₃ mei₅ bá₄ dsa₂ i₂ca₂ñi'₂, ca₂lia'₂ qui₂co₂'liain'₂ riin'₅₄. Jaun₂ Jesús në₃ jñiá₅ de'₂ dsa₂ i₂quiain'₅₄ bá₄ ca₂tsí'₃:

—Të₃ñi'₅₄ 'nia'₂ quian'₅₄ jui₅ lia'₂ lë₅ quian₅ dsa₂ fariseos* co₂'nió'₄ i₂lë₁jmo₅-dsáu₅ o₁ne₁. ² Ia₁ 'i₁caun₂ a₂rë₂'ma₄ jua'₅₄ lín₂ dsa₂ a₂tsá₃ le₃jniá₂, tion'₅₄ bá₄ rë₂jniá₂; ján₃ bá₄ tsá₃ cha₂ 'i₁caun₂ a₂rë₂jñlë₅ jua'₅₄ lín₂ dsa₂ a₂tsá₃ 'ein₂ le₃ñi₅, tion'₅₄ bá₄ rë₃ñi₅ dsa₂. ³ Jaun₂ në₃, ca₂le₃jë₃ 'e₂ a₂dsia₅ dsa₂ jë₄ qui₁né'₃, jiá₃ bá₄ le₃ja₁jniá₂ si₂. Le₂jaun₂ jui₁lia'₂ jág₁

* **12:1** lit. “levadura quió'₅ dsa₂ fariseos.”

a₂dsia₅ dsa₂ jë₄ të₃co'₅₄ a₂quile₁jnág₅ 'né₅, a₂dsi₃'ag₅
bá₄ jaun₂.†

I₂'ein₂ ca₂tín₂ dsa₂ jme₃gain₃
(Mateo 10:28-31)

4 "Nia'₂ a₂mei₅₄ quiáng₃, juíg₂ jniá₂ 'nia'₂, tsá₃ jmo₂
'nia'₂ gang'₃ i₂jme₂dsian₅ ni₁ñí₅, ia₁ tsá₃ ma₃a₂siá'₂
jua'₅₄ a₂'io₂₃ guë₄ bí₂ jmo₃. 5 Jaun₂ la₂ juá'₅ jniá₂ 'ein₂
dsón'₂ i₂ca₂tín'₂ 'nia'₂ jme₁gang'₃: i₂'éi₂ bá₄ jme₁gan'₃
'nia'₂ jmo₄ i₂'io₅ bí₂, jme₃dsiog₂₃, ton'₂ 'io₂₃ bí₂ 'liog'₃
ja₁'lig'₅₄ ján₃. 6 ¿Tsa₁ 'ni₅ dsa₂ 'ñiá₂ i₁tan₅ tei₄ quian'₅₄
tín₃ ñí guéin₂? La₁ 'i₁jan₂ 'éi₂ tsá₃ dsi₂'én₂ dsí₅ Diú₄.
7 Jag₄ 'nia'₂ jaun₂, 'ñio₅ lin₃ guë₄ dsan₂ dsí₅ Diú₄ 'nia'₂,
le₂jio₅ jñi₂ dsei'₂ 'nia'₂, ma₂ñi₅ bá₄ Diú₄ je₂liá'₂ mi'₂
tí₅. Jaun₂ tsá₃ jmo₂ 'nia'₂ gang'₃, ia₁ 'ñio₅ guë₄ quen'₄
'nia'₂ lia'₂ con'₂ guë₄ juin₅ i₁tan₅.

Dsa₂ i₂jme₂jnia₅ cuiñ₂₃ Jesús
(Matt 10:32-33; 12:32; 10:19-20)

8 "Juá'₅ jniá₂, ca₂le₃jín₃ i₂jme₂jnia₅ ja₁con₂ dsa₂
mi₂güí₃ a₂cui_g₂₃ jniá₂, ján₃ bá₄ le₂jaun₂ Jaun₅ dsa₂
mi₂güí₃ 'ag₃ jme₃jniog₂₃ a₂cui_g₂₃ ja₁con₂ ca₂le₃jín₃
ángeles quián₅ Diú₄. 9 La₁ jui₁lia'₂ i₂tsá₃ 'ag₅ a₂cui_g₂₃
jniá₂ ja₁con₂ dsa₂ mi₂güí₃, ján₃ bá₄ le₂jaun₂ tsá₃
'íin₄ jniá₂ a₂cuiñ₅ ja₁con₂ ángeles quián₅ Diú₄.
10 Ia₁ jui₁'ein₂ guë₃ i₂'in₅ 'lig'₅₄ Jaun₅ dsa₂ mi₂güí₃,
cha₂ bá₄ o₂'én₂ dso₄ quió'₅. La₁ jui₁lia'₂ i₂juá'₂
'lig'₅₄ 'iin₂₃ Jme₂dsí₂ Jñio₅, tsá₃ ma₃o₂'én₂ dso₄ cha₂.
11 Jë₁ma₂ca₂jñia₃ dsa₂ 'nia'₂ ne₄ dsi₂tan₅₄ quián₅
guá'₅, o₃ jë₁ma₂ca₂jio₃ ne₄ i₂con₂ 'í₁, ne₄ dsa₂

† 12:3 lit. "a₂táun₂ dsa₂ jág₁ tióin₂ guei'₅₄ 'né₅ bá₄ a₂jaun₂."

i₂qui₂dsi₅ 'éi'₃ ně₃, tsá₃ jmó'₂ 'nia'₂ i₅ 'au'₂ jua'₅₄ tsá₃
 ŋi'₅₄ 'a₂ lia'₂ ŋag'₅₄, 'o₃ 'e₂ juig'₅₄. 12 Ia₁ 'ŋiog₅ bá₄
 Jme₂dsi₂ Jŋió₅ jme₃tag₂₃ 'e₂ a₂ca₂tín'₂ 'nia'₂ ŋag'₅₄,
 jë₁ma₂ca₂të₂ hora jaun₂.

*Go'₂ ně₁'ein₂ ca₂dsia₃ le₁má'₂ 'ŋio₅ lín₃ jmo₃ dsí₅
 jmá'₃ quió'₅ 'ŋiog₅*

13 Jan₂ dsa₂ i₂jme₁'en₅₄ jë₄ jaun₂ ně₃, ca₂tsí'₃ Jesús:
 —Të₅, chei'₅₄ co₂nio₄ dsó₂ ríng'₃ jui₁cuë'₁₂ con'₂
 a₂ca₂tíng₂ a₂cha₂ quió'₅ 'lag₄ ŋe'₃.

14 Jaun₂ ca₂ŋag₃ Jesús:
 —'Ne₂ dsa₂, ¿'ein₂ ca₂dsiog₃ jniá₂ a₂líng₅ jan₂
 i₂dsi₅' 'e₂ a₂ca₂tín'₂ 'nia'₂?

15 Ján₃ bá₄ ca₂juá'₂:
 —Të₅ŋi'₅₄ 'nia'₂ tsá₃ i₂jmo₂ jua'₅₄ a₂ŋí₄ lë₃ 'ín₅ 'au'₂
 a₂le₃cha₂ quiáng'₂. Ia₁ on₃jua'₅₄ jmá'₃ a₂ŋí₄ cha₂
 quió'₅ dsa₂ le₃chain₂.

16 Jaun₂ ca₂tsí'₃ táng₃ dsa₂ jág₁ jáng'₅ léi₄ la₂:
 —Jme₁chan₂ jan₂ dsa₂ i₂jme₁cha₂ cu₄ 'ŋio₅ lín₃.
 'Lióng₂ lín₃ jme₁rau₂ quió'₅. 17 Jaun₂ ca₂i₃jio₅ dsí₅:
 “¿'E₂ bá₄ jmo₅₄ jniá₂ ně₃? Tsá₃ ma₃cha₂ ja₁tó'₄
 a₂ca₂rau₂ quió₃.” 18 Jaun₂ ca₂i₃jio₅ dsí₅: “Le₂la₂
 jmo₅₄. Quí'₄ tsi₁'io₅ a₂tióng₂ ně₅, jaun₂ jmo₅₄ a₂ca'₅₄
 guë₄. Jaun₂ ja₁jaun₂ tó'₄ trigo, quian'₅₄ ca₂le₃jë₃
 guë₄ a₂cha₂ quió₃. 19 Jaun₂ guë₄ 'náu'₄ dsí₃: 'Lióng₂
 ma₂niog₅ le₁má'₂, ma₂len₅ 'lióng₂ ŋi₂; ma₂lé₂ jan₅₄,
 gua₅₄ tei₄, guë'₅₄, gui'₅₄, cuë₄ o₂'ŋió₃ o₂ŋia₃ dsí₃.” La₁
 Diú₄ ně₃ ca₂juá'₂ ca₂tsí'₃ dsa₂ 'éi₂: 20 “i'₂E₂ guë₄ con'₅₄
 'ne₂ líng'₅! Jua'₂ a₂'uë₂ ně₃ mág₄ jniá₂ 'mú₃ quiáng'₂.
 Ca₂le₃jë₃ a₂ma₂dsia'₅₄ 'ne₂ rë₂, ¿'ein₂ bá₄ quió'₅ lé₂?”

21 Le₂në₅ ds_{i2}ñí₂ jui₁lia'₂ dsa₂ i₂dsia₅ le₁má'₂ jmá'₃ quió'₅ ñiog₅, la₁ të₂tsin'₅₄ líin₃ le₃ja₁con₂ Diú₄.

I₂jmo₅ 'í bá₄ Diú₄ chi'₂-guein₂ quiáin₅
(Mateo 6:25-34)

22 Jme₁ca₂dsan₃ jaun₂, ca₂tsí'₃ táng₃ chi'₂ ds_{i2}guia₃-tín₂ quiáin₅:

—Juíg₂ jniá₂ 'nia'₂, tsá₃ jmo₂ 'nia'₂ jua'₅₄ a₂ñí₄ dsan₂ 'au'₂ 'e₂ a₂quë'₅₄ të₁lia'₂ chang'₂, on₃ guë'₂ o₄quió'₄ ni₁ñí'₁, jua'₅₄ dsan₂ 'au'₂ 'e₂ qui'₅₄. 23 Ia₁ jme₂dsí₂ bá₄ a₂quen₅ guë₄ lia'₂ con'₂ guë₄ má₃. Ján₃ guë'₂ le₂jaun₂ ni₁ñí₁ bá₄ dsa₂ a₂quen₅ guë₄ lia'₂ con'₂ guë₄ 'mi'₂. 24 Ní₂ de'₂ 'nia'₂ jui₁lia'₂ i₁qui₂lia'₂. Tsá₃ 'e₂ jne₂₃, on₃ guë'₂ 'e₂ cha₂ a₂le₃rau₂ quió'₅, on₃ guë'₂ 'io₅ chí'₅ quió'₅. Diú₄ bá₄ i₂jme₂tau₅₄. jJaun₂ ñio₅ lin₃ guë₄ bá₄ quen'₄ 'nia'₂ lia'₂ con'₂ guë₄ i₁tan₅ 'éi₂!

25 ¿I₂'ein₂ 'nia'₂ i₂lé₂ le₃jmo₃ le₃chain₂ guë₄ uë₂, † ne₄ ia₁ a₂ñí₄ lë₃ 'i₅ 'au'₂ 'nia'₂ chang'₂? 26 Chi₂jua'₂ tsá₃ quin'₅₄ 'nia'₂ jmig₄ quian'₅₄ a₂ca₂jui_g₄ në₅, ¿'e₂ guë'₂ lë₃ ñí₄ dsan₂ 'au'₂ 'nia'₂ quian'₅₄ a₂siá'₂? 27 Ní₂ de'₂ 'nia'₂ ján₃ 'a₂lia'₂ qui₂dsi₂cón₃ lí₁. Tsá₃ tsi₁ñi₅ lé₂ tsé'₃,

on₃ guë'₂ lé₂ ta₃. Jaun₂ juíg₂ jniá₂ 'nia'₂, ca₂lia'₂ jnia'₅₄ Rag₅₄ Salomón, quian'₅₄ ca₂le₃jë₃ a₂jlá'₁ a₂jme₁cha₂ quió'₅, tsá₃ ca₂rë₃jláin'₁ bá₄ guë₄ jui₁lia'₂ jlá'₁ lí₁.

28 Chi₂jua'₂ le₂në₅ chí'₅ Diú₄ jlá'₁ nau₂ a₂cha₂ 'ña₁, a₂ñia'₅₄ jniá₂ jlá'₁ ca₂tiá₂ co₂lág₂, ia₁ jui₁la₂ 'ióg₃ dsí'₂ dsa₂, 'ë₂ guë₄ bá₄ 'nia'₂, dsa₂ i₂'én₂ ca₂jui_g₄, jmo₃ bá₄ Diú₄ 'í₁. 29 Jaun₂ juá'₅ jniá₂, tsá₃ i₁niog'₄ jua'₅₄ a₂ñí₄ dsan₂ 'au'₂ 'e₂ quë'₅₄ 'ag'₅₄. Tsá₃ can₂ 'nia'₂ o₂i₁ ds_{i5} quian'₅₄ a₂jaun₂, 30 ia₁ jmá'₃ a₂në₅ bá₄ a₂ñí₄ lë₃ 'nio'₃

† 12:25 o₃, “I₂'ein₂ 'nia'₂ i₂lé₂ le₃jmo₃ a₂dsi₃cón₃ guë₄ caun₂ lë₂.”

dsi₂nau₂. Ia₁ i₂ŋi₅ bá₄ Néi'₅ a₂'nió'₅ ca₂le₃jě₃ a₂ně₅
quián'₂ 'nia'₂. ³¹ La₁ 'nio'₂ de'₂ ŋjiá'₅ 'nia'₂ ja₁goin₂,
jaun₂ ca₂le₃jě₃ a₂ně₅ tē₁ja₃lé₂ a₂ma₂ŋag₅₄ cuē₃.

A₂quen₅ lin₃ a₂cha₂ quió'₅ dsa₂ guei'₅₄ i₂juíg₃
(Mateo 6:19-21)

³² 'Nia'₂ já'₂ cha'₂ quiáng₃, tsá₃lě₁jmo₂ 'nia'₂ gang'₃,
o₁ŋia'₅₄ la₂ tsá₃ juin'₅ 'nia'₂, la₁ 'ŋio₂ dsí'₅ Néi'₅ cuē₃
ja₁goin₂. ³³ 'Nag₄ 'nia'₂ a₂cha₂ quiáng'₂; jme₂'on₅₄
i₂te₂ŋé₂. ŋja'₅₄ lia'₂ le₂ně₅ bá₄ dsió₄, tē₃ron₅₄ tē₂'mi'₂
a₂tsá₃ ton₅ jmig₄ le₃'áu₂ quián'₂ 'nia'₂; caun₂ a₂quen₅
lin₃ 'ó'₄ 'nia'₂ quiáng'₂ guei'₅₄ i₂juíg₃ a₂tsá₃ ton₅
jmig₄ dsiá₃, ja₁tsá₃ líg'₂ jmig₄ dsió₄ 'ang₂, on₃ guē'₂
i₁tsan'₅₄ lé₂ le₃'én₂. ³⁴ Ia₁ ju₁lia'₂ ja₁rē₂'mú'₄ 'nia'₂
quiáng'₂, ja₁jaun₂ bá₄ 'i₄ 'au'₂.

'Nió'₅ bá₄ a₂chan₂ dsa₂ rě₂ján₁

³⁵ 'Rě₂ján'₁ 'nia'₂ chang'₂, le₁ling'₄, le₁guí'₂ si₂
tsí'₅ quiáng'₂. ³⁶ Ju₁len'₅₄ 'nia'₂ ně₂jag₄ bá₄ dsa₂
i₂chi₁ŋia₅ guan'₂ juig₅₄ ŋó₃ ja₁niog₅ jmig₄. Rě₂ján'₁
'nia'₂ chang'₂, ia₁jaun₂ lé₂ le₃na'₅₄ 'nia'₂ dsi₂jui₅
jě₁ma₂tě₂ rě₁guáin'₃ quein₃ o₄'né₄. ³⁷ 'E₂ guē₄ dsen₃
dsa₂ i₂le₁ne₅₄ jě₁ma₂ca₂guán'₃ juig₅₄. A₂dsi₂jó'₃ juá'₅
jniá₂, 'ŋiog₅ bá₄ 'éi₂ dsiog₃ ne₄ mesa, ton'₂ quí'₃ 'mi'₂
a₂jme₂ti₃ ŋág₃ má₃. ³⁸ 'E₂ guē₄ dsen₃ dsa₂ i₂tion'₅₄
le₁ne₅₄ jě₁ma₂ca₂jo₃ juig₅₄ o₁ŋia'₅₄ la₂ ca₂guáin'₃
a₂'uē₂ dsi₃nei₅, o₃ ma₂ca₂ŋí₂ dsi₃nei₅ 'e₂. ³⁹ La₁
ju₁le₂ŋi'₅₄ 'nia'₂ a₂la₂ ján₃, jua'₅₄ mei'₂ guē₃ ŋi₅ dsa₂
quió'₅ dsi₂néi₂ 'e₂ hora jiá₃ dsa₂ 'ang₂, guá₃ rě₂nei₅₄,
jmo₂₃ 'í₁, tsá₃ cuē₃ jmig₄ 'í₂ dsa₂ 'éi₂, 'ang₃. ⁴⁰ Le₂ně₅
bá₄ 'nia'₂ ján₃, rě₂jáng'₁ chang'₂, ia₁ con'₂ tsá₃ 'ein₂
lín₂ bá₄, tē₃tsin'₅₄ Jaun₅ dsa₂ mi₂güíg₃.

Ju₁lia'₂ dsa₂ i₂tsá₃ rē₂ti'₅₄ ta₁ quió'₅
(Mateo 24:45-51)

⁴¹ Jaun₂ ně₃ ca₂ŋag₃ Pe₄:

—Te₁gui'₅₄, ħ_{a1}nē₂chei'₅₄ jmá'₃ jnia'₅₄ jág₁ jáng'₅ léi₄
 ně₅, o₃ a₂nē₂chei'₅₄ ca₂le₃jín₃ 'e₂?

⁴² Jaun₂ ca₂juá'₂ Te₁gui'₅₄:

—Ĥ_{l2}'ein₂ 'éi₂, lín'₂ 'nia'₂, lín₅ dsa₂ dsen₃ i₂rē₂ti'₅₄,
 niog₅ dsi₄, i₂ca₂dsiog₃ juig₅₄ nio₃ ne₅₄ jmo₃ ta₁
 dsi₂néi₂, a₂ag'₃ ŋi'₃ dsa₂ hora ca₂tíin₂? ⁴³ 'E₂ guě₄
 dsen₃ dsa₂ i₂niog₅ ne₄, i₂jo₅ juig₅₄ jme₂ti₃ bá₄ ta₁
 quió'₅, i₁guain'₂. ⁴⁴ A₂dsi₂jó'₃ juá'₅ jniá₂, dsiog₃ juig₅₄
 a₂nio₃ ne₅₄ ca₂le₃jě₃ a₂cha₂ quió'₅. ⁴⁵ La₁ ně₁juá'₂
 lín₂ dsa₂ i₂niog₅ ne₄ 'éi₂, le₃'ag₄ bá₄ guan'₂ juig₅₄,
 chi₂juá'₂ ca₂jme₃lióg₃ ca₂jmái'₂ uig₅ dsa₂ ŋe'₂, dsa₂
 mí₂ ně₃ i₂jme₂ti₃ ta₁, ton'₂ 'ŋiog₅ guě'₂ ca₂'í₃ guě'₅,
 'ín'₂, ca₂rě₃'ein₅ bá₄ 'ŋiog₅, ⁴⁶ la₁ con'₂ tsá₃ jáin₅, con'₂
 caun₂ hora a₂tsá₃ ŋi₅ bá₄ guan'₂ juig₅₄; uig₅ gau₂'ŋio₅
 lín₃ bá₄ cuě₃ 'éi₂, co₂jaun₂ bá₄ uig₅ gue₃ con'₂ lě₅ tin₃
 dsa₂ i₂tsá₃ 'én₂.

⁴⁷ 'Ju₁lia'₂ dsa₂ i₂ŋi₅ 'e₂ 'nio₃ juig₅₄, la₁ tsá₃ 'e₂
 co₂ŋia₅₄ jmo₂₃, on₃ guě'₂ jme₂ti₃ a₂juá'₂ 'éi₂, cán₂
 uig₅ dsi₃bain₅₄ ca₂lia'₂ ton₅ 'mí₅ 'lióng₂ lín₃ nī₁ŋi₁₂.
⁴⁸ La₁ ju₁lia'₂ i₂tsá₃ 'e₂ ca₂rě₃ŋi₅ ton'₂ jmo₅-dsáu₅
 cosa a₂ca₂tíin₂ gue₃ uig₅, tsá₃ lín₅₄ 'lióng₂ 'mí₅ cán₂.
 Ju₁lia'₂ dsa₂ i₂'lióng₂ tē₂no₄ gu₂ a₂ca₂tíin₂ jme₃ti₃,
 ján₃ bá₄ 'lióng₂ a₂mág₃ juig₅₄. Já₃ guě'₂ le₂jaun₂
 ju₁lia'₂ i₂ma₂dsia₅ dsa₂ 'lióng₂ ne₅₄, 'lióng₂ guě₄
 a₂chi₃quióng₂ dsa₂ jmig₄ jáng'₃.

Jesús bá₄ 'u_{in}₄ a₂lě₂ le₁dson'₅₄ dsa₂
(Mateo 10:34-36)

49 'A₂i₃'ing₅₄ si₂ mi₂güig₃ la₂ bá₄ jniá₂ guio₃. i'E₂ gué₄ 'ín₅ dsi₃, jua'₅₄ ma₂cau₂ bá₄ co₂ŋei'₅₄ të₂ně₃!
 50 La₁ tion₅₄ niog₅ tiáng₄ jui₅ ja₁dsi₃ŋíg₂ mi'₅₄ 'ŋio₅ lin₃. Jaun₂, i'e₂ gué₄ 'ŋio₅ o₂i₁ dsi₅ chang₂, ca₂lia'₂ ca₂rě₃ti₃ ta₁ a₂guio₃! 51 ¿Lín'₂ 'nia'₂ a₂guio₃ jniá₂ i₃'ei₃ tei₄ mi₂güig₃ la₂? On₃jua'₅₄ le₂jaun₂. A₂i₃jmo₃ le₁dson'₅₄ dsa₂ bá₄ jniá₂ guio₃. 52 Ia₁ të₂le₃ ne₄ jui₅ ja₁dsau₅₄ ně₅, jui₁lia'₂ caun₂ dsi₂néi₂ ja₁lě₂ 'ŋiá₂ dsa₂, lé₂ le₁dson'₅₄, 53 ún₂ jme₃'ŋiai₅₄ on₃; i₂on₃ jme₃'ŋiai₅₄ i₂ún₂ táng₃; jui₁lia'₂ jmei₂ dsa₂ tóin'₃ mi'₅₄ quian'₅₄ ja₁ŋi'₅₄, ja₁ŋi'₅₄ guě'₂ 'í₂ mi'₅₄ quian'₅₄ jmei₂; jui₁lia'₂ chog₅₄ tóin'₃ mi'₅₄ quian'₅₄ ja₁míg₄, ja₁míg₄ guě'₂ 'í₂ mi'₅₄ quian'₅₄ chog₅₄. Jui₁lia'₂ i₂lín₅ ma₂chog₅₄ dsa₂, tóin'₃ mi'₅₄ quian'₅₄ lo₅₄, jui₁lia'₂ mi₂lo₅₄ 'í₂ mi'₅₄ quian'₅₄ ma₂chog₅₄.

Jui₁lia'₂ jme₃cha₂ léi₄ guei'₅₄
(Mateo 16:1-4; Marcos 8:11-13)

54 Ján₃ bá₄ ca₂tsí'₃ dsa₂:

—Jme₁caun'₂ 'nia'₂ 'í₁ guei'₅₄ jme₁tsau₂ jnei₅ le₃ja₁rín₂ 'iog₂, jag'₄ 'nia'₂, jiá₃ jmí₅, dsón'₂ bá₄ le₂jaun₂ lě₂. 55 Jaun₂ jme₁ja₂ dsi₂ të₂le₃ sur, jag'₄ 'nia'₂ dséi₃ 'iog₂ ně₃. Jaun₂ dsón'₂ bá₄ le₂jaun₂ lě₂ ján₃. 56 i'Nia'₂ dsa₂ i₂jnia'₅₄ dse₃ le₁ág₄ o₁ne₁! Nj'₅₄ 'nia'₂ 'a₂ lia'₂ jua'₅₄ 'e₂ niog₅ të₅ ne'₅₄ 'nia'₂ guei'₅₄, quian'₅₄ 'e₂ lě₂ ne₄ gua'₅₄ 'uě₃. ¿'A₂ bá₄ lia'₂ tsá₃ tin'₂ 'nia'₂ caun'₅₄ 'í₁ léi₄ a₂ma₂cha₂ rě₂ně₃?

Jme₁jen'₂ já_{q1} quian'₅₄ dsa₂ i₂'iog₅₄
(Mateo 5:25-26)

57 ¿'E₂ lě₃ tsá₃ cáun'₂ 'nia'₂ 'í₁ jě₄ quiáng'₂ guiong'₅₄ a₂dsi₂ten₅₄ jmó'₂? 58 Jě₁ma₂'eng'₅₄ jui₅ dsióg'₄ ne₄ dsi₂tan₅₄ quian'₅₄ dsa₂ i₂'nag₅, jme₁jen'₂ 'nia'₂ já_{q1}

le₂'i₄ jui₅ jme₁dsian₅ mi₅₄ a₂chang'₂ quiain'₅₄. Ia₁ con'₂ tsá₃ η₅ ně₁jua'₂ ca₂tsag'₂ tē₃ne₄ dsi₂tan₅₄ i₂qui₂dsi₅ 'éi'₃. 'Éi₂ ně₃ jáng'₃ ne₄ 'lióg₂; 'lióg₂ guě₄ ně₃ to'₂ né'₃ 'má₃. ⁵⁹ Juá'₅ jniá₂, o₁líg'₂ tsá₃ o₃'ing'₂ ja₁jaun₂ ca₂lia'₂ ca₂qui'₅₄ jē₁ca₂tó'₂ η₁guéin₂ a₂ring'₂.

13

A₂quen₅ lín₃ bá₄ a₂dsi₂quén'₅ dsí₅ dsa₂

¹ Jmí₄ jaun₂ i₂lín₅₄ dsa₂ i₂jme₁tion'₅₄ guě₄ ca₂dsia₃ ca₂tsí'₃ Jesús 'a₂ lia'₂ ca₂jme₃dsian₅ Pilato i₂lín₅₄ dsa₂ chan₂ Galilea. Ca₂cóin'₂ jmi₄ dsa₂ 'éi₂ quiain'₅₄ jmi₄ já'₂ i₂ca₂jme₃dsian₅ dsa₂ i₂jéin'₂ ne₄ Diú₄.

² Jaun₂ ca₂juá'₂ Jesús ně₃:

—¿Lín'₂ 'nia'₂ ně₃, dsa₂ chan₂ Galilea 'éi₂ ca₂i₃ηí₂ le₂jaun₂ ia₁ 'lióng₂ guě₄ dso₄ jme₁le₁cáin'₄ lia'₂ con'₂ guě₄ dsa₂ go₅₄? ³ Juá'₅ jniá₂, on₃jua'₅₄ le₂jaun₂; ia₁ le₂ně₅ bá₄ 'nia'₂ ján₃, ně₁jua'₂ tsá₃ ca₂dsi₃quén'₅ 'au'₂, dsiáng'₃ ján₃. ⁴ ¿On₃ bá₄ lín'₂ 'nia'₂, 'ηio₅ lín₃ guě₄ jme₁le₁cán'₄ dso₄ dsa₂ i₂guia₃-jniá₂ i₂ca₂dsan₃ 'éi₂, lia'₂ con'₂ ca₂qui'₃ ni₁'ia'₂ ηei₅ ja₁chei₂ Siloé, lia'₂ con'₂ guě₄ ca₂le₃jín₃ i₂tián'₅ Jerusalén? ⁵ Juá'₅ jniá₂, on₃jua'₅₄ le₂jaun₂; ia₁ ján₃ bá₄ le₂ně₅ 'nia'₂, ně₁jua'₂ tsá₃ ca₂dsi₃quén'₅ 'au'₂, dsiáng'₃ bá₄ ján₃.

Jág₁ jáng'₅ léi₄ quió'₅ ni₁ 'ma₂ higuera a₂tsá₃ míg₂ 'ag₅

⁶ Jaun₂ ca₂juá'₂ táng₃ Jesús jág₁ jáng'₅ léi₄ la₂:

—Jan₂ dsa₂ jme₁jnia₄ caun₂ 'ma₂ a₂'ag₅ míg₂ higo ja₁nau₂ quió'₅, jaun₂ ca₂l₁jag₅₄ chi₂jua'₂ ma₂le₁'ág₄ míg₂. Tsá₃ míg₂ cha₂ guě'₂ ně₃, jme₁dsióg₃. ⁷ Jaun₂ ca₂tsí'₃ dsa₂ i₂jmo₅ 'í₁ ja₁nau₂ jaun₂: “Ma₂'ni₅ ηi₂

guio₂₃ i₂jág₃ ni₁'ma₂ nē₅ chi₂jua'₂ le₁'ág₄ mīg₂, la₁ caun₂ tsá₃ mīg₂ cha₂ bá₄ lia'₂ co₂ráun₂ guio₅₄. Qui'₅₄ co₂ñei'₅₄. Tsá₃ ta₁ jmo₃ jñia'₅₄ jme₂dsiá₃ 'o'₅₄ 'uě₃ bá₄.” ⁸ La₁ dsa₂ i₂jmo₅ 'í₁ ja₁nau₂ 'éi₂ ně₃ ca₂ñag₃: “Te₁gui'₅₄, cuě₄ jmīg₄ o₁dsi₅₄ guě₄ caun₂ ñi₂ la₂; jmo₅₄ dse₃ le₃lág'₃, tó'₄ 'mīg₄ já'₂ ně₃, ⁹ o₁ne₄ chi₂jua'₂ 'ag₃ mīg₂ ñi₂ caun₂. Nē₁jua'₂ tsá₃ 'e₂ mīg₂ cha₂ i₁jáun₃, jaun₂ guě₄ uín'₂.”

Ca₂jme₃'lión₂ Jesús jan₂ 'io₅₄ i₂jme₁quin'₅₄ mi₂ca'₅₄ caun₂ jmīg₄ sa₅₄

¹⁰ Caun₂ sa₅₄, jme₁'en₅₄ Jesús jme₂tñin₂₃ dsa₂ dsi₂néi₂ guá'₅ sinagoga.

¹¹ Ja₁jaun₂ jme₁'en₅₄ jan₂ 'io₅₄ i₂ma₂guia₃-jñiá₂ ñi₂ dso'₅₄. Ca₂jmóg'₂ jme₂dsi₂ 'lin'₅₄ rē₂guen'₂ mi₂ca'₅₄, jme₁ñi₂₃ tsá₃ lé₂ néi'₃ rē₂.

¹² Jme₁ca₂jág₂ Jesús, jaun₂ ca₂tē₃, jaun₂ ca₂juá'₂:

—'Io₅₄, ma₂ca₂'lóng'₂ bá₄ dso₄ a₂jme₁lín'₄.

¹³ Jaun₂ ca₂téi₂ gu₂. Dsi₂jui₅ le₂jaun₂ bá₄ ca₂néi'₃ mi₂ca'₅₄ 'io₅₄, jaun₂ ca₂jme₃juin'₂ Diú₄.

¹⁴ La₁ dsa₂ i₂nio₅ ne₄ guá'₅ sinagoga, ca₂rē₃'néi₃ quian'₅₄ Jesús ia₁ ca₂jme₃'lióin₂ dsa₂ 'éi₂ tē₃ jmīg₄ sa₅₄. Jaun₂ ca₂tsí'₃ dsa₂ i₂tion'₅₄:

—Jñéi₂ jmīg₄ bá₄ ca₂tín₂ dsa₂ jmo₃ ta₁; jui₁ja₂lén₂ 'ein₂ 'nio₃ 'lión₂ jē₄ semana, on₃jua'₅₄ rē'₂ jme₁sa₅₄.

¹⁵ Jaun₂ ca₂ñag₃ Te₁gui'₅₄ ca₂tsí'₃ 'éi₂:

—i'Nia'₂ dsa₂ i₂jñia'₅₄ dse₃ le₁'ág₄ o₁ne₁! ¿Tsa₁ 'ein₂ 'nia'₂ chén'₂ ca₁jui₅ o₃ bú'₄ quián₅ jua'₅₄ tsá₃ dsi₃jio₃ dsi₃'ein'₅₄ jmīg₂ o₁jñia'₅₄ lē₅ sa₅₄? ¹⁶ Ia₁ dsa₂ mí₂ la₂, i₂lín₅ jan₂ tsi₁jon₂ Abraham; i₂sē₃dse₃ jme₁ma₂'nei'₂ ma₂guia₃-jñiá₂ ñi₂. Jaun₂ ně₃, ¿tsa₁ ca₂tñin₂ chein'₂ ján₃ jñia'₅₄ tē₃ jmīg₄ sa₅₄?

17 Jme₁ca₂juá'₂ Jesús le₂ně₅, ca₂rě₃gui'₅₄ bá₄,
ca₂le₃jín₃ con'₂ dsa₂ i₂'iog₅₄. La₁ 'io'₂ jén'₅ tě₅ dsí'₅
bá₄ dsa₂ i₂tion'₅₄, ca₂le₃jě₃ a₂jlá'₁ jmo₅ 'éi₂.

*Jág₁ jáng'₅ léi₄ ju₁lia'₂ míg₂ jon₂ quió'₅ ni₁'ma₂
mostaza*

(Mateo 13:31-32; Marcos 4:30-32)

18 Ca₂juá'₂ ně₃:

—ǰ'_{A2} lia'₂ le₃juá'₄ lě₅ ja₁gon₂ Diú? ǰ'_{E2} quian'₅₄
lé₂ le₃quín₄? 19 Lě₅ ju₁lia'₂ míg₂ jon₂ ni₁'ma₂
mostaza* a₂ca₂jne₃ jan₂ dsa₂ ja₁nau₂ quió'₅. Jaun₂
ca₂l₃cón₃ ca₂dsió₃ ca₂lě₃ caun₂ ni₁'ma₂ pa₁; i₁tan₅
ně₃ ca₂tó'₂ tsag₅₄ gu₂ nei'₅₄ jaun₂.

Jág₁ jáng'₅ léi₄ ju₁lia'₂ 'a₂ lia'₂ ron'₂ i₁ńí'₄

(Mateo 13:33)

20 Ca₂juá'₂ Jesús le₂la₂ ján₃:

—ǰ'_{E2} quian'₅₄ lé₂ le₃quín₄ lě₅ ja₁gon₂ Diú?
21 Lě₅ ju₁lia'₂ lě₅ levadura a₂co₂güín'₂ jan₂ 'io₅₄
jě₄ 'ni₅ tio'₅₄ 'ma₂† ti₁can₁ i₁ńí'₄. Quian'₅₄ co₁séin'₄
levadura bá₄ guion'₂ ca₂le₃jě₃ ti₁can₁.

Jág₁ jáng'₅ léi₄ quió'₅ o₄'né₄ dsag₂

(Mateo 7:13-14, 21—23)

22 Lia'₂ con'₂ ma₂'ein₅₄ ju₁ a₂dsió₄ Jerusalén,
qui₂ca₂i₁jme₁tiin₂₃ guě₄ dsa₂ le₂tan₅₄ ju₁g₂ te₁'i₁
ja₁ca₂ńi₅.

23 Jaun₂ ca₂ńag₃ jan₂ dsa₂:

—Te₁gui'₅₄, ǰme'₂ bá₄ dsa₂ i₂tín'₅?

Jaun₂ ca₂ńag₃:

* **13:19** mostaza: On₃jua'₅₄ mi₁jáng'₅ a₂cuí'₅ dsa₂ go₄ jniog₄; caun₂
ni₁'ma₂ dsón'₂ bá₄ jaun₂ a₂chei₂ Brassica nigra. † **13:21** griego:
sata, (caun₂ tio'₅₄ 'éi₅ 'ma₂ jaun₂ 'éi₄ con'₂ 22 litros.)

24 —Quen² 'nia'² bí² tíong'² juí⁵ o⁴né⁴ dsag²; ia¹ juá'⁵ jniá², juín⁵ i²nio³ tón'³, la¹ tsá³ le³qui⁵⁴ jmíg⁴. 25 Ia¹ con² tsá³ ḡó⁵ jē¹ma²tē² rē¹náú³ juig⁵⁴ dsi²néi², jnéi³ o⁴né⁴, 'nia'² ně³ i²tē³tsing'⁵⁴ le³ca¹né⁴, jme¹lióg'⁴ to'⁵⁴ mī'⁵⁴ tē'⁴: “¡Te¹gui'⁵⁴! Nia⁴ o⁴né⁴, tió'⁴ jnia'⁵⁴.” Éi² ně³ ḡag³: “Tsá³ cuín⁵ jniá² 'nia'²; tsá³ guion⁵⁴ a²já'⁴ ja²nó'⁵ 'nia'².” 26 Jaun² guē⁴ jme¹lióg'⁴ 'nia'² jua'⁵⁴: “Jnia'⁵⁴ bá⁴ la² i²ma²que⁵⁴ ma²'ne'⁵⁴ co²lē⁵ quian'⁵⁴ 'ne²; jua'² 'ne² bá⁴ guē'² ca²jme¹tag'² jnia'⁵⁴ jin⁴ juín⁵ dsa².” 27 Jaun² dsa² juig⁵⁴ dsi²néi² ně³, ḡag³: “Ma²nē²juá'³ jniá² tsá³ guion⁵⁴ i²'ein² 'nia'². Cau⁵ jnia'³ 'nia'² ca²le³jíng'³ i²jmo⁵ dsó'⁵ a²'lig'⁵⁴.” 28 Ja¹jaun² qui²o¹'o'⁴ o¹quíng'³ 'nia'² jan'⁵⁴, jē¹ma²tē² rē¹jíng'⁵⁴ Abraham, Isaac, Jacob, quian'⁵⁴ ca²le³jín³ guē⁴ dsa² i²jme¹'ē² jág¹ quián⁵ Diú⁴, tíoín'⁵⁴ ja¹gon² Diú⁴, la¹ 'nia'² guē'² ně³, dsi³gang'⁵⁴ úíng². 29 Ia¹ qui²ja³len⁵ i²chan² ca²taun² ca²taun² mi²güíng³ ja³tiaín'² guē'³ co²dsia⁵ ja¹gon² Diú⁴. 30 La¹ lé², chan² i²lin⁵⁴ i²tión² le³jē¹ca²tó'², tē³tsin'⁵⁴ le³ne⁴ juí⁵; i²tión² le³ne⁴ juí⁵ rē²nē³ guē'² ně³, tē³tsin'⁵⁴ le³jē¹ca²tó'².

*Ca²'o³ Jesús o⁴quíó'⁴ dsa² juí² Jerusalén
(Mateo 23:37-39)*

31 Hora jaun² dé⁴ dsi³lén² i²lin⁵⁴ dsa² fariseos, ca²juá'²:

—Co²ḡei'⁵⁴ dse³ jú⁵ ja¹lá³, quian² juí⁵ quiáng'², ia¹ 'nio³ Herodes jḡag'³.

32 Jaun² ca²ḡag³ táng³ Jesús:

—O²nó'⁵ 'nia'², o²chei'⁵⁴ dsi²ma²jág²†[†] 'éi²: “Ní², la² bá⁴ 'ú⁴, ně³, 'ióg³ ně³; ně³ bá⁴ guē'⁴ 'uíng'⁵⁴ jme²dsí²

† 13:32 lit. “dsi²güí⁵”, co²'nió'⁴ le³jua'⁵⁴, dsa² i²'io⁵ mai⁵⁴.

je₂na'₅₄ quió'₅ dsa₂, nē₃ guě₄ qui₂jme'₁liong₅₄ dsa₂.
 'Ióg₃ caun₂ guě₄ 'ŋia₅ quió₃.” ³³ A₂caun₂ jmo₅₄
 bá₄ jniá₂ ta₁ a₂ca₂tíng₂ jmo₅₄ tē₁lia'₂ chang₂, ia₁
 tsá₃ lé₂ le₃jón₂ jan₂ dsa₂ i₂'ě₂ jág₁ quián₅ Diú₄ úing₂
 ja₁lě₄ juig₂ Jerusalén. ³⁴ i'₁Nia'₂ dsa₂ juig₂ Jerusalén!
 i'₁Nia'₂ dsa₂ juig₂ Jerusalén, 'nia'₂ i₂jme₂dsiáng'₁ dsa₂
 i₂'ě₂ jág₁ quián₅ Diú₄, 'nia'₂ i₂qui₂jnag'₅₄ cang₄ dsa₂
 i₂chen₅ Diú₄ jin'₄ 'nia'₂! i'₁Lióng₂ ráun₂ jme'₁ín₅
 dsi₃ jme'₁chi₁liang'₂ chi'₂-guein₂ juig₂ la₂ quiáng'₂,
 ju₁lia'₂ jmo₅ i₁tsín'₃ a₂chi₂lain'₂ guein₂ quián₅ to'₂
 né₃ tsí₁rě₂cu₅, la₁ guion'₅₄ 'nia'₂ tsá₃ ca₂gue'₅₄!
³⁵ Ní₂ nē₃, tē₃tsí'₅₄ chi₁güig'₂ dsi₂néi₂ quiáng'₂. Juá'₅
 jniá₂, o₁líg'₂ tsá₃ ma₃jag'₅₄ jniá₂, ca₂lia'₂ ca₂tě₂
 jmig₄ ja₁jua'₅₄ 'nia'₂: “Ju₁le₂jñi₃ i₂nē₅ i₂já₅ o₄quió'₄
 Te₁gui'₅₄.”

14

Ca₂jme₃'lión₂ Jesús jan₂ dsa₂ i₂jme₁guion₂

¹ Co₂ráun₂ guě'₂ ca₂lě₃ táng₃ caun₂ jmig₄ sa₅₄
 a₂ca₂ŋó₃ Jesús i₃guě'₃ ja₁quió'₄ jan₂ dsa₂ dsen₅₄
 quián₅ dsa₂ fariseos; i₂lin₅₄ guě'₂ dsa₂ fariseos sián'₂
 a₂jñia'₅₄ tiog₂₃ bá₄ tioin'₅₄.

² Ja₁jaun₂ jme'₁en₅₄ jan₂ dsa₂ dso'₅₄ i₂guion₂.

³ Jaun₂ ca₂ŋag₃ Jesús ca₂tsí'₃ tē₅juá'₅ quian'₅₄ dsa₂
 fariseos, ca₂juá'₂:

—ǵ'I₄ 'éi'₃, o₃ tsá₃ 'i₄ 'éi'₃ jme₃'lión₂ dsa₂ dsa₂ dso'₅₄
 jme₁jmig₄ sa₅₄?

⁴ La₁ tei₄ bá₄ i₃lěin₂, tsá₃ 'e₂ ŋi₅ ŋag₃. Jaun₂ ca₂jñai'₃
 dsa₂ dso'₅₄, ca₂jme₃'lió₂. Jaun₂ ca₂dsióg'₂ quió'₅.

⁵ Jaun₂ ca₂juá'₂ ca₂tsí'₃ 'éi₂:

—ǀI₂'ein₂ 'nia'₂, tsá₃ dsi₃dsen₅ dsi₂jui₅ chi'₂
quián₅, * o₃ jan₂ ca₁jui₅ 'e₂ nē₁jua'₂ ca₂táin'₂ né'₃
táu₃ jñia'₅₄ tē₃ jmig₄ sa₅₄?

⁶ La₁ tsá₃ ca₂tió'₃ ŋag₃ jág₁ nē₅.

Tsá₃ dsióg₅ jua'₅₄ quió'₃ dsa₂ 'ma₂si₅₄ ja₁dsen₅₄ guě₄

⁷ Jme₁ca₂tē₂ ne₄ Jesús 'a₂ lia'₂ quió'₅ dsa₂ i₂té₄
jmá'₃ lia'₂ ja₁dsen₅₄ guě₄ ja₁tian'₂, jaun₂ ca₂cuē₃ jág₁
a₂jáng'₅ léi₄ la₂:

⁸ —Nē₁jua'₂ 'ein₂ tē₂ ja₁niog₅ jmig₄ jen'₂ gu₂ dsa₂,
tsá₃ ne'₅₄ jui₁lia'₂ ja₁dsen₅₄, ia₁ con'₂ tsá₃ ŋó₅ nē₁jua'₂
ca₂dsióg₃ jan₂ i₂dsen₅₄ guě₄ lia'₂ 'ne₂. ⁹ Ia₁ ǀ'e₂ bá₄
lé₂ nē₁jua'₂ dsa₂ i₂nē₂té₂ le₂on'₃ 'nia'₂ juá'₂: “I₂la₂
cuē'₅₄ ja₁ñéi'₂”? Jaun₂ tē₃ ma₂gueng'₅₄ bá₄ gog'₅₄
o₁né'₂ tē₂ jē₁ca₂tó'₂. ¹⁰ La₁ juá'₅ jniá₂, chi₂jua'₂ líg'₂
nē₁'ein₂ ca₂tē₃, tē₂le₃ jē₁ca₂tó'₂ bá₄ ne'₅₄, ia₁jaun₂
dsa₂ i₂nē₂té₂ lé₂ le₃juá'₂: “A₂mei₅₄ quiáng₃, ja₁dsen₅₄
guě₄ la₂ i₂né₂.” Jaun₂ le₂nē₅ bá₄ jme₃juag'₂ dsa₂
i₂qué'₂ quiang'₅₄. ¹¹ Ia₁ jui₁lia'₂ dsa₂ i₂jme₂can'₅₄
guion₅₄, sióin₃ tē₂le₃ jē₁ca₂tó'₂; dsa₂ i₂jmo₅ me'₂ guē'₂
ně₃, roin'₂ guei'₅₄.

¹² Jaun₂ ca₂tsí'₃ ján₃, dsa₂ i₂ca₂tē₃ 'éi₂:

—Jē₁ma₂tē₂ rē₁'niog'₂ jmó'₂ caun₂ má₃ a₂ñig'₅₄
dsa₂, tsá₃ tē'₅₄ jui₁lia'₂ dsa₂ a₂mei₅₄ quiáng'₂, on₃
guē'₂ jui₁lia'₂ i₂lín₅ o₁ring'₂, on₃ guē'₂ jui₁lia'₂ i₂cha₂
cu₄ tián'₅ cau₅ quiáng'₂ ně₃. Ia₁ con'₂ tsá₃ ŋó₅, dsa₂
le₂'éi₂, lé₂ le₃tē₂, a₂jéin'₃ táng₃ quiáng'₂. ¹³ Jaun₂
ně₃, nē₁jua'₂ 'niog'₂ jmó'₂ caun₂ jmig₄, te'₂ jmá'₃ lia'₂
dsa₂ te₂ñé₂, dsa₂ 'lian'₂, dsa₂ ten₄, dsa₂ guian'₅₄ ně₃.
¹⁴ Jaun₂ le₂nē₅ bá₄ le₃chang'₂ dse₃. Ia₁ dsa₂ 'éi₂ ně₃,

* **14:5** Cha₂ a₂lin₅₄ chog₅₄ si₂ a₂juá'₂: “dsi₃dsen₅ bú'₄ quián₅.”

tsá₃ qui'₅₄ jmig₄ le₃ jéin'₃ quiáng'₂, la₁ i₁ jáun₃ bá₄ tíng'₄
quiáng'₂, i₁ jen'₅₄ ca₂ le₃ jín₃ dsa₂ dsen₃.

Jág₁ jáng'₅ léi₄ ju₁ lia'₂ dsa₂ i₂ té₄ ja₁ niog₅ jmig₄
(Mateo 22:1-10)

¹⁵ Jan₂ dsa₂ i₂ jme₁ guá₄ cau₅ i₂ ca₂ nág₂ jág₁ ně₅,
ca₂ tsí'₃ Jesús:

—'E₂ guě₄ dsen₃ i₂ tian'₃ guě'₃ † ja₁ gon₂ Diú₄.

¹⁶ Jaun₂ ca₂ juá'₂ Jesús:

—Jme₁ chan₂ jan₂ dsa₂ i₂ ca₂ cuě₃ caun₂ má₃ pa₁,
jaun₂ ca₂ tě'₃ juin₅ dsa₂. ¹⁷ Jme₁ ca₂ tě'₂ hora a₂ nio₃
jmig₄ ně₃, ca₂ chein₃ dsa₂ i₂ jme₂ ti₃ ta₁ ne₅₄, i₁ chi'₄
dsa₂ i₂ ma₂ lě₅ jág₁ dsi₁ lén₂: “I₂ nó'₅ 'nia'₂, ia₁ ma₂ lě₅
co₂ jnia₅₄ ca₂ le₃ jě₃.” ¹⁸ La₁ ca₂ le₃ jín₃ bá₄ ca₂ juá'₂
tsá₃ jii₅₄. I₂ le₂ 'uig₅₄ ca₂ ŋag₃: “Caun₂ 'uě₃ lia'₂
ně₂ lá₂; ja₁ jaun₂ nei₅₄ i₁ jág₃. 'Én₃ dso₄ quió₃ tsá₃ lé₂
nei₅₄.” ¹⁹ I₂ sián'₂ guě'₂ táng₃ ca₂ juá'₂: “'Njá₂ dsán'₃
ca₁ ju₅ i₂ quia'₂ 'uě₃ i₂ tě₂ ca₂ lán₂, i₂ 'éi₂ nei₅₄ i₁ quión₃
'í₁ chi₂ jua'₂ ma₂ téin₅ jmo₃ ta₁. 'Én₃ dso₄ quió₃ tsá₃
lé₂ nei₅₄.” ²⁰ I₂ sián'₂ guě'₂ ca₂ juá'₂ táng₃: “Gu₃
lia'₂ ně₂ jeng'₅₄; jaun₂ lě₃, tsá₃ lé₂ nei₅₄.” ²¹ Jaun₂
jme₁ dsián'₃ mozo 'éi₂ ca₂ jmóg'₃ jág₁ ne₄ juig₅₄, jaun₂
ca₂ rě₃ 'né₃ bá₄ juig₅₄. Jaun₂ ca₂ juá'₂ tsí'₅ táng₃ mozo
'éi₂: “Co₂ chi'₅₄ o₂ ŋi₄ jě₄ calles, le₂ tan₅₄ ja₁ le₁ ŋi'₂
dsa₂ juin₅ jě₄ juig₂, qui₂ o₂ quian₅ dsa₂ te₂ ŋé₂, dsa₂
'lian'₂, i₂ guian'₅₄, i₂ ten₄ ně₃.” ²² Jme₁ co₂ lág₂ jaun₂,
ca₂ juá'₂ dsa₂ mozo 'éi₂: “Gui'₅₄, ma₂ ně₂ jmo₃ con'₂
lě₅ ně₂ jua'₅₄. Jo₂ bá₄ guě₄ dsi₂ néi₂.” ²³ Jaun₂
ca₂ juá'₂ táng₃ juig₅₄: “Gua₂ táng₃ jě₄ calles le₂ tan₅₄
ja₁ lě₄ o₄ ju₅, o₂ quian₅ tion₅₄ dsa₂ i₂ jeng'₂, jaun₂ can'₂
dsi₂ néi₂ quió₃. ²⁴ Ia₁ le₂ ně₅ bá₄ juá'₅ jniá₂, 'i₁ jan₂

† 14:15 lit. “guě'₃ i₁ ŋi'₄.”

i₂jme₁lě₄ jág₁ ca₂tě₃ le₂'uig₅₄ 'éi₂, tsá₃ quein₃ jě₄ jmig₄ quió₃.”

'Ni₀₅ bá₄ 'ua₂ ta₁ a₂jme₃quian₅₄ dsa₂ Te₁gui₅₄
(Mateo 10:37-38)

²⁵ Juin₅ lin₃ dsa₂ i₂jme₁ma₂quian₅₄ Jesús. Jaun₂ ca₂jéin₃ ca₂juá₂:

²⁶ —Chi₂jua₂ 'ein₂ 'ei₅ dsí₅ jme₃quiong₅₄ jniá₂, nē₁jua₂ tsá₃ ca₂tén₃ dsí₅ téin₂ jmei₂, chog₅₄, dsa₂ mí₂ quiáin₅, chi₂-guein₂ quiáin₅, ca₂le₃jín₃ guě₄ o₁r'in₅₄ nē₃; nē₁jua₂ tsá₃ ca₂tén₃ dsí₅ le₂jio₅ jme₂dsí₂ quió₅ nē₃, tsá₃ lé₂ le₃léin₂ dsa₂ quiáng₃. ²⁷ Jua₅₄ 'ein₂ tsá₃ ca₂tén₃ dsí₅ gue₃ 'mú₃, † jiá₃ chi₁co₅₄ quió₅, tsá₃ lé₂ le₃léin₂ dsa₂ quiáng₃. ²⁸ Jua₅₄ mei₂ guě₃ chan₂ jan₂ 'nia₂ i₂'nio₃ chi₃ caun₂ ni₁'ia₂ ηei₅, ζon₁ jniá₅ de₂ con₂ 'í₁ chi₂jua₂ ma₂len₅ cu₄ quió₅ ca₂lia₂ a₂'ió₄ a₂jaun₂? ²⁹ Ia₁ nē₁jua₂ tsá₃ le₂jaun₂, jme₃lióg₃ 'uig₅₄ 'ia₂, tsá₃ tió₅ guě₂ jme₃'ió₃, ca₂le₃jín₃ dsa₂ i₂jág₃ a₂jaun₂, a₂lě₁co₂jmóg₂ co₃ηág₂ bá₄. ³⁰ Dsia₃: “Dsa₂ nē₅ con₂ jniá₅₄ ca₂jme₃lióg₃ 'uig₅₄, la₁ tsá₃ guě₂ qui₅₄ jmig₄ jme₃'ió₃.” ³¹ O₃ ju₁lia₂ jan₂ rag₅₄ guě₂, i₂jmo₃ 'nei₂ quian₅₄ jan₂ rag₅₄ sián₂, ζtsa₁ jniá₅ de₂ guá₃ con₂ 'í₁ chi₂jua₂ tió₅ quian₅₄ guian₃ mei₅ 'lióg₂ quiáin₅, dsí₃quín₂ quian₅₄ guión₂ mei₅? ³² Chi₂jua₂ ma₂lí₄, tsá₃ tió₅ nē₃, tē₁lia₂ uing₂ guě₄ já₅ rag₅₄ jan₂, chein₃ dsa₂ i₂quian₅ jág₁ a₂mi₂₃ dsian₅ co₂ηei₅₄ mi₅₄. ³³ Le₂nē₅ bá₄ chi₂'ein₂ 'nia₂ i₂tsá₃ ca₂tén₃ dsí₅ tí₂ ca₂le₃jě₃ a₂cha₂ quió₅, tsá₃ lé₂ le₃léin₂ dsa₂ quiáng₃.

Jág₁ jáng₅ léi₄ ju₁lia₂ 'a₂ lia₂ lě₅ tsí₁ηi₁
(Mateo 5:13; Marcos 9:50)

† 14:27 lit. “tsá₃ cán₂ cróg₄ quió₅.”

34 '(Jui₁lia'₂ dsa₂ i₂quian'₅₄ jniá'₂ líin₅ jui₁lia'₂ lě₅ tsi₁ŋi₁.) A₂dse₃ bá₄ tsi₁ŋi₁ tē₁lia'₂ ŋi'₅₄. La₁ nē₁jua'₂ ca₂'en₃ ŋi'₅₄ nē₃, ħ'_{a2} bá₄ lia'₂ lé₂ le₃lei₂ táng₃? 35 Tsá₃ ma₃'e₂ ta₁ tí₄, on₃ guē'₂ lé₂ le₃lé₂ gua'₅₄, on₃ guē'₂ ma₂tí₅ ta₁ jua'₅₄ a₂le₃lé₂ ca₂bē'₅₄ 'o'₅₄. Jŋia'₅₄ lia'₂ a₂dsi₃ga'₅₄ uíng₂ bá₄. I₂dsi₅₄ gua₄, rē₂ jui₁nei₅₄.

15

Jág₁ jáng'₅ léi₄ jui₁lia'₂ jan₂ já'₂ cha'₂ i₂ca₂i₃cón'₅
(Mateo 18:10-14)

1 Ca₂le₃jín₃ dsa₂ i₂cán₂ 'lia'₅₄ quián₅ dsi₂tan₅₄, quian'₅₄ guē₄ dsa₂ i₂le₁cán'₄ dso₄ sián'₂, ca₂o₃léin₂ ja₁'en₅₄ Jesús, a₂o₃néi₃.

2 'Uig₅₄ jaun₂, dsa₂ fariseos quian'₅₄ tē₅juá'₅ ca₂chi₂ca₂'iin₃ Jesús. Ca₂juá'₂:

—Dsa₂ nē₅ qui₂guein₂₃ bá₄ dsa₂ i₂le₁cán'₄ dso₄, guē'₅ co₂lě₅ quiong'₅₄.

3 Jaun₂ lě₃ ca₂juá'₂ Jesús jág₁ jáng'₅ léi₄ la₂:

4—ħ₂I₂'ein₂ 'nia'₂, jui₁lia'₂ i₂'ŋio₅ caun₂ 'ŋiá₂-lón₂ já'₂ cha'₂, nē₁jua'₂ ca₂i₃cón'₅ jan₂, tsa₁ ja₁co₂'ŋiog₅ jaun₂ toin'₂ i₂quén'₂ ne₂guión₂ rē₂dsí₂ guia₃-né₂ (99) con'₂ i₂te₂, dsó₃ táng₃ dsi₂jui₅, dsi₂'niai'₂ i₂jan₂ i₂i₃cón'₅ 'éi₂, 'nau'₂ ca₂lia'₂ ca₂dsáu'₂? 5 Jē₁ma₂ca₂dsáu'₂ nē₃, tē₂ jui₅ co₁dsi₁₂, jón'₅ táng₃ 'io'₂ jén'₅. 6 Jē₁ma₂dsiáin'₃ dsi₂néi₂ nē₃, ŋíi'₂ ca₂le₃jín₃ a₂mei₅₄ quián₅, quian'₅₄ guē₄ dsa₂ i₂tíán'₅ cau₅ quió'₅. Jaun₂ juá'₂: “Nē₃ o₁tió'₄, jmó₁ 'io'₂ quian'₅₄ jniá₂, ia₁ dsán'₅ bá₄ já'₂ cha'₂ i₂jme₁ma₂i₂cón'₅ quiáng₃.” 7 Juá'₅ jniá₂, 'ŋio₅ lín₃ guē₄ bá₄ cha₂ o₂'ŋi₃ dsi₅ guei'₅₄ i₂juíg₃ o₄quió'₄ jan₂ dsa₂ i₂rē₂cán'₄ dso₄, i₂dsi₂quén'₅ dsí₅, lia'₂ con'₂

guě₄ o₄quió'₄ i₂quén'₂ ne₂guión₂ rē₂dsí₂ guia₃-né₂
(99) dsa₂ “dsen₃” i₂tsá₃ 'e₂ 'nió'₅ jme₃tsín₃ dsí₅.

Jág₁ jáng'₅ léi₄ ju₁lia'₂ caun₂ cu₄ 'ua'₂ a₂i₃có'₅

⁸ 'O₃ ju₁lia'₂ jan₂ dsa₂ m₁i₂ i₂'io₅ guia₃ cu₄ 'ua'₂, *
nē₁juá'₂ ca₂i₃có'₅ caun₂, ħtsa₁ téi₂ si₂, 'iá'₂ dse₃ lin₃
dsi₂néi₂, 'no'₂ ca₂lia'₂ ca₂dsó'₂? ⁹ Jē₁ma₂ca₂dsó'₂ nē₃,
jmo₂₃ 'io'₂, ŋí'₂ 'io₅₄ a₂mei₅₄ quiáin₅, i₂tián'₅ cau₅
quió'₅ nē₃, jaun₂ juá'₂: “Nē₃ o₁jmo₁ 'io'₂ quian'₅₄
jniá₂, ia₁ dsó'₅ bá₄ cu₄ a₂jme₁ma₂i₂ág₃ quió'₃.”
¹⁰ Jaun₂ le₂nē₅ bá₄ juíg₂ jniá₂ 'nia'₂, chan₂ o₂'ñi₃
o₂ñia₃ dsí₅ ángeles quián₅ Diú₄ o₄quió'₄ jan₂ dsa₂
i₂rē₂cán'₄ dso₄, i₂ma₂ca₂dsi₃quén'₅ dsí₅.

*Jág₁ jáng'₅ léi₄ ju₁lia'₂ jan₂ dsó₂ i₂ca₂dsián'₃ táng₃
quió'₅ jmei₂*

¹¹ Ca₂juá'₂ Jesús ján₃:

—Jan₂ dsa₂ jme₁chan₂ on₃ ja₁ñi'₅₄. ¹² I₂lín₅
i₂me'₂ guě₄ ca₂tsí'₃ jmei₂: “Tia₅₄, cuě₄ ca₂dsio₄ cu₄
quiáng'₂ con'₂ ca₂tíng₂.” Jaun₂ jmei₂ nē₃ ca₂dsi₃
'e₂ a₂cha₂ quió'₅, jma₃quén₅ ca₂cuě'₃ chi'₂ quiáin₅
con'₂ ca₂tíin₂. ¹³ Mei'₂ bá₄ cang₂ jaun₂, dsó₂ i₂me'₂
guě₄ qui₂ca₂'nag₃ a₂jme₁ma₂lě₅ quió'₅. Quian'₅₄ cu₄
jaun₂ ca₂'í₃ juí₅ i₁ñi₂ uíng₂ caun₂ 'uě₃ siá'₂. Ja₁jaun₂
ca₂i₁'éin₄ jē₂ cu₄ quió'₅, tsá₃ 'en₅₄ dsí₅ ca₂rē₃cháin₃.
¹⁴ Jme₁ma₂dsó'₃ jē₂ cu₄ nē₃, 'ñio₅ lin₃ ca₂rē₃'ín₃
a₂guě'₃ dsa₂ juíg₂ jaun₂. 'Éi₂ nē₃ ma₂ñi₂₃ 'oin₅₄.
¹⁵ Jaun₂ ñó₃ i₃'nióg₂ ta₁ a₂jmo₃ quió'₅ dsa₂ juíg₂ jaun₂.
Jaun₂ dsa₂ 'éi₂ nē₃ ca₂chei₃ ja₁nau₂ quió'₅ a₂ñi₁'₃ i₁ñí₅.
¹⁶ Jē₁ma₂tě₂ rē₁guě'₃ i₁ñí₅, ca₂lia'₂ ma₂le₃guě'₃ 'ñiog₅

* **15:8** griego: dracma (co₂'nió'₄ 'lian'₅₄ dsa₂ co₂jmi₄ ta₁).

cuá'₁ tsīrē₂jnei₂ a₂guē'₅ já'₂, la₁ 'i₁jan₂ tsá₃ 'ein₂
 ca₂cuē₃ a₂guē'₅. 17 Jaun₂ ca₂i₃jñia₅ dsi₅: “iTē₁lia'₂
 juin₅ mozos i₂'ñio₅ ñe'₃, cha₂ qui₂rē₂tsón₂ a₂guē'₅,
 jniá₂ ně₃ ja₁lá₃ jñig'₅ dsi₃ 'ong₅! 18 'Ag₅₄ caun₂ dsi₃,
 nég'₄ táng₃ dsi₂néi₂ quió'₅ ñe'₃. Juig₅₄ le₂la₂: Tia₅₄
 quiáng₃, 'e₂ gué₄ juē'₂ dso₄ ca₂'no₃ ne₄ Diú₄ quian'₅₄
 ja₁cong'₂; 19 jñia'₅₄ tsá₃ ma₃ca₂tíng₂ a₂tē'₄ jniá₂
 jón₃. La₁ jag₄ jniá₂ lia'₂ ja₁jñg'₅₄ jan₂ dsa₂ i₂tion₄
 quiáng'₂ bá₄. 20 Jaun₂ ca₂nau₂ ca₂'í₃ jui₅ jón'₃ táng₃
 quió'₅ jmei₂. La₁ uíng₂ bá₄ gué₄ jón'₅, jme₁ca₂jág₂
 jmei₂. Ca₂tá'₂ ñei₂ dsi₅, ca₂ñó₃ co₂chi'₅₄, ca₂cág'₃ cu₅
 ca₂chen'₃ quió'₅ 'io'₂ jén'₅. 21 Jaun₂ gué₄ ca₂juá'₂
 ja₁ñi'₅₄: “Tia₅₄ quiáng₃, 'e₂ gué₄ juē'₂ dso₄ ca₂'no₃
 ne₄ Diú₄ quian'₅₄ ja₁cong'₂; jñia'₅₄ tsá₃ ma₃ca₂tíng₂
 a₂tē'₄ jniá₂ jón₃.”† 22 La₁ jmei₂ ně₃, ca₂tsí'₃ dsa₂
 i₂jme₂ti₃ ta₁ tion'₅₄ quiáin₅: “iMa₂ně₃ co₂chi'₅₄! O₂dsi₄
 'mi'₂ a₂lē₅ a₂dse₃ gué₄, queng'₅₄ chi'₂ quiáng₃; caun₂
 gué'₂ anillo tio'₂ chi₁gú₃. Co₂dsán'₃ gué'₂ ni₁lau₂ to'₅₄
 'nia'₂ tag₅₄; 23 Jaun₂ o₁te'₄ 'nia'₂ ca₁jui₅ i₂ma₂'on'₅₄
 chén'₅, jaun₂ jñí'₄ 'nia'₂. iJaun₂ que₅₄, tió'₄ jmó₁ 'io'₂!
 24 Ia₁ chi'₂ ně₅ quiáng₃, ně₂jag₄ i₂jme₁ma₂jon₅ bá₄
 ně₅, la₁ chain₂ bá₄; jme₁ca₂i₃cóin'₅, la₁ ma₂dsáin'₅
 bá₄.” Jaun₂ ca₂jme₃lióg₃ jmig₄ tioin'₅₄.

25 'Tē₁lia'₂ jaun₂, chi'₂ ja₁ñi'₅₄ i₂lín₅ i₂juin'₂ gué₄,
 jme₁'ein₅₄ ja₁nau₂. Jme₁ma₂ja₂quián₃ guain'₂
 dsi₂néi₂, ca₂nág₂ i₁niog₅ son₅₄ i₁dsan₅ dsa₂. 26 Jaun₂
 ca₂tē'₃ jan₂ dsó₂ ca₂ñag₃ 'e₂ niog₅ lē₂. 27 Jaun₂
 juá'₂ 'éi₂: “Dsó₂ ríng'₂ bá₄ guán'₅, jaun₂ ñei'₅ ně₃
 ně₂jmo₃ 'éi'₃ ně₂ñi'₃ dsa₂ ca₁jui₅ i₂jme₁chén'₄ 'on'₅₄,

† 15:21 A₂lín₅₄ chog₅₄ si₂ chi₁ton₅ le₂la₂ ján₃: “La₁ jag₄ jniá₂ lia'₂
 ja₁jñg'₅₄ jan₂ dsa₂ i₂tion₄ quiáng'₂ bá₄.”

ia₁ guáin'₅, dsein₃ bá₄, tsá₃ 'e₂ líin₅.” ²⁸ La₁ ca₂rē₃'né₃
 bá₄ riin'₅₄ i₂juin'₂ 'éi₂. Tsá₃ 'nio₃ 'í₂ dsi₂néi₂; jaun₂
 ca₂o₃'ín₃ jmei₂, ca₂juá'₂ jág₁ 'ua₁. ²⁹ La₁ 'éi₂ ně₃
 ca₂ŋag₃ ca₂tsí'₃ jmei₂: “Ca₂le₃jě₃ ŋi₂ ma₂gui₃
 gua₅₄ jme₃tí₂ ta₁ ne'₅₄, tsá₃ líg'₂ jua'₅₄ ma₂jmo₃ tsá₃
 nag₅₄ ja₁cong'₂. Ca₂lia'₂ ŋjia'₅₄ jan₂ chein₂ lau₂ bá₄
 tsá₃ ma₂cuag'₅₄ jniá'₂ jua'₅₄ jmo₅₄ jmig₄ quian'₅₄
 a₂mei₅₄ quiáng₃. ³⁰ Ně₃ gué₄ ting'₂ jmó'₂ jmig₄
 ia₁ guán'₅ ja₁ŋí'₄ ně₅, i₂lě₁qui₂i₁'én₄ cu₄ quiáng'₂,
 qui₂i₁ŋi₂ lia'₂ lě₂ dsí₅ quian'₅₄ 'io₅₄ ga₂. Ně₃ ně₃,
 jmig₄ jmo'₂ o₄quió'₄, jŋíg'₅ ca₁jui₅ i₂'on'₅₄ gué₄
 jme₁chén'₄.” ³¹ Jaun₂ ca₂ŋag₃ jmei₂: “Jón₃, ma₁
 co₂tan₅₄ bá₄ ŋéi'₂ 'ne₂ quian'₅₄ jniá'₂; a₂quián'₂ 'ne₂
 bá₄ ca₂le₃jě₃ a₂cha₂ quió'₃. ³² La₁ ně₃ ně₃ co₂ně₅
 ca₂tág₂ jmó₁ jmig₄, quián₁ o₂'ŋi₃ dsi₅, ia₁ guán'₅
 ríng'₂, ně₂jag₄ i₂jme₁ma₂jon₅, la₁ ně₃ ma₂chain₂ bá₄
 táng₃; jme₁ca₂i₃cóin'₅, la₁ ma₂dsáin'₅ bá₄.”

16

Jág₁ jáng'₅ léi₄ ju₁lia'₂ jan₂ dsa₂ i₂tsá₃ ca₂rě₃ti'₅₄

¹ Ca₂juá'₂ Jesús ján₃ ca₂tsí'₃ dsa₂ i₂quiain'₅₄:

—Jme₁chan₂ jan₂ dsa₂ cha₂ cu₄ jme₁'ŋioi₂₃ jan₂
 dsa₂ i₂niog₅ gu₂ dsi₂néi₂ quió'₅; la₁ ca₂i₁dsia₂ jan₂
 dso₄, ia₁ juá'₂ a₂lě₁jme₁qui₂'én₂ 'éi₂ a₂cha₂ quió'₅
 juig₅₄. ² Jaun₂ ca₂tě₃ juig₅₄ ca₂juá'₂: “¿I₂'e₂ bá₄ jág₁
 ně₅ nag₂₃ quián'₂ 'ne₂? Jang'₅₄ cuentas quiáng'₂, ta₁
 a₂líng'₅, ia₁ ja₁lá₃ ŋjia'₃ ta₁ a₂niog₅ gog'₂.” ³ Jaun₂
 dsa₂ 'éi₂ ně₃ ca₂'náu'₃ dsí₅: “¿E₂ bá₄ jmo₅₄ jniá'₂?
 Jniá'₂ juig₃ ta₁ quió'₃. Tsá₃ béng₂ jua'₅₄ jmo₅₄ ta₁
 ja₁nau₂, ján₃ gué'₂ gui'₄ jniá'₂ jua'₅₄ a₂lě₁mi₁₂ jme₃'o₅₄
 dsa₂. ⁴ Ma₂gui₃on₄ a₂ lia'₂ jmo₅₄ ia₁jaun₂ guei₃ dsa₂

sián'₂ dsi₂néi₂ quió'₅ jē₁ma₂tē₁tsing'₅₄ tsá₃ ta₁ cha₂
jmo₅₄.” ⁵ Jaun₂ ca₂tē'₃ tē₃ qui₂ján₃ dsa₂ i₂jme₁le₁rín₃
quió'₅ juig₅₄. I₂le₂'uig₅₄ ca₂tsí'₃: “¿Je₂liá'₂ ring'₂
quió'₅ gui'₅₄?” ⁶ Jaun₂ ca₂juá'₂ 'éi₂: “Caun₂ 'ñiá₂-
láu₂ ba₂rig₅₄* no'₅₄.” Jaun₂ juá'₂: “La₂ ron₅ si₂
ja₁ton₅ con'₂ a₂ring'₂. Né₂, ma₂nē₃ jmo₄ táng₃
caun₂ a₂siá'₂, tió'₃ jñiá'₅₄ tē₂láu₃-guiá'₂ bá₄ taun'₅₄
a₂le₃ring'₂.” ⁷ Jaun₂ ca₂tsí'₃ táng₃ jan₂ i₂sián'₂: “Ne₂
guē'₂, ¿je₂liá'₂ ring'₂?” Jaun₂ juá'₂: “Caun₂ mei₅ 'ma₂
cuig₂.”† Jaun₂ ca₂ñag₃: “Jón'₅ si₂ ja₁ton₅ a₂ring'₂;
jmo₄ táng₃ caun₂ a₂siá'₂ tió'₃ quén'₂ co₂ne₂guióg₂
bá₄ taun'₅₄.” ⁸ Juig₅₄ nē₃, rē₂ bá₄ ca₂'iin₃ dsa₂ i₂tsá₃
ca₂rē₃ti'₅₄ 'éi₂, ia₁ 'ñioi₅₄ ca₂jmo₃. Ia₁ ja₂lin₃ guē'₄ bá₄
'ñio₅₄ ju₁lia'₂ dsa₂ mi₂güig₃ jmig₄ nē₃, lia'₂ con'₂ guē'₄
chi'₂-guein₂ i₂l₂nio₄ ja₁jñiá'₂ si₂. ⁹ Jaun₂ juig₂ jñiá'₂
'nia'₂, 'nio'₂ 'nia'₂ ju₁'a₂ lia'₂ léng'₂ a₂mei₅₄ quian'₅₄
cu₄ cha₂ mi₂güig₃ 'lig'₅₄ la₂, ia₁ jaun₂ jē₁ma₂ca₂dsa₃
cu₄, chan₂ bá₄ i₂le₃guéi'₂ 'nia'₂ ja₁o₁tiáng'₂ dse₃
co₂tan₅₄. ¹⁰ Ju₁lia'₂ i₂rē₂ti'₅₄ rē₂ quian'₅₄ ca₂juig₄
a₂tē₂no₄ gu₂, ján₃ bá₄ le₂jaun₂ rē₂ti'₅₄ quian'₅₄ 'lióng₂.
Le₂jaun₂ guē'₂ ju₁lia'₂ dsa₂ i₂tsá₃ rē₂ti'₅₄ quian'₅₄
ca₂juig₄, ján₃ bá₄ le₂jaun₂ tsá₃ rē₂ti'₅₄ quian'₅₄ 'lióng₂.
¹¹ Jaun₂ nē₃, nē₁juá'₂ tsá₃ rē₂ten'₅₄ 'nia'₂ quian'₅₄
cu₄ cha₂ mi₂güig₃ 'lig'₅₄ la₂, ¿'ein₂ bá₄ i₂lé₂ le₃'ág₃
caun₂ dsí₅ ja₁con'₂ 'nia'₂ quian'₅₄ a₂lě₅ a₂quen₅
tē₃dsón'₂? ¹² Nē₁juá'₂ tsá₃ rē₂ten'₅₄ 'nia'₂ quian'₅₄
a₂lě₅ quió'₅ dsa₂ sián'₂, ¿'ein₂ bá₄ dsia₃ gog'₂ 'nia'₂
ju₁lia'₂ a₂ca₂tín'₂ 'nia'₂ guiong'₅₄? ¹³ 'I₁jan₂ dsa₂

* **16:6** lit. “caun₂ 'ñiá₂-láu₂ batous”, (caun₂ 'éi'₃ a₂jme₁'io₅ dsa₂, a₂'a₄
con'₂ 37 litros le₂caun₂). † **16:7** lit. “caun₂ 'ñiá₂-láu₂ korous mīg₂
trigo”, (caun₂ 'éi'₃ a₂'éi₄ con'₂ guia₃, 'ma₂ le₂caun₂).

i₂ma₂'lian'⁵⁴ tsá₃ lé₂ le₃jme₃ti₃ ta₁ ne₄ on₃ juig⁵⁴. Ia₁ jme₃'ŋiai⁵⁴ jan₂, jan₂ guë'₂ jme₃'nioi₃; o₃ jme₂gain₃ jan₂, jan₂ guë'₂ tsá₃ jui⁵ toin'₂. Tsá₃ 'ein₂ 'nia'₂ lé₂ le₃jme₃ti₃ lia'₂ ne₄ Diú₄, lia'₂ ne₄ Cu₄ ně₃.

¹⁴ Dsa₂ fariseos ně₃, jme₁tioin'⁵⁴ 'nag₂₃ jë₂ jág₁ ně₅. Jaun₂ ŋia'⁵⁴ ca₂ŋág₂ 'nei₂ bá₄ jme₁ca₂nág₂, ia₁ lín₅ dsa₂ i₂ŋí₄ dsi⁵⁴ cu₄.

¹⁵ Jaun₂ ca₂juá'₂ Jesús:

—'Nia'₂ jmo'₂ a₂dseng'₃ tē₃ne₄ dsa₂, la₁ cuí'₅ bá₄ Diú₄ dse₃ 'a₂ lia'₂ lě₅ 'au'₂ 'nia'₂. Ia₁ juí₁lia'₂ i₂jmo₅ dsí⁵ a₂ŋí₄ lě₃ dsein⁵⁴ 'ŋio₅ quein₅, a₂jaun₂ 'io'⁵⁴ Diú₄.

'Éi'₃ Juá'₅, quian'₅₄ ja₁gon₂ Diú₄

¹⁶ 'Jme₁ron₅ 'Éi'₃ Juá'₅, quian'⁵⁴ Si₂ quió'₅ dsa₂ i₂jme₁'ě₂ jág₁ quián₅ Diú₄, ca₂lia'₂ ca₂tě₂ jmig₄ a₂jme₁chan₂ Juan⁵⁴. Ca₂le₃jaun₂ qui₂dsi₂'ag₅ jág₁ juí₁lia'₂ ja₁gon₂ Diú₄; ma₂ja₂lén₂ ca₂le₃jín₃ dsa₂ qui₂quín'₅ bí₂ a₂tóin'₃. ¹⁷ Tsá₃ guě'₄ 'e₂ ta₁ quian₅ a₂dsi₃ŋí₂ dsi₁ guei'⁵⁴ quian'⁵⁴ gua'⁵⁴ 'uě₃, lia'₂ con'₂ guě'₄ dsi₃'én₂ caun₂ léi₄ pí'₁ a₂le₁ton₅ 'Éi'₃, jua'⁵⁴ a₂tsá₃ le₃ti₃.

Jme₂tag₅ Jesús 'a₂ lia'₂ lě₅ juí₁lia'₂ a₂tén₂ dsa₂ dsi₂i₂gu₂

(Mateo 19:1-12; Marcos 10:1-12)

¹⁸ 'Ně₁jua'₂ jan₂ dsa₂ ŋe'₂ ca₂téin₂ dsa₂ mí₂ quiáin₅, a₂jéin'₂ táng₃ gu₂ quian'⁵⁴ i₂sián'₂, 'no₂₃ dso₄. Ján₃ guě'₂ le₂jaun₂ ně₁jua'₂ dsa₂ ŋe'₂ ca₂cain₃ dsa₂ mí₂ i₂ma₂téi₂ dsi₂i₂gu₂, ján₃ bá₄ co₂jaun₂ 'no₂₃ dso₄ ján₃.

Jan₂ dsa₂ cha₂ cu₄, quian'⁵⁴ Lázaro

19 'Jme₁chan₂ jan₂ dsa₂ cha₂ cu₄ i₂jme₁quí₅ jmá'₃ tsin'₅₄ jlá'₁, quian'₅₄ 'mí'₂ 'uí'₃ a₂chein'₅₄ ta₁jain₂, ně₃. Le₂'o₃ jmig₄ bá₄ jme₁cuě'₅ o₂'ñi₃ o₂ñia₃ dsi₅, jme₁jmo₂₃ jmig₄ jlá'₁. 20 Jme₁chan₂ táng₃ jan₂ dsa₂ te₂ñé₂ i₂jme₁chen₂ Lázaro, † i₂dso'₅₄ jme₁qui₂rē₂can'₂ 'mé'₅ ni₁ñi₁₂. Jme₁dsi₂dsiog₃ dsa₂ o₄'né₄ quió'₅ dsa₂ cha₂ cu₄. 21 Dsa₂ te₂ñé₂ 'éi₂ ně₃ jme₁'nio₃ jme₃tain'₅₄ quian'₅₄ a₂tsi₂séi'₂ ne₄ mesa. Ca₂tē₂ dsi₂ji'₅₄ jme₁ja₂lén₂ ja₂'lí'₃ ne₄ 'mé'₅ quió'₅. 22 Cang₂ jaun₂ ca₂jón₃ bá₄ dsa₂ dsi₂ñé₂ 'éi₂, ca₂tág₃ ángeles ja₁con₂ Abraham. Cang₂, ca₂jón₃ bá₄ dsa₂ cha₂ cu₄ 'éi₂ ján₃. Ca₂'ó₂ bá₄ dsa₂ ně₃. 23 Jme₁ma₂'ein₅₄ ñág₅ uig₅ ja₁dsi₂len₅ 'lag₄, § ca₂chóg'₃ ne₅₄ ca₂jiin₂ úíng₂ Abraham quian'₅₄ Lázaro cau₅ quió'₅. 24 Jaun₂ ca₂guió'₃ co₂mi'₅₄ ca₂juá'₂: “Tia₅₄ Abraham, dsia₄ ñéi₂ 'au'₂ jniá₂, chen₅ Lázaro ně₅ jui₁tia₅₄ chi₁gú₃ né'₃ jmíg₃, jui₁jia₂ jme₃güig'₂ le₁tsi'₃. Ia₁ 'ñio₅ lin₃ uig₅ ñag₅₄ 'eng₅₄ jë₄ si₂ la₂.” 25 Jaun₂ ca₂ñag₃ Abraham: “Jón₃, dsá₂ 'au'₂ jmo₄, ca₂gue'₅₄ bá₄ 'ne₂ a₂dse₃ tē₁lia'₂ ca₂rē₃cháng'₃. Lázaro la₂ ně₃, tsá₃ 'e₂ dse₃ ca₂rē₃cháin₃. Jaun₂ rē₂ně₃ ně₃ gue₂₃ lián'₂ chain₂ dse₃ ja₁lá₃. 'Ne₂ guë'₂ ma₂ñag'₅₄ uig₅ ja₁ně₅. 26 Ton'₂ ji'₅₄ ñei₅ lin₃ lě₅ jë₄ quián₂ jniog₄, jaun₂ tsá₃ 'ein₂ lé₂ le₃ñí₃ tē₂le₃ ně₅, on₃ guë'₂ i₂tion'₅₄ ja₁ně₅ lé₂ ñí₃ le₃la₂.” 27 Jaun₂ ca₂ñag₃ táng₃: “Mi₅ jniá₂ ne'₅₄ jaun₂, tia₅₄, a₂dsiang'₅₄ i₂ně₅ dsi₃con₅₄ jág₁ dsau₅ dsi₂néi₂ quió'₅ ñe'₃, 28 ia₁ 'ñiá₂ chi'₂ ríng'₃ i₂chan₂ guë₄, ia₁jaun₂ tsá₃ ja₃ñag₅₄ uig₅ ja₁lá₃.” 29 Jaun₂ ca₂ñag₃ táng₃ Abraham: “I₂ma₂rón'₅ si₂ bá₄ ó₃ ca₂quiog₂

† 16:20 Lia'₂ chen₂ Lázaro jein₅ jág₁, dsa₂ i₂jme₂'o₅₄ Diú₄. § 16:23 griego: hades, co₂'nió'₄ a₂juá'₂, ja₁quió'₄ 'lag₄.

Moisés quian'⁵⁴ dsa₂ i₂jme'¹ě₂ jág₁. ¡Jui₁tion'⁵⁴ jui₅ a₂juá'² 'éi₂!" 30 Jaun₂ ca₂ŋag₃ táng₃: "Jan₂'ón₄, tia₅₄ Abraham, ia₁ nē₁ca₂dsián'² jan₂ 'lag₄ dsi₁con₃ jág₁, dsi₃quén'⁵ bá₄ dsí₅." 31 La₁ ca₂ŋag₃ táng₃ 'éi₂: "Chi₂jua'² tsá₃ nag₅ gau₂ a₂juá'² Moisés, quian'⁵⁴ dsa₂ i₂jme'¹ě₂ jág₁ quián₅ Diú₄ nē₃, ján₃ bá₄ le₂jaun₂ tsá₃ 'e₂ gau₂ nag₃ o₁ŋia'⁵⁴ la₂ ca₂jen'⁵⁴ jan₂ 'lag₄ dsi₁con₃ jág₁."

17

A₂go'² nē₁jua'² 'ein₂ ca₂tian'³ dso₄

(Mateo 18:6-7, 21—22; Marcos 9:42)

¹ Ca₂juá'² Jesús ca₂tsí'³ dsa₂ i₂quiain'⁵⁴:

—Tion₅₄ niog₅ le₃cha₂ bá₄ a₂jmo₃ a₂qui₃nió₃ dsa₂.

¡La₁ 'e₂ guě₄ juíg₂ jui₁lia'² dsa₂ i₂'uin₄ a₂dsi₂gan'⁵⁴ riin'⁵⁴! ² Ja₂lin₃ guě₄ dse₃ jua'⁵⁴ tón₂ dsa₂ ne₄ jmi₁ŋí'⁴ chi₁quein₅ ni₁to₂ dsi₂lag₅₄, lia'² con'² guě₄ jmo₃ tián'³ dso₄ jan₂ dsa₂ dsi₂ŋé₂ la₂. ³ Tē₃ŋi'⁵⁴ 'nia'² jaun₂.

'Chi₂jua'² 'ein₂ ríng'² jmóg'² mi'⁵⁴, jéin₃. Nē₁jua'² ca₂jme₃tsiín₃ dsí₅, 'én₃ dsáu₁. ⁴ O₁ŋia'⁵⁴ guio₃ ráun₂ nē₂jmóg'² mi'⁵⁴ co₂jmi₃g₄, nē₁jua'² guio₃ ráun₂ ca₂já₃ ne'⁵⁴, juá'²: "Tsá₃ ma₃jmo₅₄", 'én₃ dsáu₁.

Bí₂ a₂'io₅ a₂'én₂ dsa₂

⁵ Ca₂juá'² chi'² dsi₂guia₃-tín₂ ca₂tsí'³ Te₁gui'⁵⁴:

—Jmo₄ jui₁le₂'éin₂ guě₄ ŋia'⁵⁴.

⁶ Jaun₂ ca₂ŋag₃ táng₃ Te₁gui'⁵⁴:

—Tsá₃ a₂nag₅₄ ŋia'⁵⁴ con'² tí₅ ca₂míg₂ mi₂jon₂ quió'⁵ ni₁'ma₂ mostaza* bá₄ 'én'² 'nia'², lé₂ le₃juig'⁵⁴

* **17:6** mostaza: On₃jua'⁵⁴ mi₁jáng'⁵ a₂cuí'⁵ dsa₂ go₄ jniog₄; caun₂ ni₁'ma₂ dsón'² jaun₂ a₂tě'² tē₅sí₃ Brassica nigra.

ni₁'ma₂ sicómoro† chí₅ nē₅, “Jñiag₃ ja₁nē₅, o₂nau₂ ne₄ jmi₁ñí₄”, le₂jaun₂ dsón₂ lé₂ bá₄.

A₂ ca₂tín₂ jmo₃ dsa₂ i₂jme₂ti₃

7 'Jua₅₄ mei₂ guě₃ jan₂ 'nia₂ chan₂ jan₂ dsa₂ i₂jmo₅ ta₁ ja₁nau₂ quió₅, o₃ jmo₂₃ 'í₂ já₂ cha₂ 'e₂, jua₅₄ mei₂ guě₃ ma₂guáin₅ ja₁nau₂, ζ₀₃ bá₄ juig₂ 'nia₂: “Ñi₅₄ i₂né₂ jaun₂ quē₅₄”? 8 Ma₁ tsá₃ le₂jaun₂. ζ₀₃ juig₂ le₂la₂ 'e₂: “jmo₄ co₂jñia₅₄ a₂guē₅₄, jmo₄ co₂jñia₅₄ quiáng₂, jaun₂ ñag₅₄ dsiá₁ quió₃. Ca₂lia₂ jë₂ma₂ca₂lë₃ guē₂, guí₂ nē₃, jaun₂ guē₄ quē₅₄, 'ag₅₄ 'ne₂”? 9 ζ₀₃ Cué₅ ti₁'mag₄ dsa₂ 'éi₂ ia₁ jme₃ti₃ con₂ lë₅ a₂të₁néi₂? Jan₂'ón₄. 10 Le₂nē₅ bá₄ 'nia₂ ján₃, jë₂ma₂ca₂lë₃ jmo₂ ca₂le₃jë₃ a₂juá₂ Diú₄, ca₂tín₂ 'nia₂ jua₅₄: “Tsá₃ 'e₂ ta₁ téi₄ jnia₅₄ ja₁cong₂, ia₁ tsá₃ 'e₂ ñag₅₄ jua₅₄ nē₂jmó₁ jnia₅₄, jñia₅₄ con₂ a₂ca₂tág₂ jnia₅₄ jmó₁ bá₄ nē₂jmó₁.”

Ca₂jme₃ 'lión₂ Jesús guian₃ dsa₂ i₂jme₁lín₄ 'mé₅ 'iog₅

11 Con₂ siá₂, ca₂'í₃ táng₃ Jesús jui₅ a₂dsióg₄ Jerusalén, qui₂ca₂ñi₅ le₂tan₅₄ 'uē₃ Samaria quian₅₄ Galilea.

12 Jme₁ca₂dsióg₃ caun₂ juig₂ bē₅₄, ca₂jme₃jein₂ guian₃ dsa₂ i₂le₁dso₅₄ lín₅ 'mé₅ 'iog₅, la₁ úing₂ bá₄ ca₂nau₂ ja₁chén₄ Jesús. 13 Ca₂juá₂ tiá₂:

—jE Jesús, Të₅, dsia₄ ñéi₂ 'au₂ jnia₅₄!

14 Jme₁ca₂jág₂ Jesús, ca₂juá₂:

—O₂nó₅ 'nia₂ o₂jme₁jnia₅ ne₄ jme₂dsa₂.

Jë₄ i₂lén₂ jaun₂ bá₄, ca₂jñia₃ 'mé₅ a₂jme₁lín₄.

15 Jaun₂ nē₃ jan₂ 'éi₂, jme₁ca₂rë₃lí₄ ca₂jñia₃ dso₅₄, ca₂jein₃ táng₃ ne₅₄, jme₂juin₂ Diú₄ co₂mi₅₄.

† 17:6 sicómoro: mei₂ tsá₃ ni₁'ma₂ Ficus sycomorus. 'Nio₂ ja₁ton₅ Amós 7:14.

16 Ca₂tóin₂ 'uë₃ cau₅ mi₂tag₄ Jesús, cuë₂₃ ti₁'mag'₄.
Jan₂ dsa₂ chan₂ Samaria bá₄ 'éi₂.

17 Jaun₂ ca₂juá'₂ Jesús:

—¿On₁jua'₅₄ guian₃ lë₂ i₂ca₂'lón₂? ¿Na₅ guë'₂ i₂ñi₃
'éi₂? 18 ¿Jan₂ dsi₂nau₂ la₂ bá₄ i₂jón'₅ jme₂juin'₂ Diú₄?

19 Jaun₂ ca₂tsí'₃ dsa₂ 'éi₂:

—Nau₂, guan'₂ quiáng'₂. Ca₂'lóng'₂ ia₁ 'éng'₂ bá₄.

'A₂ lia'₂ lé₂ i₁guá'₂ 'éi'₃ quió'₅ Diú₄

(Mateo 24:23-28, 36—41)

20 Jaun₂ ca₂ñag₃ dsa₂ fariseos ca₂ñí'₃ Jesús líg'₂
guá₂ jmig₄ a₂le₃gon₂ Diú₄. Jaun₂ ca₂ñag₃ 'éi₂:

—On₃jua'₅₄ a₂cha₂ léi₄ a₂rë₂jniá₂ guá₂ 'éi'₃ quió'₅
Diú₄. 21 Jaun₂ tsá₃ 'ein₂ lé₂ le₃juá'₂, jua'₅₄ “ñí₂ ja₁lá₃
já₅”, o₃ “jó₄ já₅.” Ia₁ a₂ma₂'i₄ bá₄ 'éi'₃ quió'₅ Diú₄ jin'₄
'nia'₂.

22 Jaun₂ ca₂tsí'₃ táng₃ chi'₂ dsi₂guia₃-tín₂:

—Já₅ jmig₄ ja₁lé₂ 'au'₂ 'nia'₂ 'niog'₂ jag'₅₄ jmig₄
a₂le₃gon₂ Jaun₅ dsa₂ mi₂güí₃, la₁ tsá₃ jaun₂ tē₅₄ ne'₅₄
'nia'₂. 23 Ia₁ já₅ jmig₄ i₁tsí'₃ dsa₂ 'nia'₂: “ñí₂ ja₁lá₃ já₅”,
o₃ “jó₄ já₅.” La₁ tsá₃ o₁nó'₅ 'nia'₂, on₃ guë'₂ jui₁le₂'én'₂
'nia'₂ quió'₅ i₂juá'₂ le₂në₅. 24 Ia₁ jui₁lia'₂ tē₂tsí'₅₄ si₁ñí'₃
ca₂taun₂ ca₂taun₂ guei'₅₄ mi₂güí₃, le₂jaun₂ bá₄ lé₂
jë₁ma₂tē₂ rë₁të₃tsin'₅₄ Jaun₅ dsa₂ mi₂güí₃. 25 La₁
jniá₅ de'₂ ca₂tín₂ ñág₃ uig₅ 'ñio₅ lin₃, jme₃'iog₅₄ dsa₂
chan₂ jmig₄ në₃. 26 Ia₁ jui₁lia'₂ ca₂lë₃ jmig₄ lia'₂
con'₂ jme₁chan₂ Noé, le₂jaun₂ bá₄ lé₂ táng₃ jmig₄
quió'₅ Jaun₅ dsa₂ mi₂güí₃. 27 Ia₁ jme₁tion'₅₄ dsa₂
'éi₂ jmig₄ jaun₂ qui₂guë'₅, qui₂'ín'₂ në₃, jme₁qui₂jéin'₂
gu₂, qui₂cuin₂₃ chi'₂ quiáin₅ a₂jéin'₂ gu₂, ca₂lia'₂
jme₁ca₂dsióg₃ jmig₄ i₁ca₂'í₃ Noé 'ñió'₃ ni₁barco,
a₂ca₂can'₂ rë'₂ jmig₂ ta₁caun₂ mi₂güí₃, ca₂i₃'én₂

ca₂le₃jín₃. ²⁸ Le₂në₅ bá₄ ca₂lë₃ ján₃ jmig₄ quió'₅
 Lot. Jme₁tion'₅₄ dsa₂ qui₂guë'₅, qui₂'ín'₂, i₂tion'₅₄
 qui₂lá₅, qui₂'nag₂₃, qui₂jne₂₃ 'e₂ qui₂jne₂₃, qui₂jmóg'₅
 'ne₄ në₃. ²⁹ La₁ jme₁ca₂dsióg₃ jmig₄ a₂o₂'ín₃ Lot
 juig₂ Sodoma, a₂ca₂tang₂ rë'₂ si₂, ca₂séi'₂ ni₁cang₁
 azufre le₁guí'₂ si₂ guei'₅₄, ca₂i'én₂ táng₃ ca₂le₃jín₃.
³⁰ Le₂jaun₂ bá₄ lé₂ táng₃ jmig₄ i₁jme₃jnia₅ Jaun₅ dsa₂
 mi₂güí₃. ³¹ Jmig₄ jaun₂, chi₂jua'₂ 'ein₂ 'en₅₄ co'₅₄
 'ne₄, jui₁te₁'i₁ bá₄ 'e₂ te₁'i₁ dsi₂néi₂ quió'₅, tsá₃ o₁sióin₄
 jua'₅₄ a₂'uë'₃ a₂jaun₂. Ján₃ bá₄ le₂jaun₂ jui₁lia'₂
 i₂'en₅₄ ja₁nau₂, tsá₃ ma₃o₁jñioi'₅₄ jua'₅₄ a₂ja₃quián₂
 'e₂ ja₃quián₂ a₂cha₂ quió'₅. ³² Dsá₂ 'au'₂ 'nia'₂ jmo₄
 'e₂ ca₂i₃ñí₂ 'io₅₄ quián₅ Lot. ³³ Ia₁ jui₁lia'₂ dsa₂
 i₂'nio₃ le₃chan₂ dse₃, dsi₃'én₂ quió'₅; la₁ jui₁lia'₂ dsa₂
 i₂dsi₃'én₂ quió'₅, le₃chain₂ bá₄ dse₃.

³⁴ 'Juá'₅ jniá₂, 'uë₂ jaun₂, on₃ dsa₂ i₂tián'₅ caun₂
 tsí₁cama; jan₂ i₂dsi₃lén₃, jan₂ guë'₂ i₂të₃'ñiá₄. ³⁵ Ján₃
 guë'₂ le₂jaun₂, on₃ dsa₂ mí₂ i₂tion'₅₄ éi'₅ co₂lë₅; jan₂
 i₂dsi₃lén₃, jan₂ guë'₂ i₂të₃'ñiá₄.[†]

³⁷ Jaun₂ ca₂ñag₃ dsa₂:

—¿A₂já'₄ bá₄ lé₂ a₂në₅, Te₁gui'₅₄?

Jaun₂ ca₂ñag₃ táng₃ 'éi₂:

—Jui₁lia'₂ ja₁ron₅ ni₁ñi₁ 'lag₄, ja₁jaun₂ ñi'₂ i₁tú₃
 tsin'₅₄.

18

*Jág₁ jáng'₅ léi₄ jui₁lia'₂ jan₂ 'io₅₄ 'nág₂ quian'₅₄ jan₂
 juë₄*

[†] **17:35** Chog₅₄ si₂ a₂gui'₅₄ guë₄, tsá₃ chi₁ton₅ versículo 36 a₂juá'₂:
 “On₃ dsa₂ ñe'₂ i₂tion'₅₄ jmo₅ ta₁ ja₁nau₂; jan₂ i₂dsi₃lén₃, i₂jan₂ guë'₂
 i₂të₃'ñiá₄.”

1 Ca₂juá'₂ Jesús caun₂ jág₁ a₂jáng'₅ léi₄, a₂ca₂jme₃t₃in₂₃ dsa₂ a₂ca₂t₃in₂ chi₃lén'₂ Diú₄ tián₂, tsá₃ o₁'ú'₄ dsí₅.

2 Ca₂juá'₂ le₂la₂:

—Caun₂ juig₂ jme₁guá'₄ jan₂ jué₄ i₂tsá₃ Diú₄ gan₃, on₃ gué'₂ dsan₂ dsí₅ dsa₂ mi₂güig₃ ně₃. 3 Ján₃ bá₄ juig₂ jaun₂ jme₁chan₂ jan₂ 'io₅₄ 'nág₂ i₂jme₁ja₂ i₂gú'₃ ja₃jin₅₄ jué₄ 'éi₂, jme₁ja₂jua'₅₄: “Jme₁rè₂ jág₁ quió₃, qui₂dsi₅ 'éi'₃ quió'₅ dsa₂ i₂jmóg'₂ jniá₂.” 4 Uě₂ bá₄ tsá₃ jui₅ tón'₂ 'éi₂ jua'₅₄ jme₃rě₃. La₁ cang₂ bá₄ ca₂i₃jnia₅ dsí₅: “O₁jnia'₅₄ la₂ tsá₃ Diú₄ gáng₅, on₃ gué'₂ dsa₂ mi₂güig₃ dsan₂ dsí₃ ně₃, 5 la₁ia₁ 'uig₅₄ a₂ŋi₄ lě₃ cuě₅ o₂me'₅₄ dsí₃ 'io₅₄ 'nág₂ ně₅, qui₁dsi₅ jniá₂ co₂ŋei'₅₄ 'éi'₃ o₄quió'₄, con'₂ tsá₃ ŋó₅ ně₁jua'₂ caun₂ le₂ně₅ ŋi₃, jmo₃ dsí₃mé'₂ dsí₃.”

6 Jaun₂ ca₂juá'₂ Te₁gui'₅₄:

—Ní₂ rě₂ a₂juá'₂ jué₄ 'lin'₅₄ 'éi₂. 7 ¿Tsa₁ lín'₂ 'nia'₂, jme₃rě₃ bá₄ Diú₄ 'e₂ a₂mi₅ dsa₂ i₂rě₂quion'₅₄ quiáin₅ i₂qui'₂-'áu'₂ ca₂nei₂ ca₂jnia₃? ¿Tsa₁ lín'₂ 'nia'₂ caun₂ juin'₂ dsí₅ bá₄ quiong'₅₄? 8 Juíg₂ jniá₂ 'nia'₂, dsí₂jui₅ bá₄ qui₃dsi₅ Diú₄ 'éi'₃ o₄quió'₄ i₂mi₅. La₁, jě₁ma₂tě₂ rě₁guan'₂ Jaun₅ dsa₂ mi₂güig₃, ¿dsiain'₂ bá₄ gué₄ dsa₂ 'én₂ ne₄ gua'₅₄ 'uě₃?

Jág₁ jáng'₅ léi₄ ju₁lia'₂ on₃ dsa₂: jan₂ dsa₂ fariseo, jan₂ gué'₂ dsa₂ i₂mi₅ 'lia'₅₄ a₂ca₂t₃in₂ dsí₂tan₅₄

9 Ca₂juá'₂ Jesús caun₂ jág₁ jáng'₅ léi₄ a₂ca₂t₃in₂ con'₂ i₂lín₂ lín₅ dsa₂ dsen₃, tsá₃ dsáu₅ dsí₅ riin'₅₄ sián'₂. Ca₂juá'₂:

10 —On₃ dsa₂ ca₂i₃lén₂ guá'₅ templo i₁chi₂i₁lein'₄ Diú₄. Jan₂ 'éi₂ jme₁lín₄ fariseo, jan₂ gué'₂ i₂jme₁lín₄

ta₁ i₂mi₅ 'lia'₅₄ a₂ca₂tín₂ dsi₂tan₅₄. ¹¹ Dsa₂ fariseo
 ně₃, tē₃ chéin'₅ bá₄ chi₂lí'₂ con'₂ 'ñiog₅, ca₂juá'₂ le₂la₂:
 “Cuē₅ jniá'₂ ti₁'mag'₄, 'ne₂ Diú₄ quiáng₃, ia₁ tsá₃
 líng₅ ju₁lia'₂ lín₅ i₂lín₅₄: i₂qui₂'ang₅, i₂tsá₃ dse₃ jmo₅
 ja₁con₂ rin'₅₄, i₂nió'₅ jág₁ quian'₅₄ dsa₂ i₂tsá₃ lín₅
 dsi₂i₂gu₂, ca₂lia'₂ jnia'₅₄ lia'₂ lín₅ dsa₂ i₂mi₅ 'lia'₅₄ ně₅,
 tsá₃ líng₅. ¹² Jme₂'ing₅₄ ně₃ tñ₃ ráun₂ lia'₂ caun₂
 semana, ton'₂ cuē₅ bá₄ jniá'₂ caun₂ qui'₅₄ a₂guia₃
 quió₃, jē₂ con'₂ a₂lág₂.” ¹³ La₁ dsa₂ i₂mi₅ 'lia'₅₄ 'éi₂
 guē'₂ ně₃, úing₂ bá₄ chéin'₅, ca₂lia'₂ jnia'₅₄ ne₅₄ bá₄
 tsá₃ tiá'₂ dsí₅ chóg'₃ guei'₅₄. Jnia'₅₄ con'₂ qui₂quein₂₃
 le₁dsí₅ bá₄ chéin'₅, juá'₂: “Diú₄ quiáng₃, dsia₄ ñéi₂
 'au'₂ jniá'₂ ia₁ rē₂cáng'₄ dso₄.” ¹⁴ Jaun₂ juíg₂ jniá'₂
 'nia'₂, dsa₂ i₂mi₅ 'lia'₅₄, 'éi₂ bá₄ tiá'₂ rē₂ tē₂tsin'₅₄ ne₄
 Diú₄ ñái'₅ quió'₅, lia'₂ con'₂ guē'₄ i₂jan₂. Ia₁ ca₂le₃jín₃
 i₂jme₂can'₅₄ guion₅₄, sióin₃; la₁ i₂jmo₅ me'₂ guē'₂ ně₃,
 roin'₂ guei'₅₄.

Ca₂jme₃gon'₅₄ Jesús chi'₂-guein₂

(Mateo 19:13-15; Marcos 10:13-16)

¹⁵ Co₂ráun₂ guē'₂, qui₂ca₂o₃jnia₃ dsa₂ guein₂
 quiáin₅ ne₄ Jesús, ia₁jaun₂ qui₃téi₂ gu₂. La₁ ca₂jí₂
 bá₄ chi'₂ dsi₂guia₃-tín₂ jme₁ca₂jág₂.

¹⁶ Jaun₂ ca₂tē'₃ Jesús guein₂, jaun₂ ca₂tsí'₃ chi'₂
 dsi₂guia₃-tín₂:

—Cuē₄ 'nia'₂ jmi₄g₄ ja₃lén₂ chi'₂-guein₂ ja₁cong₂:
 tsá₃ lē₁jñi'₅₄ juí₅. Ia₁ ju₁lia'₂ i₂le₂ně₅ bá₄ guē'₂ i₂tñ₃
 ja₁gon₂ Diú₄. ¹⁷ A₂dsi₂jó'₃ juíg₂ jniá'₂ 'nia'₂, dsa₂ i₂tsá₃
 gue₅ ja₁gon₂ Diú₄ ju₁lia'₂ gue₅ jan₂ i₂bē'₅₄, o₁líg'₂
 jmi₄g₄ tsá₃ 'í₂ ja₁jaun₂.

*Jan₂ dsó₂ chi'₂ i₂cha₂ cu₄ ca₂dsia₃ jág₁ quian'₅₄ Jesús
(Mateo 19:16-30; Marcos 10:17-31)*

18 Jan₂ i₂lín₅ dsa₂ dsen₅₄ ca₂ñí'₃ Jesús:

—Të₅ dsen₃, ¿'e₂ bá₄ 'nió'₅ jmo₅₄ jniá₂ ia₁jaun₂
ting₅₄ ja₁le₃chang₂ co₂tan₅₄?

19 Jaun₂ ca₂ñag₃ Jesús:

—¿'E₂ lë₃ quiong'₅₄ jniá₂ a₂dseng₃? 'I₁jan₂ i₂dsen₃
tsá₃ chan₂, jñia'₅₄ lia'₂ jan₂ Diú₄ bá₄. 20 Ting'₂
bá₄ 'Éi'₃ Juá'₅: “Tsá₃ nióg'₄ jág₁ quian'₅₄ dsa₂ i₂tsá₃
lín₅ dsí₂i₂gog'₂; tsá₃ jñíg'₄ dsa₂ mi₂güig₃ ríng'₂; tsá₃
'áng'₁; tsá₃ jmó'₂ dsáu₁ ríng'₂ quian'₅₄ jág₁ të₂jág₁;
jme₁gang'₃ chog'₂-ñéi'₅.”

21 Ca₂ñag₃ 'éi'₂:

—Lia'₂ con'₂ bin'₅₄ bá₄ jniá₂ ma₂guio₃ jme₂tí₁
ca₂le₃jě₃ 'éi'₃ në₅.

22 Jme₁ca₂nág₂ Jesús a₂në₅, jaun₂ ca₂juá'₂:

—'Nió'₅ bá₄ guě₄ caun₂ quiáng'₂: 'nag₄ ca₂le₃jě₃
a₂cha₂ quiáng'₂. Jaun₂ dsio'₅₄ quió'₅ dsa₂ te₂ñé₂.
Jaun₂ guě₄ le₃cha₂ 'líong₂ quiáng'₂ guei'₅₄ i₂juíg₃.
Jaun₂ ñia₅ chi₁co'₅₄ quió₃ o₁ló₄.

23 La₁ jme₁ca₂nág₂ dsa₂ 'éi₂ jág₁ në₅, ca₂tá'₂ 'lia'₂
dsí₅ 'ñio₅ lín₃, ia₁ 'ñio₅ lín₃ jme₁cha₂ cu₄.

24 Jme₁ca₂jág₂ Jesús, ca₂juá'₂:*

—'E₂ guě₄ quian'₅ ta₁ a₂tón'₃ dsa₂ cha₂ cu₄ ja₁gon₂
Diú₄! 25 Ja₂lín₃ guě₄ tsá₃ ta₁ quian'₅ a₂lé₂ le₃ñi₅ jan₂
camello jui₅ tau₂ mi₂cu₄, lia'₂ con'₂ guě₄ jan₂ dsa₂
cha₂ cu₄ ñii₅ 'í₂ ja₁gon₂ Diú₄.

26 Jme₁ca₂nág₂ dsa₂ i₂tión₂ jë₄ jaun₂, ca₂juá'₂:

—¿I₂'ein₂ bá₄ guě'₂ i₂tín'₄ jaun₂?

* **18:24** A₂lín₅₄ chog₅ si₂ juá'₂: “jme₁ca₂jág₃ Jesús chén'₅ dsa₂ 'éi₂ 'lia'₂
dsí₅, ca₂juá'₂.”

27 Jaun₂ ca₂juá'₂ táng₃:

—Ca₂le₃jě₃ a₂tsá₃ qui'₅₄ jmig₄ dsa₂ mi₂güig₃ jmo₃,
Diú₄ lé₂ le₃jmo₃.

28 Jaun₂ ca₂juá'₂ Pe₄:

—Te₁gui'₅₄, ma₁ jnia'₅₄ ma₂ca₂tí₄ ca₂le₃jě₃
a₂jme₁cha₂ quián₂, a₂ma₂ja₂náu₅ 'én₅ 'ne₂.

29 Jaun₂ ca₂ḡag₃ táng₃:

—A₂dsi₂jó'₃ juig₂ jniá'₂ 'nia'₂, 'i₁jan₂ tsá₃ jua'₅₄
a₂lě₁táun₂ 'ne₄, téin₂ chog₅₄-jmei₂, o₁r₁in'₅₄, dsa₂
mí₂, chi'₂-guein₂ quián₅ ně₃, o₄quió'₄ ja₁gon₂ Diú₄,
30 jua'₅₄ tsá₃ gue₃ tson₂ guě₄ ne₄ gua'₅₄ 'uě₃ la₂, ton'₂
le₃chain₂ dse₃ co₂tan₅₄ mi₂güig₃ caun₂.

Con'₂ siá'₂ táng₃ ca₂'ě₂ Jesús jág₁ a₂jóin₂

(Mateo 20:17-19; Marcos 10:32-34)

31 Jaun₂ ca₂tě'₃ Jesús cau₅ jmá'₃ lia'₂ chi'₂ dsi₂guia₃-
tín₂ quián₅, jaun₂ ca₂juá'₂:

—Ně₃ guě₄ ně₃ ca₂tě'₂ jmig₄ a₂dsau₅₄ juig₂
Jerusalén, ja₁niog₅ le₃ti₃ ca₂le₃jě₃ con'₂ lě₅ ca₂tó'₂
dsa₂ i₂'ě₂ jág₁ quián₅ Diú₄ ne₄ si₂, a₂'i₁n₂₃ Jaun₅
dsa₂ mi₂güig₃. 32 Jáng'₂ dsa₂ o₄gú₃ dsi₂nau₂,
ja₁lě₁co₃jmóg'₂ dsa₂, qui₃tě₃'o'₂ dsa₂, a₂qui₃'ḡéi₂
dsa₂ ně₃. 33 Jaun₂ jě₁ma₂ca₂lě₃ bóg₂, jaun₂ guě₄
jḡag'₃. La₁ jě₁ma₂ca₂tě'₂ 'ni₅ jmig₄, jein'₅₄ bá₄ táng₃.

34 La₁ 'éi₃ ně₃, tsá₃ 'e₂ ca₂ḡí'₂ 'i₁caun₂ jág₁ ně₅, ia₁
lě₅ jág₁ a₂rě₂'ma₄ bá₄ guě₄ ja₁coin₂, tsá₃ jein₅ dsí₅ 'e₂
jaun₂.

Ca₂jme₃'lión₂ Jesús jan₂ dsa₂ ten₄ juig₂ Jericó

(Mateo 20:29-34; Marcos 10:46-52)

35 Con'₂ jme₁ma₂ja₂quián₃ dsióg₄ Jesús juig₂ Jer-
icó, jme₁guá₄ jan₂ dsa₂ ten₄ cau₅ juí₅, mi₂a₂jme₃'o₅₄
dsa₂ cu₄.

36 Jme₁ca₂nág₂ a₂qui₂ca₂ŋ₅ juin₅ dsa₂, jaun₂ ca₂ŋag₃ 'e₂ niog₅ lě₂.

37 Jaun₂ ca₂juá'₂ dsa₂:

—Jesús chan₂ Nazaret bá₄ ně₅ já₅.

38 Jaun₂ 'éi₂ ně₃ ca₂juá'₂ tiá₂ ca₂tsí'₃ Jesús:

—¡Jesús, tsi₁jon₂ David, dsia₄ ŋéi₂ 'au'₂ jniá₂!

39 Ca₂jí₂ bá₄ dsa₂ i₂ja₂lén₂ ne₄ jui₅ ia₁jaun₂ jmo₃ tei₄, la₁ tē₂le₃ lě₅ guě₄ qui₂ca₂'áu'₂ bá₄ 'ein₅₄, ca₂juá'₂:

—¡Ne₂ tsi₁jon₂ David, dsia₄ ŋéi₂ 'au'₂ jniá₂!

40 Ca₂nau₂ Jesús, jaun₂ ca₂jmo₃ 'éi'₃ a₂dsi₃quión₂ dsa₂. Jme₁ca₂dsióg₃ cau₅ quió'₅, jaun₂ ca₂ŋag₃ Jesús:

41 —¿'E₂ 'niog'₂ jmo₅₄ jniá₂ quiáng'₂?

Jaun₂ ca₂juá'₂:

—Te₁gui'₅₄, a₂jnia₅₄ jme₁ne₃ bá₄ jniá₂ 'nio₃.

42 Jaun₂ ca₂juá'₂ Jesús:

—¡Gue₄, jui₁jnia₅₄ quiáng'₂! Ma₂ca₂'lóng'₂ bá₄, ia₁ 'éng'₂.

43 Dsi₂jui₅ jaun₂ bá₄ ca₂jnia₃ mi₂ne₅₄. Jaun₂ ca₂ŋó₃ chi₁co'₅₄ quió'₅, jme₂juin'₂ Diú₄. Ca₂le₃jín₃ bá₄ dsa₂ i₂ca₂tě₂ ne₄ a₂ca₂lě₃ jaun₂ ca₂jme₃juin'₂ Diú₄ já₃.

19

Jesús quian'₅₄ Zaqueo

1 Ca₂'í₃ Jesús juig₂ Jericó. Jaun₂ jme₁ma₂ŋó₅ jě₄ juig₂, ²ja₁jaun₂ jme₁chan₂ jan₂ dsa₂ cha₂ cu₄ i₂chen₂ Zaqueo, i₂lín₅ dsa₂ juin'₂ quián₅ dsa₂ i₂cán₂ 'lia'₅₄ quián₅ dsi₂tan₅₄.

3 'Éi₂ ně₃, jme₁'no'₂ jui₅ jíin₂ 'ein₂ 'éi₂ Jesús. La₁ tsá₃ lě₂, ia₁ a₂ŋí₄ lě₃ juin₅ dsa₂ tion'₅₄. Ia₁ jan₂ dsa₂ 'on'₂ bá₄ 'éi₂.

4 Jaun₂ ca₂ηó₃ co₂chi'⁵⁴ le₃ne₄ jui₅, ca₂uíg₂ guei'⁵⁴ caun₂ ni₁'ma₂ sicómoro,* ia₁ 'nio₃ jín₂ Jesús, ia₁ jui₅ jaun₂ jme₁ηí₃.

5 Jme₁ca₂dsióg₃ Jesús, jaun₂ ca₂jág₃ guei'⁵⁴, jaun₂ ca₂juá'₂:

—Zaqueo, ma₂ně₃ sión₅, ia₁ ja₁quiáng'₂ ca₂tíng₂ i₁ηia₁₂ ně₃.

6 Jaun₂ ca₂síoin₃ co₂chi'⁵⁴, ca₂guei₃ 'io'₂ jén'₅.

7 Jme₁ca₂jág₃ dsa₂, jaun₂ ca₂chi₂ca₂'ag₃ ca₂juá'₂:

—Dsi₂néi₂ quió'₅ jan₂ dsa₂ cha₂ dsá_{u1} bá₄ ηó₅ i₂ηia₅₄.

8 Zaqueo ně₃, jme₁ca₂nau₂ ne₅₄ jaun₂ ca₂tsí'₃ Te₁gui'⁵⁴:

—Te₁gui'⁵⁴, dsio'₄ jniá'₂ ca₂dsio₄ a₂cha₂ quió'₃, cuě₄ dsa₂ te₂ηé₂. Ján₃ guě'₂ le₂jaun₂ chi₂jua'₂ 'ein₂ quió'₅ ma₂'ang₃ a₂ju₁gang₂, jín'₅₄ táng₃ jniá'₂ quén₂ ráun₂ lě₅ guě₄ co₂jaun₂.

9 Jaun₂ ca₂juá'₂ Jesús:

—Jmíg₄ ně₃ ca₂lón₂ dsa₂ dsi₂néi₂ la₂. Ia₁ ján₃ bá₄ lín₅ tsi₁jon₂ quián₅ Abraham. 10 Ta₁ ně₅ já₅ bá₄ Jaun₅ dsa₂ mi₂güíg₃, a₂ja₂'niai'₂ a₂ja₂lioin₅₄ dsa₂ i₂ma₂i₂cón'₅.

Jág₁ jáng'₅ léi₄ ju₁lia'₂ guia₃ 'éi'₃ cu₄ 'ua'₂

(Mateo 25:14-30)

11 Tě₃ tion'⁵⁴ dsa₂ nag₂₃ jág₁ jaun₂, jaun₂ ca₂juá'₂ táng₃ caun₂ jág₁ jáng'₅ léi₄, ia₁ ma₂quián₅ bá₄ dsióg₄ Jerusalén, ton'₂ ia₁ lín₂ dsa₂ le₃jniá'₂ dsi₂jui₅ jaun₂ 'éi'₃ quió'₅ Diú₄. 12 Jaun₂ ně₃ ca₂juá'₂:

* 19:4 sicómoro: mei'₂ tsá, ni₁'ma₂ Ficus sycomorus. 'Nio'₂ ja,ton₅ Amós 7:14.

—Jme₁chan₂ jan₂ dsa₂ i₂lín₅ tsi₁jon₂ dsa₂ jlán'₁.
 Ca₂ηó₃ caun₂ juig₂ úing₂ ja₁'ag₃ dsa₂ a₂lén₂ rag₅₄,
 jaun₂ gué₄ ηjióí'₂ táng₃. ¹³ La₁ né'₃ a₂o₃'iin₅, ca₂té'₃
 guian₃ dsa₂ i₂jme₂ti₃ ta₁ ne₅₄. Jaun₂ le₂jan₂ le₂jan₂
 'éi₂ ca₂cué'₃ jma₃caún₃ cu₄ 'ua'₂ a₂chei₂ mina.†
 Jaun₂ ca₂juá'₂: “Jmo₄ 'nia'₂ ta₁ cu₄ nē₅ qui₁dsag'₂
 'nia'₂ ca₂lia'₂ ca₂té'₂ jmig₄ i₁guang'₂ táng₃.” ¹⁴ La₁
 dsa₂ go₅₄ ně₃ ca₂rē'io_g₅₄, ca₂chein₃ co₂nió'₃ dsa₂
 ca₂i₁chí'₄ dsa₂ ja₁jaun₂: “Tsá₃ 'niog₂ jnia'₅₄ jme₃gón₃
 i₂nē₅ jē₄ quián₂.” ¹⁵ La₁ tion₅₄ bá₄ ca₂lín₃ 'éi₂
 rag₅₄. Jme₁ca₂guáin'₃ táng₃ go₅₄, jaun₂ ca₂té'₃ dsa₂
 i₂jme₂ti₃ quián₅ i₂ca₂cué'₃ cu₄ 'éi₂, ia₁ 'nio₃ con₂ 'í₁
 jma₃je₂liá'₂ tí₅ a₂ma₂tē₁dsi₅₄ quió'₅ le₂jain₂ le₂jain₂.
¹⁶ Jaun₂ ca₂dsióg₃ i₂le'ui_g₅₄, ca₂juá'₂: “Gui'₅₄, con'₂
 gué₄ guia₃ co₂jaun₂ ma₂tē₁dsi₅₄ cu₄ mina quiáng'₂.”
¹⁷ Jaun₂ ca₂tsí'₃ 'éi₂: “E₂ gué₄ dse₃, téng'₅ bá₄ ta₁;
 ca₂jme₁ti'₄ bá₄ dse₃ quian'₅₄ a₂ca₂juig₄ a₂ca₂dsia₃
 jniá₂ gog'₂. Nē₃ ně₃ dsia₄ jniá₂ gog'₂ a₂jmó'₂ 'éi'₃
 ne₄ guia₃ juig₂.” ¹⁸ Jaun₂ ca₂guan₃ táng₃ i₂ca₂té'₂
 on₃, ca₂juá'₂: “Gui'₅₄, 'ηiá₂ gué₄ co₂jaun₂ ma₂tē₁dsi₅₄
 cu₄ mina jaun₂ quiáng'₂.” ¹⁹ Le₂jaun₂ bá₄ ca₂tsí'₃
 i₂'éi₂ ján₃: “Ne₂ gué'₂ jmó'₂ 'éi'₃ ne₄ 'ηiá₂ juig₂.”
²⁰ Jaun₂ ca₂já₃ táng₃ jan₂ ca₂juá'₂: “La₂ bá₄ ron₅
 cu₄ quiáng'₂, gui'₅₄. Ca₂'ma₃ bá₄ jniá₂ dsí₅ pe₁guí₄.
²¹ A₂gán₅ 'ne₂ bá₄ jniá₂, ia₁ guion₅₄ líng'₅ dsa₂
 tsau₂ dsí₅, tē₂le₃ dséi₂ mág'₂ quiáng'₂. Ia₁ cáun'₂
 ja₁tsá₃ 'e₂ ca₂qui₁dsag'₂ 'ηiag'₂, ton'₂ cag'₅₄ ja₁tsá₃ 'e₂
 ca₂ηí'₂.” ²² Jaun₂ ca₂ηag₃ táng₃ 'éi₂: “i'E₂ bá₄ tsá₃
 ta₁ téng'₄! Lia'₂ con'₂ lē₅ jág₁ quiáng'₂ qui₁dsi₅ jniá₂
 'éi'₃. Chi₂jua'₂ ma₂ηi'₅₄ líng₅ dsa₂ i₂tsau₂ dsí₅, cáun₄

† 19:13 mina: co₂nió'₄ 'lian'₅₄ dsa₂ con'₂ 'ni₅ tsi'₂ ta₁.

a₂tsá₃ 'e₂ ca₂qui₁dsag'₂ 'ñio₃, ton'₂ cag'₅₄ ja₁tsá₃ 'e₂ ca₂jan₃, ²³ 'E₂ 'uig'₅₄ tsá₃ ca₂i₁tio'₂ banco cu₄ quió₃ jaun₂ ně₃, ia₁jaun₂ jë₁ma₂guáng'₅ la₂, jme₁guéi'₄ lia'₂ jma₃quian'₅₄ a₂të₁dsi₅₄?" ²⁴ Jaun₂ ca₂tsí'₃ i₂jme₁tión₂ cau₅: "Jñiá'₃ 'nia'₂ cu₄ mina a₂chan'₂ i₂ně₅. Cuë'₅₄ i₂'io₅ guia₃." ²⁵ Jaun₂ ca₂juá'₂ 'éi₂: "Gui'₅₄, ma₁ ma₂'io₅ bá₄ i₂ně₅ guia₃ minas." ²⁶ Jaun₂ ca₂ñag₃ rag₅₄: "A₂dsi₂jó'₃ juig'₂ jniá'₂ 'nia'₂, ca₂le₃jín₃ ju₁lia'₂ i₂ma₂le₁'io₅, ñei₂ guë'₄; la₁ i₂tsá₃ 'e₂ qui₁dsag'₂, ca₂të₂ a₂jme₁ma₂nio₅ gu₂, co₂ñei'₅₄ jñia'₃. ²⁷ La₁, ju₁lia'₂ dsa₂ i₂'iog₅₄ i₂tsá₃ 'ñio₂ dsí'₅ gua₅₄ jmo₅₄ 'éi'₃ ja₁coin₂, o₂quian₅ 'nia'₂ ja₁lá₃, jaun₂ jme₁dsiain'₂ 'nia'₂ ne₃."

Ca₂dsió₃ Jesús juig₂ Jerusalén

(Mateo 21:1-11; Marcos 11:1-11; Juan 12:12-19)

²⁸ Jme₁ca₂dsan₃ tsí'₅ dsa₂ le₂ně₅, ca₂'ág₂ táng₃ ne₅₄ ju₁, ca₂uig₂ tso₄ a₂dsió₄ Jerusalén.

²⁹ Jme₁ma₂ja₂quían₃ dsió₄ juig₂ Betfagé quian'₅₄ Betania, a₂te₁'i₁ cau₅ má'₂ chei₂ Olivos, ja₁jaun₂ ca₂chein₃ on₃ chi'₂ dsí₂guia₃-tín₂ quian₅. ³⁰ Ca₂juá'₂: —O₂nó'₅ 'nia'₂ juig₂ niog₅ 'ño'₅₄ ó₃. Jë₁ma₂ca₂dsi₃nóg'₅, dsian'₂ 'nia'₂ jan₂ bú'₄ chéin'₅ rë₂'ñe'₅₄, i₂tsá₃ 'ein₂ ma₂co₁dsag₅₄. Chein'₅₄ 'nia'₂ jaun₂ të₅₄ ja₁lá₃. ³¹ Në₁juá'₂ 'ein₂ ca₂ñag₃ 'e₂ lë₃ tsin'₅₄, jaun₂ juig'₅₄: "Ia₁ 'niói'₅ quió'₅ Te₁gui'₅₄."

³² Ca₂i₃lén₂ bá₄ guë'₂ i₂chen₄ 'éi₂ ně₃. Ca₂lë₃ rë'₂ lia'₂ con'₂ lë₅ jág₁ jaun₂.

³³ Jme₁ma₂tioin'₅₄ chéin'₂ bú'₄, ca₂juá'₂ juig₅₄ já'₂:

—'E₂ 'uig₅₄ tsin'₅₄ 'nia'₂ bú'₄?

³⁴ Jaun₂ ca₂ñag₃:

—Ia₁ 'niói'₅ quió'₅ Te₁gui'₅₄.

35 Jaun₂ ja₂lein₃ bá₄ te₂ ja₁'en₅₄ Jesús. Qui₂ca₂dsia₃ tsi₁'mi₂ mi₂ca₄ dsi₂bú₄, jaun₂ guě₄ ca₂dsiain₃ Jesús guei₅₄.

36 Le₃ne₄ jui₅ ja₁ŋó₄ Jesús, qui₂ca₂já₃ dsa₂ 'mi₂ le₂'i₄ jui₅.

37 Con₂' jme₁ma₂ja₂quián₃ jein₅₄ Má₂' Olivos, ca₂jme₃lióg₃ ca₂le₃jín₃ dsa₂ i₂quiain₅₄ ca₂tóin₂' co₂mi₅₄ jmo₂₃ 'io₂' jme₂juin₂' Diú₄ ně₃, o₄quió₄' ca₂le₃jě₃ jui₅bí₂ a₂ma₂jmo₃ Jesús, a₂qui₂ma₂tě₂ ne₅₄.

38 Ca₂juá₂:

—jJui₁le₂juin₂' bá₄ Rag₅₄ ně₅ i₂já₅ o₄quió₄' Te₁gui₅₄! jJui₁'ei₅ bá₄ tei₄ guei₅₄ i₂juíg₃! jJui₁le₂juin₂' bá₄ Diú₄ le₂tan₅₄ ja₁ŋei₅ ně₃!

39 I₂lin₅₄ dsa₂ fariseos i₂tion₅₄' jě₄ jaun₂ ca₂juá₂:

—Tě₅, jén₃ dsa₂ i₂quiang₅₄'.

40 Jaun₂ ca₂ŋag₃ Jesús:

—Juíg₂ jniá₂ 'nia₂', jua₅₄ mei₂ guě₃ dsi₂lén₂ i₂ně₅ tei₄, ni₁cang₁ guě₂ tó₃ mi₅₄'.

41 Jme₁ma₂ja₂quián₃ dsióg₄ 'ni₂' juig₂ Jerusalén, ca₂'o₃ o₄quió₄' dsa₂ juig₂, ⁴² ca₂juá₂:

—jJui₁lia₂' bá₄ ŋí₂' 'au₂' 'nia₂' jmig₄ ně₃ a₂dse₃ já₅ jin₄' 'nia₂' a₂jme₁le₃chang₂' 'ag₃ tei₄! La₁ rě₂'ma₄ jlě₅ le₃ja₁cong₂'. ⁴³ Ia₁ jiá₃ jmig₄ ja₁tsá₃ ma₃'e₂ ŋi₅₄' 'nia₂' jmó₂'. Ia₁ cho₃ dsa₂ i₂'iog₅₄ caun₂ ni₁'ia₂' le₃lág₃' quián₂' 'nia₂', a₂jě₃lí₅₄, qui₃tiog₃ dsa₂ ně₃ le₂tan₅₄ ja₁lě₄ o₄jui₅. ⁴⁴ Jnáu₂' dsa₂ 'uě₃' 'nia₂', jme₃dsiog₂₃ lia₂' jma₃quian₅₄' chi₂'-guein₂ quiáng₂'. 'I₁ca₂míg₂ cang₄ tsá₃ ma₃'e₂ le₂juí₄ lé₂ ja₁lá₃. Ia₁ tsá₃ ca₂rě₃len₄' 'nia₂' lia₂' con₂' jmig₄ jme₁'nio₃ Diú₄ jme₃gu₅₄'.

Ca₂'uín'₂ Jesús dsa₂ i₂jme₁tion'₅₄ dsia₅ 'ma'₅₄ i₁dsi₅ guá'₅

(Mateo 21:12-17; Marcos 11:15-19; Juan 2:13-22)

⁴⁵ Jaun₂ ca₂'í₃ Jesús i₁dsi₅ guá'₅ templo, ca₂jme₃lióg₃ qui₂ca₂'uín'₂ dsa₂ i₂jme₁ma₂tion'₅₄ 'nag₅† ja₁jaun₂. ⁴⁶ Ca₂juá'₂:

—Ne₄ Si₂ juá'₂: “Né₅ quió₃ lé₂ ca₂ne₅₄ 'né₅ ja₁chi₂lén'₂ dsa₂ Diú₄.”§ La₁ 'nia'₂ ně₃ ma₂jmo'₅₄ ně₂jag₄ bá₄ tē₂'lau₂ quió'₅ dsa₂ 'ang₂.*

⁴⁷ Ca₂le₃jě₃ jmig₄ bá₄ jme₁jme₂tín₅ Jesús dsa₂ i₁dsi₅ guá'₅. La₁ juig₅₄ jme₂dsa₂ quian'₅₄ tē₅juá'₅, dsa₂ can'₅₄ quián₅ juig₂ ně₃, caun₂ 'no'₂ jui₅ 'a₂ lia'₂ jnag'₃.

⁴⁸ La₁ tsá₃ dso'₂ guë'₂ jui₅ 'a₂ lia'₂ jmo₃, ia₁ ca₂le₃jín₃ bá₄ dsa₂ i₂tion'₅₄, nag₂₃ tei₄ lin₃.

20

A₂'io₅ Jesús 'éi'₃

(Mateo 21:23-27; Marcos 11:27-33)

¹ Co₂ráun₂ jme₁ma₂'en₅₄ Jesús jme₂tín₂₃ dsa₂ jág₁ dse₃ i₁dsi₅ guá'₅ templo, jme₁ca₂dsi₃lén₂ juig₅₄ jme₂dsa₂, tē₅juá'₅, quian'₅₄ gui'₅₄ can'₅₄ ně₃.

² Ca₂juá'₂:

—Jmo₄ jág₁ 'e₂ ta₁ líng'₅. ¿Ein₂ ca₂cuë₃ bí₂ 'éi'₃ a₂jmo'₂ le₂ně₅?

³ Jaun₂ ca₂ηag₃ Jesús, ca₂juá'₂:

—Ján₃ bá₄ ηag₄ jniá₂ caun₂ jág₁ 'nia'₂: ⁴ ¿Ein₂ ca₂chen₃ Juan₅₄ a₂o₃choin₃ dsa₂ jmig₂? ¿Ca₂chei₃

† **19:45** A₂lin₅₄ chog₅₄ si₂: “i₂jme₁ma₂tion'₅₄ 'nag₅, lá₅ ja₁jaun₂.”

§ **19:46** Isaías 56:7. * **19:46** Jeremías 7:11.

Diú₄, o₃ ca₂chei₃ dsa₂ mi₂güí₃ 'e₂? Nag₄ de'₂ 'nia'₂ a₂ně₅.

⁵ Jaun₂ ca₂dsia₃ jág₁ guoin₅₄, ca₂juá'₂:

—Ně₁jua'₂ ca₂chei₅₄ jniog₄ i₂chen₄ quián₅ Diú₄ bá₄ 'éi₂, ně₃ cón'₅ bá₄ juá'₂: “¿'E₂ guë'₂ lě₃ tsá₃ ca₂rě₃'én'₂ 'nia'₂ jág₁ quió'₅?” ⁶ Ně₁jua'₂ ca₂ηag₄ guë'₂ jniog₄ dsa₂ bá₄ i₂ca₂chen₃ 'éi₂, ně₃ cón'₅ bá₄ ca₂le₃jín₃ dsa₂ juig₂ qui₃dsag₅ cang₄. Ia₁ 'én₂ dsón'₂ bá₄ dsa₂ juig₂ a₂jme₁lín₄ Juan₅₄ jan₂ i₂ě₂ jág₁ quián₅ Diú₄.

⁷ Jaun₂ ca₂ηag₃:

—Tsá₃ a₂jaun₂ ne₄ jnia'₅₄.

⁸ Jaun₂ ca₂juá'₂ Jesús:

—Ján₃ bá₄ le₂ně₅ tsá₃ juá'₄ jniá₂ 'ein₂ cuë₅ bí₂ 'éi'₃ a₂jmo₂₃ ca₂le₃jě₃ 'e₂ a₂jmo₂₃.

Jág₁ jáng'₅ léi₄ ju₁lia'₂ co₂nió'₃ dsa₂ 'lín'₅₄ i₂j mó'₂ ta₁ ja₁nau₂

(Mateo 21:33-44; Marcos 12:1-11)

⁹ Jaun₂ ca₂jme₃lióg₃ táng₃ Jesús ca₂tsí'₃ dsa₂ juig₂ caun₂ jág₁ jáng'₅ léi₄ la₂, ca₂juá'₂:

—Jme₁chan₂ jan₂ dsa₂ i₂ca₂jmo₃ caun₂ ja₁nau₂ ca₂chéin'₃ uing₂ mīg₂ uvas. Cang₂ jaun₂ ca₂o₃'ín₃ bá₄ ca₂ηó₃ uě₂ ja₁siá'₂. Gu₂ dsa₂ sián'₂ bá₄ ca₂dsia₃ ja₁nau₂ quió'₅. ¹⁰ Jme₁ca₂tě₂ jein₂ a₂ca₂rau₂ ja₁nau₂, ca₂chein₃ jan₂ dsa₂ i₂jme₂ti₃ quián₅, a₂i mag₂₃ con'₂ a₂ca₂tíin₂ ne₄ dsa₂ i₂jmo₅ ta₁ ja₁nau₂ 'éi₂. La₁ jě₂ bá₄ ca₂cuë₃ tióin'₅₄, ca₂dsióg'₂ lín₃. ¹¹ Jaun₂ dsa₂ juig₅₄ ja₁nau₂, ca₂chein₃ táng₃ jan₂ i₂sián'₂, la₁ le₂jaun₂ bá₄ ca₂j móg'₂ táng₃: jnia'₅₄ ca₂tě₂ca₂'o'₂ bá₄ ca₂cuë₃ tióin'₅₄, ca₂dsióg'₂ lín₃ táng₃. ¹² Jě₁ca₂tě₂ 'nag'₂, ca₂chein₃ táng₃ jan₂ i₂sián'₂. La₁ ján₃ bá₄ le₂jaun₂ qui₂ca₂j móg'₂ uig₅, ca₂dsei₂₃ tióin'₅₄.

13 'Jaun₂ ca₂juá'₂ juig₅₄ ja₁nau₂: “¿'E₂ jmo₅₄ jniá₂ ně₃? Chi'₂ quiáng₃ i₂'nióg₃ guě₄ lin₃ tsing₅₄. 'An₁ jme₃gain₃ bá₄ i₂ně₅.” 14 La₁ jme₁ca₂jág₂ i₂tion'₅₄ jmo₅ ta₁, ca₂quin'₃ jág₁, ca₂juá'₂: “I₂ně₅ bá₄ tin₃ a₂la₂ cang₂. Ně₃ o₁jñí'₄ jniog₄, ia₁jaun₂ jniog₄ bá₄ lé₂ quián₂.” 15 Jaun₂ ca₂dsei₂₃ ca₂i₁jñag'₂ 'ni'₂ ja₁nau₂. ¿'E₂ bá₄ jmo₃ dsa₂ i₂quió'₅ ja₁nau₂ ně₃, quian'₅₄ dsa₂ 'éi₂? 16 Guain'₂ jme₃dsiain₂₃ dsa₂ i₂tion'₅₄ ja₁nau₂. O₄gú₃ i₂sián'₂ bá₄ njág₃ ja₁nau₂ quió'₅.

Jme₁ca₂nág₂ dsa₂ jág₁ ně₅, ca₂juá'₂:

—jTsá₃ ju₁le₅₄ le₂ně₅!

17 Jaun₂ ca₂jág₂ Jesús, jaun₂ ca₂juá'₂:

—¿'E₂ guě'₂ 'nió'₄ jein₅ jág₁ ja₁juá'₂ ne₄ Si₂?

Ni₁cang₁ a₂tsá₃ ca₂rě₃ji'₅₄ tē₅'ia'₂,

ca₂dsióg₃ ca₂lě₃ ni₁cang₁ a₂dsen₅₄ guě₄

tē₁ron₅₄ qui'₅₄ 'ia'₂.*

18 Ca₂le₃jín₃ i₂tsi₃sén'₂ ne₄ ni₁cang₁ jaun₂ lé₂ le₁juig₁ le₁dsog'₅₄ quió'₅; ně₁jua'₂ ni₁cang₁ guě'₂ ně₃ ca₂tá'₂ ne₄ quió'₅, lé₂ 'liog₂.

19 Dsi₂jui₅ jaun₂ jme₁'nio₃ juig₅₄ jme₂dsa₂, tē₅juá'₅ ně₃, jme₁tsáun'₂, ia₁ ca₂rě₃lí'₄ a₂'in₅ 'éi₂ bá₄ Jesús, a₂ca₂juá'₂ jág₁ jáng'₅ léi₄ jaun₂.† La₁ dsa₂ juig₂ bá₄ ca₂rě₃gain₃.

Jág₁ ju₁lia'₂ 'lia'₅₄ a₂ca₂tín₂ dsi₂tan₅₄

(Mateo 21:45-46; 22:15-22; Marcos 12:12-17)

20 Cón'₂ ca₂chein₃ dsa₂ i₂jñia'₅₄ con'₂ tiog₅, tsá₃ jme₂li₅₄, jmo₂₃ a₂lín₅ dsa₂ dsen₃, jme₁'no'₂ jui₅ 'a₂ lia'₂ jme₁jo₁₂ jua'₅₄ ca₂jon₄ bá₄ jág₁ 'lia'₂ jme₁'ñiá₃

* 20:17 Salmo 118:22. † 20:19 'Nio'₂ ja₁ton₅ Isaías 5:7.

Jesús. Jaun₂ jme₁dsi₁jáng'₂ ne₄ bí₂ 'éi'₃ a₂'io₅ dsi₄má'₂. ²¹ Jaun₂ ca₂ŋí'₃ Jesús jág₁ la₂:

—Të₅, ne₄ jnia'₅₄ dsón'₂ bá₄ lia'₂ tí₅ jág₁ jme₂tíng'₁ dsa₂, tsá₃ jua'₅₄ jma₃quén₅ jing'₅₄ dsa₂; jme₂tíng'₁ dsa₂ con'₂ lë₅ juí₅ tí₅ quió'₅ Diú₄. ²² Jua'₅₄: ¿'I₄ 'éi'₃ qui₅₄ 'lia'₅₄ quió'₅ dsi₂tan₅₄ César, o₃ tsá₃ qui₅₄ 'e₂?

²³ La₁ ca₂rë₃lí'₄ bá₄ Jesús mai₅₄ quió'₅ dsa₂ 'éi₂. Jaun₂ ca₂ŋag₃:†

²⁴ —'E₄ de'₂ 'nia'₂ caun₂ cu₄ 'ua'₂.§ ¿'Ein₂ quió'₅ nió'₄ chi₁ton₅? ¿'A₂ lia'₂ chein₂ juá'₂ letras tio'₅₄ në₅?

²⁵ —Quió'₅ gui₅₄ emperador César bá₄ —juá'₂ jaun₂ në₃.

Jaun₂ guë₄ ca₂juá'₂ Jesús:

—Jang'₅₄ guë'₂ 'nia'₂ jaun₂ në₃, ne₄ César con'₂ a₂ca₂tín₂ César; ne₄ Diú₄ në₃ jang'₅₄ 'nia'₂ con'₂ a₂ca₂tín₂ Diú₄.

²⁶ Jaun₂ tsá₃ ca₂tió'₃ jua'₅₄ a₂jo₅₄ quian'₅₄ jág₁ të₃jë₄ jág₅ dsa₂ jaun₂. Të₂le₃ ca₂i₃gó'₃ dsí₅ bá₄ jág₁ a₂ca₂jéin'₃ Jesús; tei₄ bá₄ co₂ŋei'₅₄ ca₂i₃lén₂.

Ca₂ŋag₃ dsa₂ saduceos ju₁lia'₂ a₂jen'₅₄ 'lag₄

(Mateo 22:23-33; Marcos 12:18-27)

²⁷ Jaun₂ ca₂jme₃quián₃ i₂lin₅₄ dsa₂ saduceos, i₂jme₂tag₅ a₂tsá₃ jen'₅₄ 'lag₄, ca₂o₃ŋag₅₄:

²⁸ —Të₅, ca₂quiog₂ Moisés si₂ a₂juá'₂, në₁jua'₂ ca₂jon₃ jan₂ dsa₂ ŋe'₂ të₃ tsá₃ ca₂can₃ 'io₅₄ quián₅ guein₂, tion₅₄ 'nió'₅ jén'₂ gu₂ dsó₂ rin'₅₄ dsa₂ ŋe'₂ i₂ca₂jon₃ quian'₅₄ 'io₅₄ 'nág₂ 'éi₂, ia₁jaun₂ guein₂ i₂le₃chan₂ quián₅, lé₂ co₂'nió'₄ tsi₁jon₂ 'lag₄ riin'₅₄.

²⁹ Jaun₂ në₃, jme₁chan₂ guion₃ dsa₂ ŋe'₂ i₂jme₁lë₄

† **20:23** A₂lin₅₄ chog₅₄ si₂ chi₁ton₅ ján₃: “¿'E₂ lë₃ cáun'₂ táu₂ 'nia'₂ jniá₂?” § **20:24** griego: denario.

rin'⁵⁴. Ca₂jen'² gu₂ i₂le₂'uig⁵⁴, la₁ ca₂join₃ bá₄ tē₃ tsá₃ guein₂ ca₂can₃ 'io⁵⁴ quiáin₅. ³⁰ Jaun₂ ca₂caun₃ táng₃ i₂ca₂tē₂ on₃,* ³¹ le₂jaun₂ bá₄ i₂ca₂tē₂ ún₂ ně₃, ca₂cain₃ 'io⁵⁴ 'éi₂. Le₂jaun₂ bá₄ ca₂lě₃ quian'⁵⁴ ta₁guion₃. Ca₂dsain₃ bá₄; 'i₁jan₂ guein₂ tsá₃ ca₂can₃ 'io⁵⁴. ³² Jě₁ca₂tó'², ca₂jon₃ bá₄ 'io⁵⁴ ján₃. ³³ Jaun₂ ně₃, jmig₄ jě₁ma₂tě₂ rě₁jen'⁵⁴ 'lag₄, ħ₁ein₂ bá₄ quián₅ lé₂ 'io⁵⁴ 'éi₂? Ia₁ ta₁guion₃ bá₄ guē'₂ dsa₂ ŋe'₂ i₂ca₂guá₂ quian'⁵⁴.

³⁴ Jaun₂ ca₂ŋag₃ Jesús:

—Dsa₂ i₂chan₂ ne₄ gua'⁵⁴ 'uē₃ jmig₄ ně₃, tioen'⁵⁴ qui₂jéin'² gu₂, qui₂jéin'² gu₂ chi'² quián₅ ně₃. ³⁵ La₁ i₂ca₂tín₂ tín'⁴ ja₁tian'³ mi₂güig₃ caun₂, i₂tín⁵⁴ jen'⁵⁴ ja₁jme₁rě₂'lín⁵⁴, ja₁jaun₂ guē'₄ tsá₃ ma₃'ein₂ jén'² gu₂, on₃ guē'₄ qui₃jéin'² guē'₄ gu₂ chi'² quián₅. ³⁶ Ia₁ tsá₃ ma₂'ein₂ lé₂ dsían₃. Ja₁jaun₂ ma₂lén₂ jui₁lia'₂ lín₅ ángeles, lén₂ jaun₅ Diú₄, ia₁ ma₂ca₂rě₃cháin₃ táng₃. ³⁷ La₁ jui₁lia'₂ a₂jen'⁵⁴ 'lag₄, ca₂tě₂ Moisés ca₂cuē₃ léi₄ jme₁ca₂tó'² ne₄ Si₂ a₂ca₂lě₃ quian'⁵⁴ ni₁'ma₂ taun₅, ja₁juá'₂ 'iin₂₃ Te₁gui'⁵⁴: “Diú₄ quián₅ Abraham, Diú₄ quián₅ Isaac, Diú₄ quián₅ Jacob.” ³⁸ Jaun₂ ně₃ tsá₃ lín₅ Diú₄ quián₅ 'lag₄; Diú₄ quián₅ dsa₂ i₂jén'³ bá₄ lín₅, ia₁ o₄quió'₄ 'éi₂ bá₄ chan₂ le₃jín₃.

³⁹ Jaun₂ ca₂ŋag₃ i₂lín⁵⁴ tē₅juá'⁵:

—Tě₅, 'ŋio₅ jlá'₁ jág₁ quiáng'².

⁴⁰ Tsá₃ ma₃ca₂tiá₃ dsí₅ jua'⁵⁴ a₂ŋag₃ guē'₄ 'e₂ ŋag₃.

ħ₁Ein₂ tsí₁jon₂ quián₅ lín₅ I₂rě₂'ín₁ quián₅ Diú₄?
(Mateo 22:41-46; Marcos 12:35-37)

⁴¹ Ca₂juá'₂ Jesús ca₂tsí'₃ dsa₂:

* **20:30** A₂lín⁵⁴ chog⁵⁴ si₂: “ca₂caun₃ táng₃ i₂ca₂tě₂ on₃, la₁ ján₃ bá₄ le₂jaun₂ ca₂join₃, tsá₃ guein₂ ca₂can₃ 'io⁵⁴.”

—ǵ'A₂ lia'₂ lě₅ ně₃ a₂juá'₂ dsa₂ a₂lín₅ tsi₁jon₂ David I₂rě₂ín₁ quián₅ Diú₄? ⁴² Jua'₂ 'ñiog₅ bá₄ guě'₂ David ca₂tióng₃ ne₄ si₂ Salmos, ca₂juá'₂:

Ca₂juá'₂ Diú₄ ca₂tsí'₃ Te₁gui'₅₄ quiáng₃:

“Né₂ con₂ jniá'₂ tē₂le₃ gu₃ ne₁,

⁴³ ca₂lia'₂ ca₂tě₂ jmig₄

a₂tón'₄ jniá'₂ dsa₂ i₂'iog₅₄ o₄tag'₄.”†

⁴⁴ Chi₂jua'₂ le₂ně₅ juá'₂ David tē₂ Te₁gui'₅₄, ǵ'a₂ bá₄ lia'₂ lě₅ jaun₂ a₂juá'₂ lín₅ jaun₅ 'éi₂?

Jme₂cáun'₂ Jesús quió'₅ tē₅juá'₅

(Mateo 23:1-36; Marcos 12:38-40; Lucas 11:37-54)

⁴⁵ Tē₃ nag₅ ca₂le₃jín₃ dsa₂ i₂tion'₅₄, ca₂tsí'₃ dsa₂ i₂quiain'₅₄ le₂la₂:

⁴⁶ —Te₃ñi'₅₄ 'nia'₂ quian'₅₄ tē₅juá'₅, ia₁ 'ñio₅ 'ñio₂ dsí₅ i₂nioi₅₄ jláin'₁ le₁qui'₂ tsi₁'mi'₂ chen'₅₄ jang₄; tē₅ dsí₅ qui₂cuag₃ dsa₂ Diú₄ jui₁lia'₂ jē₄ 'ma'₅₄, jmá'₃ lia'₂ ne₄ 'ma₂si₅₄ dsen₅₄ bá₄ 'no'₂ tiain'₃ jui₁lia'₂ dsi₂néi₂ guá'₅ sinagogas; le₂jaun₂ bá₄ 'no'₂ ja₁jme₂juag'₂ dsa₂ jui₁lia'₂ ja₁niog₅ jmig₄ ně₃. ⁴⁷ Qui₂jniá'₂ 'ne₄ 'io₅₄ 'nág₂; a₂tsá₃ jme₂li₅₄ jmo₂₃ chi₂lén'₂ Diú₄ uě₂. Tson₂ guě₄ uig₅ 'ě₂ Diú₄ quió'₅ i₂le₂ně₅.

21

Ca₂tó'₂ 'io₅₄ 'nág₂ te₂ñé₂ cu₄ quió'₅

(Marcos 12:41-44)

¹ Jaun₂ ca₂chóg'₃ Jesús ne₅₄, ca₂jíin₂ dsa₂ cha₂ cu₄ i₂dsi₂lén₂ dsi₂tio'₂ cu₄ 'ñió'₃ tsi₁gu₅ ja₁tio'₅₄ ofrendas.

† 20:43 Salmo 110:1.

² Jaun₂ ca₂jín₂ táng₃ jan₂ 'io₅₄ 'nág₂ te₂ñé₂ ca₂tó'₂ tin₃ njí₁ guéin₂. * ³ Jaun₂ ca₂juá'₂ Jesús:

—A₂dsi₂jó'₃ juíg₂ jniá'₂ 'nia'₂, 'líong₂ guě₄ nē₂tió'₂ 'io₅₄ 'nág₂ te₂ñé₂ nē₅ lia'₂ con'₂ guě₄ ca₂le₃jín₃ i₂ma₂nē₂tió'₂. ⁴ Ia₁ 'éi₂ ně₃, cu₄ a₂ma₂qui₂rē₂tsón₂ bá₄ jaun₂ quió'₅ cuě₂₃; dsa₂ mí₂ nē₅ ně₃, nē₂cuě₃ ca₂le₃jě₃ a₂jme₁ron₅ quió'₅ bá₄, 'nió'₄ a₂jme₁lá₃ a₂guě'₃.

A₂dsi₃'én₂ bá₄ guá'₅, jág₁ 'ě₂ Jesús

(Mateo 24:1-2; Marcos 13:1-2)

⁵ I₂lin₅₄ dsa₂ jme₁tióin₂ dsia₂₃ jág₁ a₂ja₂né₂ guá'₅ templo, ia₁ a₂ñí₄ lě₃ jlá'₁ ni₁cang₁ a₂le₁juí₄, ca₂le₃jě₃ guě₄ a₂jlá'₁ tió'₅₄ a₂qui₂ma₂cuě₃ dsa₂ co₂'nió'₄ ofrendas. Jaun₂ ca₂juá'₂ Jesús:

⁶ —Ca₂le₃jě₃ a₂jág'₂ 'nia'₂ tíong'₂ nē₅, já₅ caun₂ jmíg₄ jě₁dsi₃'én₂, tsá₃ ma₃'e₂ ni₁cang₁ te₂ñiá'₄ jua'₅₄ a₂le₁juí₄ guě₄ lé₂.

Léi₄ a₂le₃cha₂ jmíg₄ jě₁ca₂tó'₂

(Mateo 24:3-28; Marcos 13:3-23)

⁷ Jaun₂ ca₂ñag₃ dsa₂ ně₃:

—Tě₅, ělíg'₂ jaun₂ lé₂ a₂ně₅? ě'E₂ bá₄ léi₄ le₃cha₂ jě₁ma₂ja₂quián₃ lé₂ a₂jaun₂?

⁸ Jaun₂ ca₂ñag₃:

—Jmo₄ 'nia'₄ 'í₁ tsá₃ i₂cuín₅ 'nia'₂ jua'₅₄ a₂jme₃gau₅ dsa₂. Ia₁ i₂juin₅ lin₃ i₂tě₁nio₄ i₂juá'₂ i₂noi₅₄ o₄quió₃ jniá'₂, a₂juá'₂ ně₃: “Jniá'₂ bá₄ 'éi₂”; juá'₂ ján₃: “Ma₂ja₂quián₃ jmíg₄ jaun₂”. La₁ tsá₃ i₂o₂nó'₅ 'nia'₂ chi₁co'₅₄ quió'₅. ⁹ Ia₁ jě₁ma₂ca₂nei'₂ 'nia'₂ 'ei₅ jág₁ a₂nio₃ 'nei₂, tón'₃ dsa₂ mi'₅₄ ně₃, tsá₃ tón'₁ 'nia'₂ go₂'i₃,

* 21:2 lit. “tin₃ njí₁ lepta.”

ia₁ le₂jaun₂ de'₂ jñiá₅ ca₂tín₂ lé₂ bá₄, la₁ on₃jua'₅₄
a₂ma₂dsian₅ dsi₂ju₁i₅ jaun₂.

10 Jaun₂ ca₂tsí'₃ táng₃ dsa₂:

—Qui₃nio₃ 'nei₂ ju₁lia'₂ caun₂ juig₂, qui₂quíin'₂
quian'₅₄ juig₂ siá'₂; jme₃'uán'₃ dsa₂ ca₂taun₂
ca₂taun₂. 11 Qui₂dsi₃bi₅₄ 'uë₃ tiá₂, jiá₃ 'on₅₄ dsa₂
ca₂le₂con₂, 'í₂ jm₁ui₅g₅ ně₃; jnia₅₄ gau₂ dsi₁ guei'₅₄,
'lióng₂ léi₄ ca'₅₄ qui₂le₃jniá₂. 12 La₁ né'₃ a₂lé₂
ca₂le₃jě₃ a₂ně₅, qui₃tsán'₂ dsa₂ 'nia'₂ qui₂co₃'ein₃
dsa₂. Dsi₁jang'₂ dsa₂ o₄gú₃ dsi₂tan₅₄ quián₅ guá'₅
sinagoga, jaun₂ gué₄ to'₂ né'₃ 'má₃. Dsi₁jó₂ ne₄ rag₅₄
ne₄ dsi₄má'₂ ně₃ 'uig₅₄ quió₃ jniá₂. 13 Ja₁jaun₂ cui₃
jmig₄ a₂jang'₅₄ 'nia'₂ jág₁ dsau₅ a₂'ág'₄ jniá₂. 14 'Éi₂
'nia'₂ caun₂ 'au'₂, tsá₃ 'náu'₂ 'nia'₂ 'au'₂ tē₃jñiá₅ 'a₂
lia'₂ long'₅₄, 15 ia₁ 'ñi₃ bá₄ jniá₂ cuë₅₄ jág₁ a₂tíng'₂
a₂ñi'₅₄ 'nia'₂ 'a₂lia'₂ ñag'₅₄, ca₂lia'₂ jñia'₅₄ tsá₃ ma₃'e₂
ñi₅ ñag₃ ca₂le₃jín₃ dsa₂ i₂'iog₅₄ 'éi₂. 16 Ca₂tē₂ chog'₂-
ñéi'₅ 'nia'₂ qui₃jáng'₂, ca₂tē₂ chi'₂ ríng'₂, o₁ríng'₂,
a₂mei₅₄ quiáng'₂ ně₃. I₂lín₅₄ 'nia'₂ jme₃dsiog₅ dsa₂.
17 Ca₂le₂con₂ bá₄ jme₃ñia₅₄ dsa₂ 'nia'₂ o₄quió₃ jniá₂.
18 La₁ tsá₃ can₂ 'nia'₂ o₂i₁ dsi₅, ia₁ ca₂lia'₂ jñia'₅₄
'i₁ca₂mi'₂ jñi₂ dsei'₂ 'nia'₂ tsá₃ dsi₃'én₂. 19 Nē₁jua'₂
ca₂nau'₂ 'nia'₂ tiá₂, dsi₁no'₃ 'nia'₂ tín'₄ jme₂dsí₂
quiáng'₂.

20 'Jē₁ma₂ca₂jag'₅₄ 'nia'₂ ma₂le₁lio₃ 'lióg₂
le₃lág'₃ juig₂ Jerusalén, jaun₂ gué₄ le₃len'₅₄ 'nia'₂
ma₂ja₂quián₃ 'én₂. 21 Dsa₂ i₂tián'₅ 'uë₃ Judea jmig₄
jaun₂, ju₁cuíng₁₂ le₃má'₂; i₂tián'₅ jē₄ juig₂ gué'₂
ně₃, ju₁'uín₂; ju₁lia'₂ i₂tion'₅₄ ja₁nau₂ gué'₂, tsá₃
ma₃ju₁ja₂lein₅. 22 Ia₁ lé₂ jmig₄ a₂le₃chan₂ dsa₂ gue₃
jm₁ui₅g₅ 'ñio₅ lín₃, a₂le₃tí₃ ca₂le₃jě₃ lia'₂ con'₂ lě₅

juá'₂ ne₄ Si₂. ²³ ¡Juíg₂ juí₁lia'₂ dsa₂ mí₂ i₂le₁quian₅
guein₂, juí₁lia'₂ i₂chan₂ guein₂ bē'₅₄ i₂'ín'₂ dsi'₅₄
quió'₅ ně₃, jmig₄ jaun₂! Ia₁ go₂'i₃ 'ñio₅ lin₃ tē₃tsi'₅₄
gua'₅₄ 'uē₃, a₂le₃jniá'₂ a₂'ne₂ Diú₄ ne₄ quió'₅ dsa₂ juig₂
la₂; ²⁴ ia₁ dsi₃gan'₅₄ i₂dsián₃ quian'₅₄ ñi₁tág₂; i₂lin₅₄
guē'₂ qui₃tē₂ dsa₂ le₁'ñei'₅₄ ca₂le₂con₂ go₄ dsi₂nau₂.
Co₂dsia₅ qui₃tsó'₃ dsi₂nau₂ juig₂ Jerusalén, ca₂lia'₂
ca₂dsin₃ jmig₄ quió'₅ dsi₂nau₂ a₂'i₄ 'éi'₃ tóin'₃ goin₂.

A₂ lia'₂ lé₂ i₂jñió'₂ Jaun₅ dsa₂ mi₂güig₃

(Mateo 24:29-35, 42—44; Marcos 13:24-37)

²⁵ 'Jmig₄ jaun₂ lé₂ léi₄ tē₂le₃ quian'₅₄ 'iog₂, tsi'₂, nei₅
ně₃. Ta₁caun₂ gua'₅₄ 'uē₃ tón'₃ dsa₂ tiá'₃ qui'₂ dsi'₅,
tsá₃ a₂ñi₅ jmo₃, jmi₁ñí'₄ guē'₂ ně₃ lé₂ gau₂ qui₃iná'₃.
²⁶ Tón'₃ dsa₂ qui₃nei'₂ a₂le₃gó'₃, 'i₅ dsi'₅ ne₄ ca₂le₃jě₃
'e₂ niog₅ lé₂ mi₂güig₃. Ia₁ ca₂tē₂ jui₅bí₂ a₂cha₂ guei'₅₄
mi₂güig₃ qui₃guian'₃. ²⁷ Jaun₂ guē₄ jín₂ dsa₂ Jaun₅
dsa₂ mi₂güig₃ jiá₃ jē₄ jnei₅ a₂'uain'₂ a₂jláin'₁ 'ñio₅
lin₃. ²⁸ Jē₁ma₂ca₂rē₃lióg₃ lē₂ a₂nē₅, quen'₂ 'nia'₂ bí₂,
'a₃ jlian₅₄ 'nia'₂, † ia₁ ja₃quián₂ jmig₄ a₂lión'₂ 'nia'₂
co₂ñei'₅₄.

²⁹ Jaun₂ ca₂juá'₂ táng₃ caun₂ jág₁ jáng'₅ léi₄ la₂:

—Ñí₂ 'nia'₂ juí₁lia'₂ lé₂ quian'₅₄ ni₁'ma₂ higuera,
juí₁'e₂ guē₃ ni₁'ma₂ siá'₂ ně₃; ³⁰ jē₁ma₂ca₂ne'₅₄ mog'₅₄,
cáun'₂ 'nia'₂ 'í₂ guiong'₅₄ a₂ja₂quián₃ jein₂ 'iog₂ bá₄
jaun₂. ³¹ Ján₃ bá₄ le₂nē₅, jē₁ma₂tē₂ ne'₅₄ 'nia'₂ lé₂
ca₂le₃jě₃ a₂nē₅, le₃ñi'₅₄ 'nia'₂ a₂ma₂ja₂quián₃ le₃gon₂
Diú₄. ³² A₂dsi₂jó'₃ juá'₅ jniá₂ juíg₂ 'nia'₂, tsá₃ dsi₃ñí₂
tsi₁jon₂ jmig₄ ně₃, † ca₂lia'₂ ca₂lě₃ ca₂le₃jě₃ a₂nē₅.

† 21:28 lit. “nau₂ 'nia'₂ chog'₅₄ ne'₅₄.”

‡ 21:32 o₃, “né'₃ a₂dsián₃
dsa₂ i₂lín₅ raza la₂.”

33 Dsi₃ŋí₂ guei'₅₄ mi₂güí₃ quian'₅₄ gua'₅₄ 'uë₃, la₁ já₁g₁ quió₃ ně₃, o₁lí₂g'₂ tsá₃ dsi₃ŋí₂ jua'₅₄ tsá₃ le₃ti₃.

34 'Të₃ŋi'₅₄ 'nia'₂, tsá₃ i₂jme₂cán'₁ táng₃ 'nia'₂ 'au'₂ a₂i₂niog'₅₄ dsing'₅₄ le₁'eng'₅, tsá₃ caun₂ a₂'í₅ 'au'₂ a₂chang'₂ mi₂güí₃ la₂, con'₂ tsá₃ ŋó₅ ně₁jua'₂ ca₂jo₃ jmig₄ jaun₂ 'nia'₂ co₂tiá₂. 35 Ju₁lia'₂ ja₁ta'₂ caun₂ tsi₁liá₂ bá₄ lé₂ jmig₄ jaun₂ ne₄ quió'₅ ca₂le₃jín₃ dsa₂ i₂tián'₅ ne₄ gua'₅₄ 'uë₃. 36 Jaun₂ chan'₂ 'nia'₂ rë₂jáng'₁, chi₁leng'₄ Diú₄ ca₂le₃jě₃ jmig₄, ia₁jaun₂ bá₄ quin'₅₄ 'nia'₂ jmig₄ líong'₂ ne₄ ca₂le₃jě₃ a₂niog₅ lé₂ ně₅, ia₁jaun₂ dsi₁nóg'₅ tē₃tsing'₅₄ ne₄ Jaun₅ dsa₂ mi₂güí₃.

37 Ca₂le₃jě₃ jmig₄ bá₄ jme₁jme₂tag₂₃ i₁dsi₅ guá'₅ templo, jë₁ma₂ca₂nei₂ dsó₅ dsi₂jŋia₅₄ má'₂ ja₁chei₂ Olivos.

38 Ca₂le₃jín₃ bá₄ dsa₂ jme₁ja₂lén₂ tē₂ o₃'iog₂ i₁dsi₅ guá'₅ a₂ja₂nei₃ já₁ a₂cuë₂₃.

22

Ca₂jmo₃ dsa₂ já₁g₁ a₂tsáin'₂ Jesús

(Mateo 26:1-5, 14—16; Marcos 14:1-2, 10—11; Juan 11:45-53)

1 Jme₁ma₂ja₂quián₃ jmig₄ quió'₅ i₁ŋí'₄ a₂tsá₃ levadura rë₂jŋia₅, a₂chei₂ Jmig₄ Të₂'in₅₄. 2 Jaun₂ qui₂ca₂'náu'₃ dsí₅ juig₅₄ jme₂dsa₂, tē₅juá'₅ ně₃, 'a₂ lia'₂ cuin₃ jmig₄ jŋag'₃, ia₁ a₂gain₃ dsa₂ juig₂ bá₄.

3 Jaun₂ ca₂'í₃ Satanás dsí₅ Judas, i₂tě'₂ Iscariote, i₂jme₁lín₄ jan₂ dsa₂ i₂guia₃-tín₂.

4 Judas 'éi₂ ně₃ ca₂ŋei₅₄ ca₂l₁jmo₅₄ já₁g₁ quian'₅₄ juig₅₄ jme₂dsa₂, quian'₅₄ i₂lín₅ 'lióg₂ dsen₅₄ quián₅ guá'₅ templo ně₃, 'a₂ lia'₂ jáng'₂ jín₂ Jesús o₄gú₃.

5 Jaun₂ 'io'₂ jén'₅ bá₄ dsa₂ 'éi₂, ca₂jmo₃ jág₁ a₂cuë₃ cu₄.

6 Jaun₂ ca₂cuë₃ Judas jág₁ quió'₅. Jaun₂ ca₂'náu'₃ dsí₅ 'a₂ lia'₂ jáu₂ jui₅ a₂jáng'₂ con'₂ jme₁tsá₃ juin₅ dsa₂ ma₃quaiin'₅₄.

Má₃ jë₁ca₂tó'₂ quió'₅ Te₁gui'₅₄

(Mateo 26:17-29; Marcos 14:12-25; Juan 13:21-30; 1 Corintios 11:23-26)

7 Ca₂të₂ jme₁ca₂të₂ jmig₄ quió'₅ i₁ŋí'₄ a₂tsá₃ levadura rë₂jŋia₅, con'₂ ca₂tín₂ dsa₂ jme₂dsiain₂₃ guein₂ já'₂ cha'₂ quián₅ Jmig₄ Të₂'in₅₄.

8 Jaun₂ ca₂chen₃ Jesús Pe₄ quian'₅₄ Juan₅₄, ca₂juá'₂:

—O₂nó'₅ 'nia'₂ o₂jmo₄ co₂jŋia₅₄ má₃ quián₂ jniog₄ a₂que₅₄ Jmig₄ Të₂'in₅₄.

9 Jaun₂ ca₂ŋag₃ 'éi₂:

—¿A₂já'₄ 'niog'₂ dsi₁jmó₁ jnia'₅₄ co₂jŋia₅₄?

10 Jaun₂ ca₂juá'₂:

—Jë₁ma₂dsi₃nó'₅ 'nia'₂ jë₄ juig₂, jme₃jein'₂ jan₂ dsa₂ ŋe'₂ i₂ŋá'₅ quion₂ caun₂ ni₁dsig₁ 'a₄ jmig₂. O₁'éin'₃ 'nia'₂ ca₂të₂ dsi₂néi₂ ja₁'í₂. 11 Jaun₂ juig'₅₄ 'nia'₂ dsa₂ juig₅₄ dsi₂néi₂: “Le₂la₂ juá'₂ Të₅ tsí'₅ 'ne₂: ¿Na₂ bá₄ dsi₂néi₂ ja₁guë'₅₄ má₃ quió'₅ Jmig₄ Të₂'in₅₄ quiang'₅₄ chí'₂ dsi₂guia₃-tín₂ quiáng₃?” 12 Jaun₂ 'ë₃ caun₂ ja₁lë₄ dsi₂néi₂ juë'₂ guei'₅₄ ja₁ma₂lë₅ co₂jŋia₅₄ quió'₅. Ja₁jaun₂ jmo₄ co₂jŋia₅₄.

13 Jaun₂ ca₂i₁lén₂ bá₄ 'éi₂ në₃. Ca₂lë₃ rë'₂ lia'₂ con'₂ lë₅ jág₁ jaun₂. Ja₁jaun₂ ca₂jmo₃ má₃ quió'₅ jmig₄.

14 Jme₁ca₂tě₂ hora jaun₂, ca₂guá₂ Jesús ne₄ mesa, quiain'₅₄ chi'₂ dsi₂guia₃-tín₂* quiáin₅. 15 Jaun₂ ca₂tsí'₃ 'éi₂:

—ǝLíg'₂ bá₄ 'ín₅ dsi₃ guě'₅₄ má₃ Jmíg₄ Tě₂'in₅₄ la₂ quian'₅₄ 'nia'₂, né'₃ a₂dsi₃ŋíg₂ uig₅! 16 Ia₁ juá'₅ jniá₂ juíg₂ 'nia'₂, tsá₃ ma₃líg'₂ jmíg₄ jua'₅₄ guě'₅₄ guě₄ má₃ le₂la₂ ca₂lia'₂ ca₂tě₂ jmíg₄ i₁le₃ti₃ ja₁gon₂ Diú₄.

17 Jaun₂ ca₂tíin₂ copa, ca₂cuě'₃ ti₁'mag'₄ Diú₄, jaun₂ ca₂juá'₂:

—Ján'₅ 'nia'₂ a₂la₂; jmo₄ dsióg₁ jin₄ ríng'₂. 18 Ia₁ juá'₅ jniá₂, tsá₃ ma₃líg'₂ jmíg₄ jua'₅₄ a₂gui'₅₄ guě₄ jmi'₅₄ míg₂ uvas le₂la₂, ca₂lia'₂ ca₂tě₂ jmíg₄ i₁le₃ti₃ ja₁gon₂ Diú₄.

19 Jaun₂ ca₂tíin₂ táng₃ caun₂ i₁ŋí'₄, ca₂cuě'₃ ti₁'mag'₄ Diú₄. Jaun₂ ca₂'niai₃ ca₂cuě'₃ 'éi₂, ca₂juá'₂:

—Ŋí₃ bá₄ jniá₂ i₁ŋí'₄ la₂, a₂ma₂rě₂jang'₅₄ o₄quián'₂ 'nia'₂. Jmo₄ 'nia'₂ a₂la₂ a₂dsiog'₂ 'au'₂ jniá₂.†

20 Ján₃ bá₄ le₂ně₅, jme₁ma₂ca₂lě₃ guě'₅ i₁ŋí'₄, ca₂can₃ táng₃ copa, jaun₂ ca₂juá'₂:

—A₂'a₄ copa la₂, lě₅ jág₁ 'mí₂ a₂tě₃ron₅₄, a₂li'₅₄ tē₂le₃ quian'₅₄ jmi₃ a₂dsi₃'o₅₄ o₄quián'₂ 'nia'₂.‡

21 'La₁ ně₃ ně₃, ne₄ mesa la₂ guá₅ quian'₅₄ jniá₂ i₂jáng'₂. 22 Dsón'₂ bá₄ 'en₅₄ jui₅ Jaun₅ dsa₂ mi₂güíg₃ dsióg₄ ja₁'ein₅₄ 'éi'₃ dsióg₄, la₁ i₁'e₂ guě₄ juíg₂ dsa₂ i₂jáng'₂!

23 Jaun₂ ca₂jme₃lióg₃ tsi₂ca₂jíin₂ quiain'₅₄ riin'₅₄, 'ein₂ bá₄ 'éi₂ i₂jmo₃ le₂jaun₂.

* 22:14 griego: apóstolous (dsa₂ i₂chen₄). † 22:19 A₂lin₅₄ chog₅₄ si₂ tsá₃ chi₁ton₅ “a₂ma₂rě₂jang'₅₄ o₄quián'₂ 'nia'₂. Jmo₄ 'nia'₂ a₂la₂ a₂dsiog'₂ 'au'₂ jniá₂”, on₃ guě'₂ versículo 20. ‡ 22:20 'Nio'₂ ja₁ton₅ Éxodo 24:8.

Ca₂tsín₂ o₄quió'₄ 'ein₂ i₂lén₂ i₂dsen₅₄ guě₄

²⁴ Ján₃ bá₄ ca₂lě₃ mi'₅₄ jě₄ quió'₅, ne₄ 'uig₅₄ 'ein₂ 'éi₂ i₂lén₂ i₂dsen₅₄ guě₄.

²⁵ Jaun₂ ca₂juá'₂ Jesús:

—Ca₂le₃jín₃ rag₅₄ quián₅ dsi₂nau₂, tain'₂₃ goin₂ jmo₂₃ 'éi'₃ lia'₂ lě₂ dsí₅. Le₂jaun₂ guě'₂ i₂le₁'io₅ 'éi'₃ i₂le₁'ín₁ quián₅, 'ag₅ dsa₂ a₂lín₅ dsa₂ i₂jmo₅ a₂dse₃. ²⁶ La₁ tsá₃ le₂jaun₂ lé₂ quian'₅₄ 'nia'₂. Jui₁lia'₂ i₂can'₅₄ jě₄ quián'₂ 'nia'₂, jui₁jmo₁₂ mei'₂. Le₂jaun₂ guě'₂ i₂cán₂ ne₄ jui₅, jui₁jmo₁₂ ně₂jag₄ bá₄ i₂jme₂ti₃.

²⁷ Jaun₂ ně₃, ¿'ein₂ i₂dsen₅₄ guě₄: i₂guá₅ ne₄ mesa, o₃ i₂dsia₅ má₃ 'e₂? ¿'On₁ i₂guá₅ ne₄ mesa bá₄? La₁ jniá₂ 'eng₅₄ jě₄ quián'₂ 'nia'₂, líng₅ jan₂ i₂jme₂ti₃.

²⁸ 'Nia'₂ guě'₂ líng'₅ i₂ma₂ja₂nóg'₅ quiong'₅₄ jniá₂ jě₄ uig₅ a₂qui₂ma₂l₂ñíg₂. ²⁹ 'Uig₅₄ ně₅ ně₃, dsián₄ jniá₂ 'nia'₂ ja₁o₁tiáng'₂ gong'₂, jui₁lia'₂ ma₂dsiog₃ Ne'₃ jniá₂, ³⁰ ia₁jaun₂ o₁qué'₂ o₁'én'₂ 'nia'₂ ne₄ mesa quió₃ ja₁gong₂, ja₁jaun₂ o₁tián'₂ 'nia'₂ ne₄ta₁ a₂qui₁dsí'₂ 'éi'₃ quió'₅ ta₁guia₃-tín₂ nió'₃ tsi₁jon₂ dsa₂ juig₂ Israel.

Ni₅ bá₄ Jesús a₂tsá₃ tion₃ Pe₄ a₂cui_g₂₃

(Mateo 26:31-35; Marcos 14:27-31; Juan 13:36-38)

³¹ Ján₃ bá₄ ca₂juá'₂ Te₁gui'₅₄:

—Si₂mu₅₄, Si₂mu₅₄ —ca₂tsí'₃ Pe₄—, i₂sě₃dsen₃ ma₂ně₂mag₃ 'ñiá'₂ 'nia'₂ lia'₂ ja₁'ñiá'₂ dsa₂ trigo, ³² la₁ jniá₂ ma₂ně₂mi₃ o₄quián'₂ 'ne₂, ia₁jaun₂ tsá₃ dsiá₃ éi₃ a₂'éng'₂. 'Ne₂ ně₃, jě₁ma₂ca₂jéin'₃ táng₃ 'au'₂, cuě'₅₄ bí₂ ríng'₂.

³³ Jaun₂ 'éi₂ ně₃ ca₂ñag₃:

—Te₁gui'₅₄, caun₂ bá₄ ma₂'ei₅ dsi₃ i₁'ú₃ né'₃ 'má₃ co₂lě₅ quian'₅₄ 'ne₂, o₁jñia'₅₄ 'mú₃ ca₂quín₂.

34 Jaun₂ ca₂ŋag₃ Jesús:

—Pe₄, jniá₂ guè'₂ juá'₅, tsá₃ 'o₃ të₁guí₄ dsó₂ ně₃, ca₂lia'₂ ma₂ně₂jua'₅₄ 'ne₂ 'ni₅ ráun₂ a₂tsá₃ tóng'₄ a₂cui_g'₂ jniá₂.

Ma₂ja₂quián₃ hora gue₃ Jesús uig₅

35 Jaun₂ ca₂juá'₂:

—Lia'₂ con'₂ ca₂ts'ing₂ 'nia'₂, lia'₂ con'₂ tsá₃ tsi₁na'₅₄ jme₁le₁quian'₄, on₃ guè'₂ të₂lau₂, on₃ guè'₂ ni₁lau₂ ton₅ tag'₅₄ ně₃, ĩcha₁ a₂ca₂rě₃'nió'₅ quián'₂ 'nia'₂?

'Éi₂ ně₃, ca₂ŋag₃:

—'I₁caun₂ tsá₃ ca₂rě₃'nió'₅.

36 Jaun₂ ca₂juá'₂ táng₃:

—Ně₃ gué₄ ně₃ i₂'io₅ tsi₁na'₅₄, të₂lau₂ ně₃ jui₁quian₅₄. I₂tsá₃ 'io₅ ŋi₁tág₂ ně₃, o₁'nag₁₂ mi₂dsió_g₂ quió'₅ ia₁jaun₂ lá₃ ŋi₁tág₂. 37 Ia₁ juá'₅ jniá₂, tion₅₄ niog₅ le₃ti₃ ja₁con₂ jniá₂ ja₁juá'₂ ne₄ Si₂ le₂la₂: “Nó₃ jě₄ quió'₅ dsa₂ i₂le₁cán'₄ dso₄, ia₁ ca₂jmo₃ dsa₂ dsí₅ ně₂jag₄ bá₄ a₂rě₂cáin'₄ dso₄ ján₃.”§ Ia₁ ca₂le₃jě₃ a₂niog₅ juá'₂ ne₄ Si₂ a₂'ag₂₃ jniá₂, tion₅₄ niog₅ le₃ti₃.

38 Jaun₂ ca₂juá'₂ 'éi₂:

—Te₁gui'₅₄, la₂ tiá'₅ t'ín₃ ŋi₁tág₂.

Jaun₂ ca₂ŋag₃ táng₃:

—Tió'₅ bá₄ ně₅.

Ca₂chi₂lén'₂ Jesús Diú₄ caun₂ ja₁chei₂ Getsemani
(Mateo 26:36-46; Marcos 14:32-42)

39 Jaun₂ gué₄ ně₃ o₂'iin₃ ŋó₃ jui₅ Má'₂ Olivos, ia₁ le₂jaun₂ t'ín₂ bá₄. Jaun₂ ca₂i₃lén₂ chi'₂ dsi₂guia₃-t'ín₂ quiong'₅₄.

40 Jme₁ca₂dsió_g ja₁jaun₂, jaun₂ ca₂juá'₂:

§ 22:37 Isaías 53:12.

—Chi₁len'₅₄ 'nia'₂ Diú₄ ia₁jaun₂ tsá₃ jo₅₄ jui₅bí₂
a₂cáun₂ táu₂.

41 Jaun₂ ca₂ηó₃ Jesús 'ηiog₅ uíng₂ con'₂ ja₁tág'₅
ca₂míg₂ ni₁cang₁ a₂táun₂ dsa₂. Ja₁jaun₂ ca₂chi₃jnë₃
ca₂chi₃lén'₂ Diú₄.

42 Ca₂juá'₂:

—Tia₅₄, ζtsa₁ cuin₅ jmíg₄ jniá'₄ uig₅ dsi₃ηíg₂ la?
La₁ia₁, ju₁le₅₄ bá₄ a₂'ηio₂ 'au'₂ 'ne₂, on₃jua'₅₄ con'₂
'nio₃ jniá'₂.

43 Jaun₂ ca₂jme₃jnia₅ jan₂ ángel ne₅₄, i₂ca₂sión₃ jui₅
guei'₅₄ i₂juíg₃, a₂ca₂cuë₃ bí₂.

44 Hora jaun₂ ca₂ηág₃ uig₅ 'ηio₅ lín₃, jaun₂ të₂le₃ lë₅
guë₄ ca₂chi₃lén'₂ Diú₄; ca₂tein₃ jme₁dsiog₂ në₂jag₄
bá₄ jmí₂ qui₂ca₂dsá₂ të₂ 'uë₃.*

45 Jme₁ca₂nau₂ ja₁chi₂lén'₂ Diú₄ jaun₂, guáin'₃
ja₁tián'₄ chi'₂ dsi₂guia₃-tín₂. La₁ le₁güín₃ bá₄ 'éi₂
tián'₅ ca₂jo₃, 'uig₅₄ ia₁ a₂ηí₄ lë₃ 'lia'₂ dsí₅.

46 Jaun₂ ca₂juá'₂:

—ζ'E₂ lë₃ le₁güín'₃ 'nia'₂ tiáng'₅? Nau₂, chi₁len'₅₄
'nia'₂ Diú₄ ia₁jaun₂ tsá₃ jo₃ jui₅bí₂ a₂cáun₂ táu₂.

Ma₂le₁te₂ dsa₂ Jesús

(Mateo 26:47-56; Marcos 14:43-50; Juan 18:2-

11)

47 Të₃jë₄ juá'₂ Jesús jaun₂, jme₁ca₂dsi₃lén₂ juin₅
dsa₂. Jaun₂ ca₂dsióg₃ i₂të'₂ dsa₂ Judas, i₂jme₁lín₄
jan₂ chi'₂ dsi₂guia₃-tín₂, quian₅ ne₄ jui₅. Jaun₂
ca₂jme₃quiáin₃ con₂ Jesús a₂jme₁chen'₃† quió'₅.

48 La₁ ca₂juá'₂ Jesús:

* **22:44** A₂lín₅₄ chog₅₄ si₂ tsá₃ chi₁ton₅ versículos 43 quian'₅₄ 44.

† **22:47** Jme₁tín₂ quió'₅ dsa₂ judíos a₂chen'₂ jú'₅ ríin'₅₄ jë₁cuag₃ Diú₄.

—Judas, ¿'e₂? ¿Le₁ně₅ bá₄ jing'₅₄ Jaun₅ dsa₂ m_{i2}güí₃, a₂chén'₁ quió'₅?

49 Jme₁ca₂jág₃ i₂quian'₅₄ Jesús a₂lě₂ jaun₂, ca₂juá'₂:

—Te₁gui'₅₄, ¿qui'₅₄ jnia'₅₄ quian'₅₄ ŋi₁tág₂?

50 Jan₂ 'éi₂ ně₃ ca₂quí'₃ quió'₅ i₂jme₂ti₃ ta₁ quián₅ jme₂dsa₂ dsen₅₄, ca₂jñiá'₂ rě₂gua₅₄ ne₁.

51 Jaun₂ ca₂juá'₂ Jesús:

—'A₃ ma₃jmai'₅₄.

Jaun₂ ca₂chóng'₃ táng₃ rě₂gua₄ 'éi₂, ca₂jme₃'lió₂.
52 Jaun₂ ca₂tsí'₃ juig'₅₄ jme₂dsa₂, 'i'₅₄ guá'₅, gui'₅₄ can'₅₄ ně₃ i₂dsi₃lén₂ tsáun'₂:

—¿'E₂? ¿Jui₁lia'₂ jě₁tsán'₂ dsa₂ 'ang₂ ja₂nóg'₅ qui₂le₁quian'₄ ŋi₁tág₂, 'ma₂ ně₃? 53 Líg'₂ bá₄ 'eng₅₄ tián₂ quian'₅₄ 'nia'₂ i₁dsi₅ guá'₅, tsá₃ ma₂chong'₂ 'nia'₂ ja₁jaun₂. La₁ ně₃ guě₄, 'au'₂ 'nia'₂ bí₂ tiá₂ 'au'₂ jmó'₂, ně₃ lia'₂ chí'₅ qui₁né'₃.

Tsá₃ tion₅ Pe₄ a₂cuin₂₃ Jesús

(Mateo 26:57-58, 69—75; Marcos 14:53-54, 66—72; Juan 18:12-18, 25—27)

54 Jme₁ma₂ně₂chóng'₂, ca₂tág₃ jui₅ ja₁quió'₄ jme₂dsa₂ dsen₅₄. La₁ Pe₄ ně₃, uing₂ bá₄ tě₂quín₃ ŋó₃ 'ein₂₃.

55 Dsa₂ 'éi₂ ně₃, ca₂dsia₃ si₂ i₁dsi₅, ca₂tián'₂ le₃lág'₃ cau₅ si₂; jě₄ jaun₂ ca₂guá'₂ Pe₄ ján₃.

56 Tě₂jě₄ jaun₂, ca₂rě₃lí'₄ jan₂ 'io₅₄ i₂jme₂ti₃ ta₁ ja₁jaun₂, a₂guá'₅ Pe₄ cau₅ si₂. Caun₂ ca₂jág₂ tiá₂, ca₂juá'₂:

—Ján₃ bá₄ jme₁quiain'₅₄ i₂ně₅.

57 La₁ 'éi₂ ně₃, tsá₃ ca₂tioin₃, ca₂juá'₂:

—Tsá₃ 'éi₂ cuín₅ jniá'₂, 'ne₂ 'io₅₄.

58 Jme₁co₂lág₂ jaun₂, ca₂guan₃ táng₃ jan₂, ca₂jág₂, jaun₂ ca₂juá'₂:

—Jme₁quiain'₅₄ 'ne₂ ján₃, ħlia'₅₄?

—Jan₂'ón₄. Tsá₃ dsa₂ 'éi₂ jme₁quian'₄ jniá₂, 'ne₂.

⁵⁹ Con'₂ caun₂ hora cang₂ jaun₂, tion₅₄ bá₄ tsá₃ jme₁cán₂ jan₂ jág₁, ca₂juá'₂:

—Të₃dsón'₂ jan₂ i₂jme₁quiain'₅₄ bá₄ nē₅, ia₁ Galilea bá₄ ja₁chain₂.

⁶⁰ Jaun₂ ca₂juá'₂ táng₃ Pe₄:

—Të₃dsón'₂ rē'₂ juá'₅ jniá₂ la₂, ca₂lia'₂ jñia'₅₄ tsá₃ cuíng₅ 'ein₂ 'éi₂ 'ín'₅ 'nia'₂.

Të₃jë₄ dsia₂₃ jág₁ jaun₂ jme₁ca₂'o₃ të₁guí₄ dsó₂.

⁶¹ Jaun₂ ca₂jén'₃ Te₁gui'₅₄ ca₂jñin₂ Pe₄, ca₂jmo₃ a₂dsiog'₂ dsí₅ 'éi₂ 'e₂ a₂ma₂nē₂juá'₂ le₂jñiá₅: “Tsá₃ 'o₃ të₁guí₄ dsó₂ nē₃, ca₂lia'₂ ma₂nē₂jua'₅₄ 'ne₂ 'ni₅ ráun₂, a₂tsá₃ tóng'₄ a₂cuig'₂ jniá₂.”

⁶² Jaun₂ ca₂o₃ 'ín₃ ca₂tá'₂ qui'₂ dsí₅, ca₂'o₃ 'ñio₅ lin₃. †

A₂lë₁qui₂co₂jmá'₂ dsa₂ Jesús

(Mateo 26:67-68; Marcos 14:65)

⁶³ Dsa₂ i₂niog₅ jmo₅ 'í₁ Jesús nē₃, a₂lë₁qui₂co₂jmóg'₂ tiain'₅₄, ca₂cuë₃ nē₃.

⁶⁴ Ca₂'néi₂ jme₁ne₁ Jesús, qui₂ca₂quein₃ dsi₂ne₅₄ § jaun₂ ca₂juá'₂:

—iDsi₄ jág₁ 'ein₂ nē₂quein₃ quiáng'₂!

⁶⁵ 'Lióng₂ lin₃ bá₄ ca₂juá'₂ tiain'₅₄, a₂të₂'o'₂.

Ca₂chen'₃ dsa₂ Jesús ne₄ dsi₂tan₅₄ quián₅ guá'₅

(Mateo 26:59-66; Marcos 14:55-64; Juan 18:19-24)

⁶⁶ Jme₁jñia₃ jaun₂, qui₂ca₂ñi'₂ ca₂le₃jín₃ gui'₅₄ can'₅₄ quián₅ dsa₂ judíos, juig₅₄ jme₂dsa₂, të₅juá'₅

† **22:62** A₂lin₅₄ chog₅₄ si₂ tsá₃ chi₁ton₅ versículo 62. § **22:64** A₂lin₅₄ chog₅₄ si₂ tsá₃ chi₁ton₅ “qui₂ca₂quein₃ dsi₂ne₅₄.”

ně₃. Jme₁ma₂le₁ŋi₁'₂, ca₂dsi₁ŋia₃ dsa₂ Jesús ne₅₄.
Jaun₂ ca₂ŋag₃:

67 —¿Dsón'₂ 'ne₂ líng'₅ I₂rě₂ 'ín₁ quián₅ Diú₄?

Jaun₂ ca₂ŋag₃:

—O₁ŋia'₅₄ ca₂juá'₃ jniá₂, jniá₂ 'éi₂, a₂dsón'₂ tsá₃
le₃'én'₂ bá₄ 'nia'₂. 68 Nē₁jua'₂ ca₂ŋag₄ jniá₂ 'e₂ ca₂ŋag₅₄
ne'₅₄ 'nia'₂, a₂dsón'₂ on₃jua'₅₄ a₂jaun₂ jein'₅₄ 'nia'₂ jág₁
quió₃. * 69 La₁ ně₃ ně₃, tē₂le₃ ne₄ ju₁ja₁ŋó₄ ně₅, guá₃
Jaun₅ dsa₂ mi₂güí₃, tē₂le₃ gu₂ ne₁ Diú₄ i₂'uan'₂ guě₄
lín₃.

70 Jaun₂ ca₂ŋag₃ ca₂le₃jín₃:

—¿Ia₁ 'ne₂ bá₄ líng'₅ Ja₁ŋi'₅₄ Diú₄, jaun₂?

—Jniá₂ bá₄ líng₅, ju₁lia'₂ ma₂nē₂jua'₅₄ 'nia'₂ ně₅.

71 Jaun₂ ca₂juá'₂ tío₁n'₅₄:

—¿Ein₂ guě₄ jmá'₃ dsa₂ 'niog₂ jniog₄ jáng'₃
jág₁ dsau₅? Jua'₂ jniog₄ guio₅₄ ma₂nē₂né₁ jág₁
a₂ma₂nē₂'uě'₃ i₂nē₅ 'ŋiog₅ mi₂'o₅₄ chéin'₅.

23

Ca₂dsián'₃ Jesús ne₄ Pilato

(Mateo 27:1-2, 11—14; Marcos 15:1-5; Juan 18:28-38)

¹ Jaun₂ qui₂ca₂nau₂ ca₂le₃jín₃ ca₂ŋia₃ Jesús ne₄
Pilato.

² Ja₁jaun₂ guě₄ ca₂'náu'₃ dsáu₁ Jesús, ca₂juá'₂:

—Ca₂jon₃ ŋia'₅₄ dsa₂ la₂ jme₁'ein₅₄ dsia₂₃ mi'₅₄ jín₄
dsa₂ juí₂ quián₂ ŋia'₅₄. Ní₂₃ toin'₂ dsa₂ jág₁ a₂tsá₃
ma₂'ein₂ quí₃ 'lia'₅₄ a₂ca₂tín₂ César; a₂jme₂tín₂₃ dsa₂
juá'₂ a₂lín₅ I₂rě₂ 'ín₁ quián₅ Diú₄, co₂'nió'₄ a₂lín₅
rag₅₄.

* 22:68 A₂lín₅₄ chog₅₄ si₂ juá'₂ ján₃; “on₃ guě'₂ jaun₂ a₂lo'₅₄ 'nia'₂.”

3 Jaun₂ ca₂ŋag₃ Pilato:

—¿Dsón'₂ líng'₅ Rag₅₄ quián₅ dsa₂ judíos?

Jaun₂ ca₂ŋag₃ Jesús:

—Le₂ně₅ bá₄, jui₁lia'₂ juá'₂ 'ne₂ ně₅.

4 Jaun₂ ca₂juá'₂ táng₃ Pilato ca₂tsí'₃ juig₅₄ jme₂dsa₂,
quian'₅₄ dsa₂ juig₂:

—Tsá₃ 'e₂ dsáu₁ dsa₂ ně₅ dso'₂ jniá'₂ 'i₁caun₂.

5 La₁ tē₂le₃ lē₅ guē₄ co₂mi'₅₄ ca₂tóin'₂, ca₂juá'₂:

—La₁ 'ŋio₅ lin₃ dsia₂₃ mi'₅₄ ŋi₂₃, jme₂tiin₂₃ dsa₂
ta₁caun₂ 'uē₃ Judea. Ca₂jme₃lióg₃ Galilea, rē₂ně₃
guē'₂ ma₂ŋi₂₃ ja₁lá₃ jmo₂₃ le₂jaun₂.

Ca₂dsián'₂ Pilato Jesús ne₄ Herodes

6 Jme₁ca₂nág₂ Pilato a₂ně₅, jaun₂ ca₂ŋag₃ chi₂jua'₂
'uē₃ Galilea chan₂ dsa₂ 'éi₂.

7 Jme₁ca₂rē₃ŋi₅ ně₃, a₂lín₅ Jesús dsa₂ chan₂ tē₂le₃
'uē₃ ja₁niog₅ gu₂ Herodes, jaun₂ ca₂dsióg'₂ ne₄ 'éi₂.
Ia₁ jme₁ŋi₂₃ juig₂ Jerusalén jmi₄g₄ jaun₂.

8 'Io'₂ jén'₅ bá₄ Rag₅₄ Herodes jme₁ca₂jín₂ Jesús,
ia₁ líg'₂ bá₄ 'ín₅ dsí₅ jág₂, ia₁ jme₁ma₂nág₂ bá₄ 'ei₅ jág₁
a₂'in₅ dsa₂ 'éi₂. Ia₁ jme₁'ín₂ dsí₅ jág₃ 'e₂ caun₂ o₂dsain₂
jmo₃.

9 'Lióng₂ a₂qui₂ca₂ŋí'₃ Jesús, la₁ tsá₃ ma₃'e₂ ca₂ŋag₃
'éi₂ 'i₁caun₂.

10 Ja₁jaun₂ jme₁tión₂ juig₅₄ jme₂dsa₂ quian'₅₄
tē₅juá'₅ ně₃, caun₂ qui₂ca₂'náu'₃ tion₅₄ dsáu₁ 'éi₂.

11 Jaun₂ Herodes ně₃, quian'₅₄ 'lióg₂ quián₅,
lē₁qui₂ca₂jmóg'₂ tióin'₅₄, ca₂quei'₃ 'mi'₂ jlá'₁, jaun₂
ca₂dsióg'₂ bá₄ táng₃ ne₄ Pilato.

12 Jmi₄g₄ jaun₂ bá₄ ca₂jmo₃ Pilato a₂mei₅₄ quian'₅₄
Herodes, ia₁ jme₁le₁'ŋiai₁₂ riin'₅₄ le₂jŋiá₅.

Ca₂o₃'ág₃ 'éi'₃ a₂jón₂ Jesús
(Mateo 27:15-26; Marcos 15:6-15; Juan 18:39-19:16)

¹³ Jaun₂ ca₂ŋí'₂ Pilato juig₅₄ jme₂dsa₂, quian'₅₄ i₂lín₅ ta₁, quian'₅₄ dsa₂ juig₂ ně₃. ¹⁴ Jaun₂ ca₂tsí'₃ dsa₂: —O₂jon'₅₄ 'nia'₂ ne₃ dsa₂ la₂, ia₁ juá'₂ 'nia'₂ a₂dsia₂₃ mi'₅₄ jin₄ dsa₂. Tě₃ ne'₅₄ 'nia'₂ ma₂qui₂ně₂ŋag₄ jniá₂, tsá₃ 'e₂ dsáu₁ dso'₂ jniá₂ 'i₁caun₂, lia'₂ con'₂ lě₅ dso₄ a₂jme₂cain'₅₄ 'nia'₂. ¹⁵ On₃ guě'₂ Herodes ca₂dsó'₂, jaun₂ la₂ bá₄ ca₂dsióg'₂ táng₃. Jaun₂ 'i₁caun₂ tsá₃ 'e₂ cha₂ jua'₅₄ ca₂tšin₂ gue₃ 'mú₃. ¹⁶ La₁ jmo₅₄ 'éi'₃ a₂bóg₂ dsa₂, jaun₂ guě₄ loin₅₄.

¹⁷ Jme₁jmig₄ tě₂'in₅₄, jme₁chí'₄ tag₄ quió'₅ Pilato jme₁lióin₂ jan₂ dsa₂ 'né₅ 'má₃, jme₁chei'₂ le₃jin₄ dsa₂.*

¹⁸ La₁ dsa₂ juig₂ ně₃ co₂ŋei'₅₄ ca₂le₃jii₃ ca₂tóin'₂ co₂mi'₅₄ ca₂juá'₂:

—¡Cau₅ jniá'₃ i₂ně₅! ¡Barrabás bá₄ lion₄ quián₂ jnia'₅₄!

¹⁹ Barrabás 'éi₂ ca₂to'₂ dsa₂ né'₃ 'má₃ 'uig₅₄ ia₁ ca₂dsia₃ caun₂ mi'₅₄ jě₄ juig₂, ton'₂ ia₁ jme₁ma₂jii'₃ dsa₂ ně₃.

²⁰ Jme₁'nio₃ bá₄ Pilato jme₁lióin₂ Jesús, jaun₂ jme₁ca₂tsí'₃ bá₄ guě₄ dsa₂. ²¹ La₁ tě₂le₃ lě₅ guě₄ co₂mi'₅₄ ca₂tón'₂ bá₄ dsa₂, guió'₅ juá'₂:

—¡Tióin₃ cróg₄! ¡Tióin₃ cróg₄!

²² Jě₁ŋó₄ 'ni₅ ráun₂ ca₂juá'₂ táng₃ Pilato tsí'₅ dsa₂:

—¿'E₂ guě'₂ 'lig'₅₄ ma₂jmo₃? Tsá₃ 'e₂ dsáu₁ i₂ně₅ dso'₂ jniá₂ jua'₅₄ a₂ca₂tšin₂ jóin₂. Jmo₅₄ jniá₂ 'éi'₃ a₂bóg₂ dsa₂ jaun₂ guě₄ loin₅₄.

* **23:17** A₂lin₅₄ chog₅₄ si₂ tsá₃ chi₁ton₅ versículo 17.

23 La₁ tion₅₄ ca₂mi₃ dsa₂ tioen'₅₄ co₂mi'₅₄ a₂tion₃ cróg₄. Ca₂lě₃ rě'₂ con'₂ lě₅ 'ín₅ dsí₅ dsa₂ juig₂ lé₂.

24 Jaun₂ co₂nei'₅₄ me'₂ ca₂jmo₃ Pilato 'éi'₃ a₂lé₂ con'₂ lě₅ mi₅ dsa₂.

25 Jaun₂ ca₂lióin₂ bá₄ dsa₂ i₂jme₁'en₅₄ né'₃ 'má₃, i₂jme₁ma₂dsia₃ mi'₅₄, i₂ma₂jñi'₃ dsa₂ ně₃. Jaun₂ ca₂jáng'₂ ca₂jñin'₂ Jesús o₄gú₃ dsa₂ juig₂ o₁jmo₁₂ quiong'₅₄ con'₂ 'ín₅ dsí₅ jmo₃.

Ca₂tion₃ dsa₂ cróg₄ Jesús

(Mateo 27:32-44; Marcos 15:21-32; Juan 19:17-27)

26 Con'₂ ma₂tioen'₅₄ juí₅ jñiai₂₃ Jesús ja₁dsi₃tion₃ cróg₄, ca₂chi₃quiáin₂ tion₅₄ jan₂ dsa₂ chan₂ 'uě₃ Cirene, i₂chen₂ Si₂mu₅₄, i₂'en₅₄ juí₅ jón'₅ ja₁nau₂, a₂cán₂ cróg₄ dsó₃ le₃chi₁co'₅₄ quió'₅ Jesús.

27 Juin₅ lin₃ bá₄ dsa₂ juig₂ i₃lén₂ 'ein₂₃, dsa₂ mí₂ ně₃ i₃lén₂ qui'₂-o₂₃ 'lia'₂ dsí₅ qui'₂-óin'₂ Jesús.

28 Jaun₂ ca₂jén'₃ Jesús, ca₂juá'₂:

—'Nia'₂ dsa₂ mí₂ chan₂ Jerusalén, 'a₃ ma₃'au₂ 'nia'₂ o₄quió₃ jniá₂. 'O₄ bá₄ 'nia'₂ o₄quiáng'₂ guiong'₅₄, o₄quió'₄ chi'₂-guein₂ quiáng'₂ ně₃. 29 Ia₁ já₅ jmig₄ jě₁juá'₂ dsa₂: “E₂ guě₄ dsen₃ juí₁lia'₂ dsa₂ mí₂ i₂tsá₃ lé₂ cán₂ guein₂; 'e₂ guě₄ dsen₃ juí₁lia'₂ dsa₂ i₂tsá₃ guein₂ ca₂í₃ tě₂dsí₅, on₃ guě'₂ dsi'₅₄ quió'₅ ca₂guén'₃ guein₂ ně₃.” 30 Jmig₄ jaun₂ jme₃lióg₃ dsa₂ tsí'₃ ni₁má'₂: “Lá'₃ ne₄ quián₂ jnia'₅₄”, juá'₂ ně₃ tsí'₃ dsi₂con'₂: “Mog₅₄ jnia'₅₄.” 31 Ia₁ chi₂juá'₂ le₂la₂ jmo₅ dsa₂ jmá'₂ i₂tsá₃ ca₂tín₂ gue₃ uig₅, ě₂ guě₄ bá₄ dsi₃ni₂ i₂ca₂tín₂ dsón'₂?†

† 23:31 lit. “ia₁ chi₂juá'₂ ni₁'ma₂ rě'₂ co₂jmo₅ dsa₂ le₂ně₅, ě₂ guě₄ bá₄ lé₂ quian'₅₄ ni₁'ma₂ quein₂?”

32 Ján₃ bá₄ jme₁le₁ñjia₂₃ guě₄ on₃ dsa₂ i₂le₂cán'₄ dso₄, a₂jme₂dsiog₂₃ co₂lě₅ quian'₅₄ Jesús.

33 Jme₁ca₂dsi₃léin₂ ja₁tě'₂ dsa₂ Dsi₂con'₂ Ni₁mu₅ Mi₂dsi₄ 'Lag₄, †ja₁jaun₂ ca₂tion₃ cróg₄ quian'₅₄ le₃on₃ dsa₂ 'lin'₅₄ 'éi₂, jan₂ tē₂le₃ gu₂ ne₁, jan₂ guě'₂ tē₂le₃ gu₂ jen₅.

34 [Jaun₂ ca₂juá'₂ Jesús:

—Tia₅₄, 'én₃ dsáu₁, ia₁ tsá₃ ñi₅ a₂jmo₂₃.]§

Jaun₂ ca₂co₃ dsi₂'lióg₂ ca₂tóin'₂ ca₂jmo₃ le₁dso'₅₄ ni₁tsin'₅₄ Jesús.*

35 Jaun₂ jme₁tión₂ dsa₂ juig₂ cau₅, jág₅. Dsi₂tan₅₄ ně₃ jme₁tión₂, qui₂co₂j móg'₂ burlas, ca₂juá'₂:

—Qui₂ma₂lióin₂ i₂sián'₂; ně₃ ně₃, ju₁lioin₅₄ 'ñiog₅ chi₂jua'₂ dsi₂jó'₃ lín₅ I₂rě₂'ín₁ rě₂quion'₅₄ quián₅ Diú₄.

36 Dsi₂'lióg₂ ně₃ ca₂j móg'₂ burlas ca₂jme₃quián₃ ca₂jén'₃ vino jen'₂, 37 ca₂juá'₂:

—Chi₂jua'₂ líng'₅ Rag₅₄ quián₅ dsa₂ judíos, lion₄ 'ñiag'₂.

38 Jaun₂ ca₂tióng₃ dsa₂ letras dsi₄ cróg₄ tio'₅₄ 'ni₅ né₃ jág₁ jme₅: griego, latín, hebreo ně₃, co₂'nió'₄ a₂juá'₂: “RAG₅₄ QUIÁN₅ DSA₂ JUDÍOS BÁ₄ LA₂.”

39 Jan₂ i₂rě₂cán'₄ dso₄ i₂jme₁rě₂ton₅ cau₅ quió'₅ ca₂tě₂ca₂'o'₂, ca₂juá'₂:

—¿On₁ 'ne₂ líng'₅ I₂rě₂'ín₁ quián₅ Diú₄? Ma₂ně₃ lion₄ 'ñiag'₂, jaun₂ lo'₅₄ jnia'₅₄ ně₃.

40 La₁ ca₂jí₂ bá₄ riin'₅₄ ca₂juá'₂:

† 23:33 ja₁chei₂ “Gólgota” quian'₅₄ arameo; quian'₅₄ latín guě'₂, chei₂ “Calvario.” § 23:34 A₂lin₅₄ chog₅₄ si₂ tsá₃ chi₁ton₅ jág₁ ně₅.

* 23:34 'Nio'₂ ja₁ton₅ Salmo 22:18.

—¿'En₁ jmá'₃ tsá'₃ gan'₃ 'ne₂ Diú? Jua'₂ uig₅ le₂ně₅ bá₄ guei'₂ ján₃. ⁴¹ La₁ jniog₄ a₂ca₂tág₂ dson'₂ guei'₂ uig₅ la₂, lia'₂ con'₂ lě₅ a₂ma₂jmó₁; la₁ dsa₂ la₂ ně₃, 'i₁caun₂ tsá'₃ 'e₂ riin₂.

⁴² Jaun₂ ca₂juá'₂:

—Jesús, ju₁dsiog'₂ bá₄ 'au'₂ jniá₂, jě₁ma₂dsiáng'₃ ja₁gong'₂.

⁴³ Jaun₂ ca₂ŋag₃ Jesús:

—A₂dsi₂jó'₃ ju₁g₂ jniá₂ 'ne₂, jmig₄ ně₃ tě₃tsing'₅₄ quián'₅₄ jniá₂ Ja₁jlá'₁.†

Ca₂jon₃ Jesús

(Mateo 27:45-56; Marcos 15:33-41; Juan 19:28-30)

⁴⁴ Con'₂ dsi₃ní'₃, † tē₁tsi'₅₄ qui₁né'₃ ta₁caun₂ gua'₅₄ 'uě₃, ca₂lia'₂ ca₂tě₂ hora ŋí₁ 'ni₅§ le₃ca₂'láu₂.

⁴⁵ 'Iog₂ co₂dsia₅ ca₂rě₃liá'₃; tsi₁'mi'₂ cortina a₂jme₁'ei₅ dsi₂néi₂ guá'₅ templo, co₂dsia₅ ca₂chen₃ ca₂lě₃ tin₃ dso'₅₄ jo₂.

⁴⁶ Hora jaun₂, ca₂guió'₃ Jesús, ca₂juá'₂:

—jTia₅₄ quiáng₃, o₄gog'₂ 'ne₂ dsia₅₄ jme₂dsí₂ quió₃!

Caun₂ jaun₂ bá₄ a₂ca₂juá'₂ guě₄, co₂tan₅₄ ca₂join₃.

⁴⁷ Jme₁ca₂jág₃ juig₅₄ 'lióg₂ a₂ca₂lě₃ jaun₂, ca₂jme₃juiin'₂ Diú₄, ca₂juá'₂:

—Dson'₂ bá₄ tsá'₃ 'e₂ jme₁rin₂ dsa₂ la₂.

⁴⁸ Ca₂le₃jín₃ bá₄ dsa₂ i₂jme₁tion'₅₄ i₂ca₂jág₃ a₂ca₂lě₃ jaun₂, ca₂i₃lein₃ quein₂₃ dsí₅.*

† 23:43 griego: paradiseo (Paraíso). ‡ 23:44 lit. “hora jŋéi₂.”

§ 23:44 lit. “hora ŋi₃.” * 23:48 Co₂'nió'₄ a₂jm₀23 léi₄ a₂qui'₂ dsí₅.

49 Ca₂le₃jín₃ dsa₂ i₂jme₁cuin₅ Jesús quian'₅₄ dsa₂ m'í₂ i₂jme₁ma₂quiong'₅₄ të₂ Galilea, jme₁tióin₂ úing₂ jág₅ ca₂le₃jě₃ a₂ně₅.

Ca₂'on₃ Jesús

(Mateo 27:57-61; Marcos 15:42-47; Juan 19:38-42)

50 La₁ ca₂lě₃ ně₃, jan₂ dsa₂ i₂chen₂ José, i₂jme₁quen'₅₄ lín₅ ta₁ jin₄ dsi₂tan₅₄ quián₅ guá'₅, jme₁lín₄ dsa₂ dsen₃ i₂'ua₁ dsí₅. 51 Sě₄ 'éi₂ ně₃, i₂chan₂ juig₂ Arimatea ja₁tén₄ Judea, tsá₃ ca₂rě₃'ñió₃ dsí₅ lia'₂ niog₅ ca₂jmo₃ dsi₂tan₅₄ riin'₅₄, ia₁ jme₁chi₁jñia₂₃ le₃gon₂ Diú₄.

52 Jaun₂ ca₂ñei₅₄ ně₃ i₁mi₂ jág₁ ne₄ Pilato a₂dsi₃sioin₅₄ 'lag₄ Jesús cróg₄ a₂dsi₃'ó₃.

53 Jme₁ca₂sió₂, ca₂lio₃ caun₂ 'mi'₂ tióg₃. Jaun₂ ca₂i₁quió₂₃ 'ñió'₃ tau₂ 'ñio₅ a₂jme₁ma₂lě₅ ca₂jmo₃ dsa₂ dsí₅ ni₁'lau₂, ja₁tsá₃ 'ein₂ 'lag₄ ma₂'í₅.

54 Ia₁ jmig₄ jaun₂ tion'₅₄ dsa₂ jmo₂₃ co₂jñia₅₄ a₂'nió'₅ quió'₅ jmig₄ sa₅₄ a₂jě₁ca₂jñia₃ jaun₂.

55 La₁ dsa₂ m'í₂ i₂ma₂ja₂lén₂ quian'₅₄ Jesús të₂ Galilea, ca₂o₃lén₂ ca₂jág₃ 'a₂ lia'₂ ca₂quion₅ dsa₂ 'lag₄ né'₃ táu₂.

56 Jme₁ca₂dsi₃lein₃ quió'₅, ca₂jmo₃ co₂jñia₅₄ no'₅₄ mi₂juig₂ quian'₅₄ guě₄ ma₁'au₂ ně₃, a₂dsi₃tsin₅₄ Jesús.

Jme₁ca₂jñia₃ sa₅₄ jaun₂, ca₂tiáin'₂ ca₂jñia₃ lia'₂ con'₂ lě₅ 'Éi'₃.

24

Ca₂jen'₅₄ táng₃ Jesús

(Mateo 28:1-10; Marcos 16:1-8; Juan 20:1-10)

1 Jē₁le₂'uig₅₄ jmig₄ semana, ca₂i₃lén₂ táng₃ dsa₂ m'í₂ tē₂ o₃'iog₂ lin₃, i₁jag₅₄ tau₂ 'nio₅ le₁quian₅ no'₅₄ mi₂juig₂ a₂jme₁ma₂lě₅ co₂jñia₅₄ quió'₅; [lě₂ bá₄ guě₄ dsa₂ m'í₂ sián'₂ i₂ca₂jme₃quiong'₅₄].*
 2 Jme₁ca₂dsi₃lén₂ ja₁jaun₂, jua'₂ cau₅ bá₄ ma₂i₂mu₃ ni₁cang₁ a₂jme₁rě₂jni₅ tau₂ 'nio₅. 3 Jaun₂ ca₂i₃toin'₅₄, la₁ tsá₃ ma₃ni₁ñi₁ 'lag₄ [Te₁gui'₅₄ Jesús]† ca₂dsó'₂ ja₁jaun₂. 4 [Jaun₂ ca₂lě₃],‡ tē₃ tióin₂ dsi₂gó'₃ dsi₅ jaun₂, tsá₃ a₂ñi₅ jmo₃, jme₁ca₂jín₂ on₃ dsa₂ i₂qui'₂ tsin'₅₄ tág₅, tióin₂ cau₅ quió'₅.

5 Tē₃ ma₂gó'₅ jaun₂, ca₂'iin₃ ne₅₄ tē₂ 'uě₃. Jaun₂ ca₂juá'₂ dsa₂ 'éi₂:

—¿'E₂ lě₃ 'na'₂ 'nia'₂ jan₂ i₂jén'₃ jin₄ 'lag₄? 6 Tsá₃ 'éi₂ chan₂ ja₁lá₃. Ma₂ca₂jein'₅₄ bá₄, Ju₁dsiog'₂ 'au'₂ 'nia'₂ a₂ca₂juá'₂ lia'₂ con'₂ jme₁ñi₂₃ Galilea, 7 jme₁ca₂juá'₂ a₂ca₂tín₂ Jaun₅ dsa₂ mi₂güig₃ jáng'₂ dsa₂ o₄gú₃ dsa₂ 'lin'₅₄, a₂tion₃ dsa₂ cróg₄, la₁ a₂'ni₅ jmig₄ jaun₂ jein'₅₄ táng₃.

8 Jaun₂ guě₄ ca₂dsáu'₃ dsi₅ 'io₅₄ jág₁ jaun₂ quió'₅ Jesús. 9 Jme₁dsi₃lein₃ jaun₂, ca₂dsia₃ ca₂tsí'₃ ta₁guia₃-ján₃ chi'₂ dsi₂guia₃-tín₂ i₂jme₁lě₂ guě₄, ca₂tsí'₃ ca₂le₃jín₃ guě₄ dsa₂ sián'₂ ně₃. 10 Dsa₂ m'í₂ i₂jme₁quion₂ jág₁ ně₅ ne₄ chi'₂ dsi₂guia₃-tín₂: María i₂chan₂ Magdala, Juana, María chog₅₄ Jacobo, quiain'₅₄ guě₄ dsa₂ m'í₂ sián'₂.

11 La₁ jme₁ca₂nág₂ chi'₂ dsi₂guia₃-tín₂ jág₁ ně₅, a₂lě₁tē₂'i₅ bá₄ 'io₅₄ 'éi₂, lín₂, jaun₂ tsá₃ ca₂rě₃'éin₂.

* 24:1 A₂lin₅₄ chog₅₄ si₂ tsá₃ le₁ton₅ jág₁ ně₅. † 24:3 A₂lin₅₄ chog₅₄ si₂ tsá₃ le₁ton₅ jág₁ ně₅. ‡ 24:4 A₂lin₅₄ chog₅₄ si₂ tsá₃ le₁ton₅ jág₁ ně₅.

12 La₁ Pe₄ ně₃, ca₂o₃'íin₃ ŋó₃ co₂chi'₅₄ ca₁i jag₅₄ dsi₂néi₂ tau₂ 'ŋio₅. Jaun₂ jmá'₃ tsi₁'mi'₂ tióg₃ bá₄ ca₂jág₃ niog₅. Ca₂ŋái'₃ bá₄ táng₃ jaun₂ ně₃, dsi₂gó'₃ dsí₅ 'e₂ ca₂lě₃.

A₂ca₂lě₃ dsi₂jui₅ ja₁ŋó₄ jui₂g₂ Emaús
(Marcos 16:12-13)

13 Jmig₄ jaun₂ dé₄, on₃ dsa₂ 'éi₂ tioen'₅₄ jui₅ i₃lěin₂ jui₅ jui₂g₂ ja₁tě'₂ dsa₂ Emaús, a₂niog₅ con'₂ guia₃- cáun₃ kilómetros ja₁niog₅ Jerusalén. 14 Jaun₂ dé₄ tsí'₅ riin'₅₄ i₃lěin₂ ca₂le₃jě₃ 'e₂ niog₅ ca₂lě₃. 15 Tě₃ dsia₂₃ i₃lěin₂ jaun₂, ca₂jme₃quián₃ Jesús ŋó₃ quiong'₅₄. 16 La₁ jui₁'a₂ guě₃ la₂ jág₂ i₃lěin₂, cha₂ a₂jmo₅ a₂tsá₃ rě₂cuig₂₃ 'ein₂'éi₂.

17 Jaun₂ ca₂ŋag₃ Jesús:

—¿'E₂ bá₄ jág₁ dsia'₂ 'nia'₂ ja₂nóg'₅?

Jaun₂ ca₂nau₂ ca₂tiá₂ tei₄, le₁'ág₄ 'lia'₂ dsí₅ bá₄.

18 Jaun₂ ca₂ŋag₃ jan₂ i₂chen₂ Cleofas:

—¿On₁ bá₄ jan'₂ 'ne₂ líng'₅ dsa₂ i₂lia'₂ tē₁tsin'₅₄ guan₅ Jerusalén, jaun₂ tsá₃ ŋi'₅₄ 'e₂ niog₅ ca₂lě₃ dsióg₂-jo₃ ně₅?

19 Jaun₂ ca₂ŋag₃:

—¿'E₂ ca₂lě₃ guě'₂?

Jaun₂ ca₂ŋag₃ táng₃:

—A₂ca₂lě₃ quian'₅₄ Jesús i₂chan₂ Nazaret, i₂jme₁lín₄ jan₂ i₂jme₁'ě₂ jág₁ quián₅ Diú₄, i₂'uan'₂ tē₂le₃ quian'₅₄ ca₂le₃jě₃ a₂niog₅ ca₂jmo₃, i₂'uan'₂ tē₂le₃ quian'₅₄ jág₁ a₂ca₂jme₃tag₂₃, lia'₂ le₃ne₄ Diú₄ lia'₂ le₃ne₄ dsa₂ mi₂güig₃ ně₃; 20 'a₂ lia'₂ ca₂jáng'₂ jui₂g₅₄ jme₂dsa₂ quian'₅₄ dsi₂tan₅₄ quián₂ jnia'₅₄, ca₂dsi₂'éi'₃ ca₂jŋag'₃ tioen'₅₄, ca₂tion₃ cróg₄, 21 Jnia'₅₄ jme₁'ín₂ dsí₅ chong₂, a₂lág₂ jnia'₅₄ 'éi₂ bá₄ lín₅

ijme₁lión₂ juig₂ Israel. La₁ ně₃ ně₃, ma₂'ni₅ jmig₄ ca₂lě₃ le₂ně₅. ²² I₂lin₅₄ dsa₂ mí₂ i₂tion'₅₄ jě₄ quián₂ jnia'₅₄ ma₂ně₂quiong₃ jnia'₅₄ juě'₅, ia₁ ma₃i₁jag₅₄ tē₂ o₃'iog₂ ma₂'míg₂ tau₂ 'ñio₅, juá'₂. ²³ Tsá₃ ni₁ñi₁ 'lag₄ dsó'₅. A₂jaun₂ bá₄ dsia₂₃ o₃lein₃ a₂ně₂jme₃jnia₅ ángeles ne₅₄, a₂ně₂juá'₂ i₂chan₂ bá₄ 'éi₂. ²⁴ Jaun₂ ně₃, ma₂i₁len₅₄ i₂lin₅₄ rin'₅₄ jnia'₅₄ ma₂i₁jag₅₄ tau₂ 'ñio₅. Jua'₂ dsón'₂ bá₄ dsau₅ con'₂ lě₅ jág₁ jmóg'₅ dsa₂ mí₂ 'éi₂, la₁ 'éi₂ guě'₂ ně₃ tsá₃ ně₂jín₂, juá'₂.

²⁵ Jaun₂ ca₂ñag₃ Jesús ca₂tsí'₃ 'éi₂:

—i'En₁ jmá'₃ tsá₃ 'e₂ ca₂ñí'₂ 'au'₂ 'nia'₂! ¿Líg'₂ bá₄ le₃'én'₂ 'nia'₂ ca₂le₃jě₃ a₂niog₅ ca₂juá'₂ dsa₂ i₂jme₁'ě₂ jág₁ quián₅ Diú₄? ²⁶ Ia₁ ¿on₁ le₂jaun₂ 'i₄ 'éi'₃ ca₂tín₂ I₂rě₂'ín₁ quián₅ Diú₄, dsi₃ñí'₂ ca₂le₃jě₃ a₂ně₅ de'₂ jniá₅, jaun₂ guě'₄ dsiáin'₄ ja₁le₃juín'₂ táng₃?

²⁷ Jaun₂ qui₂ca₂juá'₂ 'a₂ lia'₂ niog₅ juá'₂ ne₄ Si₂ quió'₅ Diú₄; ca₂jme₃lióg₃ de'₂ jniá₅ ja₁juá'₂ ne₄ si₂ quió'₅ Moisés, ñó₃ ca₂'ě₃ le₂tan₅₄ si₂ quió'₅ dsa₂ i₂jme₁'ě₂ jág₁ quián₅ Diú₄, ja₁juá'₂ 'iin₂₃ 'éi₂ 'ñiog₅.

²⁸ Jaun₂ ja₂quián₃ dsi₁lén₂ juig₂ pí'₁ ja₁tioin'₅₄ jui₅ dsi₁lén₂. La₁ dsa₂ 'éi₂ con'₂ jme₁ma₂ñó₅ co₂dsau₅ bá₄ ca₂jmo₃.

²⁹ La₁ i₂on₃ 'éi₂ ně₃ ca₂chi₃quióng₂ jmig₄ a₂ñia₃, ca₂juá'₂:

—Ně₃ o₁jñia₁ quian'₅₄ jnia'₅₄, ia₁ ca₂rin₂ bá₄ 'iog₂, ca₂'láu₂ ca₂nei₂ bá₄ la₂.

Jaun₂ ca₂'í₃ dsi₂néi₂ ja₁jñia₃ quian'₅₄ 'éi₂.

³⁰ Jaun₂ ca₂lě₃, jme₁ma₂guá₅ ne₄ mesa quian'₅₄ 'éi₂, ca₂can₃ i₁ñí'₄, ca₂jme₃jñiói₃, jaun₂ guě'₄ ca₂'niai₃ ca₂cuě'₃ le₃on₃ i₂quian'₅₄.

31 Të₃jë₄ jaun₂ në₂jag₄ a₂jaun₂ guë₄ ca₂niá₃ jme₁ne₁₂ líin₂, jaun₂ guë₄ ca₂rë₃cuig₂₃. La₁ dsi₂jui₅ jaun₂ ca₂i₃cóin'₅ tē₃ ne₅₄.

32 Jaun₂ guë₄ ca₂dsia₃ jág₁ guioin₅₄:

—Dsón'₂ bá₄ lia'₂ tio'₅₄ jui₅ ja₂náu₅, ca₂lë₃ dsi₅ néi₁ ca₂le₃jě₃ 'e₂ niog₅ në₂juá'₂ në₂jme₃ñi'₂ dsi₅ jniog₄ a₂juá'₂ Si₂.

33 Dsi₂jui₅ le₂jaun₂ bá₄ ca₂tóin'₂ táng₃ jui₅ ja₂lein₃ Jerusalén. Jme₁o₃lein₃ jaun₂, tion'₅₄ ta₁guia₃-ján₃ chi'₂ dsi₂guia₃-tín₂ i₂lě₂ guë₄, le₁ñi'₂ quian'₅₄ guë₄ dsa₂ sián'₂. 34 Jaun₂ juá'₂ 'éi₂ tioin'₅₄:

—Të₃dsón'₂ bá₄ ma₂ca₂jen'₅₄ Te₁gui'₅₄. Ia₁ ma₂në₂jme₃jniai₂₃ ne₄ Si₂mu₅₄.

35 Jaun₂ guë₄ ca₂j móg'₃ táng₃ i₂on₃ 'éi₂ jág₁ 'a₂ lia'₂ ca₂lë₃ le₂'i₄ ju₅, 'a₂ lia'₂ ca₂rë₃cuig₂₃ con'₂ jme₁ca₂'niai₃ i₁ñi'₄.

*Ca₂jme₃jnia₅ Jesús jë₄ quió'₅ chi'₂ dsi₂guia₃-tín₂
(Mateo 28:16-20; Marcos 16:14-18; Juan 20:19-23)*

36 Të₃ tioin'₅₄ dsia₂₃ jág₁ jaun₂, jme₁ca₂jme₃jnia₅ Jesús ca₂nau₂ jë₄ quió'₅ §

37 Ca₂i₃gó'₃ dsí₅ tioin'₅₄, líin₂ jan₂ jme₂dsí₂ bá₄ 'éi₂ ñi₅.

38 Jaun₂ ca₂juá'₂:

—¿'E₂ lë₃ ñi₄ lë₃ tion'₅₄ 'nia'₂ chí'₅ go₂'i₃? ¿'E₂ lë₃ ñi₄ 'lióng₂ a₂'náu'₂ 'nia'₂ 'au'₂? 39 La₂ jag₄ 'nia'₂ o₄gu₃ o₄tag₃. Jniá₂ bá₄ la₂. I₂nó'₅ 'nia'₂ i₂níg'₃ quió'₃ i₂jag₄

§ 24:36 A₂lin₅₄ chog₅₄ si₂juá'₂ ján₃: “co₂tan₅₄ ca₂cuag₃ Diú₄, ca₂juá'₂: —Siang'₃. Jui₅, 'ei₅ bá₄ tei₄ tion'₅₄ 'nia'₂.”

'nia'₂. Jan₂ jme₂dsí₂, on₃jua'₅₄ i₂ton₅ ŋí₅ on₃ i₂'en₅₄ mu₅, ju₁lia'₂ jág'₂ 'nia'₂ lín₅ jniá₂.

40 Të₃ juá'₂ le₂në₅, qui₂ca₂'ë₃ o₄gú₃ o₄tag₁₂ ně₃.

41 Të₃ tioen'₅₄ jaun₂ dsi₂gó'₃ dsi₅ tsá₃ 'éin₂ o₄quió'₄ a₂ŋí₄ lë₃ 'io'₂ jén'₅, jme₁ca₂juá'₂ Jesús:

—¿Cha₁ a₂le₃que₅₄ ca₂la₂ ja₁lá₃?

42 Jaun₂ ca₂o₃can₅ ca₂'nau₅₄ quió'₅ i₁ju₁ cui₂ ne₄ si₂, [quian'₅₄ guë'₂ ca₂jne₄ ni₁tá'₅ cuing₅].*

43 Jaun₂ ca₂gue₃ ca₂guë'₃ guá₅ tē₃ne₄ ca₂le₃jín₃.

44 Jaun₂ ca₂juá'₂ ně₃:

—Ma₁ ca₂juá'₃ jniá₂ le₂jñiá₅ lia'₂ con'₂ jme₁ŋi₂₃ jin'₄ 'nia'₂, a₂tion₅₄ le₃ti₃ ca₂le₃jě₃ lia'₂ con'₂ lě₅ tio'₅₄ ne₄ Si₂ 'Éi'₃ quió'₅ Moisés, ne₄ Si₂ quió'₅ dsa₂ i₂jme₁'ě₂ jág₁ quián₅ Diú₄, ne₄ Salmos ně₃, ja₁'ag₂₃ jniá₂.

45 Jaun₂ guë₄ ca₂jme₃ŋí'₂ dsi₅ 'éi₂ a₂juá'₂ Si₂, 46 jaun₂ ca₂juá'₂:

—Le₂në₅ bá₄ tio'₅₄ ne₄ Si₂: a₂tion₅₄ bá₄ dsi₃ŋí₂ uig₅ I₂rë₂'ín₁ quián₅ Diú₄, la₁ jein'₅₄ bá₄ táng₃ a₂'ni₅ jmiḡ₄, 47 a₂tion₅₄ dsi₃'ag₅ jág₁ ně₃, a₂'nió'₅ qui₂dsi₃quén'₅ dsi₅ dsa₂ ia₁jaun₂ bá₄ lé₂ le₃'én₂ dsáᵤ₁. Jág₁ ně₅ dsó₃ qui₂rë₂'ě₂ o₄quió₃, ne₄ ca₂le₃jín₃ i₂chan₂ gua'₅₄ 'uë₃, la₁ Jerusalén de'₂ jñiá₅ ja₁le₃lióḡ₃. 48 'Nia'₂ ně₃ i₂qui₂ca₂'tě₂ ne'₅₄ ca₂le₃jě₃ a₂niog₅ ca₂lě₃, qui₂o₁jang'₄ 'nia'₂ jág₁ dsau₅. 49 Jaun₂ ně₃, tsin₅₄ jniá₂ i₂ma₂lě₅ jág₁ chen₃ Ne'₃. La₁ jñia₄ guë₄ 'nia'₂ juig₂la₂, ca₂lia'₂ ca₂lě₃ le₁lín'₄ 'nia'₂ quian'₅₄ ju₁bí₂ a₂sió₃ guei'₅₄.

*Ca₂uíḡ₂ Jesús guei'₅₄ i₂juíḡ₃
(Marcos 16:19-20)*

* 24:42 A₂lín₅₄ chog₅₄ si₂ tsá₃, chi₁ton₅ jág₁ ně₅.

50 Jaun₂ ca₂ŋiai₃ chi'₂ dsi₂guia₃-tín₂ tē₂ juig₂
 Betania, jaun₂ ca₂cho₃ gu₂ ne₄ quió'₅ ca₂le₃jín₃,
 ca₂jme₃gu'₅₄. 51 Ca₂lě₃ ně₃, tē₃jě₄ jme₂gu'₅₄ jaun₂,
 ca₂i₃uín₂.†

52 'Éi₂ ně₃, ja₂lein₃ bá₄ táng₃ Jerusalén, jmo₂₃ 'io'₂
 'ŋio₅ lín₃, 53 le₃ó₃ jmig₄ bá₄ jme₁ŋi'₂ i₁dsi₅ guá'₅
 jme₂juin'₂ Diú₄.

Co₂ně₅.

† 24:51 A₂lín₅₄ chog₅₄ si₂ juá'₂ ján₃: “ca₂ŋái'₃ guei'₅₄ i₂juíg₃.”

Jag₁ 'mí₂ a₂ma₂li'₅₄ quian'₅₄ Diu₄
New Testament in Chinantec, Tepetotutla
(MX:cnt:Chinantec, Tepetotutla)

copyright © 1994 Wycliffe Bible Translators, Inc.

Language: Chinantec, Tepetotutla

Translation by: Wycliffe Bible Translators, Inc.

Chinanteco, Tepetotutla [cnt], Mexico

Copyright Information

© 1994, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Chinantec, Tepetotutla

© 1994, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-22

PDF generated using Haiola and XeLaTeX on 11 Nov 2022 from source files
dated 30 Dec 2021

5c52af9e-3086-5d57-9b7e-2e495fea8899